













23,492 / c

~~7~~  
7369

M. xxvii. Fre

FREDERIC W.  
—  
c





Digitized by the Internet Archive  
in 2017 with funding from  
Wellcome Library

<https://archive.org/details/b28759886>



FREDERICK II



RELIQVA LIBRORVM  
FRIDERICI II.  
IMPERATORIS  
DE  
ARTE VENANDI CVM AVIBVS.  
CVM  
MANFREDI REGIS ADDITIONIBVS.

EX MEMBRANACEO CODICE CAMERARII PRIMVM EDITA AVGVST. VINDELIC.  
1596, NVNC FIDELITER REPETITA ET ANNOTATIONIBVS ICONIBVSQVE  
ADDITIS EMENDATA AEQVE ILLVSTRATA.

ACCEDVNT  
ALBERTI MAGNI CAPITA  
DE  
FALCONIBVS ASTVRIBVS ET ACCIPITRIBVS  
QVIBVS

ANNOTATIONES ADDIDIT SVAS  
IO. GOTTL. SCHNEIDER, SAXO.  
ELOQVENT. ET PHILOLOG. PROFESSOR.

---

T O M V S I.

---

LIPSIÆ,  
IMPENSIS I. G. MÜLLERI HEREDVM.  
1788.



RELIGIA LIBRARY

FRIDAY

1883

1883

THE NEW YORK PUBLIC LIBRARY

1883

1883



1883

1883

1883

1883

1883

1883

1883

1883

1883



*AD*  
*AVGVSTISSIMVM, POTENTISSIMVM,*  
*PIISSIMVM*  
*BORVSSORVM REGEM*

*ET*  
*BRANDENBVRGIAE ELECTOREM*  
*FRIDERICVM*  
*WILHELMVM II.*



ON  
THE  
MATHESIS OF THE  
MATHESIS

BOOKS OF THE

II

THE  
FRIEDERICH  
WILHELM II.



## D O M I N E,

**Q**uod singulari priuilegio altero abhinc seculo multis nobilibus magnatibusque concessum fuisse legimus, ut diebus religiosa aliqua ceremonia solemnibus sacrorum publicorum officiis in ecclesia peragendis adesse ipsi cum falconibus possent, quos super pugno delatos, canum venaticorum turba comitante, dum officia cultus diuini celebrabantur oratione et cantu, in altaris magni aliqua parte collocabant; idem fere me nunc audere non indignaberis, Domine clementissime, dum, ut pietatis officium exsequar, librum de re accipitraria cum animi grati virtutumque TVARVM admiratione pleni significatione ad TE adfero. Sed is libri auctor est, quem admiratione atque adeo fauore TVO indignum non habebis; nec equidem faciliorem aliquem patronum reperire posse mihi videbar, cuius auctoritate et gratia fretus publice TE appellarem pietatem-



que meam testarer homo peregrinus, qui beneficiis TVIS allectus  
in hanc litterarum uniuersitatem Viadrinam studiosae iuuentuti  
prodesse litterarumque emolumentum augere pro viribus studui.  
Quare nihil magis in votis habeo, quam ut porro mihi beneficiis et  
fauore TVO adiuto munere eodem feliciore etiam cum eventu fungi,  
imperii TVI prosperitatem sapientiamque TVAM admirari, TE-  
QVE optimum patriae parentem amare et colere et venerari liceat.

**MAIESTATI TVAE**

ADDICTISSIMVS CIVIS ET PROFESSOR

I. G. SCHNEIDER, Saxo.





## AD LECTOREM.

---

**L**aetabuntur mecum, qui studia haec amant et seuerè colunt, novam hanc rarissimi et egregii libri editionem eum tandem reperisse redemptorem, qui omnem mecum operam dedit, ne forma habitusque libri, si non dignitatem auctoris maiestatemque aequaret, merita tamen in litteras historiamque naturalem plane dedecoreret. Elegantiam enim chartae, typorum, scripturamque annotationibus aliquot illustratam atque emendatam praestare volumus; alias elegantiae pulcritudinisque partes, quibus libri multi peregrini, saepe solis, spectari solent etiam apud nos, luxuriantibus ingeniis et sumtuosae cupiditati nationum doctorumque virorum diuitiis abundantium non invidemus, paupertate nostra atque vna eruditionis elegantiaeque gloria contenti. Nimis enim saepe formae decorem pulcritudinemque studiosorum cupiditati officere et insano librorum pretio litterarum studia magis impedire quam excitare



citare atque augere experti fumus. Hoc igitur primum spectauimus, ut exemplum primum ex Codice membranaceo Camerarii expressum nitide et fideliter redderetur. Nullum enim alium scriptum Codicem comparare nobis cum hoc exemplo licuit, ut scripturae vitia, quae suspicari quam iudicare saepe facilius est in hac mediæ æui, ut appellari solet, barbara latinitate, emendaremus, si qua essent nimis aperta. Criticae igitur artis usum cohibuimus et ad annotationes reiecimus, punctuali ceterum diligentia etiam in lacunarum indiciis reddendis adhibita. In Glossariis vulgatis parum mihi fuit praesidii ad latinitatem explicandam. CANGIVS enim et qui eum impare successu aemulatus est CHARPENTIER ex Friderico nostro pauca, ex ALBERTO vero et VINCENTIO nulla fere laudant aut interpretantur vocabula, ad historiam naturalem quae spectant. Vtinam in annotationibus, quod propositum mihi habui, etiam consequi contigisset aut licuisset. Quanquam enim per aliquot annos in historia avium naturali habitavi, in eaque tam discenda quam opera mea excolenda diu multumque defudaui, multum tamen abfuit, ut in hac fortunæ meae conditione omnem illam avium universitatem earumque naturam ingenio meo complecti, indagare atque explicare possem, quam augustus libri auctor in tanta provinciarum, opum, ministrorum artificumque abundantia dignatus sua cognitione comprehenderat. Admirabuntur mecum omnes diuinum auctoris ingenium, qui inter continuas et grauissimas imperii bellorumque gestorum curas omnem avium naturam, structuram corporis, ingenium moresque tam curiosa et, ut quibusdam videbitur, minutiosa diligentia, dum aucupio curas solabatur, indagatam tradidit, ut in tanta historiae naturalis luce, quam multi hodie iactant, nullum æui nostri scriptorem reperiam, quem in huius laudis societatem Imperatori adiungere auserim. Eo igitur maiorem adhibui diligentiam, ut, quae ipse intelligere mihi videbar, quam fieri poterat brevissime explicarem illustraremque, laudatis, si qui postea scriptores rem traditam accuratius docuerunt. Ubicunque vero alienam afferre auctoritatem ad rem confirmandam non potui, ex penu annotationum mearum addidi, quae lucis aliquid afferre doctrinae obscurae possent. Hoc igitur consilio icones aliquot manu mea delineatas addidi, quibus non tam vrogalli, ad quem proprie pertinent, quam universa avium osteologia atque internarum quarundam molliorum partium structura magis illustraretur, quam iconibus hucusque publicatis, quas equidem viderim, factum



factum noui. Plures addere multae vetabant rationes, quas etiam tacente me facile lectores suspicabuntur, quos rogo, vt in iconibus hic adiunctis non elegantiam sed potius curiosam feri picturae discipuli diligentiam spectent. In reliquis structurae auium partibus cupidus ad optimos quosque auctores et ad accuratissimas quasque picturas ablegauit. Multum etiam adiuuabit lectorum studia singulare opus, quod vir doctus, B. MERREM, parat, et quo omnem auium anatomiam et physiologiam complectetur. Initium, quod coram habeo, germanico sermone scriptum, habet illud etiam adiunctam aquilae eiusque sceleti picturam; sed ea sceleti statura et positio, quam hic conspicio, doctrinae Imperatoris explicandae sufficere mihi non videbatur.

Artis ipsius accipitrariae nisi eam partem, quae genus auium rapacium vniuersum, earumque structuram, naturam et indolem spectat, non attingi. Nimis enim multi libri, quibus plane careo, ita mihi perlegendi fuissent; nec ii, quibus annotationes meas scripsi, disciplinae huius explicationem accuratam desiderabunt. Facillimum quidem est ex natura et ingenio auium rapacium, accuratissime, quod quidem in me fuit, explicato post industriam augusti auctoris, artem falconariam intelligere; quibus vero exercere eam otium opesque permittunt, illi profecto haec veluti artis elementa, tanquam argutias, contemnent. Quos vero legi artis falconariae scriptores Gallicos et Italicos, eorum indicem in fine annotationum subtexui, cum illis, quos nominatos tantum legi. Horum vero lectionem vsunque debeo beneficio CHR. GOTTL. HEYNNII, cuius ingenium et in litterarum studia merita vti fera mirabitur posteritas, ita equidem eiusdem in me amorem et beneficia, Praeceptoris sanctissimi, ad cineres vsque pio animo venerabor. Eidem igitur debent lectores, quidquid ex his libris excerptum ad rem facere intellexerint. De volatu quaedam addidi excerpta ex specimine maioris operis methodici, quod de arte hac meditatur CL. HUBER, Geneuae 1784 edito; quae quidem egregie magnam disciplinae Imperatoris partem volatusque omne artificium illustrant. ALBERTI Magni ex libris quae primum exemplum adiuncta habebat capita, eundem locum obtinere passus sum, quoniam disciplina Imperatoris aliquo modo redintegrari exinde potest. Pluribus etiam in locis ALBERTVS doctrinae suae testes atque auctores laudat Imperatoris Falconarios atque ipsum adeo Imperatorem.



rem. Hanc vero appendicem paucioribus fere notis illustraui, dum exemplum editionis ALBERTI Venetae anni 1495 perlegebam; orationem enim ALBERTI Friderici libro adiunctam comparare cum editione Veneta nescio adhuc an mihi per longinquitatem loci licebit, exemplo authentico Lipsiam typothetarum operis transmissio. Dubium mihi scilicet est, VELSERS editionem principem ALBERTI an Venetam meam expresserit in sua Friderici editione. Addidi, quidquid varietatis aut correctionis mihi comparatio VINCENTII Bellouacensis, qui multa ex ALBERTO excerptit, et libri CONR. GESNERI de Avibus inter legendum suggesserat. Admirationem tamen mihi magnam fecit, quod Falconarios Imperatoris ipsumque adeo Imperatorem Fridericum laudari videbam; ipsius vero libri ab Imperatore scripti nulla vel in ALBERTO vel in VINCENTIO, qui post ALBERTVM Speculum naturale ex scriptis tum notis et publicatis omnibus composuit, vestigia reperi. Ex quo quidem conicere licet, librum hunc Imperatoris egregium diu apud filium regem Manfredum aut alibi latuisse, nec in hominum notitiam nisi nostris demum temporibus artis typographicae beneficio venisse. Notusne fuerit an ignotus Gallicis artis falconariae scriptoribus, dicere nunc non habeo; paucos enim scriptorum horum legere et in consilium adhibere potui; quod non leuiter doleo, eam maxime ob causam, quod multa inde ad naturam avium rapacium vniuersam rectius et penitus intelligendam disciposse non sine ratione suspicari mihi videor. Hunc scilicet videmus artem humano generi per longum temporum spatium etiam in Germania nostra perniciosam et Magnatum Principumque otia in parentium fraudem damnumque alienantem obiter habuisse usum, nimis tamen caro redemptum infortuniorum vario genere, ut avium rapacium inprimis, ut et omnium fere reliquarum avium naturam accuratius explicaret, quam fieri potest a naturae studiosis, qui otiosi et saepe nimis ex longinquo vitam moresque generis volatilis libertate sua fruendis spectant. Exstant etiam de arte falconaria libri graece scripti a DEMETRIO aliquo ad Imperatorem Constantinopolitanum cum duobus aliis rudioribus et breuioribus a RIGALTIO olim editi, quos diligenter comparaui; verum omnes illi libri longissime absunt ab illa doctrinae elegantioris, ordinis perspicui et diligentiae sagacis laude, quam Imperatorio libro mecum tribuit CL. MERREM; nec ipsae avium rapacium familiae distinguuntur; aut, si nomina posita sunt aliquot, ut in tertio graeco barbaro libro,



libro, nullam habent interpretationem aut descriptionem adiunctam; vanum igitur lectoribus accuratioris notitiae desiderium relinquunt, omnemque eorum operam in Glossariorum usu adhibendo eludunt. Collectas tamen inde multas posui observationes, quas intelligere mihi videbar, et quas utiles ad cognoscendum existimabam. ALBERTI etiam de falconibus doctrinae addidi, quidquid in reliquis viri laboriosissimi et ut in seculo vitaeque genere suo doctissimi libris indagaueram, et quo librum hunc non inutiliter augeri autumabam. Nec me operae poenitet adhuc, quam in comparando legendoque spisso satis volumine consumsi, etsi de eruditione ALBERTI aliter sentire video virum doctum, qui nuper historiam litterariam Ornithologiae scribere aggressus est. Denique si quam hinc inde notulam asterisco praefixo signatam viderit lector, curis eam secundis deberi, postquam omnem iam apparatus operis transmiseram, meminisse oportet.

Supereſt, ut pauca de auctore libri auguſto, ſtudiis eius et in rem litterariam meritis adiungam, quae quidem ſcire lectoris intereſſe exiſtimauerim. Ducem fere vbique ſequar eruditam Io. GOTTFR. SCHMVTZERI diſputationem Lipſiae anno 1740 editam de Friderici II. in rem litterariam meritis, additis, ſi quae ipſe indagando reperi. Quae vero nuperrime auctor libri: *Vicende della Coltura nelle due Sicilie* 1784. Neapoli editi, T. II. pag. 235. ſeqq. de Friderici meritis litterariis tradidit, negligenter omnia nec vlllo cum verborum ordine ornatuue aliunde repetita ſunt; nec poſt eum librum lectum me adhuc poenitet operae, quam ipſe in indaganda aeui iſtius historia litteraria adhibui.

Laudibus militaribus litterariam non minorem adiunxit Fridericus II. Imperator. Non ſolum enim poëtices ſtudium amplexus ingenio ſuo excoluit et plures, quae manuſcriptae pleraeque adhuc in bibliothecis regum principumque Italiae latitant, cantiones ſermone prouinciali compoſuit; ſed ſeuerioribus etiam litteris operam dedit, earum ſtudium multis modis auxit, adeoque primum gradum ſtruxit ad illuſtrem ſeriori aetate conſecutam litterarum humanarum diuinarumque reſtaurationem. Itaque VINCENTIVS Bellouacenſis iure ſuo in Speculi Hiſtor. I. c. 2. affirmare poterat, temporibus ſuis non tantummodo ſecularium litterarum, ſed etiam  

\*\* 2

diuina-



diuinarum scripturarum vbique multiplicatam esse scientiam. Ingenitam scilicet Imperatoris curiositatem et liberalem discendi cupiditatem a sapientibus atque eruditis institutoribus excitatam et bene nutritam auxit atque aluit peregrinatio per Orientem cum exercitiis cruce signatis suscepta et perfecta, vbi incultum accuratiorem ingenii, doctrinae artiumque omnium, quarum laude etiamnum florebant Arabes, peruenit. Tum igitur cepit consilium omnemque dedit operam, vt litteras ex Arabum disciplina librisque in Italiam inprimis Galliamque reuocaret. Multos proinde scriptorum graecorum libros aut suo sermone scriptos aut in Arabicum conuersos, tanquam opima spolia, in Italiam retulit, eorumque vsum per interpretationes latinas vulgavit. Opera Aristotelis iussu eius in latinum sermonem per viros lectos et in vtriusque linguae prolatione peritos, vt asserit PETRVS DE VINEIS Libro 3. Epist. 67., ex Graeco, partim ex Arabico, translata et in Academia Bononiensi publice explicata fuerunt. Vix credi potest, omnes Aristotelis libros vno eodemque tempore sermone latino vulgatos fuisse. Metaphysicos vero circa annum 1209 primum latinos legi coeptos esse, arguit MVRATORIUS (Antiquit. Italic. T. III. pag. 938.) ex narratione RIGORDI de rebus gestis Philippi regis Francorum ad annum 1209 pertinente, vbi *per dies illos libelli quidam ab Aristotele compositi, qui docebant Metaphysicam, delati de nouo a Constantinopoli et a Graeco in latinum translati* magnum animorum motum excitasse dicuntur, ita vt, cum homines nimis religiosi crederent, Almaricum haereticum errores inde imbibisse suos, publico interdicto proscriberentur. Praeterea a MICHAELE SCOTO, quo familiarissime vsus est, plures libros, qui ad disciplinam physicam, mathematicam astrologiamque tum summopere amatam spectant, iussit componi. Praeter editos latet in Ambrosiana bibliotheca manu exaratus *Liber particularis Michaelis Scoti, Astrologi Domini Frederici Romanorum Imperatoris et semper augusti, quem secundo loco breuiter compilauit ad eius preces*, vti titulum posuit MVRATORIUS in Antiquit. Italic. T. III. pag. 945. Extat hodieque in pluribus Italiae Galliaeque bibliothecis manuscripta versio Aristotelis librorum omnium de animalibus, quam multi atque ipse nuperus Aristotelis interpres Gallus, qui eam cum graeca oratione, sed nimis raro, comparauit, MICHAELI SCOTO auctori assignant, libri inscriptione an aliena auctoritate confisi, nescio. Ex recensione libri a doctissimo interprete Philosophi, CAMVS, facta cognoui, eandem librorum Aristotelis in eo esse seriem, quam



quam in ALBERTO MAGNO; ex speciminibus deinde allatis ab eodem Gallo apparet, versionem esse ex Arabico factam. Comparaui ipse has SCOTI lectiones cum ALBERTI M. libris et cum ea librorum Aristotelis versione, quam excerpfit VINCENTIVS Bellouacensis in Speculo naturali, atque ita facile intellexi, praeter SCOTVM etiam ALBERTVM M. et VINCENTIVM Arabicam versionem secutos esse, aut potius ALBERTVM cum VINCENTIO versionem a SCOTO, vti volunt, factam adhibuisse. Digna res est accuratioe inuestigatione virorum doctorum, quibus aditus ad egregias Italiae Galliaeque bibliothecas patet, quem auctorem habuerit, quoque seculo facta fuerit, quae M. SCOTO adscribitur versio; deinde optandum est, vt tandem aliquando e latebris ad commune hominum eruditorum iudicium et in publicum vsum protrahatur. ALBERTVS M. versionem arabicam EBNSINA seu AVICENNAE variis eius annotationibus auctam ante oculos habuisse videtur; eius enim commentarium saepiuscule laudat. Etsi vero ALBERTVS aliquo in loco (Libro VIII. pag. 93. a.) Aristotelem apud se in multis diminutum et mancum conquestus est; cuius rei testem lacunam habeo magnam, quam libri sexti capitulum inter tertium et secundum reperi; habuit tamen libros ex arabico conuersos vno libro de animalium perfectorum et minus perfectorum discrimine, cuius hodie vestigium inter Aristotelicos non exstat, auctiores, vnde librum vigesimum suum excerpfit; qua de re monui nuper in Promtuariorum Lipsiensium historiae naturalis 1786 p. 207 et 234. Eo igitur magis optandum est, vt SCOTO adscripta versio tandem in lucem prodeat, quod comparata ea cum ALBERTO M. scripta Aristotelis multis in locis in integrum restitui posse intellexi.

Verum praeterea alia in bibliothecis Italiae et Galliae bene multis latet manuscripta operum Aristotelis versio, quae cum orationem graecam in singulis verbis fideliter vbique confectata sit, multum conferre potest ad libros philosophi emendandos. Eam igitur iam olim PETRVS VICTORIVS in emendandis Politicis Aristotelis magno cum fructu adhibuit; eandemque etiam multis in locis historiae animalium consuluit CL. CAMVS et lectiones inde excerptas posuit. Hanc vero versionem seculo tertio et decimo in gratiam THOMAE Aquinatis factam, atque olim in scholis solam vsitatam THOMAE Cantipratensi Brabantino auctori adscribi refert VOSSIVS de Histor. latin. II. 60. IOH. vero



**AVENTINVS** Hainricum Brabantinum, Dominicanum, nominat, annumque 1271 edit. Quae si eadem est versio ex graeco facta, quae commemoratur a **RIGORDO**, aliquanto antiquior est, ut ex narratione eius antea posita conficitur. Habemus igitur duas operum Aristotelis versiones vno fere tempore, uti vulgo creditur, alteram ex graeco, alteram ex arabico sermone, factas; sed neutrius auctorem certo testimonio cognouimus hucusque, nec, vtra Friderici Imperatoris iussu facta sit, magis liquet. Ipse quidem aliquoties libros Philosophi de animalibus, de caelo, et mechanicos laudat, sed ex iis locis perspicui non potest, quam sit versionem secutus. Tertiam versionem, aliquantum antiquiorem, seculo quippe nono factam a rege Britannorum Alfredo, commemorat **BARTHOLOMAEVS**, Anglicus dictus, et particulas satis magnas ex libro de plantis inde excerptas posuit. Verum iterum ignoramus, ex graeco in latinum, an ex alia dialecto in britannicam, uti Orosium, transtulerit Aristotelem Alfredus. Vides igitur, per quam varios canales deriuata in occidentis nationes disciplina Aristotelis quam multis errorum sordibus inquinata esse debuit; nec miraberis, adeo multa hodieque in recentiorum scriptis ex medii aevi scriptoribus eorumque compilatoribus transcripta exstare barbararum versionum vestigia.

Physicam Imperator adeo amauit tamque diligenter excoluit, ut, teste Nicolao de Iamfilla in Chronico de rebus gestis Friderici II. (in Muratorii Scriptor. Italic. T. VIII.) *ipse de ingenii perspicacitate librum de natura et cura auium composuerit*, in quo pluribus in locis ab Aristotelica disciplina diuersus abit, dissensusque sui rationes satis validas edit. Tantum abest, ut caecus affecla more plurium seculorum in verba magistri iuret! Huius libri lectio confirmare etiam potest narrationem Antonini Mongitori in Biblioth. Sicula T. I. pag. 246; qui ut demonstraret, quam curiosus in omnium rerum naturalium scientia perscrutanda fuerit, animalia, inquit, atque monstra, quae in orientalibus plagis gignuntur, a Caesaris Augusti aevo in Italia inuisa aluit, et quicquid pretiosum in Asia gemmare conspicitur, in aedes suas abunde adportatum refulsit. Huius rei testem laudare possum **VINCENTIVM** cum **ALBERTO**, qui camelopardalin aliaque extranea animalia in Italia Galliaque a Friderico Imperatore monstrata publice narrant, multasque praeterea animalium rariorum auiumque species curiose satis describunt aut nomi-



nominant, quarum tum aliunde notitiam nisi ex curiosa Friderici II. magnificentia haurire vix poterant.

Praeter exemplum libri manuscripti, ex quo plenum lacunarum et in fine mutilum edidit primum VELSERS, alterum dicitur exstare in bibliothecae Colbertinae Codice 2177, testante OVDINO Comment. de Script. Ecclesiast. T. III. p. 66. Num plura alibi lateant exempla eaque integriora, nescio, nec in hac catalogorum egestate librorumque aliorum bene multorum, quam saepe doleo, quaerere nec licet nec vacat.

Praeter hunc librum alterum de natura et cura animalium composuisse Fridericus II. traditur, sed errore iam satis a SCHMUTZERO demonstrato, ab historiae Neapolitanae politissimo scriptore PETRO GIANNONI Libro XVII. c. 4. Eum tamen ipse GIANNONI errorem redemit notitia, quam prodidit de IORDANI RVFI, stabulo regio Praefecti, Tractatu de cura equorum et medicamentis illis salutaribus. Is IORDANVS in fine librum suum iussu Imperatoris conscriptum seque omni scientia ad disciplinam istam rite pertractandam ab ipso Friderico institutum fuisse testatur. Codicis Italici initium sic habet: Incipit liber Marefcalchiae maristallae Domini Friderici Imperatoris. Desinit vero in his verbis: Hoc opus composuit Iordanus Ruffus de Calabria Miles et Familiaris Domini Friderici II. Romanorum Imperatoris memoriae recolendae, qui instructus fuerat plene per eundem Dominum de omnibus supradictis. Hic vero liber, auctore GIANNONI, manuscriptus asseruatur inter libros Cardinalis Seripandi in monasterio S. Giovanni a Carbonera. Eundem tamen iam olim ex Bibliotheca Thuani manuscriptum adhibuit et in multis Glossarii locis laudauit CANGIVS, vti patebit conferenti vocabulum BARVLI, FICVS, GALLA, INFVSIO, SPALLACIAE, STRANGVILLO, VIVOLAE. Mirum tamen in locis multis accidit illud, quod IORDANVM RISVM CALABRVM *De medicaminibus equorum ad Fridericum II. Imperatorem* saepius laudari videbam, quam IORDANVM RVFVM, etsi in Indice Auctorum Manuscriptorum, quibus vsus erat, simpliciter laudatur IORDANVS RVFVS CALABER *de medicina equorum*. In Indice Scriptorum editorum liber hic IORDANI RVFI gallice etiam exstare dicitur; quae quidem verba de edita versione gallica an manuscripta sint intelligenda, dubito. Monuit praeterea, quod facile credo homini doctissimo et diligentissimo, multa



multa loca ex isto IORDANI libro in scripta sua deriuasse PETRUM Crescentiensem, non nominato vsquam IORDANO. Quo magis optandum, vt IORDANI liber aliquando in lucem proferatur, vna cum simili, quem sub nomine HERODII *de curis equorum* laudat MATTHAEVS Syluaticus in Pandectis Medicis sub vocabulo *marmor* et *Siriasis*: eundem vero sub nomine GERODII saepius laudat SIMON Ianuensis in Codice Parisino apud CHARPENTIER in Glossario sub vocabulo *porus*, *ranulae* et alibi. Eundem denique sub *Erodei de medicina equorum* nomine in Italica bibliotheca manuscriptum commemorat TOZZETTI in Itinerario Italico. Nec enim dubitari potest, multa in illis libris tradita legi, quae non solum ad veteres rei veterinariae scriptores emendandos atque illustrandos faciunt, sed rectius etiam ex illis libris iudicari posse puto de statu litterarum seculi tertii et decimi, ex quo seculorum seculorum doctrina omnis ita pendet, vt, vbi ad hos fontes accedere non licet, in plurimis historiae litterariae partibus plane caecutiamus. Fabularum etiam multarum originem certius tenebimus, quando libros isto seculo scriptos omnes accuratius cognitos habebimus, quorum auctores hucusque plerosque vix nomine tenuis cognouimus. ADELINVM philosophum, Experimentatorem alium dictum scriptorem, et tertium IORATH saepissime appellat et commemorat Gallicus libri de rerum natura scriptor apud Vincentium, cuius aetas ex hoc potest agnosci, quod Platearium medicum laudat, ipse vero multis in locis ab Alberto M. refutatur, cuius libros, vti etiam Gallici scriptoris de natura rerum, IORATHI, PLATEARII, ALEXANDRI alicuius, mihi ignoti hominis, aliorumque in compendium redegit VINCENTIVS Bellouacensis. Sed redeo ad libros Friderici Imperatoris aut iussu eius scriptos, quibus annumerare fortasse licebit *librum animalium*, quem ipse initio capitis 24. libri I. laudat. Aristotelis enim librum aliquem intelligi non posse, in annotatione ad eum locum satis demonstraui. Praeterea CANGIVS saepiuscule laudat Vitam Caroli Magni iussu Friderici Imperatoris scriptam in Bibliotheca regia Parisina latentem, quae an postea edita a viro aliquo docto fuerit, ignoro; nec affirmare ausim, Fridericum secundum Imperatorem intelligi, quoniam vbique simpliciter Fridericum Imperatorem a CANGIO appellari video.

Moralem philosophiam ARISTOTELIS ex graeco in latinum sermonem transtulit iussu regis Manfredi, filii Friderici, Bartholomaeus Messinensis, cuius versionis Codex manuscriptus exstat in bibliotheca



bliotheca Florentina S. Crucis, vt historiae litterariae Italiae auctor diligentissimus tradit TIRABOSCHI. Hanc deinde philosophiam cum physica commentariis suis illustrare conatus est THOMAS AQUINAS. Ne vero mireris fuisse isto aevo linguae graecae peritos viros, quibus opera interpretandorum graecorum veterum scriptorum committi posset, meminisse oportet, Siciliam tum, Apuliam et Calabriam tenuisse adhuc ciues graecos Saracenis, quibus etiam in exercitu libenter utebatur Fridericus, et Christianis permixtos. Atque his etiam Codicem legum a se promulgatarum graece scriptum prodidit Fridericus, quem hodieque seruat Regis Galliarum Bibliotheca. In Calabria ipsa Hydruns, hodie Otranto, veluti nidus graecarum litterarum fuit; hinc oriundus Magister IOHANNES versus iambicos graecos in obsidionem Parmae a Friderico factam composuit in Bibliotheca Laurentiana seruatos. Atque omnino diutissime studia graecarum litterarum in Italia conseruata floruerunt in monasterio Casulorum vrbs Hydruntis, vbi seculo XV. repertus et deinde impressus est QVINTI dicti CALABRI poematis Codex graecus vnicus, quem nouimus. Linguae Arabicae scientiam vsunque ad interpretandos Arabum libros vulgatum tum fuisse iisdem etiam argumentis constat; nec erat, cur Fridericus ex Arabia, Mauritania, aut Hispania peregrinos interpretes accerferet.

Desino in commemoratione versionis germanicae libri huius a Friderico Imperatore scripti, quam iussu Marchionis et Principis sui confectam Onolsbachii 1756 forma octaua edidit IOH. ERHARD PACIVS, Diaconus et Rector Scholae Gunzenhausensis. Vfus is est eo sermone, quo falconarii germanici vtuntur, more venatorum, peculiari, rudi et aspero quidem illo, sed qui multas habet voces, quas ad varias rerum proprietates designandas non solum vtilis autumo, sed in ipsam etiam ornithologiae terminologiam germanicam introductas vellem, cum hucusque compendiorum compilatores omnes voces latinas, et ipsas nimis saepe barbaras, varie aliusque alio peius interpretari soliti sint. Omnes igitur eas voces inde collectas posui in Appendice Annotationum, eo quidem lubentius, quod plerasque vulgo ignotas frustra in Lexicis quaeri animaduenteram. Nullum fere praeterea alium mihi vsum potuit praestare versio germanica, facta absque accurata historiae naturalis auium scientia; nec adeo nota satis auium nomina, multo vero minus ignota, barbara aut peregrina fideliter reddit. Praeterea finitis demum commentariis nactus

\*\*\*


sum



sum librum, adeoque adhibere eum in consilium nullibi potui. Repetita habet ab initio V E L S E R I praefationem cum picturis iisdem, quas ex Codice excerptas nullo plane usu publicavit V E L S E R V S, adeo ut reliquarum, quas in Codice satis multas additas esse monet, desiderium nullum lectoribus intelligentibus faceret.

Praeterea quod addam, non habeo. Itaque vale, beneuole lector; et si quid me ad auum rapacium naturam historiamque illustrandam librumque Imperatoris egregium rectius intelligendum contulisse existimas, porro studiis meis faue. Dabam Francofurti ad Viadrum medio mense Aprili 1788.

I. G. SCHNEIDER, Saxo.







I.

D I V I A V G V S T I  
F R I D E R I C I S E C V N D I

ROMANORVM IMPERATORIS  
HIERVSALEM ET SICILIAE REGIS,

DE ARTE VENANDI CVM AVIBVS,  
LIBER PRIMVS.

PROLOGVS PRIMI LIBRI,

*qua legi potuit.*

. . . . . et vt remoueremus errorem plu-  
rium circa praesens negotium, qui sine arte habentes quae artis erant, in eodem  
negotio . . . . . imitando quorundam libros mendaces et insufficienter compo-  
sitos de ipso: et vt relinqueremus posteris artificiosam traditionem de materia  
huius libri. Nos tamen, licet proposuissemus ex multo tempore componere  
praesens . . . . . vlimus fere per . . . . . propositum . . . . .  
quoniam non putabamus nos ex tunc sufficere, neque . . . . . eramus  
vnuquam aliquem praecessisse qui huius libri materiam complere tentasset, par-  
ticulae vero aliquot ab aliquibus per solum vsum, sicut erant et inartificialiter tra-  
ditae; Imo multis temporibus cum sollicitudine diligenter inquisuimus ea quae  
huius artis erant, exercitantes nos in ea . . . . . in eadem, vt tandem suffice-  
remus redigere in librum quicquid nostra experientia aut aliorum didicerat, quos  
quod erant experti circa . . . . . huius artis, non sine magnis dispendiis  
ad nos venientes de longinquo, vocatosque . . . . . nobiscum habuimus, de-  
notando quicquid melius nouerint, eorumque dicta et facta memoriter cominen-  
dando. Qui quamuis arduis et inexplicabilibus fere negotiis persaepe praepediti  
essemus, circa regnorum et imperii regimina: tamen hanc nostram intentionem  
praedictis negotiis non postposuimus, in scribendo etiam artem, vbi oportuit,

A

secuti



secuti sumus; pluribus enim, sicut experientia didicimus, maximorum in naturis  
 auium . . . . .  
 Sed nos semper . . . . . vero quae narrat in libro animalium  
 dicit quosdam sic dixisse. Sed id quod quidam sic dixerunt, nec ipse forsan vi-  
 dit, nec dicentes viderunt. Fides . . . . .

*Aliquot deinde versus legi non potuerunt.*

difficilia emergunt circa negotia huius artis. Rogamus autem vnumquemque no-  
 bilem . . . . . ex sola sua nobilitate . . . . . qui ab aliquo . . . . . perito  
 ipsum legi faciat et exponi, minus benedictis indulgens: nam cum ars habeat sua  
 vocabula propria, quemadmodum et ceterae artium, et nos non inueniremus in  
 grammatica Latinorum verba conuenientia in omnibus, apposuius illa quae  
 magis videbantur esse propinqua, per quae intelligi possit intentio nostra. Est  
 huius . . . . . ateria ars vena . . . . . partium . . . . . quae  
 theoric . . . . . in operando quae practica nuncupatur. Rursus quaedam pars  
 de generali contemplatione tam eorum quae spectant ad theoricam, quam eorum  
 quae spectant ad practicam. Reliqua vero de speciali consideratione eorundem.  
 Intentio vero nostra est manifestare in hoc libro de venatione auium, ea quae sunt  
 sicut sunt, et ad artis certitudinem redigere, quorum nullus habuit scientiam  
 haecenus neque artem. Modus agendi est prosaicus, prooemialis et executiuus.  
 Executiuus vero multiplex, partim namque diuisiuus, partim descriptiuus, partim  
 conuenientiarum et differentiarum assignatiuus, partim causarum inquisitiuus.  
 Et sunt alii modi quos sequimur, vt in libro patet. Auctor est vir inquisitor et  
 sapientiae amator, Diuus Augustus, Fredericus secundus Romanorum Imperator,  
 Ierusalem et Siciliae Rex. Vtilitas est magna, etenim nobiles et potentes, solliciti  
 circa regimina mundanorum, per huius artis vsum, suis curis plerumque gaudia  
 interponent: Pauperes vero et minus nobiles, de hac arte nobilibus seruientes,  
 obtinebunt ab ipsis necessaria suae vitae. Vtrique vero per hanc artem habebunt  
 manifestationem operationis . . . . . ae in auibus. Supponi . . . . . scientiae  
 naturali, cum . . . . . auium manifestet, licet illae naturae, ex documento per  
 hunc librum habito, alterari quodammodo videantur. Libri titulus talis est, Li-  
 ber Diui Augusti Frederici Secundi Romanorum Imperatoris, Ierusalem et Siciliae  
 Regis, de arte venandi cum auibus. Ordo tractandi in singulis particulis euiden-  
 ter patebit. Prooemium namque antecedit narrationem. In tractatione vero seu  
 in executione ea quae generalia sunt, praeponuntur specialibus, et quae secundum  
 naturam priora sunt, praeponuntur his quae posteriora sunt secundum naturam.



## CAPITVLVM I.

*Quod ars venandi cum auibus dignior est caeteris venationibus.*

Cum autem ars venandi cum auibus pars sit artis venandi simpliciter, et ars venandi simpliciter plures alias partes habeat, et cum omnes partes artis venandi per venationem deducantur in actum: primo videndum est, quid sit ars venandi, et quid venatio, et quae partes artis venandi, quatenus praetermissis aliis omnibus, ad praesens, de sola arte venandi cum auibus hic dicatur. Ars venandi est collectio documentorum, quibus sciunt homines ad opus suum deprehendere animalia non domestica, vi vel ingenio. Venatio autem nihil aliud est, quam motus aut exercitium, quae eo studio fiunt, vt huiusmodi animalia capiantur. Partium autem artis venandi alia est, quae cum instrumentis inanimatis venari docet: Alia cum instrumentis animatis: Alia cum vtrisque simul. Illius autem quae docet cum instrumentis inanimatis, multiplex modus est, verbi gratia; Aliquando fit cum retibus, pedicis, balistis, arcubus, sagittis, et multis aliis decipulis. Sed illa quae cum instrumentis animatis, aliquando fit cum canibus, aut Leopardis, aut aliis quadrupedibus multis: Aliquando fit cum auibus rapacibus. Quae autem dicantur aues rapaces, et quae non rapaces, mox dicetur quare sic dicantur.

Praetermissis ad praesens aliis partibus artis venandi, dicetur ex hoc solum de arte venandi cum auibus, et ostendetur in praesenti capitulo per multas causas, quod ipsa est dignior caeteris, propter quod de eadem prius dicemus. Causae autem quod nobilior sit caeteris, sunt plures: Legens enim hunc librum et intelligens, plura secreta de operationibus naturae cognoscet per hanc, quam per alias artes venationis.

Amplius caeterae venationes magis notae sunt a pluribus, pro eo, quod habiliores possunt comprehendi: Haec vero est minus nota et a paucioribus, non nisi quia est de difficiliore et bono. Amplius res aliarum venationum, per quas deuenitur ad finem intentum, minus nobiles sunt, quam res praesentis: verbi gratia, caeterae venationes habent instrumenta artificialia et manufacta, vt retia, laqueos, pedicas, venabula, iacula, arcus, balistas, et huiusmodi. Aut habent animalia quadrupedia, domestica, agreslia, scilicet modos Leopardorum, Canum, Lincos, Lincas, Furectos, et alia plura.

Haec vero venatio instrumentis praedictis non vtitur, neque animalibus quadrupedibus modo dictis; sed ad acquisitionem finis habet aues rapaces, quae et inanimatis instrumentis, et quadrupedibus . . . . . sunt. Amplius etiam multo artificiosius est, instruere aues rapaces venari, quam canes, aut quadrupedia agreslia, pro eo, quod aues rapaces magis timent ab hominibus, quam caeterae aues, et quam quadrupedia, quae docent homines venationem.



Non viuunt etiam aues rapaces feminibus, aut iis rebus, quas tractant homines, et quibus vtuntur plures de aliis auibus. Et ideo non conuersantur cum hominibus, neque domesticantur cum eis, nisi forte aliquando venarentur aues, quae viuunt de feminibus et aliis, quae sunt inter homines, et hoc palam est, quod aues rapaces plus fugiunt naturaliter ab hominibus, quam caeterae aues, et quam quadrupedia supradicta. Raro etiam nidificant aues rapaces in locis hominum habitatis. Et quamuis de quadrupedibus dictis plura fugiunt ab hominibus, ipsae enim sunt ferae agrestes et feroces, et ideo difficile est mansuefacere ipsas, et docere venari: tamen difficilius est docere aues rapaces venari. Nam illa quadrupedia non habent tantam aptitudinem fugiendi, aut elongandi se, (cum habeant motum terrestrem, et gradientur super faciem) quantam habeant aues. Cum ipsae aues habeant motum velociorem, et volatum per aëra. Ideo quadrupedia plus possunt subiici potestati hominum, quam aues, et possunt capi per vim, aut aliis modis, cum super terram ambulent. Aues vero cum per aërem volent, non possunt capi vi, sed solo ingenio hominum et capi possunt, et doceri. Propter hoc haec ars venandi difficilior est caeteris venationibus et dignior. Amplius omnes aues rapaces possunt doceri per hanc artem capere maiores aues, vt grues, fistaroas, anseres, et maiores alterius materiei, quam per se caperent, et minores aues non solum eo modo, quo caperent per se, sed pluribus aliis modis. Per quod probatur essentia artis, difficultatis et vtilitatis. Amplius aues rapaces et faciem hominis, et conuersari cum homine naturaliter abhorrent, sed per hanc artem docentur facere ad opus hominum, quod operabantur per se, et ad opus suum, et conuersari cum homine, quem naturaliter fugerunt. Amplius aues rapaces per hanc artem docentur venari simul eandem praedam, et consentire indiuiduis suae speciei, et alterius, tam volando quam super praedam, quod per se et sine hac arte nunquam facerent. Amplius et scientes inscii de facili possunt iuuare in venatione, quae fit cum canibus, aut aliis quadrupedibus; possunt enim tenere canes vbi conuenit, et dimittere. Nullus vero in venatione quae fit cum auibus, de facili iuuare poterit, neque portare, neque iactare aues nisi sit doctus et expertus has. Falcones namque et accipitres et huiusmodi ab indocto redderentur inepti, aut forsitan deuastati. Amplius caeteras venationes videndo et audiendo potest aliquis etiam inscius addiscere; hanc autem non sine docente, neque sine artificiosa operatione frequenti poterit aliquis siue nobilis siue ignobilis addiscere. Amplius pro eo quod plures de nobilibus hanc artem addiscunt, et diligenter exercent, pauci vero de ignobilibus: satis coniecturaliter probatur, quod haec ars sit nobilior caeteris ex supradictis. Itaque palam est, quod ars venandi cum auibus, et ars est, et caeteris venationibus nobilior, et dignior, et ideo prior. Quare de ipsa est prius tractandum, de reliquis vero venationibus, praecipue de illis, in quibus nobiles delectantur, vita comite, post complementum huius operis dicetur a nobis.

CAPIT.



## CAPITVLVM II.

*De Diuisione auium generaliter in aquaticas, terrestres et medias.*

**I**n hoc autem primo tractatu huius artis dicemus de diuisione auium, quod est necessarium dicere prius, ad artem venandi cum auibus. Vnde autem omnes aues, sicut et caetera animalia habeant omnes operationes suas, circa coitum, circa partum, circa acquisitionem cibi, circa mutationem locorum ad calorem et frigus temporis, circa mutationem alimentorum. Dicemus conuenienter diuisiones auium generales, diuersos motus quos faciunt ad acquisitionem escae suae, diuersitatem escae qua vtuntur, mutationem quam faciunt ad loca quaedam propinqua; quaedam remota propter calorem et frigus temporum, diuersitatem et iuamentum membrorum in ipsis, naturam plumarum, modos volatum suorum, modum pugnae, et defensionem quam habent, et mutationem plumarum. De his eisdem non dicemus, nisi figuraliter, et quantillum sufficit ad nostrum propositum, scilicet vt artifex, qui exercet venationem cum auibus rapacibus sciat per cognitionem horum generalium melius, vbi, quando et quomodo cum rapacibus valeat praedari non rapaces. Reliqua vero omnia, quae praetermittimus de natura auium in libro Aristot. de animalibus, requirantur.

Prima itaque diuisio auium est haec: Auium aliae sunt Aquaticae, aliae terrestres, aliae mediae. Aquatiles vero dicuntur aues de riuera, et hae sunt, quarum mansio est in aquis, et circa aquas, quibus natura prouida membra dedit habilia ad manendum in aquis et circa aquas, et de sua natura et complexione habent diligere manere in aquis. Terrestres vero dicuntur aues de campo, et sunt hae, quarum mansio est super terram, et habent membra habilia ad hoc, et complexio sua ministrat eis diligere semper manere in terris et super terras. Mediae autem dicuntur, quarum mansio partim in terris, partim in aquis consistit, et natura dedit eis membra congrua ad vtrumque, et complexio dat eis quod diligant in vtroque manere. Et quamuis Aristoteles diuidat omne animal in aquaticum et terrestre, aquaticum appellans pisces solum; sub terrestri vero volatile et gressibile comprehendens, nec omne volatile etiam dicens aues. Nos tamen quadam consuetudine habita inter venationes auium, et quadam transumptione loquendi, aues in commixtione materiae quarum dominantur superiora et extrema leuium elementorum, quae immo sunt leuiiores subtiliores volantes, et aërem inhabitantes diuidimus in aquaticas, terrestres et medias, quarum omnium exempla dabimus, prosequendo diuisiones earum in genera diuersa, et generum in species diuersas.

Aquaticarum vero auium aliae semper habent mansionem in aquis, quae non recedunt ab aquis neque pro cibo, neque pro alio, nisi tantum vt mutantur de vna aqua in aliam, aut vt mutant loca secundum mutationem temporum, vt modi mergorum, et corui marini, qui mergones etiam dicuntur, et cinni, et



illae, quae dicuntur ab Aristotele in libris animalium Pellicani, qui ab Apul. dicuntur Cofani. Hae sunt aues magnae ad modum cinnorum albae, longum et latum habentes rostrum, sub quo habent pelliculam quam aperiunt et claudunt piscando ad modum sagenae. Hi habent digitos pedum coriales, et corium est continuans digitum posteriorem anterioribus digitis, quod non contingit in aliis habentibus digitos coriales. Hae et multae aliae raro aut nunquam recedunt ab aquis. Aliae vero non semper habent mansionem in aquis, sed recedunt ab aquis, et propter duo praedicta, et alioquin propter cibum, quae propter hoc, quod natura earum hoc appetit, ad aquas redeunt, et in ipsis habent mansionem suam, ut sunt diuersa genera anserum, et diuersa genera anatum et similium. Terrestrium vero aliae semper manent in terris, neque vadunt vnquam ad aquas, nisi causa sui potus, et suae balneationis, ut modi coturnicum et perdicum, et fasiani, bistardae, et anates, quae dicuntur campestres, quae similes sunt bistardis, multo tamen minores, pauones et plures huiusmodi.

Aliae non semper manent in terris sed recedunt a terris, et vadunt ad aquas propter potum et balneum, et etiam propter cibum, deinde recedunt ad terras et in terris manent et quiescunt, sicut expetit earum natura, ut quoddam genus aquilarum, quae dicuntur ad hoc aquilae piscatrices. Hae mergunt se in mari, in fluminibus et lacubus ad piscandum, postea recedunt ad manendum in terra, in rupibus et arboribus, et merito huiusmodi aquilae dicuntur terrestres, cum sint de genere rapacium, et omnes rapaces terrestres dicimus esse. Mediarum inter aquaticas et terrestres triplex est modus. Sunt enim quaedam, quae permanent libentius in aquis, quam in terris, secundum quod, earum natura ex modo commixtionis elementorum hoc appetit, ut modi . . . . Et sunt quaedam, quae diligunt magis conuersari in terris, quam in aquis, cum in utroque permaneant, ut Puerii, Vanelli, Liuercini, et huiusmodi, inter quas Puerii minus diligunt aquas quam vanellii, et vanellii magis quam Liuercini. Vnde Liuercini plus trahuntur ad naturam terrestrium quam vanelli et pluerii, vanelli namque et pluerii saepe dormiunt in campis nocte, sed Liuercini saepius. Et sunt quaedam, quae diligunt manere quasi aequaliter in aquis et terris, ut genera gruum, maiorum scilicet et minorum, et ambae species ciconiarum, albae scilicet et nigrae, nigrae tamen saepius visae sunt permanere in aquis. Visae sunt autem frequenter albae et nigrae euntes ad piscandum in aquis et locis aquosis, et in pratis mollibus, deinde redire ad manendum in terra.

Continentur itaque omnia genera auium, omnesque species sub his tribus differentiis, quae sunt, aquaticum, terrestre, et medium. Istud etiam est sciendum, quod illas medias aues, quae plus morantur in aquis, locauerunt exercitati inter genera auium aquaticarum, quia imitantur tam aquaticas, quam terrestres aues de riuera. Illas autem quae terras tenent, de natura complexionis morantur plus in terris, consueuerunt terrestres dicere, et tam has terrestres, quam istas vo-

care



care aues de campo. Illas autem quae tenent aequaliter vtrumque, alii inter aquaticas, alii inter terrestres posuerunt, sed illae mediae, quae exeunt de aquis, et ascendunt in terram, et redeunt ad aquas ad tutelam et ad quiescendum, licet frequentent campos, verius tamen dicentur aquaticae, cum multo plus habeant stare et refugere in aquis, vt genera gruum. Sed illae mediae, quae habitant in campis et vadunt ad aquas causa balnei et potus, et refugiunt ad aquas, quando rapaces sequuntur eas, dici poterunt conuenientius terrestres, vt Liuercini, pluerii, vanelli et huiusmodi, plures etiam de terrestribus ad aquas refugiunt timore rapacitum persequentium eas, vt dicetur in Capitulo de Defensionibus auium, sicut sunt cornices.

### CAPITVLVM III.

#### *De Diuisione auium, in rapaces et non rapaces.*

**R**ursus et aliter diuiduntur aues: Aliae enim sunt rapaces, aliae non rapaces. Et licet Aristoteles et alii Philosophi conuenerunt in diuisionibus tractandis prius de affirmatiuis, et subsequenter de negatiuis: tamen quia necessarium est tractare de rapacibus specialiter, ideo primo tractabimus de negatiua, videlicet de auibus non rapacibus, de rapacibus autem tractabimus latius subsequenter.

Non rapaces vero dicuntur, quaecunque non viuunt de raptu, siue sint aquatiles siue terrestres, siue mediae, et quidem terrestres quae quandoque rapiunt, et de suo raptu viuunt, quandoque non viuunt de suo raptu, sed de granis et fructibus et huiusmodi, sicut sunt modi coruorum cornicularum, picarum et huiusmodi, pro eo quod non viuunt de solo raptu, non possunt dici rapaces proprie, multo minus genera vulturum et picarum, quae dicuntur ossa frangentes, et quidam modus aquilarum ignobilium, cum nunquam rapiant alias aues aut bestias, sed semper comedunt carnes cadauerum morticinas scilicet, aut residuas, dici non debent rapaces. Oportet tamen scire, quod eadem genera et eadem species auium diuersis vocabulis apud diuersos nuncupantur, et multoties eisdem; non tamen propter identitatem nominum eadem sunt dicenda, sicut neque propter diuersitatem, diuersa: nomina namque non sunt eadem apud omnes, sed mutantur apud homines diuersi idiomatis, et eiusdem. Propter hoc eadem genera et species siue diuersa dicantur, secundum quod essentialia naturae materiei vniuersalia erunt eadem atque diuersa, scilicet in natura sua, vt forma membrorum in motibus et operationibus ipsorum, in vsu eorundem ciborum, in eodem modo pullificationis et in caeteris naturis ipsorum, sicut in modo volatus et in modo . . . fionis, naturae namque et proprietates quae sequuntur res inseparabiliter, eadem sunt apud omnes, quemadmodum res quarum sunt proprietates.

Amplius diuersae regiones habent quaedam genera auium diuersa ab aliis, et vna regio habet aliqua genera auium, quae nec alia habet regio, et vna regio  
habet



habet eadem, quae habet alia, sed plurimum dissimilia in colore et aliis accidentibus, considerando tamen naturam et formam membrorum, et vsus cibariorum, et operationes caeteras ipsarum, cognoscentur, sub quo genere erunt collocanda. Propter hoc cum posuerimus exemplum de vno genere auium, et dixerimus et similia ei, non est opus enumerare caetera, ne in prolixitatis fastidium indicamus. Magna enim est multitudo aquaticarum auium, terrestrium et mediarum et caeterarum. Inueniuntur etiam multiplicia genera aquaticarum similia et proxima valde, quemadmodum et terrestrium et mediarum, quae omnia longum esset enumerare. Sed cum videbuntur identitates auium in essentiis et proprietatibus supradictis, aut diuersitates, iudicentur esse eiusdem generis aut diuersi, quod habebit locum etiam in auibus illis, quae non fuerunt visae alia vice.

#### CAPITVLVM IV.

*De aquaticis, quibus modis acquirunt suam escam, quando, et quam.*

**E**xpletis diuisionibus auium in aquaticas, terrestres et medias, et rursus in rapaces et non rapaces: videndum est per ordinem de motibus et operationibus, quas habent singula genera ad acquisitionem cibi sui, in quo patebunt aliae plures diuisiones auium, et naturae plures earum. Motus itaque et operationes, quas habent aues aquaticae ad acquisitionem cibi, plures sunt. Nam aliae aquaticarum natant et non beneuolant, et ab aquis non recedunt, vt omnia genera mergonum fere, de quibus videtur contrarium ei, quod sentit Aristoteles in libro de animalibus dicens, quod quae aues sunt modici volatus, sunt boni gressus. Mergonum namque genus modici est volatus, et peioris gressus, quod si intelligitur minus vniuersaliter de terrestribus, verum erit: de aquaticis vero modici volatus, non sic se habet. Aues aquaticae natantes pro eo quod sibi est expediens manere in aquis, habuerunt a natura pedes suos dispositos ad natandum magis quam ad ambulandum, et fere omnes natantes, siue sint de illis quae beneuolant, siue de illis, quae male volant, mali sunt gressus. R E X.

Causa autem quare aues natantes sunt mali gressus, est: quia cum huiusmodi aues aptae natae sint ad natandum propter victum, quem sibi sic natando acquirunt, natura dedit eis tibias curuas, vt melius fortius, et facilius se impellerent natando per aquas; nam si longas haberent tibias, nimis esset eis difficile, natando se impellere, cum de necessitate oporteret tibias ipsas, propter ipsarum longitudinem, nimis profunde attingere, et subintrare aquas, et cum aquae in profundo, tanquam magis distantes ab aëre facilius ducantur, non facientes tantam resistentiam, dum vna res videlicet infra tantum aqua ducatur, et in superficie propter attractionem aëris, quo aqua ipsa ambigitur, magis sustineat corpus natans, et dum oporteat quod duo ducantur natando per superficiem, videlicet ipsa aqua et



et aër, qui sibi coniungitur et opponitur, maiorem resistantiam faciant pedibus auis natantis ducendo et exercendo eos in posterius, et sic magis impellant. Auis ipsa si tibiae longas haberet, ducendo eas per profunditatem aquarum, non posset facere talem impulsione, dum non inueniatur tanta resistantia in profundo, qualem facit cum tibiis curtis, quae ducuntur per superficiem aquae, quae magis auxiliatur impulsioni. Videmus enim exemplum in galeis, ut si quando remiges volunt fortius nauigare cum remis, non immittunt multum profunde remos per aquam, sed sustinent ipsos alte, ducendo prope superficiem aquae, ad hoc ut aqua ipsa prope superficiem remis ipsis fortius resistente, galea melius impellatur, et velocius currat. Contingeret etiam inde aliud, quia auis postquam natando sic tibiae longas extenderet, vix posset ipsas ad se retrahere, quod subsequenter et saepius faceret alias impulsiones natando, ut facit cum tibiis curtis, quas frequentius et facilius ad se retrahit. Habuerunt igitur huiusmodi aues a natura tibiae curtas ad melius natandum, et quia curtitudo tibiarum est contraria gressui, sicut euidenter apparet in nanis, sequitur igitur, quod aues ipsae omnes sunt mali gressus rationabiliter. Aliae vero aquaticae natant et beneuolant, nec recedunt ab aquis, ut genera Cinnorum, et Pellicani, quos quidam in Italia dicunt Cofanos, et modi coruorum marinorum et similia eis. Aliae non natant neque beneuolant, neque recedunt ab aquis, ut modi quidam rallorum et sibi similia. Aliae non natant, et beneuolant, neque elongantur ab aquis, ut genera Ayronum et sibi similia. Rursus aquaticarum natantium quaedam submergunt se penitus in aquis ad acquisitionem cibi, quaedam caput et collum usque ad spatulas, vel usque ad medium corporis. Diuersitas ciborum, quibus utuntur aquaticae, talis est: aquaticarum enim aliae viuunt de rebus aquaticis solum: aliae de campestribus solum: aliae de vtrisque. Quae viuunt de rebus aquaticis solum, sunt pellicani, genera coruorum marinorum, et genera mergonum; quae solum de piscibus viuunt. Illarum vero, quae de campestribus solum viuunt, aliae acquirunt sibi cibum in aquis, vel circa aquas, ut cinni, qui viuunt de herbis, granis, et fructibus, quae priusquam comedant in aqua remolliunt, propter teneritatem rostri. Aliae de prope, et a longe ab aquis ubi melius inuenire possunt, ut genera anserum, quae viuunt de herbis, granis, et segetibus, et huiusmodi. Illarum vero, quae de vtrisque viuunt, aliae viuunt de piscibus, et reptilibus aquaticis et terrestribus, ut sunt modi Ayronum, qui viuunt de piscibus, ranis et serpentibus, muribus, et huiusmodi: Aliae de piscibus, herbis, fructibus et granis, sicut anates. Ex praedictis patet, quod quaedam auium aquaticarum natant et comedunt pisces, quales sunt modi mergulorum, pellicani, corui marini, et huiusmodi. Quaedam natant et non comedunt pisces, ut maneries cinnorum. Quaedam non natant et comedunt pisces, ut modi Ayronum, et sibi similia. Quaedam non natant, neque comedunt pisces, ut sunt multi modi picarum, quae sunt aquaticae, neque natant, neque comedunt pisces.



## CAPITVLVM V.

*De exitu Aquaticarum de aquis ad pascendum.*

Octo de diuersitate ciborum quibus vtuntur aues aquaticae requiruntur dicere; quando exeunt ad pascendum, illae scilicet quae pascuntur extra aquas, et quoties exeunt per diem, et quomodo exeunt ad pascendum, et redeunt de pascuis ad aquam, et quo ordine, et ad quae loca, et quare redeunt ad aquam, et quomodo stant in aquis quiescentes. Exeunt autem aues aquaticae, quae ex aquis exeunt ad pascendum, in die, et hoc est commune omnibus auibus huiusmodi aquaticis, exceptis quibusdam, quae adeo sunt debiliū motuum et modici volatus, quod prae timore, quem habent de auibus rapacibus, per diem volare non audent, neque ad transmutandum aquas, neque propter sui pastum, de nocte vero exeunt et volant, vt quidam modus mergonum, et fullicarum, et plures earum, quae habent malum volatum; certis autem horis diei exeunt aquaticae ad pascendum, et certis horis redeunt a pascuis, mane namque circa ortum solis exeunt ad pascendum, et morantur in pascuis vsque ad tertiam, et aliquando minus, aliquando plus, cum enim dies aestuosus est, minus morantur, et cum dies est nubilus et non aestuatus, plus morantur, circa tertiam vero diei redeunt ad aquas et illic morantur et quiescunt vsque circa nonam, et tunc iterum exeunt ad pascendum, et morantur in pascuis vsque ad occasum solis, et tunc secundo redeunt ad aquas, quiescentes in eis tota nocte, anticipant autem horas exeundi et redeundi secundum intentionem et remissionem caloris in die, vt praedictum est. Plures etiam huiusmodi de aquaticis pernoctant aliquando extra aquas pascendo, praecipue cum splendore Lunae, et huiusmodi sunt anserum modi, quae sunt aues multum comedentes, et comedunt herbas et caetera, quae videre possunt in nocte cum lumine Lunae, hoc autem faciunt maxime quando noctes sunt longae, nam eis non sufficit esca, quam sumpserunt in die. Accidit autem quod anseres maiores et etiam minores pascendo seu volando miscent se cum domesticis anseribus, et nulla de ipsis remanet cum domesticis, quemadmodum plures de domesticis recedunt cum eis, et sunt agrestes, facilius enim est ad naturam redire, quam consuetudinem retinere, beneficio siquidem pastus et nutrimenti, non solum aues sed plura animalium conuersantur inter homines. Alii autem modi aquaticarum et mediarum non pernoctant extra aquas, nec pascuntur in nocte, quia sunt aues modici cibi, et quae pascuntur grana, radices herbarum, et similia, quae non possunt videre de nocte, etiam cum splendore Lunae, vt pluerii, vanelli, et genera gruum; anates vero et Circellae, et similes non accedunt istis horis certis, sed pascuntur tota die aquis vel extra aquas. Ex praedictis patet, quotiens redeunt de pascuis, fortiuntur enim omnes horas diei in tres partes, duabus partibus sunt in pascuis, reliqua vero parte ante has in aquis quiescunt, omnibus vero horis noctis stant in aquis, et sic vnam partem faciunt de tota nocte, vnde bis exeunt in die



ad pascua, et bis redeunt de pascuis. Modus autem quem habent in exeundo et redeundo multiplex est; aliae enim congregantur cum aliis eiusdem speciei, et diuissim in multas turmas exeunt, et redeunt sequentes aliae alias successiue, quasi gemino ordine linearum, conuertentium se in angulum: raro vero aut nunquam associabunt se in numerum alterius speciei, sed manent ut plurimum anseres cum anseribus, anates cum anatibus, circellae cum circellis, grues cum gruibus, et sic de aliis. Et si quando contingat illas associari auibus alterius speciei, non hoc faciunt, ut cum eis remaneant, sed quia, quando vident alias ire, volunt ire et ipsae: postmodum vero statim dissociabunt se ab eis, et quaelibet redibit ad alias suae speciei. Aliae vero non seruant istum modum, sed confuse exeunt et redeunt, et sine ordine, aliquando associatim, aliquando singulariter, ut vanelli et huiusmodi. Hae aues et caeterae tam mediae, quam terrestres, quae non sunt rapaces, pro eo quod non indigent praeparatione cibi sui, ut ipsum deglutiant, nam ipsum inuentum granatim deglutiunt, et siue grana siue pisces siue vermes comedant, tam volatiles quam non volatiles, tam cito deglutiunt, quod si aliae aues hoc videant, quae viuunt de similibus cibis, non possunt tam celeriter currere, quin illae prius deglutiissent, non curant solitarie pasci, sed associatim volant, et pascunt cum aliis suae speciei.

## CAPITVLVM VI.

### *De ordine exitus ipsarum ad pascendum.*

**O**rdo autem exitus aquaticarum et mediarum de aquis ad pascendum ad plus est hic: prius exeunt species anserum minorum, deinde grues, postmodum species anserum maiorum, ultimo vero bernecelae, et quidam modus anserum paruarum incedentium cum eisdem simul, quae dicuntur blenectae, et subsequenter alii modi auium aquaticarum.

Ordo reditus hic est: Bernecelae et Blenectae prius redeunt ad aquas, deinde grues et anseres, postremo vero et caetera multitudo. Loca ad quae exeunt ad pascendum sunt secundum diuersitatem escae, qua vtuntur, diuersa, et secundum diuersitatem temporum, ut dicitur infra, docendo loca, in quibus inueniuntur aues; ad quas iactari debent falcones et caeterae aues rapaces. Anates vero et caeterae aues aquaticae similium specierum, exeunt libentius et saepius ad pascendum temporibus pluuiosis, propter quod et in hyeme magis, et multo saepius in Septembri, Octobri, Nouembri, maxime diebus pluuiosis. Hoc autem faciunt, cum pluuiiae deponunt semina herbarum, et fructus arborum, et dumorum, quae omnia in suo cursu congregant et deportant ad loca riuulorum, Riueriarum, et ad caetera loca minora collectiua aquarum. Haec ergo sunt loca, haec sunt tempora, quando et quo exeunt libentius et saepius. Non solum autem anates et aquaticae huiusmodi tunc exeunt libentius ad pascendum, sed etiam omnes aues,



quae viuunt de vermibus, quos cauant sub terra, et quos inueniunt super terram, vermes enim hoc tempore et his locis generantur amplius, et exeunt de suis habitaculis ad superiora terrae, fugiunt namque aquam, quae est eis nociua, et facilius est eis penetrare ad sursum propter superficiem remollitam, quam ad deorsum, vbi est solidum.

## CAPITVLVM VII.

### *De reditu aquaticarum ad aquas seu loca aquosa.*

**L**oca vero ad quae redeunt sunt aquosa, quemadmodum sunt lacus, stagna, paludes, flumina magna et modica, quae dicuntur Riueriae, et caetera loca vna collectiua aquarum, quae dicuntur a quibusdam placteriae, libentius autem et saepius huiusmodi aues redeunt ad flumina lapillosa, spaciofa, et saepissime ad insulas, et quae sunt in eis. Propter hoc autem redeunt ad loca aquosa in die, vt illic maneant tutiores contra feras, lustras scilicet, vulpes et huiusmodi, et contra aues rapaces, quae rapaces parum possunt in aquis; nam aquaticae se submergunt in eis ad defensionem suam. Aliis etiam modis habent defensionem suam in aquis. Debilis vero avis aquatica maiorem defensionem habet in aqua, quam alia fortior extra aquam.

## CAPITVLVM VIII.

### *De statu quem faciunt in aquis tam dormiendo, quam non dormiendo.*

**H**ic autem est modus, quem habent stando in aquis et dormiendo. Illae aues aquaticae, quae natant, aliquando manent in aquis natando, et aliquando prope ripam, tenendo pedes suos in terra sub aquis vsque ad genua, vel vnum pedem solum. Illae vero, quae non natant, siue sint aquaticae, siue sint mediae, tenent aliquando suos duos pedes in terra sub aquis, aliquando vnum vsque ad genua, vel supra, secundum quantitatem aquae. Maior vero pars aquaticarum et non aquaticarum, quando dormiunt, ponunt caput suum retro spatulas suas supra dorsum, et tam natantes, quam non natantes super vnum pedem dormiunt, quae ideo tenent caput inter spatulas, vt rostrum, quod est corneum et frigidum, et caput etiam calefiat: per hanc calefactionem enim humiditas ipsius capitis facilius dissoluitur et repellitur, quae per frigus congelaretur. Imo et de facili fieret morbus in capite, qui dicitur . . . . id est, petrificatio, phlegmatis in capite. Super vnum pedem vero dormiunt non solum aquaticae, sed fere generaliter omnes aues, vt leui somno dormiant, et citius excitentur, quod faciunt, vt imminetia nocumenta facilius sentiant et fugiant. Aquaticae vero cum dormiunt, ad hoc tenent vnum pedem in aqua, vt quando aliquam feram contingeret aquam intrare, aut aliquid aliud nocuum eis, ipsae sentiant facilius motus aquae. Aqua  
namque



namque pro eo quod humida est, et male terminabilis proprio termino, mota circulariter, mouet aliam partem sibi continuam etiam circulariter, et sic prouenit motus, desistente primo motore, usque ad crura auium. Aues vero sentientes sua crura tangi, excitantur protinus et sibi cauent, et omne corpus quanto super plures bases steterit, firmitus stat, et difficilius est commoueri, quanto vero super pauciores, contrarium. Propter hoc dormientes super vnum pedem, facilius commouentur et excitantur. Praeterea omne dormiens cum timore, facilius excitatur, sed omnes huiusmodi aues cum timore dormiunt naturaliter; igitur sic dormientes facilius excitantur. Sunt et aliae rationes, quas Manfridus, Rex Siciliae quondam, Diui Augusti Imperatoris, huius libri authoris, filius addendas curauit, cum librum ipsum coram se legi mandauit. Cum aues omnes tam aquaticae et mediae, quam terrestres tantum laborent pro acquirendo cibo, exeundo, redeundo et stando super pedes, fatigantur valde, sed nocte veniente, qua quiescere consueuerunt, cum stando pedes quiescere volunt, vicissim aliquando super vno, aliquando super alio quiescunt, sicut accidit fessis animalibus ambulabilibus, dum quiescere volunt stando supra pedes, quandoque super vno pede, quandoque super altero quiescunt. Est et alia ratio, quod cum pedes auium fere carne careant, et in eorum compositione sint ossa, nerui, lacerti, cutis, et ungues corneae, quae omnia sunt frigida naturaliter, et in somno infrigidentur extrema propter reuocationem caloris et spirituum ad loca decoctionis, pedes ipsi sint naturaliter frigidi, in somno leuiter infrigidantur, vnde cum infrigidata membra propria operatione deficient, est necessarium quod calefiant, ad hoc vt viuificentur virtutes et per consequens operationes eorum. Vnde vicissim circa ouariam et ventrem et infra plumas vt calefiant, contrahunt pedes suos, hoc faciendo successiue primo de vno pede, et postmodum de alio consequenter. Si vero ventus est, dormiendo opponunt sua pectora vento, vt pennae ipsarum iaceant confertae corpori pendentes ad inferius, quemadmodum innatae sunt, et non iaceant hirsutae. Nam si ventus veniret a tergo, eleuaret pennas et plumas earum, et commoueret eas, quare inquietarentur, cum deberent quiescere et dormire.

### CAPITVLVM IX.

*De terrestribus, quibus modis acquirunt sibi escam, quando et quam: Et quare nocturnae exeunt ad praedandum de nocte.*

**M**otus autem et operationes, quas habent aues terrestres volando naturaliter ad acquisitionem cibi, multi sunt. Quaedam enim terrestrium auium sunt boni volatus et nullius gressus, vt modus hirundinum maiorum, de quibus dicit Aristoteles, quod saepe videntur in primo veris, et in autumnno, et in aestate quandoque et maxime paulo ante pluuiosum tempus et paulo post, habent autem curta



crura et debilia; alas vero longas ad modum falcis, quae in terra posita non possunt ambulare, et de terra vix possunt exfurgere ad volandum, propter quod manent et adhaerent saepe in rupibus et in cryptis vt ab alto se praecipitent ad volandum. Quaedam sunt boni volatus et mali gressus, vt omnia genera rapacium, et plurima de non rapacibus, et secundum plurimum omnes aues, quae sunt boni volatus, non sunt boni gressus, generaliter vero omnes, quae sunt mali gressus, sunt boni volatus, nam haec consequentia est generalis, prima vero non. Aliae terrestrium sunt boni gressus, et nullius volatus, vt strutiones. Aliae sunt boni gressus et mali volatus, vt perdicum, coturnicum genera, et modus rallorum terrestrium, quae dicuntur duces coturnicum, et fasiani et similes his. Amplius terrestrium aliae acquirunt sibi cibum volando, et in aëre capiunt ipsum. Aliae acquirunt sibi cibum ambulando super terram et de terra recipiunt ipsum. Illarum vero, quae volando capiunt ipsum, aliae comedunt ipsum in aëre, vt modi hirundinum, syrenae et similes, quae capiunt in aëre, et comedunt modos muscarum, scarabaeorum, apum, et vesparum, et caeteros vermiculos volantes, nisi cum capiunt aliquem vermiculum ex habentibus aculeos, qui possent eis nocere nimis in transglutiendo. Ad occidendum vero huiusmodi, et ad praeparandum descendunt aliquando ad terram, vel vadunt ad ramos arborum, et praeparant, vt non sit eis nocius, quando deglutient. Aliae vero volando suam capiunt . . . . . semper stant super terram et super arbores ad occidendum, depraedandum, et praeparandum, et ad comedendum ipsam, vt sunt aues rapaces omnes fere, quae capiunt alias aues in aëre, saepius ad terram vadunt vel ad arbores, vt comedant. Illarum vero, quae ambulando acquirunt sibi escam, aliae mordicando cum rostro in superficie terrae, et non raspando cum pedibus, vt bistardae, cinni, anates campestres et similes, quae pascuntur semper super terram, herbas, grana, vermes et huiusmodi. Aliae raspando cum pedibus sub terra, quando non inveniunt escam super terram, vt perdices, gallinae, fasiani, pauones, coturnices, et similes his. Aliae rasant cum pedibus et cum rostro cauando, mordicant ea quae inveniunt super terram et sub terra, vt genera monedularum, coturnicum, coruorum, et earum quae sunt similes corniculis, et vt modi picarum, ac sturnelli et similes his. Praeterea et alios modos multos in acquirendo cibum huiusmodi aues terrestres habent, quos taediosius esset narrare ad praesens. Cibi vero quibus saepius vtuntur terrestres diuersi sunt: nam aliae vtuntur magis alio cibo, quam carnibus: aliae carnibus et alio cibo: aliae carnibus solum. Illarum, quae vtuntur magis alio cibo, quam carnibus, quaedam saepius comedunt grana, fructus arborum et dumorum, brucos, et caetera conuenientia sibi, vt perdices, starnae, phasiani, pauones, franquillini. Coturnices et huiusmodi, quaecunque sunt modici volatus, vtuntur iisdem cibis, vt modi columbarum et turturum, et facha, quae sunt maiores columbis et maiores turturibus, et bistardae, et anates campe-



campestres, quae sunt in colore et forma membrorum et in pluribus similes bistardis, sed multo minores in quantitate. Quaedam nec femina, nec herbas, nec fructus comedunt, sed formicas et modos araneorum, et modos vermiculorum, ut sunt species piconum. Quaedam vero de auiculis terrestribus habent cibum de arboribus, fructus scilicet arborum, et vermiculos qui sunt super arbores. Quaedam ex herbis, femina scilicet herbarum, et vermiculos qui sunt super herbas. Quaedam ex terris, femina scilicet iacentia super terram, et vermiculos de terra. Quaedam vero ex omnibus his indifferenter habent sibi cibum. Illae vero, quae comedunt carnes et alios cibos indifferenter, sunt genera coruorum, cornicularum et modi picarum, sed carnes, quibus vescuntur, sunt de morticinis, vel residua de animalibus occisis ab auibus, aut hominibus, aut feris, raro namque rapiunt avem aliquam, aut bestiolam, nisi forte infirmam aut debilem, et aues huiusmodi in defectu carniū pascuntur grana, fructus, vermes, locustas, bruculos, et similia, quae acquirunt super terram, aut sub terra. Illae vero, quae comedunt solum carnes, tribus modis sunt: Aliae enim nunquam comedunt carnes de suo rapto, sed semper morticinas, aut residuas, de quibus praedictum est, ut sunt genera vulturum, ossifrangorum, et sibi similium. Aliae vescuntur morticinis carnibus, residuis, et aliis, quas quandoque rapiunt, ut genus miluorum, et quaedam genera aquilarum ignobilium. Aliae vescuntur solum illis carnibus, quas habent de suo rapto, et nunquam carnibus cadaueris, neque residuarum, ut genera falconum et accipitrum rapacium, et similium. Dicto de diversitate ciborum, quibus utuntur terrestres aues, restat dicere ea, quae sequuntur, sicut dicebatur de auibus aquaticis, scilicet quando et ubi, etc. Horae itaque, quibus exeunt aues terrestres de suis mansionibus, non sunt adeo evidenter distinctae in omnibus auibus terrestribus, quemadmodum in omnibus aquaticis, quae exeunt ad pascendum. Veruntamen quibusdam terrestribus sunt determinatae, quibusdam non. Determinatas horas habent ad exeundum omnes fere, quae sunt modici volatus, ut modus perdicum et starnarum, fassiani, franquillini, et aliae, quae sunt boni volatus, et maneries columbarum, quae exeunt mane circa ortum solis, et stant in pascuis suis usque circa tertiam, et tunc redeunt ad mansiones suas fructuosas et herbosas. Nam illae, quae sunt modici volatus, pro eo quod sunt modici volatus, et aues rapaces delectantur rapere ipsas pro bonitate carniū suarum, timent esse tota die extra mansiones suas ad pascendum: imo exeunt in mane ad pascendum prope mansiones suas, et redeunt de pascuis circa meridiem, post nonam vero iterum exeunt ad pascendum, et stant in pascuis usque ad occasum solis, post occasum vero redeunt ad suas mansiones ad pernoctandum in eis, et tutius quiescendum. Tamen sciendum vniuersaliter, quod illae, quae in arboribus natae sunt, et mansionem ibi habent, ad arbores redeunt, quae vero in rupibus, ad rupes, quae in fruticibus, ad frutices, quae in terra, ad terram, et sic de caeteris mansionibus omnium auium terrestrium. Sunt et aliae aues terrestres, quae exeunt ad pascendum



dum in nocte bis, scilicet in crepusculo serotino, et matutino, praecipue si nox fuerit obscura, in splendore enim Lunae exeunt, ad praedandum quacunque hora, sicut sunt bubones et modi noctuarum, et vniuersaliter omnes aues, quae de nocte exeunt ad praedandum. Nec istud praedari de nocte faciunt pro eo quod, sicut asserit Aristoteles, de nocte vident, et de die non vident: de die namque vident et de nocte, . . . . . comedunt . . . . .  
. . . . . auium . . . . . in die volare non audent. Imo . . . . .  
. . . . . animalia quadrupedia quae per diem latent, et per noctem exeunt ad pascendum, quae debilis defensionis sunt faciunt hoc . . . . .  
. . . . . eis accidere, videntur enim per diem ab eis quae vellent . . . . .  
nocere, et odoratu sentirentur vestigia sua. Similiter est de huiusmodi auibus, et de pluribus, quae sunt debilis defensionis, faciunt hoc, ne videantur ab auibus aliis sibi nocere volentibus, omnes enim insurgunt in eis et verberant ipsas, unde et aucupes ad huiusmodi aues congregant alias, quas capere volunt, de nocte vero, pro eo quod caeterae aues, quae inimicantur eis, quiescunt in mansionibus suis, tutius volant ad praedandum. Pluribus vero auibus terrestribus non sunt horae determinatae ad exeundum de suis mansionibus ad pascendum in die, sed exeunt mane, vel quacunque hora diurna possunt ad pascendum, et tota die stabunt et volitabunt in suis pascuis, post occasum vero solis redeunt ad proprias mansiones, ut in eis pernoctent securius et quiescant, sicut . . . . . variae. Cornicum modi . . . . . et modi monedularum . . . . . Vultures similiter et ossa . . . . . similes, auiculae terrestres, ut sunt alaudae, couar . . . . . passeris . . . . . faciunt, quod et istae tota die pascuntur, si tempus faueat ipsis, et non habent certam mansionem, adeo sibi propriam, ut caeterae aues supradictae, quamuis postea redeant omnes ad loca, in quibus natae sunt, vel ad similia illis. Sunt etiam aues terrestres, quae pascuntur per diem, et magis a tertia usque ad nonam, quoniam tunc inveniunt escam sibi quam capiunt in aëre, vermes volantes scilicet, apes, vespas, scarabaeos et huiusmodi, ut sunt illae, quae dicuntur syrenae.

## CAPITVLVM X.

*De modo exitus terrestrium ad pascendum, et de reditu, et statu ipsarum.*

**M**odus autem, quem habent aues terrestres in exeundo de suis mansionibus ad pascua, multiplex est, nam quaedam congregatae exeunt in turmas multarum suae speciei, quaedam vero singulariter: congregatae, ut turtures et columbi, praecipue sturni . . . . . quae licet tempore . . . . . se ab aliis masculus cum femina sua ad pullificandum, tamen diligunt societatem, et visae



visae sunt eo tempore . . . . . societate. Singulariter vero volant ad acquisi . . . . . rapaces, et tantum in tempore partus et pullificationis . . . . . mas cum femina, sicut . . . . . caeterae. Quorum rapacium quaedam, sicut quoddam genus . . . . . volando capiunt escam suam, locustas scilicet, bruchos et modum scarabaeorum, quae omnia capiunt non cum rostro, sicut aliae capiebant, sed cum pedibus, et comedunt eos etiam in volando, quoniam non est eis opus occidere huiusmodi escam, neque praeparare: et plures modi auium rapacium, dum iuuenes sunt, comedunt huiusmodi cibos, praecipue modi falconum. Et quaedam terrestres ambulando exeunt congregatae in multitudine, vt modi perdicum, praeterquam in tempore coitus. Aliae vero ambulando singulariter exeunt, vt phasiani et coturnices, nisi quando sunt pulli, tunc enim multi sequuntur matrem, quando exeunt ambulantes ad pascendum. Auiculae vero terrestres volitando exeunt huc et illuc per arbores et dumos et per terram, nam de . . . . . rapaces accipiunt escam. . . . . Vultures vero et illae . . . . . generis habent hunc modum exeundi ad pascendum, . . . . . rupibus, vel super . . . . . prospiciunt circum . . . . . remotis, vt videant aliqua indicia cadauerum, quae indicia . . . . . ab hominibus, si vident eos occidere animalia, vt . . . . . ad cadauer . . . . . lupis et huiusmodi feris, quae venando occidunt animalia. Cum igitur haec indicia viderint, recedunt illuc omnes subito et congregantur ad corpus, et si stantes in rupibus altis, aut super arborem non viderint aliquid de signis praedictis, ascendunt ad aëra in sublimem, circumuolando huc et illuc, vt ad loca magis remota videre possint, et si vnus de ipsis subito descendat ad cadauer, caeteri motus illius cognoscentes, quos facit ad descendendum, subito insequuntur illum, et descendunt congregantes se multi, vbi erit cadauer. Non est ergo tenendum, quod odoratu sentiant cadauer, vt quidam dicunt, sed potius visu, quod expertum est per nos pluries, etenim quando vultures erant ex toto ciliati, non sentiebant carnes proiectas ante ipsos, quamuis odoratum non habebant oppilatum. Experti sumus etiam, quod non rapiunt aues, cum famelici sunt, et videntibus proieciimus pullos gallinae, et non capiebant illos, nec occidebant, et cum intromittant caput suum et collum per strictum foramen cadaueris intus in cadauere extrahendo, quicquid est intus per id foramen, caput et collum eorum est sine pluma, vt in pluribus.

### CAPITVLVM XI.

*De mediis auibus, quibus modis acquirunt sibi escam, quando et quam.*

**M**otus et operationes, quas habent aues mediae ad acquisitionem cibi, multiplex est, nam quaedam discurrendo huc et illuc et velociter locum commutando, acqui-



acquirunt sibi cibum cauando, aut mordicando cum rostro, vt corlini, pluerii, et vanelli et huiusmodi; quaedam ambulando et non discurrendo, sed volando de loco ad locum, quando transmutant loca ad acquisitionem, et cauando scilicet cum rostro, quae sunt sub terra, et mordendo cum rostro, quae sunt super terram, vt grues: quaedam ambulando et piscando cum rostro reptilia, quae sunt sub terra, aut caetera, de quibus viuere possunt, non tamen mordicant cum rostro ad colligendum grana, aut herbas, aut fructus arborum vel herbarum, quoniam de huiusmodi non viuunt, vt sunt ciconiae albae et nigrae et mediae, non natant, sed sunt boni volatus et ab aquis saepe recedunt, et vt maneant in terra, et vt pascantur illic.

## CAPITVLVM XII.

### *De diuersitate ciborum, quibus vtuntur mediae aues.*

**D**iuersitas ciborum, quibus vtuntur mediae aues, talis est: Quaedam viuunt nunquam de rebus aquaticis, sed de campestribus, scilicet de granis, radicibus herbarum, et seminibus fructuum, arborum et herbarum et dumorum et similibus, vt modi gruum, cauant autem libenter radices herbarum, et libentissime yari. Quaedam de vermibus, quos cauant sub terra, et aliquando de illis, quos inueniunt super terram, de locustis scilicet, bruchis et caeteris vermibus volatilibus, et non volatilibus, quos inueniunt etiam super herbas, in pratis, et in paludosis locis, et in terris aratis, vt sunt genera corlinorum, vanelli, pluerii, et speciei suae similes, habentes rostrum longum ad modum corlinorum, quorum maior pars vitae est, cauare sub terra. Littercini vero comedunt saepius scarabaeos, bruchos et huiusmodi. Quaedam comedunt pisces, vermes, et reptilia, et comedunt de animalibus lacertas, ranas, mures et huiusmodi, quae essent hominibus et pluribus animalibus venenosa, vt sunt modi ciconiarum.

## CAPITVLVM XIII.

### *De exitu quarundam mediarum.*

**E**xunt autem de suis mansionibus quaedam de mediis hora indeterminata, mane scilicet vel quacunque hora poterunt, et tota die sunt in locis pascuorum, de quibus viuunt, vt corlini, vanelli et huiusmodi. Quaedam vero bis in die. Illae scilicet, quae habent mansionem et refugium ad aquas, quemadmodum aquaticae, sicut sunt grues, et bis redeunt ad aquas; et illae, quae manent in terra, et habent plus refugium in terra, similiter bis in die exeunt de suis mansionibus ad pascua, vt ciconiae. Quaedam vero non audent exire de die, nocte tamen volant, timent enim de auibus rapacibus, vt littercini et huiusmodi.

CAPITVLVM



## CAPITVLVM XIV.

*De exitu mediarum ad pascendum, et de statu ipsarum in locis pascuorum.*

**M**odus exeundi multiplex est: nam quaedam de mediis exeunt congregate, praeterquam in tempore pullificationis, vt grues, corlini, pluerii, vanelli, et huiusmodi: quaedam diuisim, vt ciconiae, quae solitarie exeunt, et solitarie stant, et solitarie redeunt, liuercini etiam singulariter vadunt ad pascua. Aliae vero confuse et sine ordine, modo solae, modo cum aliis.

## CAPITVLVM XV.

*De reditu mediarum et statu ipsarum in mansionibus.*

**L**oca vero, ad quae exeunt, sunt diuersa, per diuersitatem temporum: generaliter vero omnes vadunt ad loca, in quibus abundant cibi, quibus vtuntur quaelibet species, secundum maneriem ciborum, de quibus viuunt. Specialiter tamen dicitur infra, cum dicitur, vbi inueniri possunt, quando aues rapaces iactari debent ad huiusmodi aues. Redeunt autem quaelibet ad suas mansiones, ad pernoctandum illic, vt tutiores sint a feris, propter quod securius dormiunt: in campis vero per noctem saepius dormiunt vanelli. Ciconiae vero ad turres, aut arbores, aut alia loca alta, grues vero ad aquam, quemadmodum et aquaticae, et vniuersaliter omnes aues redeunt ad mansiones, quas elegit mater in pullificando, elegit enim conuenibiliores mansiones ad tutelam filiorum, et si non habebunt easdem, eligent sibi mansiones similes illis mansionibus, in quae nidificant matres, quaedam tamen pernoctant in campis quiescentes in terris, vt quidam modus columborum, qui habent rostrum croceum, et sunt minores aliis columbis, praeter quasdam, quae pullificant in terra, de nocte tamen ascendunt et permanent in arboribus, vt sunt Fasiani, gallinae et huiusmodi. Dormiunt autem et aues mediae super vno pede, quemadmodum aquaticae et terrestres, tam rapaces, quam non rapaces, propter id quod dictum est.

## CAPITVLVM XVI.

*De transitu auium.*

**Q**uia iam dictum est de auibus non rapacibus aquaticis, mediis et terrestribus, id quod dicendum erat: nunc videndum est de mutatione locorum, quam faciunt aues secundum mutationes temporum. Verum cum duplicem mutationem faciant, scilicet de frigidis locis ad calida, et de calidis ad frigida, dicetur prius de illa mutatione, quam faciunt de locis frigidis ad calida. Hanc enim, postquam . . . et perfectae viribus et pennis . . . faciunt, et haec mu-



tatio est transitus seu passagium; de frigidis namque regionibus transeunt ad calidas regiones, de locis natiuitatis suae ad longinqua. Alia vero mutatio, quam faciunt, est post hyemis tempus, scilicet de calidis regionibus ad frigidas, idque propter hoc dicitur reditus. Sed quia non omnes aues hanc mutationem faciunt, attendendum erit, quae transeunt, et quando et quare transeunt, quem modum habent parandi se ad transitum, quod tempus anni, et quarum qualitatum tempora conueniunt transitui earum, et quae transeunt prius, et quare prius illae, quem ordinem tenent dum volant transeundo, de quibus locis transeunt, ad quae loca descendunt dum transeunt, et ad quae loca transeunt, quare morantur in locis ad quae transierunt, et quam diu.

## CAPITVLVM XVII.

### *Quae aues transeunt et quando.*

**T**ranseunt autem aquaticae, siue sint de illis, quae viuunt de piscibus tantum, siue de illis, quae viuunt de piscibus et aliis rebus aquaticis, siue de illis, quae viuunt de rebus terrestribus, et non de piscibus neque de rebus aquaticis, siue sint de illis, quae viuunt de rebus terrestribus et aquaticis, quae nunquam sunt boni volatus. Mediae similiter transeunt, praecipue illae, quae viuunt de vermibus, quos cauant e terra. Aues autem terrestres . . . . transeunt tam . . . . quam non rapaces, tam magnae quam paruae, non tamen . . . . aquaticis namque de mediis et de terrestribus, illae . . . . modici volatus . . . . aut infirmae, hanc mutationem, praecipue ad loca longinqua facere non possunt. Veruntamen loco huius mutationis, habent aliam ad loca propinqua, vt de montibus ad conualles tempore hyemis, et de vallibus ad montana tempore aestatis; quod faciunt terrestres, vt fasiani, pauones, bistradae, et generaliter omnes secundum plurimum, quae non incedunt binae et binae, scilicet vnus masculus cum sua foemina tempore pullificationis, et tempore hyemis de aquis minus calidis ad calidiores, vt de fluminibus minoribus ad maiora, et de maioribus ad paludes et stagna et lacus, et de his ad quasdam maritimas propinquas, vel ad aquas fontium de profundo venientium, quoniam huiusmodi aquae tunc sunt calidiores, et e conuerso tempore aestatis. Hoc faciunt illae, quae sunt modici volatus, vt modi mergorum et ralli, et illae, quae sunt boni volatus, quando infirmitate aut debilitate detinentur, hanc mutationem faciunt, non ad loca remota, vt praedictum est. Illae autem aues, quae propter infirmitatem transire non possunt, cum sint de speciebus transeuntium, in regione, in qua manent, vocantur Payfanae, et in sua patria commorantes. Aues autem illae, quae nascuntur et inhabitant in India, et in regione, quae est sub aequinoctiali vel prope, illic nidificant, et suos filios nutriunt, donec perfecti fiant, nec indigent vt transeant ad acquisitionem cibi sui alias, neque vt fugiant nimietatem frigoris.



frigoris. Cum enim sol bis accedat ad centrum capitis habitantium illic, et bis recedat, et bis superfit, habent duplex ver, duplicem aestatem, duplicem autumnum, et duplicem hyemem, et ideo fructus, herbas, semina, locustas, bruchos et huiusmodi habent in abundantia, nec frigus hyemale est eis infensum, cum sol non elongetur a capitibus eorum, nisi ex viginti tribus gradibus et minutis. Praeterea cum vere et aestate nutrant et percompleant pullos, quemadmodum et caeterae omnes, si transire vellent fugiendo calorem, vel citra aequinoctialem vel ultra, si est habitatio illic, aut facerent hoc cum motu solis illic, aut e conuerso, si cum motu solis, sequerentur calorem, sed multo magis indigebant fugere, quando maior erat calor, scilicet cum nidificabant et pullos nutriebant, sed tunc non fugerunt, quare neque nunc oportet eas fugere aut transire; nisi forte dicatur de his, quemadmodum et de aliis, quae non sunt de transeuntibus, quod particularem mutationem faciant de conuallibus et planis ad montana et syluosa, et de aquis calidis ad frigidas, vt fugiant calorem, et e conuerso, vt fugiant frigus.

### CAPITVLVM XVIII.

#### *Quare transeunt aues.*

Causae autem, propter quas aues hanc mutationem faciunt, et transeunt ad loca remota, sunt plures, vna principalior aliis, quae est mutatio temporum de calore in frigus; aues enim, sicut et caetera viuientia, esse suum, et suam vitam receperunt ex quadam temperie commixtionis elementorum, et propter hoc, cum temperatum ex temperato seruetur, et ex distemperato calido vel frigido destruitur, ipsae aues ad suum bene viuere quaerunt temperiem aëris et loci, et fugiunt immoderantiam frigoris, immoderantiamque caloris. Vnde vere siquidem et aestate in frigidis locis commode commorantur, autumno vero et hyeme incommodè morarentur in eisdem, propter hoc transeunt tunc ad calida loca, quamuis sint remota. Aliae causae sunt minus principales praedicta, vna videlicet, vt illic inueniant sibi cibum. Nam cum contingat in frigidis regionibus aquas congelari per frigus, et in glaciem firmari, et herbas deficcari, et terram superficie tenus solidari in tantum, quod semina herbarum, et fructus, et caetera, quae ceciderunt in terram, adhaereant et solidentur cum terra, et vermes, qui sunt sub terra, tunc non possunt haberi, imo cum scarabaeorum modos, vermiculos volantes, apes, vespas et huiusmodi oporteat prae nimio labore deesse, necessario aues, quae viuunt de piscibus, rebus aquaticis, herbis, et caeteris praedictis, cuiuscunque generis sint ipsae aues, confugient ad loca calidiora, vbi nec aquae congelantur, nec terrae, nec cibus ipforum deest. Aues etiam rapaces transire oportet, quamuis possunt sustinere frigus melius caeteris, cum sint eis calidiores. Nam vt viuant saepius de aliis auibus cuiuscunque speciei, quas rapiunt, et quas tenere possunt, cum illae aues, quae sunt esca sibi, transeant, et ipsae transeunt sectantes escam suam,



et temperiem aëris etiam. Aues etiam minoris quantitatis, vt cardilli, meruli, sturnelli, maluitii, seu turdi, et huiusmodi auiculae, et propter temperiem aëris, et acquisitionem cibi sui transeunt: sed grues, aprones, anseres, anates, et huiusmodi multo magis propter intemperiem aëris transeunt. Mediae vero, vt sunt ciconiae, corlini, pluerii, vanelli, et quaecunque habent rostrum longum ad modum corlinorum, pro eo quod non possunt cauare sub terra ad inuentionem cibi, et liuercini, qui viuunt de scarabaeis, transeunt ad loca calida, quamuis sint remota, vt illic viuant. Alia causa est, imbrium, ventorum, et niuium abundantia tunc temporis in regionibus frigidis, quae omnia contraria sunt volatui auium et vitae. Alia causa est specialis pro aquaticis auibus et mediis, quae submergunt se in aquis pro timore auium rapacium, et pro timore, quem habent de feris, manent in aquis ad sui defensionem, conuenit vt per frigus congelans perdant hanc suam defensionem, et fugiant ad calidiora loca, transuolent vbi non congelantur aquae. Patent itaque causae, quare transeunt de frigidis regionibus ad calidas, et quomodo illae aues, quae non sunt de transitu, secundum mutationem temporum mutationem faciunt ad loca propinqua.

## CAPITVLVM XIX.

### *De modo quem habent aues parandi se ad transitum.*

**H**abent autem hunc modum parandi se ad transeundum, non statim, quod exeunt de nidis, intendunt ad hoc, nondum enim potentes sunt viribus, nec firmae pennis, vt possint sufficere ad transeundum ad loca longinqua, nec inflat frigus compellens eas recedere, nec carent cibo; donec firmantur in praedictis, hoc est, in fine veris, et per totam aestatem, volitant per regiones propinquas nido, et pascuntur confuse huc et illuc, quandoque cum auibus suae speciei, quandoque cum aliis, quandoque solitarie, recedente vero iam aestate, pro eo quod sentiunt debere aduenire frigidum tempus, dimittunt loca natiuitatis suae, et congregant se cum auibus suae speciei, non solum pulli cum pullis, sed indifferenter iuuenes cum senibus, siue sint pulli earum, siue non, et sic congregatae transeunt et pascuntur in regione . . . . sunt diuisim . . . . . expectando quouisque tempus eis seruiat ad transeundum. Huiusmodi vero congregandi se, praeparandique locum habent, in aquaticis, . . . . . omnibus quae sunt de transitu, et in terrestribus, praeter in rapacibus, sicut dicetur in suo capitulo. De mediis vero terrestribus et aquaticis, adeo verum est, quod se congregant cum multis suae speciei, videtur enim, quod quamuis sint diuersarum specierum, et valde similia, et quamuis pascantur in eisdem pascuis, exeunt quasi mixtae, raro tamen aut nunquam aues vnus speciei commiscebunt se aliis auibus, nec tantum sunt propinquae, sed semper retrahent plus se ad aues suae speciei, quemadmodum est videre in generibus anserum, quae licet vno nomine anseres communi dicantur, et sint plures



plures species anserum, sicut species illarum, quae dicuntur roserae, et species illarum, quae dicuntur Carbonerae, et species berniclarum, et species Iantabum. Ipsae enim quamuis simul videantur in eisdem pascuis manere, tamen se separant illae, quae sunt vnius speciei, ab aliis diuersarum specierum. Amplius, secundum quod frigus successiue et gradatim in quibusdam locis . . . . sic ipsae aues gradatim transeunt de quibusdam locis ad alia, et secundum quod frigus minus potest in vno loco, quam in alio, sic ipsae in parando se ad transeundum, plus morantur in vno loco quam in alio.

## CAPITVLVM XX.

*De tempore anni, et temporum qualitatibus, ipsarum transitui conuenientibus.*

**T**empora vero ventosa, quae conueniunt ad mutandum se ad loca in calore et frigore conuenientia sibi, secundum permutationem temporum, cognoscunt aues quadam vi animae praefaga futuri, et naturali sensu, qui est eis secundum permutationem caloris et frigoris; vnde ad hyemem et aestatem permutant loca ad transeundum. Igitur tempora autumnii conueniunt, est enim tempus autumnii medium inter aestatem, (in qua susceperunt vires, et percreuerunt eis pennae) et hyemem futuram, cuius frigora timent. Elegerunt itaque hoc tempus, cum in eo recesserint a frigidis regionibus, et ad calidas accesserint, priusquam hyems veniat. Cauent a ventis contrariis suo transitui, et ab imbribus et grandinibus, eo tempore in quo non sunt venti, iuuantes autem ventos attendunt, Septentrionales, siue collateraliter siue directe a tergo faueant eis, et hoc attendunt non minus sapienter, quam nautae, cum talibus namque ventis de duobus laboribus, quos faciunt transeundo, vnum in impingendo se, alterum in regendo se in aëre, releuantur, praecipue ab impulsione sua, tales enim venti impellunt aues transeuntes, si enim vtrumque laborem simul haberent, non possent diu volare, nec ad loca longinqua; etiam quando transeunt cum vento, si volunt quiescere alis, possunt, et tamen vadunt, sustinente et prouehente ipsas vento, et si, quando non esset ventus, vellent transire, magnus labor esset eis, et multo maior, si contra ventos transirent, haberent namque tres labores, sustinere se, impellere se, ventis obsistere. Visum est namque, quando transeuntibus repente superuenit ventus contrarius, aut imbres magni, aut grandines, aut alia mala tempora, cadunt in mari, et si aliquae de ipsis tunc possunt ad naues confugere, permittunt se capi, priusquam moriantur, aut quam cum vento contrario retrocedant. Et similiter videmus, quod statim, quod venti, qui iuuant ipsas, adsunt, siue de die, siue de nocte, dimittunt omne id, quod faciunt, siue pascuntur, siue dormientes quiescant, et arripiunt iter suum cum ventis. Vnde et rapaces, quibus proiecimur praedam, iam dimiserunt prae-



praedam, quam sibi . . . . . et comedere volebant, et cum ventis transibant; quae aues non solum de die, sed et de nocte, si eosdem ventos habuerint, transibunt cum ipsis ventis, et famem et laborem sustinent, quousque fauent ipsi venti. Quae autem de nocte transeunt, cognoscitur ex vocibus earum, grues enim, Ayrones, anseres et anates non ex labore volandi, quem sustinent, vt dicit Aristoteles, sed magis, vt aliae alias aduocent, audiuntur de nocte proferre voces per aëra sursum. Adeo autem cognoscunt de tempore et de vento, quod, si viderint, quod tempus et ventus diu debeant durare, et fauere ipsis, quousque transuolent ad loca, ad quae vadunt, iter arripiant, sin autem, non; similiter si debiles volatu sint, non attentant arripere transitum, quousque certae sint de tempore bono prolixiore, imo remanent, vbi sunt, expectantes ad longius tempus . . . . . quod eis sufficiat. Si vero fuerint aues fortes volatu, et sufficientes transire, cum illo modico bono tempore transibunt ad loca, quae petunt.

### CAPITVLVM XXI.

*De ordine et transitu auium secundum prius et posterius, et earum ordine, dum volant.*

**D**e auibus autem, quae transeunt, illae, quae debiliores sunt volatu, prius incipiunt transire et transeunt, vt omnes auiculae, quae naturam habent transire, sicut modi ciconiarum, et modi Ayronum, quae in fine aestatis, scilicet in fine Augusti, transeunt et recedunt, hoc autem faciunt, ne importunitas temporis primitiua eas impediat, si amplius tardent ad transeundum. Aues vero, quae non sunt adeo debiles in volatu suo, vt supra dictae, circa initium autumnii transeunt recedunt, scilicet a medietate Septembris in antea, vt duplex modus gruum, species namque gruum maiorum et species gruum minorum, potentiores sunt sustinere ventos et pluuias incipientes, quam auiculae, quam Ayrones et quam ciconiae. Illae autem, quae sunt fortiores, vltimo transeunt, scilicet circa vltimum autumnii, et hoc est in mense Nouembris, vt anates et anseres, quae ideo, quod possunt melius sustinere ventum, imbres, et alias temporis asperitates, tardius transeunt, adeo enim fortes sunt in volatu, et potentes sustinere frigus, quod tam de quolibet modo anserum, quam Iancarum et Bernicharum, quae similiter sustinent bene frigus, . . . . . per totam hyemem, habentur plures in sexto et septimo climate, inueniunt enim illic herbam, de qua viuunt, et sunt boni volatus, propter quod tardius parant se ad transeundum, et tardius transeunt, sunt enim de fortioribus contra frigus, sunt autem tantae sagacitatis et industriae, quod non solum in temporibus dictis transeunt, sed aliquando citius, aliquando tardius, secundum quod vna aestas breuior est alia, aut secundum quod tempora hyemalia citius incipiunt vno anno quam alio, propter hoc anticipant, aut postponunt suum transi-



transitum quaelibet species, quae potius possunt vel melius sustinere calorem vel frigus, vel aliud malum tempus, secundum qualitatem et quantitatem suorum corporum. Amplius, auium eiusdem speciei, sicut gruum aut aliarum, illae, quae de remotioribus locis septentrionalibus habent transire, pro eo, quod apud ipsas citius incipit frigus, et propter longum iter, quod habent facere, citius properant ad transeundum; illae vero eiusdem speciei, quae a minus remotis locis habent transire, quoniam tardius eis aduenit frigus, et quia breue iter habent facere, tardius incipiunt transire. Amplius, si tempus autumnii fuerit aptum et venti fauentes, sine intermissione transibunt, et citissime complebunt transitum: sed si fuerit ineptum, ut frigus interueniat, et venti non faueant, tardius complebunt transitum suum, expectabunt enim semper, quod illa temporis asperitas pertranseat, et aues, quanto magis sunt prope aequinoctialem, tanto tardius transire incipiunt. Ordinem autem hunc seruant in transeundo; omnes enim illae aues, quae de riuera dicuntur, non confuse volant nec inordinate, quemadmodum volant illae, quae terrestres sunt, nam terrestres non attendunt in suis volatibus, quae prior sit in illa multitudine, aut quae posterior, ipsae vero de riuera ad plus hunc ordinem seruant, vna praecedit, aliae omnes de illa multitudine subsequuntur successiue et in gemina serie, vna series erit a dextris, alia a sinistris, et . . . erunt plures in vna serie, quam in alia, quae appropinquabunt praecedenti, vtrumque in modum linearum, coniungentium ad faciendum quemcunque angulum, et aliquando in vna serie solum. Et istum ordinem seruant non solum in transeundo ad loca remota, et redeundo de illis, verum etiam in exeundo ad pascua et redeundo de pascuis, ut praedictum est. Vna autem praecedit semper, maxime enim in multitudine gruum, non pro eo, quod illa sciat loca, ad quae iturae sunt, et aliae non, sed ut praeuideat nocumenta, et alias reddat vociferando aut deuiando cautiores, reliquae namque in tutela illius, quae praecedit, quae dicitur Dux, assecurantur in volatu suo, sed quoniam labor est illi Duci diu praecedere, non solum per volatum, sed propter sollicitudinem, quam habet, et propter timorem, exit de Ducatu suo, et de ordine, quoniam amplius hunc laborem tolerare non potest, et alia succedit ei in Ducatu, quae vero exeunt, reintrant ordinem aliarum. Non est ergo verisimile, quod scribitur ab Aristotele, quod vna semper sit Dux aliarum; nam si verum esset hoc, non permutaretur Dux, sed semper duceret.

## CAPITVLVM XXII.

*De quibus locis transeunt, et ad quae loca transeuntes descendunt.*

**L**oca autem, de quibus recedunt ad transeundum, sunt secundum plus loca septentrionalia, quantumcunque remotiora esse possunt, in quibus aues possint habitare, et loca etiam septimi climatis, in illis namque locis est maior copia

D

auium



auium aquaticarum et caeterarum, quam in aliis locis citra septimum clima, quod infra patebit. Non solum etiam de illis locis recedunt ad transeundum, sed et de aliis climatibus fere omnibus, scilicet de sexto, quinto, quarto et tertio climate; vt generalius comprehendantur, omnes aues, quae sunt de transitu, per hyemem non remanent in locis, quibus nascuntur, sed de illis locis recedunt et transeunt ad calidiora, nam, si non transirent, male dicerentur de passagio, nisi forte infirmitate aut debilitate detineantur in locis suae natiuitatis. De secundo vero et primo climate, non est opus, quod transeant ad fugiendum frigus, illa nempe climata etiam per hyemem sufficienter calida sunt. Et si de aliquo loco contingat eas transire, transeunt ad loca propinqua, vt praedictum est. Maior itaque pars transeuntium transeunt de locis septentrionalibus, confugientes ad loca meridionalia. Loca vero, ad quae descendunt, dum durat tempus transitus earum, sunt loca conuenientia unicuique speciei earum, scilicet ad aliquam terram, vnde habeant cibum, vel ad insulas. Sciendum tamen est, quod, postquam transire incipiunt, non descendunt, quousque perueniunt ad locum, ad quem transire intendunt, nisi aut necessitate famis, quam habent, aut per fatigationem, aut per ventum contrarium. Descendunt igitur aut per ventum contrarium, vt quiescant a fatigatione, et vires resumant, aut vt pascantur. Sic autem transuolant de regione ad regionem, de insula ad insulam, quousque perueniunt ad loca, in quibus hyemare debent.

### CAPITVLVM XXIII.

#### *De locis, ad quae transeunt, et quare.*

**L**oca vero, ad quae transeunt fugiendo frigus, vt in eis hyement, sunt diuersa,

*Apparet in autographo aliquot paginas hic deesse, quibus auctor de locis, ad quae aues transeunt, et de causis, cur ad illa ipsa transeant, atque de earum reditu videtur disputasse. Quae deinde sequuntur, ad disputationem de auium membris pertinent.*

pulli a generatione, per quam habent comparationes diuersas. Aues enim, si haberent membra sua vnus fere quantitatis, quamuis diuersarum specierum, vniformi essent comparatione contentae, sed cum habuerint membra sua diuersarum formarum ab inuicem, et magis diuersarum a membris auium alterius speciei, necessario varias exercuerunt operationes et multo magis varias ab auibus alterius speciei.

Membra igitur auium, sicut et animalium gressibilium et natalitium, duobus modis fiunt, quaedam consimilia, quaedam officialia. Consimilia sunt, quorum partes eiusdem naturae sunt cum toto, et sunt haec ossa, cartilagine, nerui, ligamenta cordis, venae, carnes et pinguedo, panniculi cutis, plumae, et ungues, de quibus omnibus pauca dicemus secundum se, nisi forsan in tangendo naturam illorum membrorum, quae componuntur ex eis, in consimilibus enim membris, secun-



secundum eorum essentiam, nullam aut modicam habent aues diuersitatem. Officialia vero membra constituta sunt ex diuersis consimilibus, et partes eorum non sunt eiusdem naturae cum toto. Quae officialia distinguuntur ab inuicem et figura, et quantitate, et numero, et positione, et sunt quaedam eorum, quae sensui subiacent, quaedam verò interiora, quae non subiacent sensui, per quae vtraque aues exercent operationes sibi necessarias ad saluationem suam, secundum se, et secundum speciem. Nec est opinandum, quod propter operationes, quas faciunt cum membris, membra ipsa receperint talem suam formam, conuenientem scilicet illis operationibus, sumerent enim causam hoc modo a posteriori, quae potius sumi debet a priori, membra siquidem prius sunt secundum naturam, deinde virtutes, quae manifestantur postmodum per actus et operationes suas, quemadmodum actus per obiecta. Patet itaque, quod operationes posteriores sunt suis membris, cum sint post virtutes, quae sunt post membra, omne enim, quod est posterius posteriore, est posterius priore multo magis. Sed dicendum, quod virtus informatiua materiam, quam habuit in loco debito, naturaliter aptam recipere formas membrorum varias, coaptauit et immisit in materiam huius auis formam membrorum similem membris parentum, quae membra suas virtutes nata sunt tam a materia potente eas recipere, quam a virtute generatiua informante. Praeterea si natura generans membra formasset propter operationes, ad quas appropriata sunt, iam vnā speciem fecisset, vt aliam perimeret, naturam rapacem, vt non rapacem perimeret, ex quo sequeretur, vt vnā speciem creasset ad destructionem alterius, et secundum hoc esset in vna specie beneuola, in altera verò non, imo, quod magis est, in vna fuisset beneuola et maleuola, vnaquaeque enim species inuenit in aliis speciebus, quod sibi est nocuum. Potius ergo tenendum est, quod in vnaquaque specie, et vnoquoque indiuiduo cuiuscunque speciei, sic natura prouidit et fecit de materia conueniente et habili omnia illa membra, quae formare potuit cuique indiuiduo conuenientiora, per quae membra ipsum indiuiduum perficit operationes sibi necessarias. Hinc est enim, quod vnumquodque indiuiduum, ex eo quod habet talem formam in suis membris, cum virtute insita eisdem, appetit operari per vnumquodque membrum, quicquid formae ipsius membri conuenientius est. Membra vero officialia exteriora auium, quae sensui subiacent, in maiori parte sunt huiusmodi, caput, oculi, aures, nares, rostrum, collum, spatulae, artus, latera, venter, et anus, coxae, tibiae, pedes, digiti, dorsum, lumbi, branchiae, cauda, perunctum, et alia huiusmodi. Interiora vero sunt, panniculi velantes cerebrum, cerebrum, nucha, lingua, et alia membra, quae sunt in ore, canna pulmonis, pulmo, cor, casula cordis, diaphragma, item isophagus, gorgia, et intestina, stomachus, splen, epar, renes, testiculi, matrix, et alia plura intrinseca, de quibus omnibus nostri propositi non est dicere; cum neque velimus dicere omnes operationes, quas aues faciunt secundum quaelibet sui membra, illorum vero membrorum officialium exteriorum et



interiorum varietatem maxime ponamus, per quae membra defendit se a nocu-  
mentis, et per quae conuersari habet in propriis habitaculis, et per quae sustenta-  
tur in aëre, et per quae mutat loca, et illa, quae necessarium est scire in tractatu  
nostro de aegritudinibus. Habent siquidem aues membra propria praedictis ope-  
rationibus, hoc autem multipliciter, aut enim vnum solum membrum vni soli ope-  
rationi deditum, aut vnum pluribus, aut plura vni, aut plura pluribus. Et nos  
etiam prolixitatem fugere volentes, et quoniam ad nostrum propositum non spe-  
ctat, non dicemus inquisite omnia de naturis membrorum, sed illa, quae nostro  
proposito pertinent, et a capite sumemus exordium.

Caput est membrum continens cerebrum, instrumenta sensuum, est autem  
constitutum de ossibus multis, craneo videlicet, et aliis multis, de lateribus et  
neruis praebentibus sensum et motum, de panniculis et de aliis pluribus officiali-  
bus membris deputatis sensui, de oculis scilicet ad videndum, de auribus ad audi-  
endum, de naribus ad odorandum, de rostro et lingua ad gustandum. Est autem  
caput magni et necessarii iuuamenti, continet namque id, a quo virtutes sunt prin-  
cipales, et sensibiles, et motivae, et iuuat in eo, quod continet instrumenta sensus.

Aues autem diuersarum specierum, et etiam eiusdem speciei, magnam ha-  
bent differentiam in capite, scilicet in quantitate, figura, in numero partium sua-  
rum, et in positione earum. Sunt enim aues magni capitis, respectu sui corpo-  
ris, vt modi bubonum et noctuarum, pluerii, vanelli, et aliae plures. Aliae  
sunt parui capitis in relatione ad suum corpus, vt modus vulturum, bistardae,  
pellicani, cinni, et aliae plures. Aliae habent caput proportionatum, conueniens  
reliquo corpori, vt gallinae, columbae, et huiusmodi. Item quaedam habent  
caput oblongum, vt anseres, cinni, et aliae plures, et in eadem specie sunt, quae  
habent caput oblongum, quaedam magis, quaedam minus. Aliae habent caput  
rotundum, vt corlini, vanelli, pluerii, modusque auium cauantium sub terra ver-  
mes, quae, quamuis sint longi rostri, nihilominus sunt capitis rotundi. Item  
quaedam aues habent caput sine plumis, quaedam vero inuestitum plumis, quae-  
dam in capite carent plumis et lanulis, vt auis, quae dicitur galeranus niger cam-  
pester, habens rostrum et crura nigra, et sicut galeranus varius ex albo et nigro,  
qui libenter in Syria et in Aegypto, et in orientalibus partibus sunt, huiusmodi  
enim in toto capite et vsque ad medietatem colli, carent plumis et lanulis, et qui-  
dam modus auium comedentium cadauera, quae sunt albae, habentes extrema-  
tem alarum nigram, croceum colorem secundum rostrum vsque ad medium capi-  
tis, hae carent plumis et lanulis; grues etiam in vertice capitis carent plumis,  
quamuis habeant pilos plures supra caput, aliae vero carent plumis supra caput,  
veruntamen habent illic lanulas, vt sunt genera vulturum, praecipue alborum.  
Illarum autem, quae habent caput plumosum, aliae habent caput omnino sine  
crista, vt aues in maiori parte, aliae habent caput cristatum. Habentium vero ca-  
put cristatum aliae habent cristam carneam et tenuem, desuper incisam in mul-  
tis



tis locis, vt galli, qui habent cristam rubeam super caput, et sub faucibus ad modum barbae, et sicut sunt quaedam aues aquaticae, habentes rostrum rubeum, crura et pedes, dictae anates de faraone, quae sunt variae, ex albo, nigro et rubeo, habent enim inter nares et frontem quoddam tenue carneum rubeum eleuatum ad modum cristae, non tamen incisum, sicut est galli cristae, et sicut sunt masculi cuiusdam modi cinnorum, habentium rostrum rubeum, ipsi namque habent super rostrum inter nares et frontem quoddam molle carneum eleuatum ad modum vnus auellanae, quae dicitur cristae eorum. Aliae habent plumas eleuatas in medio capitis ad modum cristae, vt vpupae, et modus quidam psittacorum, qui apportantur de India, de hoc enim modo vnus misit nobis Soldanus Babyloniae, albam pennam et plumas superioribus, sub lateribus vero tendentem ad croceum colorem, et quaedam habent plumas eleuatas per longum in medio capitis, et perlongatas ad modum crinium vsque ad dorsum, vt omnes modi Ayronum. Modus vero Bistardarum, quae habentur in desertis, habent pennas eleuatas in medio capitis per longum vsque ad dorsum, ad modum crinium seu trizarum. Aliae vero habent plumas eleuatas super caput dextrorsum et sinistrorsum ad modum cornuum, vt sagiani, bubones, et noctuarum modi. Aliae habent plumas eleuatas super caput dextrorsum et sinistrorsum, et praeter hoc plumas dependentes vtrinque a faucibus versus collum, vt quoddam genus mergorum. Et aliae habent in medio capitis tres pennas descendentes inferius versus collum ad modum barbae. Eleuatio autem harum plumarum super alias apparet euidentius, quando aues timent aut irascuntur, nam horripilant plumas, huiusmodi etiam plumae in vere magis . . . cunt et apparent. Item sunt quaedam aues, quae habent super caput suum quoddam durum eleuatum ad modum cornu, vt illae, quae vocantur gallinae de India. Item quidam visi sunt super habere . . . caput quiddam durum, vt . . . de simile speroni suorum . . . et aliquando duo cornua. Sunt praeterea et aliae plures diuersitates capitum in auiibus, tamen parum aut nihil ad propositum valentes.

## CAPITVLVM XXIV.

### *Sequitur de oculis.*

**O**culi sunt instrumenta visus, de quibus, quare sint duo, quare in prora capitis locati, et quare altius instrumentis aliorum sensuum, et quomodo constant ex tribus humoribus, septem tunicis, dictum est in libro animalium. Iuuamentum autem oculorum est videre, per quam actionem animal praeuidet sibi nocuum et necessarium, vt illud fugiat, et hoc eligat. Differentia autem auium, quantum ad oculos, multiplex est, in quantitate, colore et forma, quaedam enim aues sunt magnorum oculorum in comparatione ad quantitatem corporis, quaedam parvorum, quaedam mediocrium, et quaedam sunt nigrorum oculorum penitus, vt



modi falconum, sed nigredo pupillae in talibus intensior est nigredine albuginei humoris, et quaedam sunt oculorum glaucorum in circuitu pupillae, quae nigra est, ut genera accipitrum, et niforum, quaedam sunt aliorum colorum, et aliae mutant colorem in oculis secundum mutationem aetatum. Oculi autem auium, ut in pluribus, clauduntur palpebris inferioribus, quae sunt in eis longae, et sufficientes ad hoc, et quarundam auium oculi clauduntur a superiori et inferiori palpebra, carent autem palpebrae pilis; et aues superinducunt velociter suis oculis ad mundificationem ipsorum quandam pelliculam palpebralem, et velociter retrahunt eandem. In oculis vero non minor est diuersitas, sed ad praesens non ad propositum. Cilia autem, quae sunt multum prominentia super oculos ad defendendum ipsos, in auibus rapacibus sunt detecta, et plumis carentia, dura, et sic tenuia, ut fere incidant: in aliis vero auibus sunt minus prominentia, et sunt plumosa.

## CAPITVLVM XXV.

### *De auribus.*

**A**ures auium sunt instrumenta auditus earum, quae sunt foramina duo post oculos, tendentia ad occiput. Ista duo foramina sunt intrinsecus tornatilia, ut torcular, sunt in osse petroso, vnum a dextris, alterum a sinistris, nec habent exterius cartilaginem, quae auricula seu buccina auris dicitur, quod fit in illis auibus solum, quae sunt de genere bubonum et noctuarum, et in quadam aue, quae dicitur Vhan, hae enim habent pelliculam circa foramen auris, quae, quando replicatur, praetendit formam buccinae auris humanae patentis semper. Aures auium tectae sunt in circuitu in quibusdam plumis, et in quibusdam pilis duris. Iuuant autem aures in eo, quod per eas auditur, et auditu perpendit auis, ex sono scilicet, delectabile vel detestabile.

## CAPITVLVM XXVI.

### *De naribus, rostro, humeris.*

**N**ares sunt duo foramina in superiori parte rostri, vnum in directo alterius, quibus perficitur odoratus et eisdem anhelatur, et per eas emittuntur superfluitates venientes a cerebro, vnde et vtrumque illorum foraminum interius habet duas vias, vnam tendentem ad caput, alteram tendentem ad palatum, illae autem viae, quae tendunt ad palatum, in ipso palato vno longo foramine sunt contentae, quod foramen respicit versus cannam pulmonis. Iuamentum autem narium iuxta descriptionem earum positum est. Aues enim habent diuersitatem in naribus, nam in quibusdam nares sunt rotundae, in quibusdam oblongae, in aliis perfractae extrinsecus, ut in auibus aquaticis, in aliis est cartilago media inter vtramque narem, et in quibusdam auibus caruncula est intus in naribus, in aliis prominens vsque foras,



ras, vt in modis falconum, in aliis interius depressa et subiacens, vt accipitribus, et in quibusdam auibus non est caruncula in naribus, et quaedam aues habent nares opertas in circuitu pilis duris, vt corui et huiusmodi, et quaedam non opertas, et quaedam habent nares suas interius tornatiles in modum testae limacis, vt porfirae, et quaedam non sic, sed recte perforatas, sunt et aliis multis modis nares et carunculae auium, quos modos diligens inquisitio facile inueniet. Inter nares vero et oculos quidam locus est in rostro mollis, et cedens tactui, habens cutem desuper, et duos panniculos subtus, vnum desuper alium, et sub illis est via patula, quae praetenditur a naribus vsque versus cerebrum, et illinc transit superfluitas a cerebro veniens, et alia via tendens ad palatum.

Rostrum est membrum corneum in capite auis positum, cum quo sumit cibum, constat autem ex duabus partibus, superiore et inferiore, quae sunt ei loco mandibularum in aliis animalibus, continentium dentes, parte superiori rostri contiguatur palatum, parti inferiori adhaeret lingua non tota, et subper iacet ei. Omnes aues mouent inferiorem partem rostri sursum, et superiorem deorsum, quando scilicet est eis necessarium, quamuis Aristoteles dicat contrarium: hic vero modus in auibus raro est manifestus in rapacibus, sic et in psitaco. Maxime autem iuuantur aues omnes ex suo rostro in accipiendo cibum, in trahendo in os suum, in perungendo pennas suas, in scalpendo, vbi prurit et possunt attingere cum eo, et generaliter omnes defendunt se cum rostro a volentibus nocere eis rostro, et discernunt durum et molle, asperum et lene, tactus enim quamuis sit communis omnibus membris, magis vtuntur in tangendo rostro, digitis et vnguib. Diuersantur autem aues in substantia rostri, forma, quantitate et caeteris. Aliae enim habent rostrum durioris substantiae, vt rapaces, picones, ciconiae, grues, ayrones et huiusmodi, aliae mollioris, vt turtures, columbae domesticae, et faecha et plures aliae. Aliis sunt rostra adunca, aliis recta, et aliis acuta, aliis dentata, et aliis non, et aliis ferrata, aliis non. Sunt et aliae plures formae, quarum omnium exemplum facile est inuenire, et ex supra dictis poterunt plura perpendi. Aues aquaticae natantes, quae vtuntur piscibus et non alio cibo, habent rostrum suum talis figurae, quod conueniebat eis comedere pisces, habent enim in rostro, vnde iuuantur contra lubricitatem piscium, pisces equidem sunt lubricantes, et aqua facit ipsos amplius lubricare, et subtus fugere, sicut videtur in pellicanis, qui habent rostrum longum et latum, asperum deintus, supra et infra, et in extremitate extrinseca superiori quasi vngulam recuruam, duram et scindentem, cum qua capiunt pisces, et proiciunt intus in pelliculam, quam habent adhaerentem inferiori parti rostri quasi saccum, quae pellicula apta est aperiri et claudi, in eam namque pisces incidunt quasi in sagem, eo enim, quod longum habent rostrum non dentatum, neque incisum in alterutram partium, facile pisces poterant euadere, propter quod adfuit illa pellicula, in quam incidunt et retinentur quasi in . . . . . Modi etiam mergorum habent rostrum cum aptitudine, qua iuuantur



iuuantur in piscatione, habent enim rostrum aliquantum longum et rotundum, in extremitate curuum et acutum plus pellicano, dentatum supra et infra vtrique, subteriori vero parti rostri adhaeret pellicula, quemadmodum in pellicanis, non tamen tanta in proportione sua, quanta in pellicano. Similiter in aliis auibus aquaticis, quae viuunt piscibus, rostrum habet suam aptitudinem ad capiendum et retinendum pisces, verbi gratia ayrónes habent rostrum longum, obrotundum, acutum, anterius incisium, asperum, vtrique dentatum. Aquaticae vero, quae viuunt herba, secundum plus habent aptitudinem rostri, qua secant herbas, scilicet rostrum dentatum interius, subtus et supra, etiam in lingua habent denticulos ad melius incidendum, quas incisas immittunt postea per isophagum ad ventrem. Vniuersaliter autem aues aquaticae, mediae et terrestres, viuentes de herbis, granis, et seminibus, vtrique habent rostrum aptum, vt colligant, transglutiunt. . . . . aquaticae habent rostrum . . . . . concauum et in mar . . . . . quasi ferratum, vt sunt modi anatum, quae, collectis cibis in rostro suo, commouent rostrum, quasi masticarent, et hoc faciunt ex vtroque latere rostri, vt exeat limus terrae et caeterae superuacuitates, quas colligunt cum granis et seminibus et alio cibo. Terrestres etiam, quae viuunt granis, habent rostrum aptum, obrotundum et intus concauum, vt perdicum modi, cōturnicum, et huiusmodi. Sed etiam de auiculis habentes rostrum durum, de granis, quae colligunt, aptitudine rostri sui rumpunt corticem, et assumendo eiiciunt medullam, vt passeris, cardilli, pſitacus, et huiusmodi, et hoc accidit, vt melius digerant, quia sunt pauci caloris: sed habentes rostrum molle, non habentes aptitudinem eius ad rumpendum corticem, transglutiunt grana cum cortice, tam dura, quam mollia, vt columbae, turtures, fakecha, et plures aliae rostri mollis, quae habent calorem multum. Terrestres vero, quae carnibus viuunt solum, habent aptitudinem rostri ad hoc et vngues pedum iuuant ad hoc idem, quia non possunt ferre granum cum rostro, habent namque rostrum durum, aduncum, incisium et dentatum, vt falcones et huiusmodi, non dentatum, vt accipitres et similes. Quae vero terrestrium comedunt grana et carnes, habent aptitudinem rostri ad colligendum grana, et ad dilacerandum carnes, vt sunt corui, cornelli, cornicularum modi, picarum et monedularum, et similibus, habent rostrum incisium et apertum pro carnibus incidendum, pro grano colligendo. Aues vero mediae habent rostra sua diuersimode apta, nam aliae habent rostrum concauum, intrinsecus longum, durum, anterius non perfecte acutum, cum quo cauant terram ad extrahendum radices, vt modi gruum. Sed illae mediae, quae viuunt vermibus, quos cauant sub terra, habent rostrum conuenientis formae ad sumendum sibi cibum, istarum namque aliae habent rostrum longum, gracile, et anterius obrotundum et durum, vt quidam modus corlinorum, et aliae habent acutius, vt pluerii et vanelli, et aliae habent rostrum longum et curuum ad inferius, vt alius modus corlinorum, et aliae habent longum et rectum, et in extremitate aliquantulum curuum,



curuum, vt . . . . . picaciae et huiusmodi, et aliae habent . . . . .  
 et acutum anterius, vt pluerii, vanelli, et aliae habent longum, gracile et . . . . .  
 recuruum, quae vero habent rostrum molle, . . . . . limo molli. Ha-  
 bentium vero longum et gracile rostrum, aliae habent minus longum, aliae ma-  
 gis, tamen habent vtraeque anterius durum et grossum, in modum clauae, quae  
 molliorem habent interiorem partem rostri, et mediam, et vsque versus caput,  
 quam anterius, per quod molle discernunt, an sit cibus eorum, quod cauauerunt  
 subter terram, visu namque discernere non est eis aptum, cum non videant ter-  
 ram dum cauant; sed illae, quae colligunt grana, et alium sibi cibum super ter-  
 ram, visu discernunt inter cibum eorum et non cibum, nec habent rostrum tam  
 molle, quod gustu possint discernere bene inter cibum et non cibum. Aliae etiam  
 formae rostrorum sunt multiplices, per quas diuersimode assumunt sibi cibum,  
 quas difficile esset enumerare et longum.

De crista vero, quae superest capitibus, et subest faucibus in quibusdam  
 auibus, et de cornibus etiam, quae nascuntur super capita quarundam auium, di-  
 ctum est, quomodo se habeant, in capitulo de diuersitate capitum, de eo vero  
 quod superest rostro dicetur, vbi dicetur de rapacibus. Collum vero est mem-  
 brum, quod sustinet caput, et est medium inter humeros et caput, et constat ex  
 pluribus partibus, quoniam continet cannam pulmonis, isophagum, venas, ar-  
 terias, nervos, lacertos, spondiles multas coniunctas inuicem, ligamentis conti-  
 nuatas. Habuit autem collum plures spondiles, vt sustinendo caput per suas iun-  
 cturas et flexiones, portaret caput dextrorsum, sinistrorsum, sursum et deorsum,  
 ante, retro, ad voluntatem auis, mediantibus musculis et nervis ab occipitio  
 descendentibus, et hoc est iuuamentum colli. Diuersitas autem auium in collo  
 multiplex est, quaedam enim habent collum longum, et harum quaedam plus,  
 quaedam minus: aliae habent collum curtum, et harum quaedam magis curtum,  
 quaedam minus curtum. Item aliae habent collum grossum, aliae gracile, et aliae  
 plumosum, aliae sine plumis, lanulosum tamen. Quantitas autem colli in omnibus  
 auibus vniuersaliter posterius protenditur a capite vsque ad principium dorsi, an-  
 terius vsque ad furcam pectoris, et dextrorsum et sinistrorsum vsque ad humeros.  
 Longum collum habent plures de auibus mediis, vt modi gruuum, et ciconiarum,  
 et aues aquaticae natantes, non submergentes se penitus, habent longum collum,  
 vt modi cinnorum, et pellicani, et anseres, et non natantes, vt ayrones. Lon-  
 gitudinem autem colli, aut rostri, aut vtriusque simul necessaria fuit habentibus longa  
 crura, cuiuscunque modi sint, maxime pascentibus super terram. Cum enim cor-  
 pus sustentetur ab altis cruribus, non possent colligere sibi cibum de terra, nisi  
 haberent longitudinem in collo, et in rostro, aut in vtroque; non tamen illae,  
 quae habent hanc longitudinem, necessario habent longa crura, cinni namque,  
 pellicani, et anseres longitudinem habent in praedictis, tibias tamen curtas.  
 Breue tamen collum habent aues terrestres in maiori parte, et breuius, quam aqua-



ticae et mediae: sed breuissimum omnium habent bubonum et noctuarum modi, et caeterae aues rapaces; et ideo habent collum fortius, quoniam cum paucioribus iuncturis, ex hoc sequitur, quod trahunt validius cum collo, quam non rapaces, cuiuscunque generis et modi sint. Grossum collum habent multae auium, quemadmodum masculi et foeminae bistardae, sed masculis ingrossantur multo amplius tempore coitus, vt, quicumque viderit, possit iure admirari, nam aliis temporibus ad consuetam grossitiem reuertitur, foeminis vero tempore coitus et aliis temporibus est eadem grossities, cur autem hoc eueniat, inquirendum relinquitur audienti. Gracile collum habent modi corlinorum et ayronum. Plumosum collum habent fere omnes aues, sine plumis vero, vt modus vulturum. Omnes aues, dum volant, tenent collum extensum, praeter pellicanum et ayronem, qui collo replicato ad se et contracto volant, ayrones tamen, quando propter timorem conantur, volando extendunt collum. Humeri autem seu spatulae sunt, quibus coniunctae sunt alae, et inter humeros collum descendit ad reliquum corpus; sunt autem duo humeri, vnus ad dextram, alius ad sinistram, et sunt altiores lateribus, et ab ipsis incipit distinctio alarum a corpore. Constant autem ex tribus ossibus, neruis, musculis, ligamentis et chordis; ossa vero tria concatenata sunt et colligata in humero hoc modo, os furculae, quod incipit ab initio altitudinis pectoris, eidem priori alligatur quadam distantia suis cartilaginibus, suisque ligamentis, quod os furculae ab illo loco bifurcatur, et vnum protenditur collateraliter a collo vsque ad humerum, alterum ad alterum humerum, et sic collum intercipitur inter vtramque extremitatum cuiusque horum, coniuncta sunt autem ad duo ossa colligata sibi inuicem in eodem loco suis ligamentis, et illic faciunt angulum, nam vnum, quod in extremitatibus suis est angulosum, sed in medio rotundum, descendit ab illa coniunctura et protenditur ad vnum principii pectoris ex sua parte, et ei contiguatur cartilaginibus mediis et aliis ligamentis, alterum vero protenditur ad dorsum, et supponitur costis prope spondila dorsi, hoc autem est curuum, et latum, et debile, nullam penitus habens coniuncturam ligamento speciali, neque colligationem alicui de ossibus in parte illa, vbi autem coniuncta sunt sibi inuicem haec duo ossa ex parte alae, quodam modo sunt concaua, angulosa et cartilaginosa, et in eorum concauitate vertebrum primi ossis alae, quod os medici dicunt arnum, locatum, et locatur et mouetur secundum motus diuersos sursum et deorsum, ante, retro. Haec autem duo ossa in coniunctione sua alterius ossis, quod est de furcula pectoris, constituunt humerum, cuius humeri iuuamentum est, vt ala firmetur in eo, tanquam in sui centro, circa quod habent suos motus, et expositione ossium spatulae, ala in suis spatulis motibus detinetur, vt nec plus debito supra ascendat, neque infra plus, quam est necessarium, descendat, neque ante neque retro plus debito relaxetur. Differentia auium in spatulis si tangatur, parum prodest.



## CAPITVLVM XXVII.

*De alis.*

**A**lae sunt membra, per quae volatilia habent volare. Sunt autem duae in auibus, alia dextra, alia sinistra, et sunt in auibus ad modum brachiorum in hominibus, et anteriorum crurum in quadrupedibus, constant autem ex pluribus ossibus coniunctis inuicem successiue, et ideo plures habent iuncturas, quare melius reflectuntur, et non solum ex ossibus constant, sed ex nervis, venis, arteriis, musculis, chordis, et caeteris ligamentis; ossa hoc modo sunt ordinata. Loco, qui dicitur humerus, coniungitur quoddam os, quod medici dicunt armum, et vbi finit istud os, coniunguntur sibi alia duo ossa, quae dicuntur focilia, quae sunt distincta et separata ab inuicem in medio ipsorum, sed in extremitatibus sunt coniuncta et colligata, et, vbi finiunt haec duo focilia, coniungitur ei reliqua pars alae, quae videtur in auibus loco manus in omnibus, et continet in se et contiguit plura ossa in diuersas iuncturas minores, ordinata hoc modo: primo sunt ossa minora, collocata super vertebrum illius ossis, quod coniungitur focilibus, repleta vacuitates illius iuncturae illic, et iocantia, quorum vnum exit longe extra alam, in auibus, quae percutiunt cum alis, et est durum, cum quo se defendunt et pugnant ipsae aues, quae habent ipsum foris prominens, vt in anseribus et cinnis, et in paruis paruum, et in magnis magnum. In hac reliqua parte est vnum os paruum semotum ab aliis, et hoc videtur esse loco pollicis, habens in sui extremitate forinseca quoddam subtile durum et acutum, in modum vnguis. Est et aliud os super isto gracile et debile, super quod quodammodo appodiat se pollex, sub isto gracili est aliud os grossius, vnum in suis extremitatibus, diuisum autem in duo et fenestratum in sui medio, et vbi finit iunctura, alia duo ossa breuia, vnum latius reliquo, extremitati vero latioris, quod est supra paruum, coniunctum est os vltimum alae, paruum et strictum. Haec est ordinatio et coniunctura ossium.

Replicationes autem partium alae hoc modo fiunt: quando ala reducta et recollecta est ad corpus, pars illa, in qua est armus, descendit ab humeris iuxta latus, inferius versus ancham, sequens vero pars, quae incipit a fine armi, et est locus cubiti, ascendit ad superius iuxta latus primae partis, reliqua vero tertia pars alae descendit ab illo loco, qui dicitur impulsorium alae, et gallice dicitur le bout, vsque inferius. Fuerunt autem in alis ad melius esse plures iuncturae et reflexiones, et non vna tantum, nam si vna fuisset, aut esset longa, aut brevis, si brevis, non esset sufficiens sustentare corpus auis, neque facere, quae pertinent volatui: si longa, non replicaretur ad corpus conuenienter, nam si replicaretur ad inferius, pertransfret caudam, et impediret sessionem auis, si ad superius, pertransfret caput, et pennae alae essent apertae et non coopertae inuicem, nec essent tamen idoneae ad sui operationem, pro eo enim, quod aues in diuersas partes habent se mo-



uere necessario, scilicet dextrorsum, sinistrorsum, ante, retro, sursum et deorsum, si alae essent contractae vna iunctura sola, non conueniret ad variandos hos motus, et si plures habuissent iuncturas, quam habent, cum illae, quas habent, sufficiant ad suos motus diuersificandos, alae essent debiliores, cum omne membrum debilius sit, quanto est plurimum iuncturarum, et essent impedimento cooperturae, quam faciunt pennae alarum inter se inuicem, et quarta iunctura si adesset, non replicaretur ad corpus, sed esset de foris, cuius pennae non essent coopertae sub aliis pennis, vt conuenit, et si essent de foris, essent impedimento pennis, quae non essent sub coopertura, et illae extremae pennae, quae deberent descendere inferius, ascenderent superius, et esset inconueniens. Alis autem insunt pennae maiores per longum extremitatis posterioris earum, et plumae minores insunt alis supra et infra, eo modo, qui dicitur in capitulo de plumagio. Mouentur autem multipliciter secundum voluntatem auis, scilicet sursum, deorsum, ante, retro, extensiuè, et contractiuè, sunt autem hi motus diuersi per alios et alios lacertos alarum, motus namque, qui fit ante, fit per lacertos anteriores, retro vero per posteriores, sursum per superiores, deorsum per inferiores, qui veniunt ab ala vsque ad pectus, extensiuus vero motus alae, et contractiuus seu replicatiuus, per alios et alios lacertos fiunt. Auis autem, quando volat, motum alae ad superius non facit, nisi gratia inferioris faciendi, ad hoc enim exaltat alam, vt ab alto descendat infra melius, et validius, et quae auis altius extollit alas, et magis ad superiora dorsi replicat, motum inferiorem alarum validiorem faciet, per quem motum subleuatur auis, impellitur et defertur, et quia hic inferior motus fit per lacertos ab alis venientes ad pectus, quarum auium grossiores et fortiores erunt hi lacerti, earum erit etiam hic motus validior, et per hoc impellitur fortius et velocius in volatu suo, de qua re syllogizabo sic: Omnis auis habens grossiores et fortiores lacertos ab alis ad pectus, habet velociorem et fortiorem hunc motum in alis; Omnis auis habens grossius et densius pectus, habet grossiores et fortiores lacertos ab alis ad pectus: igitur omnis auis habens grossius et densius pectus, habet grossiores et fortiores et velociores motus in alis, et quaecunque habent huiusmodi motum, fortius et velocius volant. Amplius, motus vniuscuiusque alae, qui fit ad volandum, est quasi pars circularis motus, et omnes pennae maiores alarum mouentur similiter motu, qui est pars circularis motus, sicut namque ala facit in suo motu portiones circuli, sic et quaelibet penna alae facit suam circuli portionem, et quae penna propinquior est corpori, facit portionem circuli breuioris, quae vero remotior, maioris et amplioris, et portiones circuli, quas faciunt singulae pennae, sunt de circumferentiis aequidistantibus, et ala, quae facit portionem maioris ambitus, et magis distat a corpore auis, iuuat magis subleuari aut impelli et deportari, quod ait Aristoteles in libro de ingeniis leuandi pondera, dicens, quod magis facit leuari pondus maior circulus. Iuuamentum autem alarum est in eo, quod per motum suum fit volatus, quo volant aues, mutant loca ad acqui-



acquisitionem cibi et aëris sibi conuenientis, et quo fugiunt nocumenta. Et aliquae aues defendunt se cum alis et pugnant, et per motum etiam alarum subleuatur corpus auis ad aëra, impellitur et deportatur, et per reductionem et replicationem alarum ad corpus, pars dorsi et latera ab importunitatibus aëris proteguntur. Differunt autem aues in alis multipliciter, nam quaedam habent alas breuiores respectu sui corporis, quaedam longiores, quaedam proportionales. Rursus quaedam habent alas longas et pennas alarum longas, quaedam habent alas longas, et pennas alarum breues, et quaedam habent breues alas, et pennas alarum longas, et quaedam habent breues alas, et pennas alarum breues, amplius quaedam habent alas ad similitudinem falcis, multum scilicet falcatas, et quaedam extensas, et non multum falcatas. Sunt et aliae differentiae alarum, sed, quae dicta sunt, nunc sufficiant.

### CAPITVLVM XXVIII.

#### *De dorso.*

**D**orsum est illud membrum, quod ab inferiori extremitate protenditur vsque ad lumbos, inter alas et latera. Est autem ossuosum, quoniam constat in sui medio per longum ex spondilibus, quae sunt post spondiles colli, vsque ad principium spondilium lumborum, et vtrinque constant iuxta suos spondiles ex . . . . varione, quam faciunt costae cum spondilibus dorsi. Iuuamentum autem eius est, vt defendat corpus a posteriori. Diuersitas auium in dorso in eo est, quod quaedam sint amplioris dorsi, quaedam strictioris, et quaedam longioris, et quaedam breuioris.

### CAPITVLVM XXIX.

#### *De lumbis.*

**L**umbi vero protenduntur a fine dorsi vsque ad caudam, et sunt duo, dexter et sinister, et in sui medio continentur spondiles a fine dorsi vsque ad caudam, et vtrinque continent ossa lata, concaua defubtus, quae dicuntur ossa anchorum, habentia circa sui medium quandam concauitatem, quae vocatur Scia. Iuuamentum autem lumborum est defendere renes ab exterioribus nocumentis, et vt vertebra ossium costarum firmentur in foraminibus anchorum.

### CAPITVLVM XXX.

#### *De cauda.*

**C**auda vero auis dicitur, quod superest ano, protensum exterius, constans ex spondilibus exterioribus spinae, extenditur autem vlterius dilatando, et innascuntur in ea pennae maiores. Iuuamentum autem caudae dicitur, vbi tractatur



de plumagio. Aues verò in pluribus, quae habent longum corpus, habent breuiorem caudam, sed quae habent breue corpus, caudam longam.

### CAPITVLVM XXXI.

#### *De peruncto.*

**P**erunctum est quoddam membrum, quod superest caudae, constitutum ex geminis quasi glandibus, in medio illarum prope finem est quoddam neruosum, durum, eleuatum ad modum virgae. Iuuamentum enim huius peruncti est, recipere a reliquo corpore humiditatem virulentam, quam receptam et in ipso congregatam auis, cum opus fuerit, comprimendo cum rostro suo fuget, et cum eodem rostro pennas suas et ungues perungit, quatenus pennae melius possint resistere madefactioni, aqua enim pluens super pennas perunctas minus adhaeret eis, et integrius et lubricabilius descendit, et pennae saniores seruantur et ungues, rapacium vero ungues ex peruncto citius vulnerant, et sunt causa citius interficiendi praedam, inferunt enim per hoc vulnera venenosa. Diuersantur autem aues in peruncto, nam aquaticae generaliter multum habent de peruncto, et magis quam mediae et terrestres.

### CAPITVLVM XXXII.

#### *De pectore.*

**P**ectus est membrum sub sui medio continens cor et defendens ipsum; ab anteriori parte eleuatum, prominens in medio sui per longum exterius, deintus autem concauum. Est vero ossuosum, hoc autem os strictum est, forte et eleuatum in modum parietis in medietate sui; pars vero ossis pectoris altera a dextris, altera a sinistris subiacet, et hoc os in superioribus partibus sui, in quibus coniungatur cum furca pectoris et cum ossibus spatularum, densius et solidius est, in inferioribus vero partibus sui, vbi coniungitur loco, qui dicitur ouaria, mollius est et cartilaginofius, ramificatum autem est et distinctum in plures ramos ossuosos, in partibus illis, in quibus coniungitur lateribus. De continentia etiam pectoris sunt lacerti, venientes ab vtraque ala ad pectus vtrinque, et propter hoc conuenienter descendebat os pectoris ab vtraque parte, vt illi lacerti reuerterentur in angulositatibus illis, quae fiunt ex osse medio, et duabus partibus subiacentibus, et est etiam neruus quidam ad longum protensus super altitudinem medii pectoris, coniungens vtrosque lacertos illic; et in hoc apparet iuuamentum multiplex pectoris, nam os in sui medio fuit eleuatum, vt obsisteret nocumentis exterioribus, et distingueret lacertos vnus alae venientes ad pectus a lacertis alterius, quae distinctio si non adfuisset, non posset moueri vna ala neque pati, quin moueretur et pateretur altera. Concauitates vero angulosae adfuerunt, vna a dextris, altera a fini-



a sinistris, vt in eis locarentur lacerti; neruus protensus in longum adfuit desuper, vt quodammodo velaret et ligaret ad os medium lacertos, vtrique concauum fuit inferius, vt cederet locum cordi, versus ventrem debuit esse mollius, ne duritie sua laederet mollitiem ventris, et idcirco in pluribus auibus est pannosum pectus inter ramos, quos diximus, maxime super ventrem. Differunt autem aues in pectore, nam aquaticae et praecipue natantes longius habent pectus vniuersaliter, et habent longius corpus, quam terrestres. Rursus in generibus falconum prominentia magis est rotundior et grossior, quam in generibus accipitrum et nisorum. Os etiam illud, quod eminet in pectore gruis, habet interiora sua vacua, in qua vacuitate locatur et reflectitur canna pulmonis, in reliqua vero parte sui, quae solida videtur, non est soliditas; ne nimis esset ponderosum, sed quaedam spongiositas, vt esset leuius ad portandum, cuius simile non est in ossibus pectorum aliarum auium; ossa enim magnarum auium respectu sui corporis minus solida sunt minusque firma, quam ossa paruarum respectu sui: nam si essent solida in magnis auibus, essent ponderosa et difficilia ad portandum, in paruis vero solidiora debuerunt esse, vt firmiora essent, et difficilia frangi, ad multos et varios motus, quos habent paruae aues plus quam magnae.

### CAPITVLVM XXXIII.

#### *De lateribus.*

**L**atera vero sunt, quae sub alis iacent, inter pectus et dorsum, et penduntur a sub axillaribus vsque ad capita anchorum, et constant ex costis, in quibusdam pluribus, in quibusdam paucioribus, et pannis et lacertis colligantibus costas, quae costae perueniunt vsque ad spondiles dorfi. Est autem iuuamentum laterum collateraliter defendere cor, pulmonem, panniculos, et caetera intrinseca sub eis, quemadmodum pectus cor ab anteriori parte. Venter vero, qui a quibusdam ouaria dicitur, est totum id, quod extremitate pectoris protenditur inter anchas et costas vsque ad anum, et etiam magna pars ventris continetur sub ipso pectore vsque prope cor, continet autem in se stomachum, intestina, epar, splenem, et caetera nutritiua, vt consuetum est dici. Est autem venter desuper pennosus, neruosus, lacertosus, et ideo mollis, extensius, vt superfluitatibus contentis in ipso, et transeuntibus ouis, et humoribus, et ventositatibus cedere posset per extensionem suam. Iuuamentum autem eius est, continere membra, quae diximus, et calefacere, et superfluitates deportare exterius. Dictum est, quod in loco lumborum sint duo ossa anchorum, longa, concaua, inferius lata, habentia circa sui medium quandam concauitatem, quam medici dicunt sciam, et in illa scia locatur vertebrae superius coxae. Sunt igitur coxae, crura et pedes membra sustentantia corpus auis super terram, et per eadem habet auis ambulare super terram, et habere quandoque defensionem suam, maxime autem per pedes et ungues habent scalpere,



scalpere, vbi sibi prurit, raspare terram, illae scilicet, quibus hoc conuenit. Et haec sunt iuuamenta, quae habentur ex coxis, cruribus et pedibus. Constant autem coxae, crura, pedes, ex ossibus multis successiue sibi inuicem contiguatis hoc modo: os coxae, quod vnitum est cum suo vertebro superiori, locatum in scia, et illic detinetur neruis, chordis et aliis ligaminibus, habet circa se lacertos plurimos, a quibus habet diuersos motus, hoc autem os refertur illi ossi in alis, quod dicitur armus, habens in quibusdam auibus medullam, in quibusdam nullam. Huic vero ossi consequenter colligantur duo focilia cruris, quae sunt in alis, sunt autem duo focilia cruris, vt, si vnum pateretur, reliquum remaneat sanum, et illud, quod exterius est, quoniam erat paratum recipere nocumenta, grossius et firmitus fuit, et illud minus, quod est in crure, adeo est tenerum, maxime inferius, vt illic credatur esse neruus, et quanto plus tendit, tanto plus rotundescit, et subtiliatur, haec autem duo focilia, quae nos dicimus constituere crus, a quibusdam appellantur coxa, qui etiam, quod superius est, appellant supra coxam; os vero vnicum iungitur extremitati duorum focilium inferius, et protenditur vsque ad digitos pedis, et hanc partem multi appellant crus seu tibiam, nos tamen opinamur magis, quod sit de pede, quemadmodum in fasianis, gruibus et bistardis. Hoc autem os, cui applicantur digiti, in quibusdam auibus est tectum corio squammoso, omnino carens plumis, in quibusdam vero non squammoso et habente plumas vsque ad pedes, et in quibusdam vsque ad ungues, et in aliis raras plumas inter squammas, vt in falconibus. Item in aliquibus habet a posterius quoddam carneum acutum longum, vt gallinis, fasianis, pauonibus, in aliquibus vero omnino carent huiusmodi, quod dicitur speronus. Extremitati autem huius ossis applicati sunt et catenati suis chordis et ligaminibus digiti ipsarum, de quibus in suo capite dicetur plenius. De comparatione autem coxarum ad alas sic se habet: illae, quae habent grossius et carnosius pectus, habent fortiores alas, et proinde graciliora crura, et coxas, et huiusmodi sunt potentiores in volatibus, quam in gressibus, sed quae habent grossiora crura et coxas, graciliter habent pectus, et ideo potentiores sunt in gressibus huiusmodi et paucioris volatus, quam quae habent e conuerso. Quod enim recuperant partes membrorum inferiorum, diminutum est eis ex parte alarum.

Replicationes vero iuncturarum in coxis, cruribus et pedibus, contrariae sunt replicationibus iuncturarum in alis, in sursum scilicet et deorsum applicando ad corpus, quod patebit, si reddantur singula singulis. Item iuncturae tibiaram et coxarum in auibus replicantur e conuerso iuncturis coxarum et tibiaram posteriorum in animalibus ambulabilibus, ad anterius scilicet et non ad posterius, et hoc ideo, vt motum suum in stando et capiendo melius habere possint, cum pedibus enim capere volens, ad anterius capiet, ad posterius vero non potest, hoc modo enim pedes prius vadunt ad capiendum, ante retro, dextrorsum sinistrorsum, quemadmodum persona auis. Membra coxarum, tibiaram et pedum, in  
auibus



auibus aquaticis natatilibus, percrefcunt citius quam alae earum, quoniam cum pedibus fuis habent in aquis acquirere cibum fuum, non cum alis, et maior fua defenfio eft in aquis natando cum pedibus et fubmergendo fe, haec ideo membra natura ftatuit prius complere, deinde alas, in quibus poftquam formatae funt, nafcuntur pennae maiores; adefl et alia ratio, motus enim pedum, quos aues faciunt natando per aquam, attrahunt humores et nutrimentum ad fe, ob hoc etiam alae, quae non funt in motu nifi modico, nec eft eis opus cum alis recedere, percomplentur tardius quam coxae et crura et pedes, in aliis vero auibus, quam in natatilibus, non fimpliciter fe habet ita, fed citius percomplentur in membris fuperioribus, cum quibus eft eis opus acquirere cibum fibi, fugere nocumentum, et habere defenfionem fuam.

## CAPITVLVM XXXIV.

### *De digitis pedum.*

**D**igiti autem funt, fuper quos tanquam fuper bafes fuas ftabiliuntur crura et coxae, et per confequens tota auis, et ideo funt plures, et expanfi, et remoti ab inuicem, quod enim fuper bafem ampliorem firmatur, firmitus ftat, ex hoc apparet quoddam iuuamentum ipforum. Iuuant praeterea ad amplectendum ramos et alia, fuper quae ftant, et ad alia plura iuuant. Constant autem ex pluribus offibus, fucceffiuè fibi inuicem colligatis per fuas chordas, fuaque ligamenta, et omnes colligati in vnum funt cum offe praedicto. Sunt autem digitus pedum in pluribus auibus quatuor, in aliquibus tres, in aliquibus duo: habentium vero quatuor digitos in pede, plures habent tres digitos antèrius, et vnum pofterius, paucae vero funt habentes duos antèrius, et duos pofterius, vt picones, et modi pfitacorum, et aliae applicantes fe arboribus. Sed illae, quae habent tantum tres digitos, digito carent generaliter pofteriori, ipfos namque antèrius habent, vt funt biflardae, liuercini, pluerii, et in maiori parte aues conuerfantes in campis lapillofis, aut in torrentibus lapillofis. Auis vero, quae habet tantum duos digitos in pedibus, medium et forinfecum, intrinfecum non habet, ne noceat ei in grefsu fuo, ficut eft frutio, qui habet vtrumque antèrius, hic, quoniam grandis eft, fortiores digitos habuit in pedibus, neque enim fedet fuper ramos, neque habet facere multa cum digitis, nifi currere. Item digitorum alii funt coriales, vt cophanus, et vt anfer, qui fcilicet habent corium neruofum et cartilaginofum ligans eos inuicem, quamuis diftanter, ficut funt digitus auium aquaticarum natantium, quod ideo fuit, vt impellendo aquam ad pofterius maiori copia fe ipfos impellerent in antea melius in natando, et quanto funt plus coriales, tanto magis natant. Alii vero funt digitus coriales, fed corium decifum eft, vnicuique digito adhaerens collateraliter, vt eft videre in fulicis. De habentibus digitos coriales pellicanus folus habet pofteriorem continuatum cum digito antèriori intrinfeco, et diftat longe a digito



anteriori extrinseco, cuius rei simile non est in aliis auibus habentibus digitos coriales, ut est videre in auibus terrestribus et mediis. Digiti autem pedum non fuerunt lineares et sine iuncturis, nam ex hoc essent minus habiles ad officia sua, cum enim non essent flexibiles in circulum, eo quod iuncturas non haberent, ramos, glebas, saxa et alia corpora, magis rotundae figurae quam alterius, quibus infident, saepius tangerent in puncto vno, sed sicut in geometria legitur, linea tangens sphaericum aut circulum necesse est ut in puncto tangat, quod autem in puncto tangit, minus tangit, et minus amplectitur rem tactam, et ideo fuerunt plures iuncturae necessariae in digitis pedum, ex illis enim pluribus iuncturis digiti complicabiles fiunt in circulum, et in pluribus locis tangunt, quod amplectuntur, et ob hoc firmiter retinent, quod fuit necessarium auibus, quando sedent plurimum, dum dormiunt, super vnum pedem in maiori parte. Replicatio autem digitorum in suis iuncturis ad superiorem partem non fuit necessaria, ad subteriorem vero partem fuit, quatenus brancarent conuenientius ramos, ad quos confugiunt per saepe, ut illic dormiant, praecipue illae, quae non habent digitos coriales, et quae nidificant inter arbores; et ut fortius et firmiter retinerent, tenendae fuerunt plures iuncturae, praecipue in digitis anterioribus, sicut dictum est. Numerus autem et dispositio iuncturarum in digitis auium, praecipue habentium quatuor digitos, tres ante et vnum post, talis est: digitus posterior vnum habet os, et vnam iuncturam, et ideo fortior est, sicut enim omne membrum plures iuncturas habens minus rigidum et debilius inuenitur, sic habens pauciores iuncturas rigidius et firmiter inuenitur, quod conueniebat digito posteriori, fit enim appodiatio auis ad posterius super ipsum, et ipse solus sustentat ad posterius, ut tres ad anterior, et iste digitus refertur ad caeteros digitos anteriores, quemadmodum pollex in manu; anteriores primi digiti replicantes se ad posteriorem, et posterior replicans se ad anteriores, circulationem percomplere videntur, et ideo rem inclusam firmiter retinere, et similiter fortitudo respondet fortitudini trium, et falcones feriunt cum posteriori digito, quod falconarii dicunt talum. Alius vero digitus a parte intrinseca duo habuit ossa et contiguata inuicem, et duas iuncturas vel articulos tantum, ut etiam fortis esset, cum ipso namque stringunt aues fortius quam cum aliis duobus, et fortius cum illo se defendunt, et super ipsum fortius firmant se, ipse etiam directius respicit posteriorem, et ideo cum ipso perficit anterior circulum. Medius autem digitus anteriorum in pluribus longior est aliis, hic habet tres iuncturas ex tribus ossibus contiguis inuicem, quia amplius debebat brancare, quam alii, in circulari enim conuolutione medium obtinebat, replicatio enim digitorum, quando aliquid capiunt, sphaericam et circularem formam videntur facere, in qua posterior digitus cum intrinseco anteriori breuiorem circulum faciunt, medius maiorem circulationem comprehendit, unde ossa sua longiora sunt, extrinsecus vero quatuor habet iuncturas ex quatuor ossibus contiguis, est autem breuior digito medio, pro eo, quod sua quatuor ossa sunt breuiora tribus



tribus illius, cum autem sit ex pluribus iuncturis quam alii, debilior est caeteris, nec fuit ei necessaria magna fortitudo, cum ipso namque avis minus se defendit, et in ipso minus se firmat, hic autem digitus habuit officium concludendi brancationem ex altera parte, et in formam quasi sphaericam reducendi, ut pro eo, quod habuit plures iuncturas, in pluribus locis rem contentam tangeret, et rem subtiliorem rotundare posset, ut dictum est. Ex his etiam patet mirabilis ordo complementi naturae in articulis pedum, posterior digitus, quem dicunt talum, unicum habet articulum, digitus vero anterior intrinsecus, quem plures dicunt pollicem, duos habet articulos, sunt ergo tres articuli in his duobus digitis, digitus vero anterior medius tres habet articulos, qui cum praedictis complet senarium numerum, digitus autem anterior extrinsecus est quatuor habens articulos, quaternarius vero numerus secundum Pythagoram adiunctus senario reddit decem, quem denarium completum numerum vocat; decem igitur articuli digitorum pedis hoc ordine et ad praedictam utilitatem sunt dispositi per naturam. Sciendum etiam, quod praeter uniuersale corium, quod tegit totum corpus, superest cruribus usque ad subcoxalia et per totum pedem et digitos usque ad ungues quoddam corium durius alio uniuersali, in quibusdam auibus squamosum, in quibusdam non squamosum, in quibusdam plumosum, in quibusdam non plumosum. Cuius corii iuuamentum est munire pedes et crura, quae saepius exponuntur tribulis, spinis, lapidibus et aquosis locis, et aliis nocumentis, dum gradiuntur aues.

## CAPITVLVM XXXV.

### *Sequitur de unguibus.*

**U**ngues quamuis a medicis inter consimilia membra numerentur, quoniam tamen adhaerent digitis officialia membra, et ipsi iidem multa habent officia, dicemus in tractatu officialium de ipsis. Sunt autem ungues, qui circumdant extremitates digitorum, solidi, substantiae corneae, concaui interiorius, in qua concauitate recipiunt extremitates digitorum, sunt autem solidati cum carne iuncta sibi, et cum cute suprema, ligamenta eorum sunt chordosa, et ad ipsos veniunt nerui, arteriae et venae praestantes eis sensum et naturale nutrimentum. Est autem in extremitate cuiusque digiti vnus unguis. Iuuamentum autem unguium est, ne offendantur extremitates carnae digitorum a corporibus duris tangentibus digitos, primo sunt iuuamenta auium ad scalpere et raspere, et in pluribus sunt arma, nam cum eis pugnant, rapiunt, et laniant et adhaerent solis unguibus. Auium autem quaedam sunt rectorum unguium, ut plures de non rapacibus, quaedam aduncorum, ut modi rapacium; sunt tamen etiam plures de non rapacibus aduncorum unguium, non rectorum, ut monedulae et picae, et aliae plures, quod ergo Aristoteles dicit in libro animalium, aues uncorum unguium idem sunt, quod aues rapaces, non sic se habet. Inter omnes aues generaliter habent unguem medii



digiti anterioris ferratilem a parte domestica, et hoc non sic est in aliis vnguibus, cum isto namque vngue caput et caetera membra, ad quae possunt attingere, rasant et scalpunt, ex utroque pede scilicet. Alaudae vero, cozardi, calandrae et similes his, habent in digito posteriori vnguem longiorem et rectiorem, quam in aliis digitis, et quam aliae aues in sua proportionem. Grues etiam habent in digito anteriori intrinseco cuiusque pedis vnguem fortem, durum, aduncum et acutum, quasi esset rapacis alicuius, et hoc non habent in aliis digitis, cum quo vngue ex utroque pede grues se defendunt, et ut huiusmodi vngues seruentur inhebetati et illaesi, natura stabilivit, quod, dum grues stant super pedes, huiusmodi vngues secundum latus, non secundum acumen sui, stant super terram. Ciconia vero habet vngues non ut aues aliae, sed latos, sicut homines et simiae.

### CAPITVLVM XXXVI.

#### *De membris interioribus officialibus.*

**M**embra interiora officialia sunt lacerti, craneum, panni velantes cerebrum, ipsum cerebrum, nucha, et alia huiusmodi, quae sensui non subiacent, de quibus nostri propositi non est dicere perfecte, quae sint, aut ex quibus constant, nisi ea tantum, in quibus aues habent aliquam diuersitatem et manifestationem. Lacerti namque cum de carne constant, et nervis, ligaminibus atque pelliculis vestiantur, ad hoc iuuant, ut membra per eos moueantur, unde sunt diuersi ad mouendum diuersa membra, diuersi etiam ad mouendum vnum in partes diuersas. De craneo vero certum est, quod defendit cerebrum, et habet formam suam in qualibet specie auium secundum diuersitatem capitis superius assignatam. De cerebro, quoniam administrat medullam . . . . . quomodo ab ipso oriuntur . . . . . omnes vel mediate vel immediate deferentes sensum et . . . . . ad caetera membra nullam . . . . . in auibz diuersitatem, de . . . . . triculis vero id idem . . . . . De spina vero, cum non sit nisi contiguatio spondilium omnium in vnum corpus, et conseruans et defendens nucham vsque ad extremitatem caudae, dicendum, quod in quibusdam auibz est longior, secundum quod sunt longioris corporis et longioris colli, et in aliis est breuior, secundum quod sunt breuioris corporis et breuioris colli, et quod in vna spina sunt plura spondilia quam in alia. Et spondilia dorsi sunt iuncta inuicem tanta vnitate, ut supra dorsum videantur spondile vnum vsque prope lumbos, vbi est principium ossium ancharum, illic namque manifeste apparent iuncturae spondilium, a lumbis vero desuper renes vsque ad principium caudae super anum dilatantur spondilia, et intercipiuntur inter duo ossa ancharum, et in quibusdam auibz dilatantur plus, in quibusdam minus, et hic locus a quibusdam appellatur erupponus, et solidiores sunt ipsorum iuncturae, et foramina eorum illic ampliora, vbi vero finiunt ossa ani, qui ab illis est principium caudae, gracilantur spondi-



spondilia caudae, et paulo post ingrossantur et dilatantur, vt plures carnes et grossiores lacertos recipiant, et per hoc melius sustineant membra peruncti, et vt pennis maioribus in circuitu nascentibus amplius locus detur, circa finem vero iterum gracilantur. De nucha vero, quae dicitur medulla spinalis, quomodo procedit a cerebro transiens per foramina omnium spondilium vsque ad extremum caudae continuata, et quomodo ingrossatur super renes, vbi foramina spondilium sunt ampliora, et quomodo neruorum paria exeunt ab ea, ita quod inter quaeque duo spondilia est vnum par, cuius paris vnus neruus procedit dextrorsum, alter vero sinistrorsum, non pertinet dicere in nostro proposito. De ore vero et lingua, in quibus aues plus differunt, dicamus. Os quibusdam auibus magnum est respectu sui corporis, quibusdam paruum, quibusdam dentatum secundum palatum, quibusdam non. Non habet etiam os auium vnulam, neque epiglottum, neque dentes, sed pro dentibus habent rostrum, et in quibusdam auibus modicam aut nullam continet linguam, vt in ciconiis et pellicanis, et auibus habentibus rostrum recuruum, ad modum cochlearis, et aliis pluribus, quae aues propter hoc minime habent differentias vocum, cum careant instrumentis vocalibus, quae vero habent linguam, manifestam vocem firmant, et voces tanto magis variant, quanto sint eis habiliores linguae ad motum, quae enim habent linguam gracilem et agilem in rostro paruo et gracili, certum est, quod habent plures modulos vocum, vt philomelae, calandrae, alaudae, sturnelli, meruli, cardilli, et caeterae auiculae, hae namque et suas voces proprias proferunt, et sonos auditos nituntur conformare, maxime graciles sonos, et aliquae de illis garriunt plus in vere, et in tempore coitus earum, et in tempore sereno, quieto, temperato, et mane plus, sunt tamen, quae die et nocte vociferantur per plures menses veris, vt philomelae, quae aliis temporibus silent; sed quae habent linguam carnosam et grossam, sunt, quae nituntur imitari in gutture suo voces humanas, quas saepius audiunt, vt coruorum modi et picarum, et magis psittacorum viridum modus, et maxime modus alborum, qui modi psittacorum proferunt literam R plus quam aliae aues. Hae autem varietates vocum contingunt ex habilitate linguae, et aliorum instrumentorum vocalium, maiores vero aues minus habent variare voces, propter ineptiam instrumentorum, sed quae habent pauciores modos vocum, habent ad minus tres modos vocum, aliam enim habent ad desiderium acquirendi escam sibi, aliam ad desiderium coeundi, mas aduersus foeminam, et e conuerso, aliam, quando timent et propter timorem vociferant. Lingua vero in pluribus auibus secundum subteriore partem sui habet quoddam durum ad modum vnguis, quod peruenit vsque ad summitatem linguae anterioris, ex quo fit durior et firmior in anteriori parte, circa vero sui medium per transversum habet quandam flexibilitatem, sub quo loco interius in lingua quarundam auium est os quoddam. Interius autem lingua ramificatur in duos ramos vtrinque procedentes vsque ad occiput, qui videntur esse neruosi, forma vero linguae sequitur, vt in pluribus,



formam rostri, vt contentum continens, et . . . . . rostro cum recto . . . . . in stricto et subtili stricta et gracilis, in lato lata, in dentato dentata, iuuans per hoc ad incisionem herbarum, in breui breuius, in duro et acuto dura et acuta, vt est in modis piconum, qui cum rostro verberant et perforant arbores, et acumen linguae infigunt in vermes, et extrahunt ipsos, vt comedant. Patet igitur, quod aues habent diuersitatem in lingua secundum diuersitatem rostrorum. Iuuamentum autem linguae est, perficere gustum. In fine vero linguae interius est vnum foramen in lingua, quod descendit in cannam pulmonis, et nullum habet epiglottum, habet enim naturam claudendi se, dum cibus aut potus desuper ipsum transit ad subsequens foramen, quod descendit ad isophagum, illac transit cibus et potus. Sunt etiam in superiori parte oris, scilicet in palato, duo foramina, vnum longum praecedens, quod respondet viis tendentibus ad nares, quibus attrahitur flatus intrans in cannam pulmonis, aliud vero foramen sequitur, istud est in fine palati interius, vnde descendunt superfluitates a capite, et hoc tenet officium vuulae secundum hoc.

### CAPITVLVM XXXVII.

#### *De canna pulmonis.*

**C**anna autem pulmonis cartilaginosa et anulosa, hinc descendens vna vsque prope pulmonem, hic enim diuiditur in duas minores cannas, quarum vna vadit ad vnam partem pulmonis, altera ad alteram. Item canna pulmonis descendit vsque ad collum, recte super spondilia, vsque in loca pulmonis, praeterquam in gruibus, canna enim gruum in longum et rectum descendit inter furculam pectoris, et procedit et reflectitur illic inter ossa pectoris, quae exit inter duas tabulas, et reflectitur et regiratur illic supra se ipsam duplici giro, deinde peruenit ad pulmonem, diuidens se in duas partes, sicut cannae caeterarum auium, hinc est, quod aer verberatus et reflexus in tortuositates cannae pulmonis sonat altius, quapropter grues habent sonoram vocem et altam prae caeteris auibus, sed minores grues non nisi sibilant vsque ad annum, et tunc mutant vocem.

### CAPITVLVM XXXVIII.

#### *De pulmone.*

**P**ulmo vero auium diuisus est in dextram partem et sinistram, quae adhaerent et collocantur inter costas, et super eas prope spondilia dorsi, et prolongatur pulmo vsque versus ultimas costas ex utroque latere.

CAPITVLVM



## CAPITVLVM XXXIX.

*De diaphragmate.*

**D**iaphragma non videtur euidenter in auibus, sed est inter duo spiritualia membra et nutritiua; praeter casulam cordis positi sunt multi panni distinguentes nutritiua ab inuicem, vt epar ab intestinis, et caetera nutritiua similiter.

## CAPITVLVM XL.

*De Isophago.*

**I**sophagus vero recte descendit in quibusdam auibus iuxta anteriorem partem colli, et in quibusdam reuoluitur circa collum, vt in cinnis, et in quibusdam auibus habet supra furculam pectoris quoddam amplum ad modum sacci, quod gorgia dicitur, primo recipit cibum et potum ab ore in eam transmissum, in ea enim cibus et potus calefit, et praeparatur, priusquam veniat ad stomachum, et in quibusdam auibus supra furcam pectoris nihil habet ampli, neque habet gorgiam, sed protenditur isophagus ab ore vsque ad stomachum, et vbi continuatur cum stomacho, amplior efficitur.

## CAPITVLVM XLI.

*De stomacho.*

**S**tomachus vero est membrum, ad quod per isophagum mittitur cibus et potus, et in eo dirigitur, et ei continuantur intestina ab inferiori, quemadmodum isophagus a superiori. Hic autem stomachus in quibusdam auibus est valde carnosus, densus et durus, vt in anseribus, anatibus, gallinis et huiusmodi, et in quibusdam auibus stomachus non est carnosus neque durus, sed neruosus tantum, quantum ad tunicam superiorem et inferiorem, vt in auibus rapacibus. Ab ore itaque cibus et potus deducitur per isophagum ad stomachum, a stomacho vero post digestionem cibi superflua deportantur ad intestina, quae intestina multipliciter sunt inuoluta, et protenduntur vsque ad podicem, quod subest caudae.

## CAPITVLVM XLII.

*De Epate.*

**E**par est membrum generans sanguinem, diuisum in duas partes, vnam dextram, et alteram sinistram, cui Epate applicatur in quibusdam auibus saccus fellis, sunt namque aues, quae penitus carent felle, vt columbae et turtures.

CAPI-



*CAPITVLVM XLIII.**De Renibus.*

**R**enes in auibus duo sunt, vnus dexter, alter sinister, et adhaerent prope spondilia sub ossibus ancharum, protensi vsque versus anum, et viae deferentes vrinam transeunt sub ipsis, adhaerendo eis vsque ad locum exitus superfluitatum, inde est, quod aues emittunt vrinam cum egestionem, nec fuit eis necessaria vesica.

*CAPITVLVM XLIV.**De testiculis et matrice.*

**I**n principio renum super spondilia adhaerent in masculis auium duo testiculi, vnus dexter, alter sinister: in foeminis vero illud membrum, in quo creantur oua, quod membrum etiam dici potest matrix, modica autem est diuersitas in auibus, quantum ad testiculos et matricem.

*CAPITVLVM XLV.**De plumagio auium generaliter, comprehendente quaedam similia pilis, lanulas, plumas, pennas.*

**D**iximus de diuersitate, quam habent aues in membris, et in iuuamento ipsorum, quantum expediebat: dicemus nunc de plumagio auium, quod sequitur membra ipsorum, et fundatur in membris. Est autem plumagium de superfluitatibus exeuntibus a corpore auium, sicut pili a corpore quadrupedum, et squamae a corpore reptilium; quod plumagium necessarium est auibus ad melius esse, scilicet ad cooperimentum cutis, per quod a calore et frigore et madefactione defendantur, ad sustentandum volucres in aëre, et ad volandum. Innascitur vero auibus plumagium multiplex, pullis namque nouiter genitis primo innascuntur illae, quae nec sunt vt pili, neque vt lanulae, sed habent naturam inter vtrumque, quae cooperiunt, et a frigore quoquo modo defendunt. Secundo innascuntur aliae, quae dicuntur lanulae, a quibusdam dumae, hae sunt exiles et molles, densiores et longiores primis, hae plus cooperiunt et plus defendunt illis, et his natis cadunt illae. Tertio innascuntur aliae, quae dicuntur plumae, et simul cum eis illae, quae dicuntur pennae, et differunt plumae a pennis, nam plumas dicimus, quae habent cannulas in radice, et costam procedentem per medium gibbositatis vsque ad vltimum earum; hae plumae nascuntur per totum corpus, et cooperiunt cutem: sed pennas dicimus, quae habent maiores cannulas, radices sibi, et similiter costam protensam per medium pilositatis vsque ad summum, hae sunt maiores plumis, et multo magis sunt ad sustinendum volucrum in aëre, quam ad cooperi-



cooperimentum cutis, sed praecipue sunt ad volandum, vt fugiant nocumenta, et accipiant escam, et non nascuntur nisi in alis et cauda. Plumis itaque et pennis nascentibus, et sua longitudine pertranseuntibus lanulas, ipsae lanulae cadunt, et quanto plus crescunt, et lanulae plus cadunt. Verum quoniam inter cannulas plumarum, et inter cannas pennarum sunt interualla spaciofa, et ob hoc corpus illic minus sufficienter cooperiretur, vnde posset intrare frigus, adfuerunt aliae lanulae prioribus minores in locis illis, vt cooperiant illic, et calefaciant, et suppleant defectum plumarum et pennarum, hae lanulae remanent corpori, vsque dum mutant plumas et pennas, hinc est quod in quibusdam auibus plumae habent sub se alias plumas minores adhaerentes cannulis, et ab eisdem exeuntes, vt calefaciant; hae aliae in hoc gerunt naturam et officium lanularum, et ad hoc in fine cannulae, vbi finit pilositas plumae, inferius adsunt ex vtraque parte quaedam molles de natura lanularum; sed quae non habent plumas alias adhaerentes cannulis, habent plurimum de huiusmodi lanulis, exeuntibus a cannulis vtrinque et proximius cuti, et vt plumae melius cooperiant et calefaciant et defendant ab aqua. Inter cannulas quarumque duarum plumarum propin quarum sibi superest tertia pluma, cooperiens more squamarum in reptilibus, sunt etiam ex hac serie sua protegentes, et protectae ab inuicem, et magis calefacientes et defendentes a supra dictis nocumentis.

## CAPITVLVM XLVI.

### *De coloribus plumagiorum.*

**A**uium siquidem secundum totam speciem quaedam sunt albae, aliae magis, aliae minus, quaedam nigrae, aliae magis, aliae minus, quaedam griseae seu cinericiae, quaedam fulvae seu terrestres coloris, quaedam variae ex albo et nigro in diuersis pennis, aut in eisdem, et varietas ex multis coloribus, plus in quibusdam ex viridi et croceo colore. Sunt et aliae species ex multis aliis coloribus, et sub eadem etiam specie inueniuntur indiuidua diuersorum colorum, et in tota aue sunt diuersi colores, et quandoque in vna penna vel pluma. Et sunt aues, quae mutant colorem plumagii secundum aetatem, vt cinni, qui primo anno sunt bisi seu cinericii, secundo medii ex cinericio et albo, tertio deinde fiunt albi magis ac magis: haec eadem mutatio solet accidere pluribus speciebus auium, quae sunt albae secundum speciem. Et sunt aues, quae mutant colorem plumagii tempore coitus, sicut mutant figuram in pluribus suorum membrorum, vt ayrones bisi, quibus tempore coitus florescunt suae plumae et pennae quodam flore pulueroso et bifo; et ex hoc manifestum est, quoniam tingunt pannos, quos tingunt alterius coloris, colore simili suo, quibus eisdem rostrum et pedes rubent tempore coitus, et ad singulas mutas mutantur colores plumagii. Propter hoc de coloribus plumagii vniuersaliter auium non est nostrum propositum dicere, pro



eo quod fere innumerabilibus modis sunt in omnibus speciebus avium, nisi tantum in avibus rapacibus, quibus utimur in venatione, et illud non hic, sed ubi tractabitur specialiter de eisdem, sed dicamus in genere, quibus avibus innascuntur plumae et pennae citius, et quibus tardius, et quibus percomplentur in sua magnitudine citius, et quibus tardius. Avibus terrestribus, quarum nidus est super terram, et eis parentes non ferunt escam, sed ipsae, statim quod natae sunt, sibi acquirunt, plumae et pennae innascuntur citius, et citius completur augmentum plumarum et pennarum, quam illis avibus, quarum nidus est super terram, et parentes ferunt eis escam, quando natae sunt, et his et illis citius, quam avibus, quarum nidus non est super terram, sed in alto, quibus omnibus habentibus nidum suum in alto parentes ferunt escam, non enim est possibile, teneras et noviter genitas ab alto descendere, et per se cibum acquirere. Qua de re natura providit utiliter, dare plumas et pennas velocius nidificantibus super terram, cum immineant eis plura nocumenta, de serpentibus scilicet, vermibus, feris, avibus rapacibus, et de aliis multis, cum quibus plumis et pennis possent nocumenta vitare, parentes sequi, et per se sibi acquirere escam, hae enim citius videntur volare cum parentibus suis, ut sunt pulli perdicum, fasianorum, coturnicum, bistardarum, et aliarum huiusmodi; etiam illae, quae nidificant super terram, quibus parentes ferunt escam, sicut sunt alaudae, cozardi, et plures aliae, videntur citius volare, quam nidificantes in altum, nidificantibus enim super frutices, arbores, rupes altas, et super alia loca alta, non imminet tot nocumenta, quot praedictis, et plumae et pennae innascuntur eis tardius et percrescunt, quam praedictis. Pullis itaque avium rapacium non imminet tot et tanta nocumenta, cum nidus ipsarum in securioribus locis sit, verbi gratia, in rupibus altis, in arboribus altis, et illinc parentes a remotioribus provident escam; plumae et pennae innascuntur tardius et percrescunt tardius, quoniam sunt siccioris naturae, quam caeterae aves, quod autem in sicciore ave plumae et pennae tardius nascantur et crescant, quam in minus sicca ave, signum est ex eo, quod videmus de pennis, illa, quae est in sicciore membro, aut in sicciore parte membri, tardius percompletur, quod patet in alis: praeterea avibus rapacibus longiores sunt plumae et pennae respectu sui corporis, quam caeteris avibus, tum quoniam longiores sunt, tum quod in sicciore corpore, tardius percomplent suam longitudinem plumae et pennae. Veruntamen quoniam pulli rapacium expelluntur citius a parentibus suis, quam pulli aliarum, et vi volatus habent sibi acquirere praedam, et fugere nocumenta, nascuntur eis plumae et pennae, crescentes proportionaliter suo corpori fortes et firmae, non rapacibus vero nascuntur plumae et pennae minus fortes et minus firmae, quam conveniant corpori earum, quod natis plumis et pennis, et in sua longitudine iam completis, amplius crescit. Avibus autem aquaticis natatilibus plumae et pennae nascuntur tardissime omnium, quamvis parentes non ferant ipsis escam, cum enim contra nocumenta imminet sibi habeant defensionem suae personae natando in aquis,



aquis, et cum in eis inueniant escam, sibi minus fuit necessaria origo pennarum et plumarum a principio natiuitatis suae, quam aliis, et quamuis in his tardissime omnium plumae et pennae nasci incipiant, tamen, quoniam huiusmodi aues humidiores sunt, et in humidis locis assidue commorantes, plumae et pennae, ex quo nasci incipiunt, et citissime omnium crescunt, et in sua longitudine citissime complentur, sicut est videre in modis anserum, anatum, et reliquarum natantium, cum collo namque, cruribus et pedibus natantes per aquam escam acquirunt, et nocumenta fugiunt multo tempore ante, quam plumae et pennae incipiunt nasci, et quam membra alarum sint completa, et si euellantur ab eis plumae et pennae, usque ad modicum tempus renascentur et complementae erunt.

## CAPITVLVM XLVII.

### *De plumis.*

**P**lumae vero auibus innascuntur et percomplentur ante complementum pennarum, quod fuit vtile ad cooperimentum et tutamen totius corporis contra importunitates aëris, hae plumae, quoniam nascuntur in humidioribus locis corporis, et minus remotae a corde, quam pennae, et quoniam sunt breuiiores, quam pennae, percomplentur citius in augmento suae longitudinis, quam pennae, et de ipsis eisdem plumis, quanto nascuntur in minus humido loco corporis, a quo habent minus de nutrimento, et quanto maiores sunt aliis plumis, tanto tardius in sua longitudine percomplentur aliis. De pennis vero hoc item manifestum est, vltima namque penna forinseca alarum, pro eo quod radicitus adhaeret ossi, et remotior a corpore aliis, tardius crescit et percompletur, quam caeterae pennae, quae pennae quanto plus nascuntur prope corpus, tanto citius crescunt et percomplentur. Inde est, quod illae, quae dicuntur vani, citius percomplentur, quam decem vltimae forinsecae, vani namque magis sunt propinqui corpori, quam reliquae decem; et in pennis caudae similiter est videre, pro eo namque, quod sunt in loco pingui et humido, citius percomplentur pennis alarum, et inter pennas caudae illae duae, quae nascuntur in medio aliarum, sub quibus duabus aliae receptantur, pro eo, quod sunt in humidiori loco, citius crescunt et percomplentur aliis pennis collateralibus sibi, de quibus collateralibus illae, quae sunt remotiores ab illis duabus ex vtraque parte, crescunt et percomplentur tardius, quae vero propinquiores, velocius. Dicatur etiam, vbi nascuntur plures dumae et plumae, et vbi pauciores, et de numero pennarum in alis et cauda.

## CAPITVLVM XLVIII.

### *De lanulis.*

**L**anulae vero siue dumae plures sunt circa anum et ante ouariam seu ventrem, haec enim loca cum intestina contineant, et plurimum sint pannosa, et non



habeant carnes ante positas, indiguerunt maiori calefactione; multae etiam sunt in pectore, quamuis non in tanta copia, quanta ante ouariam, pectus enim, quamuis carnosum sit, tamen semper est oppositum imbribus et ventis, in lateribus vero pauciores sunt lanulae, calefiunt namque latera per superpositionem alarum, in dorso vero paucissimae, cum non obftet imbribus et ventis. Plumae vero sunt super dorsum, lumbos et vsque ad caudam, duriores et firmiores, non tamen plures, quam in pectore aut ante ouariam, illic namque sunt plures ratione praedicta, paucissimae vero sunt in utroque latere, alis suppleantibus defectum plumarum illic. Plumae autem, ut dictum est in capitulo de iuuamento membrorum, in capitibus et collo quarundam auium non adsunt omnino, et in quibusdam auibus per totum corpus, sed in coxis et sub coxalibus non per totum, in quibusdam vero in coxis et sub coxalibus totis, vsque ad iuncturam, quae est sub coxalibus, et in quibusdam in coxis, sub coxalibus et cruribus vsque ad digitos pedum, et in quibusdam in his etiam per digitos vsque ad ungues, sicut est videre in generibus bubonum et noctuarum, et aliis. Fuit autem utile hoc eis, quoniam nocte volant saepius irruentes in loca spinosa ad acquirendam sibi praedam, sed in bubonibus quae sunt in digitis, magis sunt de natura plumae, in noctuis magis sunt de natura pili. In habentibus autem coria pedum et squamosa et dura, non nascuntur plumae, squamis non permittentibus eas nasci, visi sunt tamen modi falconum, accipitrum et nisorum habere plumas in cruribus et pedibus, quae oriebantur inter squamas et erant rarae, et hoc accidit raro.

## CAPITVLVM XLIX.

### *De pennis alae.*

**P**ennae vero in alis et cauda nascuntur solum; in his autem locis sufficiens fuit nasci pennas ad subleuandum corpus in aëre et sustentandum, cum enim expanduntur pennae alarum per extensionem alarum et caudae, ventus et aër subleuant volucrum, cuius motus in aëre per motum alarum volatus est, sicut gressibilium incessus, piscium per aquam natatus, per terram ambulatus. Numerum autem, positionem et iuuamentum pennarum in alis et cauda dicamus. Caeterum quoniam in quibusdam auibus non rapacibus in alis et cauda pennae sunt plures, et in quibusdam sunt pauciores, et non semper sunt sub certo et eodem numero, quod est videre in pennis caudarum gallorum, fasianorum, pauonum, anatum et aliarum plurium, praetermittemus dicere de auibus non rapacibus, et dicemus de ipsis auibus rapacibus, quibus utimur in venatione, sic namque expedit nostro proposito, ut infra patebit. In speciebus vero auium rapacium saepius sunt sub certo et eodem numero, quamuis alterius formae, sed quod dicemus de pennis auium rapacium, maxime de positione et iuuamento ipsarum, referri poterit ad pennas auium non rapacium.

CAPIT.



## CAPITVLVM L.

*De numero pennarum alarum.*

**N**umerus itaque pennarum in vnaquaque ala est viginti sex, quatuor magis propinquae corpori, quae dicuntur corales, et postea duodecim, quae dicuntur vani, firmiores et duriores coralibus, et alterius coloris et figurae, demum versus extremitatem alae aliae sunt decem, quae forinsecae dici possunt, hae sunt firmiores, duriores et longiores illis, quae dicuntur vani, vltima harum decem dicitur saxellus, et de his decem saxellus et illae, quae priores sunt saxello, sunt decisae et formatae ad similitudinem curtelli, quod enim de penna distincte latius est, manubrii locum obtinere videtur, et hoc est infra, sed quod distincte strictius est, locum videtur obtinere ferri curtelli, quod est extra manubrium, et hoc est supra, propter quod opinamur, quod dicantur cultellae, quaedam tamen habent plures, quaedam pauciores, et quaedam habent incisuras vel stricturas longiores, et quaedam curtiores, et quaedam strictiores, et quaedam minus strictas: sunt itaque viginti sex pennae in ala. Sunt praeterea quatuor paruae pennae et durae in ala positae extra has decem forinsecas, et adhaerent illi paruo ossi forinseco, quae dicuntur esse loco pollicis, hae quatuor vocantur empiniones, et sunt minores peninis et maiores plumis.

## CAPITVLVM LI.

*De positione maiorum pennarum.*

**P**ositio autem pennarum maiorum in ala hoc modo est, et incipiamus ab extrinseco, deuenientes ad illas, quae sunt propinquiores corpori. Vltimo ossi tertiae iuncturae alae, quam diximus, adhaeret illa sola penna vltima et forinseca, quam dicimus saxellum, et adhaeret secundum longum seu cannoli radicis suae, et peruenit vsque ad illum locum, quo iungitur hoc os aliis ossibus. Alii ossi, cui iungitur istud, adhaerent tres pennae maiores, quae non adhaerent tam fixe huic ossi, quam firme adhaerebat saxellus primo ossi, et istae tres videntur cum saxello magis contiguari inuicem, quam cum aliis sex, quae sequuntur. Alii vero ossi, quod contiguatur huic, adhaerent sex pennae, quamuis non tam fixe neque tam firme, quemadmodum tres praedictae ossi praedicto, et sic tribus his ossibus adhaerent decem pennae, quas dicimus decem forinsecas, hae vero decem sunt magis contiguatae inuicem, quam cum illis, quae sequuntur, et harum decem, quando ala est extenta, vnaquaeque facit angulum acutum cum ala sibi subiecta exteriori, interiori vero obtusum propter saxellum, qui tam prope adhaeret ossi, quod nullum angulum cum osse subiecto facit. Ossi vero maiori de facilibus, et est extrinsecum, adhaerent duodecim pennae seriatim per longum, quae dicuntur vani, et hae sunt vnius formae et vnius coloris, scilicet alterius, quam illae decem



forinsecas, hi vero vani extenta ala faciunt vnaquaeque angulos duos rectos vtrinque cum osse subiecto. Reliquae quatuor subsequuntur hos duodecim vanos seriatim, quae quatuor dicuntur corales, et sunt fere alterius formae et coloris, quam vani. Omnes autem hae viginti sex continentur seriatim in cute cooperiente alam, extenta illuc, vnde exeunt cannulae radicales pennarum, et hae cannulae perueniunt vsque ad os intus in corio, perforantes praeter saxellum, qui adhaeret ipsi ossi, vt dictum est. Sunt etiam in ala supra istas viginti sex pennas seriatim et infra ipsas aliae pennae minores illis et maiores plumis, et sunt duriores et maiores respectu sui, quam aliae. Sed vnaquaeque illarum, quae supprastant decem forinsecis, inter quasque duas lateraliter collocantur, et perueniunt vsque ad os, scilicet quantum maiores, et plus: illarum vero, quae substant, vnaquaeque adhaeret alicui, scilicet maiori lateraliter iuxta cannas maiores, et non protenduntur vsque ad os, quantum protendebantur cannae maiores, et istae, quae substant illis decem, sunt parvae, debiles et exiles plus quam illae, quae supprastant. Illae autem, quae supprastant vanis et coralibus, non supprastant collateraliter ipsis, sed directe, vnaquaeque parua supra suam maiorem, et tantum appropinquat ossi, quantum illae, sed illae, quae substant vanis et coralibus, adhaerent similiter illis non collateraliter, sed directe sub illis, et non protenduntur vsque ad os, sed vsque ad lacertum subteriore, et sunt debiles et exiles, vt illae, quae substant decem primis. Et supra has minores, quae supprastant maioribus, et sub istis, quae substant similiter maioribus, sunt aliae locatae seriatim per ordinem pennae minores et plumae vsque per totam alam, sic munientes et protegentes totam alam et confirmantes aliae alias. Praeterea sunt illae, quae dicuntur empiniones, in loco, vbi diximus. Sic autem sunt propinquae huiusmodi pennae inuicem, quod, quando extenditur ala, interior medietas forinsecas per longum cooperitur ad minus ab exteriori medietate illius, quae sequitur eam, et sic de caeteris per ordinem, quod fit, vt non sint interualla nocentia volatui; quod autem exterius est de pilositate, extra costam pennarum decem, et multo magis saxelli, durius, densius et breuius, quam quod est ex alia parte costae, hoc fuit necessarium, cum illud latus pennae esset detectum et expositum, ad incidendum ventum et aërem, et quanto plus elongantur a saxello, tanto dilargatur et debilitatur plus, cuius simile est in cauda, quando vero ala replicata est et reducta in corpus ad replicationes, iuncturis debitis corales cooperiunt vanos, et vani curtellos, quod totum est ad meliorem custodiam pennarum aliarum ab aliis inuicem. Est autem iuuamentum coralium, vt, quando extenditur ala ad volandum, munita sit pennis vsque ad corpus et sine aliquo interuallo, per hoc enim melius sustinetur avis in aëre, quod si corales deessent, magnum esset interuallum inter corpus et locum, vnde incipiunt vani, per tale siquidem interuallum transiret ventus et aër, et aqua pluuiae, quod totum esset nocumentum sustentationis et volatus avis, et quando ala esset reducta ad corpus, iam dorsum et vani non haberent sufficiens



sufficiens cooperimentum. Est vero aliud iuuamentum pennarum, quae dicuntur vani, hae namque, quando extenditur ala et mouetur ad volandum, iuuant sustentare auem et impelli ad anterius, maxime ex motu alae praedicto, et quando ala reducta est ad corpus, vani cooperiunt curtellos, imo omnes illas decem forinfecas. Decem vero forinfecae habent hoc iuuamentum, quando extenta est ala ad volandum, iuuant sustentari auem, sed magis iuuant impelli ad antea, et hoc est earum proprium, per motus namque suos semicirculares et aequidistantes iuuant subleuari pondus corporis auis, et impelli ad ante, et vnaquaeque magis, quanto magis exterior et remotior est, sicut praedictum est in iuuamento membrorum, et ideo accidit, quod amissa vna de his decem auis peius volat, quam amissa aliqua de vanis, et magis nocebit volatui, quam si amiserit vnā de exterioribus, et quando ala reducta est ad corpus, hae decem iuuant cooperiri latera et calefieri, in quibus lateribus paucae plumae et paucae dumae naturaliter infunt. Empiniones autem iuuant ad hoc, quod, quando auis descendit de alto, coarctat et concludit caeteras pennas ad corpus, et extendit empiniones, nam, si expansis pennis et empinionibus descenderet, ventus et aër subleuaret ipsam, et prohiberet eius descensum, et si totaliter conclusis alis, pennis et empinionibus descenderet, ipsa ponderosa descenderet et non regeret se, quō vellet, aut quomodo vellet. Cum empinionibus vero expansis solum, non impeditur in suo descensu, sed descendit regendo se, quo vult, et quomodo vult; pennae vero suprastantes et substantes maioribus, et aliae per ordinem supra illas et sub illis, iuuamentum habent concludere et cooperire interualla, quae erant inter cannas et cannulas pennarum, et confirmare magis pennas. Dictum est itaque de numero, positione et iuuamento pennarum in ala, dicatur nunc de cauda.

## CAPITVLVM LII.

### *De numero pennarum caudae.*

**N**umerus autem pennarum in cauda rapacium, vt saepius accidit, est duodecim. Accidit etiam aliquando, quod sint tredecim, vel quatuordecim, vel pauciores, propter abundantiam vel indigentiam materiae, sicut est videre in digitis humanis et in cornibus arietum et in aliis. In auibus non rapacibus sunt in quibusdam speciebus multo plures, et in aliis pauciores, de quorum numero non intendimus dicere, vt supra dictum est. Hoc tamen hic notandum est, quod aliquando nomine caudae intelligimus solas pennas caudae, et non membrum, a quo exeunt pennae, aliquando vero et magis proprie membrum illud, a quo oriuntur et exeunt pennae caudae, cui membro superest id, quod dicitur perunctum, in maribus et foeminis.



## CAPITVLVM LIII.

*De positione et forma pennarum caudae.*

**P**ositio autem et forma pennarum caudae hoc modo se habet: recte a medio membri, quod dicitur cauda, secundum longitudinem exeunt duae pennae, quae cooperiunt alias pennas, quando cauda non est extenta, dicuntur coopertoriae, et naturaliter harum dextra cooperit sinistram, hae sunt longiores aliis in pluribus rapacibus, quibus utimur, sed in aliis auibus in quibusdam longiores, in quibusdam breuiiores. Sunt et aliae decem collaterales istis duabus, quinque ex vno latere, quinque ex alio, seriatim et per ordinem vna subsequens aliam, quae decem, quando cooperiuntur a duabus cooperculis, quando cauda non est extenta, dicuntur cooperculae, hae dextrae, illae sinistrae. Cooperculae vero, vt amplius cooperire possent, ex utroque latere costulae suae fuerunt aequa amplitudine pilosae, reliquae vero latius sunt pilosae a latere intrinseco quam extrinseco, et secundum quod magis distant ab his duabus, sic strictius sunt pilosae exterius, et pilositate strictiore, et interius sunt pilosae pilositate latiore et molliore, quod patet manifeste in duabus forinsecis pennis caudae, vna dextra, altera sinistra, quod conuenienter accidit propter duas causas dictas in pennis forinsecis alae. Quando vero hae duodecim pennae caudae sunt extentae et expansae ad volandum, extremitates longitudinis earum faciunt formam in generibus falconum portionis circuli, et hanc exterius in quibusdam maioris portionis, et in quibusdam minoris: in modis vero accipitrum et niforum non faciunt formam portionis circuli, sed potius aequalem longitudinem linearem. Sunt et aliae aues, in quarum caudis huiusmodi forma est arcualis non exterius sed interius, pro eo quod pennae mediae sunt breuiiores, extremae vero et forinsecae longiores. Sunt vero plures aliae species non rapacium, in quibus, secundum quod sunt diuersae, sunt et aliae huiusmodi formae extremarum pennarum caudae extendarum. Super has vero duodecim pennas caudae sunt et aliae multo minores eis, desubtus vero similiter aliae subalbidae molliores et longiores illis, quae supstant ipsis duodecim, et hae inferiores a quibusdam dicuntur Bracalae. Iuuamentum autem caudae in auibus est multiplex, ipsa enim expansa iuuat sustentari corpus auis aequo magis pondere, et per adiutorium caudae alae minus fatigantur, et per caudae motum auis iuuatur habere quatuor motus, sursum, deorsum, dextrorsum et sinistrorsum: illae vero, quae supstant duodecim pennis caudae, et illae, quae dicuntur bracalae, sunt illic ad claudendum interualla, quae erant inter cannas illarum duodecim, et ad fortificandum pennas, et ad calefaciendum loca, in quibus sunt. Sunt et aues, quibus non insunt in cauda pennae magnae, quamuis sint magni et ponderosi corporis, vt grues, biftardae, cinni, anseres, anates, et vniuersaliter aues aquaticae in maiori parte habent breuiorem caudam, quam caeterae; et sunt aues, quae habent longam caudam respectu sui corporis, vt pica. Generaliter autem pennae alarum



rum et caudae in quibusdam auibus naturaliter sunt longae, respectu sui corporis, in quibusdam breues, in quibusdam molles, in quibusdam durae, in quibusdam amplae, in quibusdam strictae, et in quibusdam mediocres.

### *Addidit Rex.*

Inter modos auium aquaticarum, terrestrium seu mediarum, quaedam habent breuem caudam, quaedam longam. Omnes vero aues aquaticae et mediae sunt breuem habentes caudam, sicut cinni, anseres, anates, grues, et huiusmodi, generaliter tamen omnes aues aquaticae, mediae et terrestres, quarum mansio semper est in terra vel in aquis, pascentes herbas, seu piscantes, habent breuem caudam respectu sui corporis. Causae vero, quare habent curtam caudam, sunt hae: prima videlicet, cum iuuamentis, quibus longa cauda iuuare videtur, istae aues non egeant, eo quod mansio earum non est in arboribus seu rupibus, ita quod, quando vellent a terra super arbores insidere, volando in fursum velint se regere supra caudam, nec resideant in arboribus, quod oporteat eas opponendo se ventorum incurfibus et aliis obstaculis se regere et gubernare cum cauda. Secunda est, quia, cum earum status sit supra terram ratione mansionis et acquisitionis cibi, et oporteat eas ad hoc, quod cibum inueniant, discurrere super terram, et maxime mane vadant ad pascendum, tempore scilicet, quo herbae sunt plenae rore, ad minus, si caudam haberent longam, madefierent caudae ipsae, vnde tam ad reditum suum, quam ad alium quemcunque volatum, cauda longa madefacta noceret potius, quam iuaret, et si hoc accidit pascentibus herbam, multo magis in piscantibus, quae manent semper in aquis.

## *CAPITVLVM LIV.*

### *De maneriebus volatum in auibus.*

**D**icto de diuersitate membrorum in auibus, et de iuuamento ipsorum, nec non et de plumagio, sequitur, vt dicamus de natura volatus post illa duo, cum ex illis duobus habeatur. Est autem volatus incessus volatilium per aëra, qui fit cum motu alarum: quemadmodum ambulatio est incessus super terram, qui fit per motum pedum, sed nec omne volatile, nec omne alatum dicimus esse auem, cum multae sint alae, quae non sunt auium, sed omnem auem dicimus esse alatam, illam vero solum auem dicimus, quae pennata est et plumosa naturaliter. Et quoniam volatus auium fit cum motu alarum suarum, videnda est diuersitas motus alarum volando, vt per hoc videatur diuersa maneries volatus in auibus. Auium quaedam vno motu mouent alas in suo volatu, et illum motum non nisi necessitate vrgente mutant; quaedam diuersimode mouent suas alas in volatu, et modos mouendi alas mutant necessitate etiam non vrgente. Illarum, quae vno motu mouent alas in volatu suo, quaedam frequenter mouent alas, quaedam raro,

H

quae.



quaedam neque raro, neque frequenter. Quaecunque igitur aues habent alas breuiiores et pennas alarum forinfecas breuiiores, quam conueniat corpori suo, et quaecunque habent alas longas, pennas tamen forinfecas alarum breuiiores, quam corpori conueniat, pro eo quod sine multo motu alarum non possunt impelli, neque bene sustentari in aëre, frequenter mouent alas, quae si habuerint simul cum praedictis dispositionibus pennas forinfecas alarum strictas et molles, cum interuallis naturalibus vel accidentalibus, frequentius mouebunt alas volando, si vero duras vel amplas sine interuallis, minus frequenter mouebunt alas, pro eo quod amplitudo pennarum et durties earum iuuant aues melius sustentari et impelli per aëra. Inter aquaticas aues plures sunt, quae frequenter mouent alas, vt modi anatum, anserum, mergorum, fulicae, et plures aliae; inter medias modus plueriorum, et aliae plures; inter terrestres, vt franquillini, modi perdicum, fasciani, modi coturnicum, et quae dicuntur anates campestres, et plures aliae, et inter indiuidua vnius speciei sunt quaedam, quae frequentius mouent alas aliis, et sunt quaedam, quae minus frequenter. Quaecunque vero aues habent alas et pennas forinfecas alarum longiores, quam conueniat suo corpori, et quaecunque alas breues, pennas tamen alarum forinfecas longiores habent, quam conueniat corpori, pro eo quod sine multo motu alarum possunt sustentari et impelli per aëra, raro mouent alas, quae, si habuerint simul cum praedictis dispositionibus alarum et pennarum pennas forinfecas alarum duras et amplas, sine interuallis naturalibus et accidentalibus, pro eo quod huiusmodi alae et pennae diutius iuuant aues sustentari et longius impelli, rarius mouebunt alas volando, si vero molles et strictas cum interuallis aliquibus, minus raro oportebit mouere alas, cum huiusmodi pennae non iuuent aues sustentari in aëre aut impelli longe sine motu alarum; ideo omnis auis habens curtas pennas alarum et molles plus, quam conueniat suo corpori, pro eo quod ponderosa est, et omne ponderosum tendit ad centrum, si non frequenter moueat alas, cadendo tendit ad terram. Aues raro mouentes alas volando sunt modi ayronum, albani, huani, milui, et genera aquilarum, et plures aliae de aquaticis, terrestribus, mediis, et omnes aues maiores corpore raro mouent alas volando, propter longitudinem alarum et pennarum, quam habent, maiorem circulationem faciunt, cum mouent alas ad volandum, et alae et pennae ductae per maiorem circulationem per longius spatium ducuntur, propter hoc tardius reducuntur ad iterandum motum, et sic necessario raro mouent alas, similiter e conuerso illae, quae curtas habent alas et pennas alarum, motu alarum breuiorem circulationem faciunt, et per breuius spatium ducuntur alae et pennae, propter hoc citius reducuntur ad iterandum motum, et sic necessario mouent frequenter alas. Inter has etiam, quae raro mouent alas, sub eadem specie sunt quaedam, quae mouent rarius aliis. REX.

Praeterea aues habentes longas alas et pennas amplas, cum ante se volunt impellere in volando, mouendo suas alas longas versus dorsum, impellunt ea quan-



quantitate, qua contingunt aërem ipsum, et cum longae sunt alae multum, et pennae amplae, multum de aëre contingunt, quare multus aër multum resistit impulsioni, et propter resistantiam ipsius, in aperiendo etiam et claudendo alas, alae rarius mouentur, et hoc accidit simili modo, sicut accidit de motu plumbi lati et acuti, eo quod plumbum latum tardius descendit, quam plumbum acutum, propter maiorem resistantiam, ut dicit Philosophus in libro coeli et mundi. Quaecunque autem aues habent alas et pennas forinsecas alarum proportionales suo corpori, scilicet quod neque longiores habent, quam conueniant, neque breuiores, sed tantas, quanta conueniunt, pro eo quod ex motu alarum et pennarum neque maiorem circulationem faciunt, neque minorem, sed mediam inter maiorem et minorem, et sic neque tardant ad iterandum motum, neque properant, neque raro, neque frequenter mouent alas volando, sed inter vtrumque, quoniam tamen medium contingit distare aequaliter ab extremis, et contingit, quod appropinquet magis alteri extremorum, si habuerint pennas alarum forinsecas amplas et duras, non iam vere mediocriter, sed accedendo ad raritatem mouebunt alas volando, et tanto plus accedendo ad raritatem, quanto ampliores et duriores habebunt eas: sed si habuerint eas pennas strictas et molles, non iam vere mediocriter, sed accedendo ad frequentationem mouebunt alas, et tanto amplius, quanto strictiores et molliores habebunt eas. Aues, quae mediocriter mouent alas, sunt ut plures modi falconum, et aliae plures de vnoquoque genere. Vniuersaliter de omnibus generibus auium dicitur, quod quanto habebunt pennas alarum forinsecas ampliores et longiores ac duriores, tanto erunt illae aues melioris volatus, et e conuerso. Patet itaque ex praedictis, quae sint aues, quae habent in volatu suo vnum modum mouendi alas, de quibus etiam sciendum, quod istum suum modum mouendi alas mutant, quando necessitas vrget, verbi gratia, quando timent et quaerunt fugere, omnes conantur quanto plus possunt frequentius mouere alas; et similiter propter escam acquirendam, praecipue rapaces, quando conantur rapere praedam, sed quando longum volatum conantur facere, sicut accidit transeundo ad loca longinqua, et redeundo, omnes nituntur rarius mouere alas, frequens enim motio alarum ipsas defatigaret, et defatigatae longum volatum facere non possent. Inde accidit, quod aues rapaces habentes interualla pennarum, sicut accipitres et nisi, postquam frequentius mouerunt alas ad praedandum, si contingit, quod non capiant praedam, statim extentis alis, et non motis neque frequenter neque raro, per spatium coguntur euolare, quatenus ab illa defatigatione, quam sustinuerunt, in frequentius mouendo alas ad praedandum, quiescere valeant sic extentis alis, quando etiam ascendere quaerunt circumuolando ad altum, mutant modum mouendi alas, sicut accipitres et nisi, postquam per aliquod spatium frequentius mouerunt alas, postea ipsis extensis et non motis, ut quiescant, in circuitu circumferuntur, statimque, cum volunt plus ascendere, iterum frequenter coguntur mouere alas, deinde circumferuntur extendendo alas, et non mouendo eas per spatium, sic vicissim



permutantes motum alarum, vt quiescant a labore, quem habent ex frequentiori motu alarum, diu namque non possunt frequentius mouere alas; per hoc etiam patet, quod frequens motio alarum generata est per fatigationem auium, fatigatio vero facit, quod non diu possit durare frequens motio alarum, et sic necessitate coguntur mutare modum mouendi alas. Vniuersaliter autem omnes, quando volant aliquo ad insidendum, tenent alas expansas, nec mouent eas, vt melius insidant. Illarum autem auium, quae in volatu suo diuersimode mouent alas, nulla necessitate urgente, sed naturaliter, plures sunt modi, quaedam enim sunt, quae frequenter mouent alas per spatium, et in eodem volatu suo conclusis alis se impellunt per spatium, sic vicissim complentes volatum suum, vt noctuae, et plures de auiculis, et quaedam sunt, quae modo frequenter mouent alas, modo raro, et modo conclusis alis volando per spatium se impellunt, sic vicissim perficientes volatum suum, vt modi picarum, Iayus, vpupa, et quaedam aliae, et tam haec, quam supra dictae, pro eo quod habent alas curtas et pennas, et pro eo quod habent distantias inter pennas, non possunt diu volare frequenter mouendo alas, ideo necessario mutant modum mouendi alas, vt quiescant, dum tenent alas conclusas, et per vicissitudines huiusmodi releuantur a fatigatione. Est etiam quidam modus columborum de Syria, qui directe volando naturaliter, in ipso volatu inuersant se bis vel ter, quasi stupefacti essent, et statim iterum directe volant, quod vnde proueniat, ignotum est nobis, nisi hoc faciant alacritate et laetitia. Sunt et alii modi plures mouendi alas de pluralitate, quorum prolixum esset subdere exempla.

Rursus auium quaedam sunt velocis volatus, quaedam tardi, velociter autem volare dicimus, pertransire in breui tempore spatium, quod transuolant, velox enim est, quod in breui tempore multum pertransit, et tardum, quod in multo tempore parum pertransit. Aues itaque, quae sunt fortes, et habent pectus carnosum et lacertosum pennasque alarum forinsecas duras, et longiores, et firmas, quoniam per haec iuuantur amplius impelli in illo breui spatio, sunt velocis volatus, quemadmodum de raro mouentibus aquilarum genus, bistardae, modus columborum, galerani campestres et aquatici, species corlinorum maiorum, et plures aliae, praecipue quae habent maiores alas et maiores pennas, ex motu namque harum maior circulatio fit, per maiorem circulationem fit impulsio fortior, et sic motus velocior, quod videtur in galeis nauigantibus longioribus remis, et quemadmodum de frequenter mouentibus alas modi anserum, anatum, et pluerii, et quae dicuntur anates campestres, franquilini, fassiani, modi perdicum et coturnicum, et plures aliae. Sed aues, quae sunt debiles et pectus non habent carnosum, neque lacertosum, neque pennas forinsecas duras et firmas, quoniam per hanc dispositionem membrorum et pennarum minus impelluntur, sunt tardi volatus, quemadmodum de raro mouentibus alas omnes modi ayronum et sibi similia, albani, huani et plures aliae, quemadmodum de frequenter mouentibus alas

genera



genera mergorum, fulicae, modi rallorum tam campestrium quam aquaticorum, et aues quaedam de regione orientali, quae dicuntur aues de paradiso, et plures aliae tam de aquaticis quam terrestribus. Amplius auium, dum sunt in volatu suo, quaedam diuertunt et cedunt rapacibus persequentibus eas, quae omnes sunt de raro mouentibus alas, et non de maioribus corpore, hae, quoniam non impediuntur frequenti motu alarum, neque magnitudine corporis, diuertere possunt et cedere in volando, vt modi ayronum, albani, huani, cornices, milui, vpupae, vanelli, picae, et plures aliae tam de minoribus, quam de mediocribus; et quaedam neque diuertunt, neque cedunt in volatu suo rapacibus persequentibus eas, quae omnes secundum plurimum sunt de frequenter mouentibus alas, vt modi anserum, anatum, pluerii, fasiani, franquilini, modi perdicum et coturnicum, et generaliter omnes, quae frequenter mouent alas, ex eo enim, quod frequenter mouent alas, non possunt dare operam ad diuertendum et ad cedendum, maiores etiam corpore, vt cinni, cofani, bistardae, grues et huiusmodi maiores, pro eo quod magnitudo corporis impedit diuertimenta fieri in volando, et non diuertunt, neque cedunt, dum volant. Amplius auium quaedam sunt curti volatus, quaedam longi, curti volatus dicimus illas aues, quae parum possunt perseuerare volando et non multum, de quibus contingit, quod fatigentur suis volatibus, vt capiantur aliquando manibus, aliquando canibus, vt sunt fasiani, modi perdicum, coturnicum, franquilini, et plures aliae de illis, quae frequenter mouent alas, nam de raro mouentibus nullae sunt curti volatus, propter hoc generaliter potest dici, quod omnes, quae parum perseuerant volando, sunt de illis, quae frequenter mouent alas, non tamen e conuerso, cum plures inueniantur de frequenter mouentibus alas, quae non sunt curti volatus, vt inferius dicetur. Causa autem, quare aues non perseuerant volando, et sunt curti volatus, est haec: in omnibus huiusmodi auibus alae sunt paruae, quantum ad corpus, quod deferunt, et pennae alarum forinsecae strictae cum interuallis pluribus, propter quod oportet eas frequenter mouere alas, et ex frequenti motu tali citius defatigantur, et cum non possunt diutius in aëre sustentari, quoniam alae et pennae non sunt, quantaue conueniunt corpori, necesse habent ad terram descendere, et ideo sunt curti volatus; longi vero volatus sunt illae, quae diu possunt perseuerare volando, quas non potest homo defatigare tantum volatibus suis, quod contingat ipsas capi manibus aut canibus, quemadmodum multae de frequenter mouentibus alas, quae diu perseuerant volando, vt ayrones, albani, huani, milui, et plures aliae, hae autem omnes sunt longi volatus, quoniam habent alas longas et pennas amplas respectu sui corporis, quod deferunt, vnde diutius possunt in aëre sustentari, de raro vero mouentibus alas quae species rarius mouebit alas, perseuerabit diutius, et longiorem facit volatum, et sub eadem specie quod indiuiduum rarius mouebit alas, perseuerabit diutius, quam illud, quod non tam raro mouebit. Illae autem, quae sunt curti volatus, et frequenter mouent alas, adiutorio venti



longum volatum faciunt, scilicet quando transeunt aut redeunt, et tunc non frequenter mouent alas, sicut cum de insula in insulam transeunt, vt coturnices. Item aues, quae habent longas alas et pennas, melius volant cum vento, quam illae aues, quae habent curtas alas et pennas, esto quod sint vnus velocitatis in volatu suo sine vento; sed illae, quae habent curtas alas et curtas pennas alarum, melius volant contra ventum, quam illae, quae habent curtas alas et longas pennas, esto quod sint vnus velocitatis in volatu suo sine vento. Et illae, quae frequenter mouent alas suas, sunt melioris volatus directe contra ventum, quam illae, quae raro mouent alas. Plures insunt de minoribus, cuiuscunque modi sint, quae possint melius volare contra ventum, quam de maioribus. Omnes etiam aues aquaticae minus laeduntur in volatu suo a pluuiis, quam aliae, et eadem auis, dum habet plumas et pennas sauras seu primas, magis laeditur a pluuiis, quam habens pennas mutatas, et quanto magis nouae erunt pennae mutatae, dummodo percompletae sint, tanto minus laeduntur a pluuiis. Amplius auium quarundam volatus in die tantum est, sed hoc duobus modis, scilicet omnibus horis diei indifferenter, vt modi picarum, columbarum, passerum, et plurium auicularum, aut circa mane et circa sero tantum, circa mane ad habendam escam pro die, circa sero et noctem, vt aues aquaticae, quae exeunt ad pascendum in terra, et plures de mediis et terrestribus, nam circa medium diem timent volare, nam tunc propter assumpta pascua sunt ponderosiores et pigriores ad volandum, vnde minus, quam quando ieiunae sunt, possunt resistere rapacibus auibus, vt aquilis et aliis rapacibus. Consueuerunt namque rapaces circa medium diem sublimi volare, praecipue in aestate, et in diebus calidis ad refrigerandum se in sublimi et exaureandum. Est et alia ratio, quae apparet magis sufficiens, videlicet quod, cum aues mane exeant ad pascendum famelicae factae, et completa digestionis noctis praecedentis, postquam sufficienter pascua sumpserint, de necessitate oportet quiescere tunc, quod in quiete melior sit digestio, quam in motu. Et volatus quarundam etiam saepius est in nocte, aut in crepusculis, vt noctuarum, bubonum, vespertilionum, quae non tunc volant, quod melius videant, quam in die, sed quoniam in die volare timent, cum habeantur odio, et verberentur a caeteris. Et volatus quarundam est in die et in nocte, vt liuercinorum. Generaliter vero omnes aues, dum transeunt aut recedunt, quandocunque ventus fauet eis, de die et de nocte volant, vt dictum est in capitulis de transitu et reditu auium. Volatus quarundam est saepius prope terram et infirmus, vt gallinarum, perdicum, fasianorum, pauonum, coturnicum, et caeterarum, quae sunt grauis et mali volatus, et hoc, vt cito recuperent ad loca suae defensionis. Et quarundam volatus saepius est sublimis, vt auium rapacium, et non rapacium plurium, quae sunt leuis et boni volatus, et hoc, vt a remotis videant escam sibi, et propter hoc etiam rapaces fuerunt prae caeteris boni visus; sed quae petunt volare ad alta, aut directe ascendunt, vt huani, aut circumvolando, vt ayrones, sed dum cum adiutorio venti quaerunt volare, omnes aues altius extolluntur, cum vero

ventus



ventus est contrarius, quanto plus infra possunt, quoniam ventus plus potest in superioribus. Amplius volatus quarundam, vt semper, in singularitate est, vt auium rapacium, pro eo quod vna quaerit rapere praedam alii, vnde vnaquaeque timet, et singulariter volat, propterea quod non potest deglutire escam suam, sed paulatim deplumat, et deinde paulatim morsellatim degustat, vnde, dum sic praeparat escam suam, timet de aliis rapacibus, et ideo libentius singulariter volat. Et quarundam volatus, vt saepius, est in societate, vt omnium, quae granatim colligunt escam suam, et semel deglutiunt, quod semel accipiunt. Sed volatus, qui est in societate, duobus modis est: quaedam enim volant ordinate, vt grues, anseres, anates, et aquaticae: quaedam volant inordinate et confuse, vt passerres, sturnelli, columbi, quae ideo in societate volant, quod saluius et securius sunt, maxime cum auibus suae speciei, quas vnitas et similitudo naturae consociat et confoederat. Et quarundam volatus est aliquando singulariter, aliquando associatus, vt turturum et facherarum. Et omnes aues ad pullificandum consociant semas et foemina, et ad mutandum loca propter calorem aut frigus associant se magis, et, quando non pullificant, in maiores turmas congregantur.

### CAPITVLVM LV.

*De his, per quae pugnant aut defendunt se aues.*

Postquam iam dictum est de iuuamento membrorum et plumagii, sequitur, vt dicamus, per quae pugnant et defendunt se aues. Modus itaque pugnae et defensionis, quae fiunt inter aues generaliter, est aut per membra sua, quae opponunt ad pugnandum et defendendum, aut per volatum suum, aut per recursum, quem habent ad loca. Per membra vero, sicut per rostrum, per alas, per pedes et ungues, per haec vero aut omnia, aut quaedam. Per rostrum multis modis, secundum quod multae sunt formae rostrorum, aut enim percutiendo, aut mordendo, aut vtrumque faciendo, et has impugnationes aut defensiones faciunt duobus modis, volando aut non volando. Illae namque, quae habent rostrum dentatum et latum, saepius mordent, quam percutiant, et hoc non volando, volando namque mordent, vti modi cinnorum, pellicani, et genera anserum, anatum, et similium aquaticarum, et naturaliter omnes habentes rostrum latum et dentatum saepius mordent, quam percutiant. Sed illae, quae habent rostrum longum, acutum et durum, volando et non volando percutiunt cum rostro, et non mordent nisi accidentaliter, et postquam percusserint, vt modi ciconiarum et ayronum, habentes vero rostrum aduncum, et durum, et acutum, mordent cum rostro tam volando quam non volando, et non percutiunt, vt aues rapaces, et specialiter vt genus falconum. Genera vero gruum, cum longum et durum habeant rostrum, neque latum, vt anseres aut anates, neque acutum, vt ciconiae aut ayrones, percutiunt et mordent, et vtrumque faciunt magis non volando, sed plus percutiunt, quam mordent, siue volando, siue non volando, quoniam habent formam rostri  
magis



magis ad percutiendum, quam ad mordendum. Et vniuersaliter omnes habentes rostrum acutum et durum, percutiunt plus, quam mordeant, mergones vero, qui et corui marini dicuntur, mordendo percutiunt, et percutiendo mordent, et habent rostrum longum et curuum et incisum. Corui vero, cornices et similes percutiunt et mordent, et habent rostrum durum, acutum et partim recuruum. Quae vero cauant sub terra pro inueniendis vermibus, modicam vel nullam pugnam aut defensionem faciunt cum suo rostro, quamuis longum habeant, cum sit rostrum molle per totum, praeterquam in principio anterius, vbi est durum, rotundum et hebes, vt sunt corlinorum modi, pluerii, vanelli et huiusmodi, per alas pugnant et defendunt se percutiendo, siue volent, siue non volent, percutiunt autem cum alis, sed specialiter cum illis ossibus alarum, quae exeunt deforis dura et acuta, vt diximus. Aquaticae vero, quae se defendunt cum alis, habent hoc os longum, durius et grossius caeteris, vt modi cinnorum, anserum, anatum, pellicanorum et similium, et quaedam de terrestribus, vt modi columbarum et bistardarum, et quaedam de mediis, vt pluerii, vanelli, liuercini, et corlinorum modi, et omnes cauantes sub terra, per pedes et vngues pugnant et defendunt se percutiendo, dilaniando, branchando, opponendo ipsos, vbi expedit, et repellendo nocumentum, et hoc faciunt tam volando, quam non volando. Grues habent tres defensiones cum pedibus, volantes enim aliquando recalcitrando percutiunt cum pedibus, vt dicetur in tractatu de venatione, et stantes super terram erecte, calcant et subpedicant cum pedibus, sed supinatae iacentes, percutiunt et lacerant cum illis vnguibus vtriusque pedis, quos diximus. Ayrones vero non nisi resupinati super terram defendunt se cum pedibus, tunc vero nituntur repellere nocumentum a se cum vtroque pede, quamuis hoc possint facere debiliter. Sed aues rapaces brancant et vulnerant cum pedibus tam volantes quam non volantes; contingit enim, quod auium rapacium persequentium illa, quae fugit, porrigit pedes suos fuganti, et sic capiunt et colligant pedes cum pedibus, sed raro accidit, quod auis rapax ad defensionem per se pugnet cum alia rapace. Generaliter vero omnes aues, quae non habent aduncos vngues, neque vnum, neque omnes, defendunt se nunquam cum pedibus laniano, sed de pedibus suis illam defensionem faciunt, quam vniuersaliter omnes aues, quae non habent aduncos vngues, anteponunt namque pectori suo pedes, vt cum eis repellant aues rapaces. Sunt etiam aues, quae cum pedibus saltant super terram, vt aues rapaces sub se comprimant, vt bistardae, et anates campestres, similes sunt bistardis, sed longe minores, et in aestate turpem sonum faciunt ad desiderium coitus. Per volatum suum multipliciter se defendunt aues, nam aliae per longum volatum quaerunt euadere, vt grues, aliae per velocem ad veniendum ad locum defensionis suae, vt perdicum et coturnicum modi, aliae per diuertimenta et cessiones, quas faciunt in volando, vt modi ayronum, cornices, vpupae, vanelli, picae, et plures aliae. Aliae vero per volatum ad altiora se quaerunt defendere, et hoc duobus modis;

aut



aut enim directe ascendunt, vt columbi, turtures, anates campestris, aut in gyrum circumuolando ascendunt ad defensionem sui, vt ayrones, qui, secundum quod dictum est, duplici vtuntur defensione per volatum, diuertimenti scilicet et ascensus. Et omnes, quae per volatum quaerunt defendere se ascendendo, idcirco ascendunt, quod non possint superari et vinci ab auibus rapacibus in magis ascendendo. Aliae sunt, quae quaerunt se defendere volando versus loca, de quibus timent rapaces, quamuis ad ea non descendant, vt anseres, anates, et plures aliae de riuera, quae volant circiter loca, in quibus sunt aquae magnae, nemora, calami et cannae, de quibus locis timent aues rapaces, ad huiusmodi enim loca timent descendere et accedere. Aliae ad maiorem securitatem sui volatum suum faciunt in crepusculis et in nocte, vt noctuae, bubones et liuercini, qui pro eo, quod sunt timorosi, de nocte volant securius.

### CAPITVLVM LVI.

#### *De modo defensionis.*

**D**e modo autem defensionis, quem habent aues refugiendo ad loca securiora, dicendum est, quod vniuersaliter omnes aues ad plus, si possunt, refugiunt ad loca natiuitatis suae, vel ad similia illis. Illae siquidem, quae natae sunt prope aquas, ad eas confugiunt, quarum quaedam natando in eis solum habent defensionem, vt pellicani, quaedam submergendo se penitus sub aquis, vt modi mergorum, anatum et aliarum plurium, quaedam non penitus submergendo se, sed in parte, vt cinni, et anserum modi. Aues vero, quae non natant, neque sunt aquaticae, timore auium rapacium ad aquas confugiunt, sciunt enim, quod aues rapaces de aquis timent, et circa aquas debilissimae sunt, vt dictum est in capitulo de diuisione auium. Plures itaque auium ad aquas confugiunt, quaedam pro defensione sua, quaedam pro cibo, quaedam pro utroque. Illae vero, quae natae sunt inter arbores, ad arbores confugiunt, vt modi cornicum, picarum, et aliorum plurium. Et illae, quae natae sunt prope aquas, et ipsae eadem quandoque inter arbores confugiunt, quandoque ad aquas, vt modi ayronum. Si vero natae sunt supra prata, frutices, aut dumos, ad ea confugiunt, vt turdi, sturnelli, et auicularum plures. Quae natae sunt in rupibus, ad saxosa confugiunt, vt rapaces. Sed quae natae sunt super terram, et sunt coloris terrestris, in terra latitant, et terrae se recommendant, vt perdices, coturnices, coyardi, anates campestris, calandrae, et auiculae plures, de quibus multae sunt adeo stolidae in cautela sui, quod, credentes se esse securas in terra, capiuntur etiam manibus hominum, et quando insequitur eas rapax, in terram confugiunt. Perdices, fasiani et huiusmodi, quoniam sunt curti volatus, et per adiutorium loci quaerunt defensionem sibi, nunquam libenter recedunt longe a loco apto defensioni suae. Defensionibus et impugnationibus praedictis generaliter vtitur maior pars auium, quaedam pluribus, quaedam paucioribus. Speciales autem defensiones insunt auibus et propriae, vt bistardis et



anatibus campestribus est propria defensio, emittere longe a se stercus suum in aues rapaces, quae sequuntur eas. Rursus bistardae et anates campestres contra aues rapaces horripilant plumas, agrifando se, et eleuant alas, deponendo caput ad modum gallorum pugnantium, quod propter timorem faciunt, sed tamen bistardae percutiunt alis in pectore aues rapaces. Sunt et aliae aues, quae refugiunt ad societatem et congregationem aliarum suae speciei, vt inter eas securiores sint, et per eas defendantur, sicut sunt columbi, grues, sturnelli, et aliae fere omnes, imo etiam tota agmina in se ipsa densius se constringunt, auibz rapacibus facientibus insultum in ea. Quod autem in societate tutiores sint, signum est, quod plures sunt species auium, quae concurrunt ad defendendum auem speciei suae sociam, quam auis rapax persequitur, et opponunt se rapaci aui, et nituntur verberare eam, vt grues, anseres, cornices et plures aliae.

### CAPITVLVM LVII.

*De mutatione plumagii, quam generaliter faciunt aues singulis annis.*

**D**iximus de diuersitate membrorum exteriorum, et de iuuamento eorum, et de plumagio, scilicet quomodo nascantur auibz plumae et pennae, et de situ plumarum, et de forma, quantitate, numero et positione pennarum, et de iuuamento plumarum et pennarum. Verum quoniam aues singulis annis mutant plumas et pennas, conuenit, vt dicamus de mutatione plumagii, et videamus, quare mutant aues plumagium, et quare singulis annis, et quo tempore anni, et quo modo mutant, et quo ordine, et quae citius explent mutationem, et de differentia plumagii ante mutam vel post. Fuit autem necessarium et vtile, quod aues mutarent dumas, plumas et pennas, quoniam generantur de superfluitatibus humorum, et de debili materia, quae multis ex causis corrumpuntur, eas namque ad plus per totum annum durare contingit, et dum procedunt vltius, incipiunt deuariari, vnde, si primo anno non mutarentur, tantum corroderentur in se ipsis et rumparentur, quod modicam aut nullam operationem facerent aues cum eis; idcirco natura prouidit substituere nouas, per quas expelluntur et cadunt veteres, hae autem nouae de abundantibus superfluitatibus humorum generantur, superfluitatum autem copia ex humorum abundantia fit, cuius rei signum est, quod, quando aliquis falco perficit suam mutationem citius debito, accidit, quod iterum eiicit aliquot de pennis alarum, quas primo inter alias mutauerat, et hoc est propter calorem temporis aperientem poros, et propter nutrimenti et humorum copiam. Praeterea capilli et pili quando rumpuntur aut reciduntur, restauratur, quantum fuerat deperditum et amplius, cum per continuam successionem vaporis generatio ipsorum indeterminatam longitudinem suscipiat, plumis vero et pennis non accidit sic, cum enim determinatam habeant quantitatem, si corrodantur, non restauratur eis, quod deperditur, quare, cum contingat corrosionem vsque ad radicem processu temporis protendi, si non substituerentur aliae, careret auis omnino plumis et pennis,

et



et tunc esset insufficienter munita contra importunitates aëris, et prorsus inutilis ad volandum. Singulis autem annis mutant plumagium, cum non sit sufficiens vltra annum; imo contingit, quod aues non rapaces plumagium natiuitatis suae mutant, postquam sunt completae et perfectae, et assumunt aliud plumagium, quod percrescit et percompletur proportionaliter et continuo, in quo corpus ipsius auis percompletur, et hoc plumagium secundum deponitur et mutatur item in complemento eiusdem primi anni, sicut est videre in fasianis, perdicibus et coturnicibus, et pluribus aliis, quae primo anno deponunt et renouant plumagium suum semel. Causa autem, propter quam in primo anno semel accadat mutatio plumagii in rapacibus, et non rapacibus bis, sumitur ex eo, quod dictum est in capitulo de plumagio, scilicet quod non rapaces, quibus imminebant plura nocumenta, quam rapacibus, indigebant plumis et pennis a principio, cum quibus et nocumenta fugerent, et escam sibi acquirerent, maxime illis, quibus parentes non ferunt escam, et quoniam erant humidioris naturae, quam rapaces, oriebantur eis pennae cito, debiliores tamen et molliores, percrecentes citius, quam corpus auis, crescente vero aue, et corpore iam maiore facto, et propter copiam nutrimenti, priores plumae et pennae, tanquam insufficientes deferre corpus iam maius factum, decidunt, et natura substituit alias firmiores propter hoc, quod humores iam sunt solidiores, et istae secundae sufficiunt deferre corpus vsque circa complementum anni, et tunc propter abundantiam humorum deponitur hoc plumagium secundum, et succedit tertium, quod sufficit durare per subsequentem annum: rapacibus vero, quibus non imminet tot nocumenta, et sunt siccioris naturae, quam non rapaces, non oriebantur plumae et pennae velociter, neque a principio, sed paulatim, vnde oriebantur firmiores et duriores, percrecentes proportionaliter corpori, propter quod sufficebant deferre corpus vsque circa complementum anni, et ideo semel tantum mutant plumagium primo anno, singulis vero annis succedentibus, semel mutant plumagium, tam rapaces, quam non rapaces, ratione praedicta. Tempus autem, in quo incipiunt mutare plumagium maior pars auium, est ver: in vere namque abundant humores, humorum proinde superfluitates, de quibus fit plumagium, et conuenienter fit mutatio plumagii in vere, quoniam succedit aestas, in qua non laeduntur a frigore, et per aestatem crescunt et firmanentur pennae tantum, quod sufficit transitui, quem faciunt aues in autumnio ad loca calida timentes hyemem; nec in alio tempore, quam in vere, esset conueniens mutatio plumagii, quemadmodum dictum est supra de transitu auium. Sunt tamen aliquae aues, quae in aestate mutare incipiunt, et haec diuersitas temporum mutationum accidit secundum natiuitatem ipsarum in diuersis temporibus, vnaquaeque enim auis incipit mutare plumagium suum anno completo, in tempore simili natiuitatis suae tempore, vt accidit circa mutationem frondium et herbarum in stipitibus et radicibus circa complementum anni sui, renasci incipit prioribus desiccatis, et hoc totum opinamur accidere ex motu superiorum, et diuersis



aptitudinibus materiae, in quam agit. Modus autem mutandi plumagium duplex est, alius enim est ordinarius, alius inordinarius. Ordinarius vero est, quando simul deponuntur multae pennae, sed quibus deiectis succedentes tantum crescunt, quousque iuuare possunt ad volandum, priusquam deponantur aliae, et post hoc deponuntur aliae simili modo et ordinatim. Inordinarius vero modus mutandi plumagium est, quando simul deponuntur multae pennae, et quando quibusdam eiectis deponuntur indifferenter et aliae, non expectando, quousque substitutae crescant, deinde deponuntur et aliae pennae inordinatim et dissimili modo. Aues itaque rapaces pro eo, quod vi volatus debebant acquirere praedam suam fugientem ante se, habuerunt ordinatum modum mutandi plumagium, ex qua mutatione non perditur volatus, qui eis erat necessarius ad praedandum, sed aues non rapaces terrestres minus ordinatum modum mutandi habuerunt, non enim indigebant vi volatus ad capiendum escam, cum ipsa esca non fugiat ante eas, veruntamen ad sui defensionem et ad fugiendum nocumenta indigebant volatu, vnde non omnino confuse mutant, sed aues aquaticae natantes inordinatum modum mutandi plumagium habuerunt, neque ad fugiendum nocumenta, neque ad acquisitionem escae indigebant volatu, cum vtrumque reperiant in aquis. Ordinem autem, qui habetur in mutando plumagium, experti sumus fere in auibus rapacibus euidenter, quam in caeteris, propter quod de ipso dicemus plenius infra, vbi tractabitur de muta auium rapacium. Hic tamen dicemus generaliter, vt conuenit, aues incipiunt prius mutare pennas, quam plumas, pennae enim longiores sunt plumis, et ad sui generationem et complementum indigent amplioribus humoribus, quam plumae, sed si incipiant ducere plumas prius, quam pennas, vel aequae cito, completa esset mutatio plumarum per multum tempus ante, quam mutatio pennarum, et sic aue mutata plumis diu, et non mutata pennis, non esset complementum mutationis totius plumagii in eodem tempore, quod totum esset contrarium volatui auis; rectum est igitur, quod a pennis prius incipiat mutatio, vt, cum plumarum incipiet, in eodem tempore compleatur mutatio vtrarumque. Mutationem autem plumarum citius explent aquaticae propter abundantiam humiditatis et humorum, secundo terrestres non rapaces propter maiorem copiam humiditatis, tardissime omnium aues rapaces, facta proportionem ad eandem quantitatem, sunt enim siccissimae inter aues. De tempore autem, quantum tempus scilicet postulat a principio mutationis vsque ad complementum eiusdem, et de ordine mutationis pennarum in alis et cauda dicetur plenius et specialius infra, vbi conuenit. Plumagium autem saurum seu non mutatum differt a mutato in eo, quod generaliter plumae et pennae post mutam sint meliores et alterius coloris, dumae vero plures sunt post mutam, quam ante mutam, pennae vero meliores sunt post mutam in eo, quod non tam cito madefiunt, nec tam cito rumpuntur, nec tam facile corroduntur, sicut ante mutam. Quae itaque nunc dicta sunt de mutatione plumagii generaliter, sufficiant.



---

## PROLOGVS SECVNDI LIBRI.

---

**Q**uoniam in praecedenti tractatu dictum est, quod venatio, quam faciunt homines cum auibus, est ars, et quae ars est, et quoniam est ars venandi aues non rapaces praecipue cum auibus rapacibus ea doctis, et dictum est, quare ars huiusmodi nobilior est caeteris artibus venandi, et quoniam etiam dictae sunt generaliter quaedam naturae auium, aquaticarum scilicet, mediarum et terrestrium, tam rapacium, quam non rapacium, vtilis non modicum ad huiusmodi venationem: in hoc tractatu secundo accedemus magis ad nostrum propositum, descendendo ad artem ipsam specialius, et ad omnia, quae necessarium est scire et habere illum, qui hanc scire desiderat et exercere. Artifex debet hanc artem suscipere per doctrinam alicuius experti in ea, et susceptam exercere per se ipsum, qui qualis esse debeat, docetur infra, postquam scilicet iam acquisitae sunt aues rapaces, cum quibus exerceri debet venatio, non enim qualis qualis esse debet, sed qui appetat naturaliter et diligat venationem huiusmodi, et qui per naturam ad venandum sit habilis et deinde per doctrinam: materia etiam, circa quam et circa cuius partes versatur tota intentio artificis, quae materia est aues rapaces, cum quibus exercetur huiusmodi venatio, et quamuis sunt instrumenta artificis, cum quibus capit aues non rapaces, tamen artifex versat intentionem suam circa habendas ipsas et instruendas et circa diuersos modos ipsarum auium rapacium conuenibilium ad venationem. Partes vero huiusmodi materiei sunt diuersae species auium rapacium, sicut sunt falcones, accipitres, et huiusmodi, de quibus fiet executio sufficiens postea. Partes autem artis diuersae sunt secundum diuersitatem partium materiae, nam alia pars artis est de venatione, quae fit cum modis falconum, et alia, quae fit cum modis accipitrum et nisorum, et hae partes comprehendunt etiam partes sub se, et sunt etiam partes artis et scientiae secundum modum sciendi, vna in habendo in anima, contemplatione vniuersali, ea, quae docemus, non referendo ad operationem, et haec theórica dicitur, alia in sciendo ad operationem reducere, quae docemus, et haec practica dicitur. Et cum quis huiusmodi venationem exercebit non secundum intellectum theóricae, qui prius est, neque secundum scientiam, quae refertur ad opus, dicemus ipsum casualiter operari, non secundum artem, quamuis alioquin bene operaretur in sua venatione, etenim inermes, qui in palaestricis se exercent, ferunt aliquando bonos ictus, et ignarus sagittandi percutiet aliquando ipsum signum. Finis, qui mouet artificem, est intentio eius, prius, vt habeat aues rapaces, quae edoctae sunt per suam artem capere non rapaces eo modo, quem ipse vult, posterius vero, vt cum ipsis



arte doctis capiat non rapaces, et ex his consequitur vtilitatem triplicem, secundum quod dictum est in principio primi tractatus. Principia vero, quibus vtitur in arte ipsa, sunt documenta et regulae traditae in hoc nostro libro, qualiter esse aut fieri debeant omnia, quae sunt necessaria ad venationem, quae documenta et regulae in eo, quod sub compendio debito, et secundum quod exigit rectitudo, traduntur, artem perficiunt venandi cum auibus rapacibus non rapaces. Neque liuoris oculus nos de prolixitate redarguat, cum neque eadem inutiliter repetamus, neque apponamus superflua aut impertinentia, sed tantummodo necessaria huic arti. Operationes vero, quibus innititur artifex circa hanc suam materiam, scilicet circa aues rapaces, diuersae sunt et multae, et antecedentes inuicem, et subsequentes: aliae namque sunt in cognoscendo aues rapaces; aliae in acquirendo eas, vt artifex eas habeat; aliae, vt aues rapaces iam acquisitae detineantur ab artifice; aliae in mansuefaciendo detentas, scilicet quod non horreant conuersari cum homine; aliae in instruendo mansuefactas exire de manu artificis et redire ad eius manus; aliae in docendo, vt sciant capere illas aues, quas artifex vult, et quomodo vult, quas forsan per se non caperent aut non illo modo; aliae in vtendo ad venationem non rapacium eis iam arte doctis. Praeter has autem sunt et aliae operationes non modicum vtilis ad propositum, scilicet in conseruando aues rapaces in sanitate, quatenus opus, quod ab eis requirit artifex, bene perficiant, et aliae in curando aegrotas. Ordo, qui attendi debet in arte ipsa secundum hoc, in doctrina nostrorum tractatum huius libri patet per ordinem operationum, quas diximus, prius namque est acquirere, quam acquisitum detinere et mansuefacere, et sic de caeteris, quod totum patebit plenius, in quantum quaeque suum locum sortita decenter. Instrumenta autem, per quae artifex in operationibus suis circa hanc materiam consequitur finem intentionis suae, sunt diuersa: nam quaedam sunt in acquirendo aues rapaces, vt retia, laquei, et huiusmodi, cum quibus capiuntur, cum auibus etiam rapacibus quandoque capiuntur rapaces, verbi gratia cum accipitribus falcones; quaedam sunt in detinendo iam acquisitas, vt maleculum iacti, et longa, sedilia conuenientia, et huiusmodi; quaedam sunt in mansuefaciendo detentas, vt id, quod dicitur tiratorium, cappellum, tina balneatoria, et similia; quaedam in instruendo ipsas exire de manu et ad manum redire, vt id, quod flieria seu credentia dicitur, loyrum cum carnibus et sine carnibus, et alia, cum quibus reuocantur ad homines; quaedam in docendo ipsas, vt sciant capere aues, quas vult artifex, et quomodo vult, sicut id, quod dicitur trahina, siue fiat de grue, siue de ayrone, siue de alia aue, siue de pelle leporina impleta paleis, et sunt multa, quae spectant ad trahinam; quaedam instrumenta sunt in vtendo eis iam doctis ad capiendum aues, vt tympanum pulsans, chirotheca circumducta, et huiusmodi; quaedam in conseruando sanas, etiam quando iam mutant pennas, vt domuncula, quae dicitur muta, et plumas, et multae medicinarum; quaedam in curando aegrotas, vt ipsae **medicinae**, et vasa necessaria ad dandum ipsas medicinas: de  
singulis



singulis horum instrumentorum dicetur, vbi conueniet. Praemisso vero prologo, redeamus ad intentionem, dicendo primo, quid sit auis rapax, nam per definitionem seu descriptionem maxime declaratur existentia vniuscuiusque; dicetur etiam postmodum, quare rapaces seu de rapina vocentur.

## CAPITVLVM I.

### *Quid sit auis de rapina, et quare dicatur de rapina.*

**A**uis de rapina est animal volatile, pennatum, terrestre, velocis volatus, modici gressus, vncorum vnguium et rostri, viuens de raptu viuorum animalium, foemina cuius est maior masculo. Animal est pro genere in ipsa definitione, volatile est differentia, qua differt a non volatili, pennatum similiter est differentia, qua differt ab animali volatili non pennato, sicut sunt plura ex speciebus animalium, verbi gratia, sicut vespertilio, apes, genera vermium, et huiusmodi: nam vespertilio alas habet non pennatas, sed carneas, panniculosas et cartilaginosas, quae adminiculantur ei in adhaesione murorum, lignorum et similibus, nam debiles habent pedes, quibus inhaerere non possent locis, quibus latitare volunt. Terrestre vero est eo, quod est calidius et siccius aliis, scilicet aquaticis seu mediis, vnde inhabitare non potest loca huiusmodi qualitatibus opposita, videlicet loca aquosa seu paludosa, quorum naturae oppositae sunt et disconuenientes naturis rapacium: nam rapaces sunt calidae, calore igneo, contrario frigori aqueo, et siccae siccitate terrea contraria humiditati aquosae, et dicitur a sapientibus, quod omnia per similia in forma et natura propria conseruantur et per contraria corrumpuntur. Merito igitur aues rapaces calidae et siccae non inhabitant loca dissimilia naturis suis, quibus corrumpantur, cum appetitus cuiuslibet rei viuientis non sit, vt corrumpatur res ipsa, quinimo potius, vt in sua naturali essentia conseruetur, appetitus enim contrarii viuienti non inest, nisi accidentaliter, sicut cum viuens ipsum fit aegrum vel aliqua alia alteratione mutatum; et hoc patet exercentibus se in vsu rapacium, qui, cum viderint eos aquam appetere, aegros ipsos iudicant, et proferentes aquam eisdem, ipsos curare intendunt, curati vero tanquam contrariam eorum naturae non appetunt, nisi forte eorum paucissimi, qui ex assuetudine forte habent eam assumere, vel forte patiuntur latentem distemperantiam siccitatis. Velocis volatus est alia differentia, per quam non solum differt ab animalibus non pennatis, verum etiam ab auibus, quae fere omnes, de breui volatu et longo, respectu rapacium sunt tardi volatus, nam si sunt aliquae longo volatu velociores quibusdam de rapacibus, tamen in breui volatu a quibusdam rapacibus attinguntur, verbi gratia, anates et huiusmodi sunt velociores ex longo volatu, ita, quod euadunt accipitribus,  
et



et quibusdam aliis rapacium, de curto tamen leuiter capiuntur ab eis. Falcones tamen ex longo et curto volatu capiunt eas, et specialiter falcones, qui girofalcones dicuntur. Modici gressus sunt, nam, vt saepius accidit, aues omnes velocis volatus modici seu tardi sunt gressus, quia, quod gressu deficit, volatu suppletur, et e conuerso, et hoc manifestum est in hirundinibus, quae, quia velocissimi sunt volatus, pauci vel nullius sunt gressus. Per hanc differentiam vncorum vnguium et rostri magis specificè differunt a pluribus maneriebus auium, et fere ab omnibus, licet dixerit Aristoteles, quod aues omnes vncorum vnguium sint rapaces, licet instantia inueniatur in multis, nam monedulae, sturnelli, vultures et quaedam aliae aues vncos habent vngues, tamen non viuunt de raptu, capiendo alias aues, nec rapaces dicuntur; sine dubio necessaria est haec consequentia, quod aues, si sunt rapaces, vngues vncos habeant, sed non conuertitur. Quod vero additur, viuens de raptu viuorum animalium, est vere specifica differentia, quae constituit speciem, praecedentibus addita; nam vncorum vnguium aues, quae de raptu viuorum animalium non viuunt, rapaces non dicuntur, sicut vultures et plures, quae de cadaueribus viuunt, et quaedam species anserum et similes ipsis. Cuius foemina est maior masculo, haec est proprietas non modicum substantialis, nam in nullis animalibus nobis notis reperitur, quod foemina sit maior masculo, imo aequalis, vel minor in omnibus reperitur; quod quare accidit, rationes quas vidimus super hac quaestione sufficientes dicimus, et in scriptis redigi fecimus, eo quod ab vtentibus venationibus cum auibus rapacibus saepe interrogati fuimus de hac quaestione, et sunt hae.

## CAPITVLVM II.

### *Quare foemina sit maior masculo.*

**L**egitur namque in pluribus libris philosophorum, quod calidum est operans et augmentum efficiens in subiectis, et hoc videmus per signum, nam in quolibet potentialiter humido liquefacto per calidum magis videtur quantitate liquefactum, licet nihil aliud ei admixtum fuit siue adiunctum in liquefactione; humidum vero est patiens et recipiens, quod si proportionatum est calido, extenditur subiectum, et ad magnitudinis moderatam metam peruenit, si vero humidum in proportionem excedat calidum, calido ipsum humidum regulare potente, subiectum egredietur metam praedictam, excedens magnitudinem, propter quod magnum efficietur, exinde subiectum recedens a moderata quantitate magnitudinis, plus et minus secundum proportionem ipsius humidi ad calorem. E contrario accidit paruitas corporis, videlicet humido modico existente in comparatione calidi operantis, sic ergo multiplicata caliditate respectu humidi, corpus paruum efficitur, humido vero proportionato, corpus moderatae magnitudinis efficitur, sed ipso humido excrecente in comparatione calidioris corporis, efficitur magnitudo moderan-



derantiam praedictam excedens, vnde cum aues rapaces sint calidae natura, et fere calidissimae, eo quod in eis multiplici de causa caliditates conueniunt, sunt enim calidae comparatione generationis, eo quod aues, aues namque in comparatione ambulabilium, tanquam mobiliiores, calidae iudicantur, sunt et rapaces, quarum rapacitas a caliditate contingit, inuasio enim seu raptio aliarum auium animositatem ostendit, et animositas non nisi a calore contingit, iudicantur etiam calidae a complexione, et comparatione facta ad temperantiam melioris et temperatoris speciei ipsarum; vnde cum tot de causis caliditates conueniant auibus istis, merito calidissimae iudicari possunt, ex multiplicitate enim subiecti calidi caliditas vigoratur et intenditur, sed signum est in hoc, quia videmus plura grana piperis magis calefacere paucis, et generaliter multa calida, si eiusdem speciei sint vel diuersarum coniuncta, composita plus calefaciunt paucis, et hoc accidit, quia profunditas operatur ad augmentum et multiplicationem operationis qualitatum, propter quod multus ignis ad multam materiam comburendam sufficit, et paruus non nisi modicam, eo quod suffocaretur a multa: cum igitur humidum auium rapacium sit humidum viscosum et spissum, quod apparet ex neruositate multa ipsorum, diuersificatur ratione sexus, nam in foeminis, quae sunt frigidae et humidae, respectu marium, frigiditas sexus ipsarum calorem obtemperat seu remittit, et humiditas spissum et viscosum reprimit, quare efficitur magis obediens ostensioni, quae fit a calore agentis. Calor igitur intensus rapacium, et humidum spissum et terreum ipsarum, remissa a frigiditate et humido aquoso sexus foeminei, magnitudinem corporis in foeminis operantur, et e contrario in masculis paruitatem, iuxta illud Philosophi: contrariarum causarum contrarii sunt effectus. In vnaquaque specie auium rapacium, secundum Plinium, pauciora sunt indiuidua indiuiduis cuiusvis speciei non rapacium, facta videlicet comparatione vnus speciei rapacium ad vnicam speciem non rapacium. Secundum Plinium vero ideo dicimus, eo quod in maiori parte hoc accidit, quia in paucis est reperiri instantiam, dicitur enim, quod aliqui sunt modi non rapacium, in quorum tota latitudine speciei non est nisi vnicus mas et vnica foemina, sicut dicitur de phoenice et huiusmodi: nos vero illud non credimus. Aues rapaces pauciores sunt caeteris auibus non rapacibus in specie sua, et sunt terrestres, et nullae de rapacibus sunt aquaticae, seu mediae: quia, cum vniuersaliter calidiores et sicciores sint aquaticis et mediis, contrarietatem habent aquae in duabus qualitatibus, vna actiua et alia passiuua. Cum etiam non habeant formam membrorum neque plumagii conuenientia aquis, non inhabitant aquas, nec etiam possunt esse in aquis, neque stando super pedes suos, cum longa crura non habeant, quemadmodum ayrones et grues, neque natando, cum non habeant pedes coriales neque digitos, sicut anseres, anates, fulicae, et fere omnes aquaticae. Quod si rapaces conuersarentur in aquis, plumae et pennae ipsarum ad hoc ineptae madescerent plus quam aquaticarum, et ungues sui remollirentur, ex quo vix possent volare, et aues, quas praedaren-



tur, vix cum vnguibus vulnerare et retinere: propter has causas aues rapaces horrent manere in aquis, tanquam valde debiles in eis. Sunt tamen quaedam similes aquilis, sed minores eis, quae manent circa aquas in altis rupibus, et de alto prospicientes pisces in aquis repente ruunt in ipsos, et piscantur eos, et de ipsis viuunt, quae ob hoc dicuntur aquilae piscatrices. Hae habent meliorem formam membrorum et melius plumagium ad hoc, quam caeterae rapaces, et, licet piscentur in aquis, non tamen propter hoc aquaticae iudicantur, cum earum mansio non in aquis, sed terris semper existat.

Dicto, quid sit auis de rapina: quia auium rapacium quaedam sunt, quibus homines non vtuntur, sicut sunt omnes modi aquilarum, quae propter ponderositatem non sunt habiles ad portandum, et maxime si portarentur, omnes aliae aues rapaces, quas portari contingeret, cum eisdem nec portari possent decenter, nec volare timore ipsarum. Et sunt etiam aliae aues rapaces paruae, sicut sunt smeriliones, vbleti, et huiusmodi, et tam his, quam maioribus praedictis, homines non vtuntur nisi ad delectationem tantum, et raro, et pauci, solum vt ostendant quendam nouum modum, per quem credantur scire, plus enim appetunt videri esse scientes, quam esse. Idem tamen modus est docendi illos, de quibus agere volumus, et istos tam maiores quam minores. Nos vero de istis tractare non intendimus, sed de illis auibus rapacibus, quibus vtuntur homines, et sunt habiles ad portandum, et vna non in tantum timet aliam, quod volatum suum dimittat, si ad inuicem portarentur, et quicquid utilitatis et delectationis fieri posset cum praedictis, magis et commodius fit cum istis. Ideo intentio nostra est de istis tractare.

Homines autem venationem exercent cum auibus rapacibus aut ad delectationem, aut ad utilitatem, aut ad vtrumque, vel pro se, vel pro aliis, capiendo aues magnas, mediocres et paruas, aquaticas et campestris, vtpote grues, bistrardas et similes, et fasianos, perdices, anates, et huiusmodi, et quandoque capiunt quadrupedia, vt gazellae, caprei, hinnuli capreorum, hinnuli ceruorum, vulpes, lepores, cuniculi, et similes; et quoniam haec omnia capi non possunt cum vna specie aut duabus auium rapidarum, sed cum pluribus et diuersis, propter hoc dicendum est, quot species sint auium rapidarum, quibus homines vtuntur in sua venatione.

Aues rapaces, quibus homines vtuntur, et apud nos vsi sunt ab antiquo, sunt istae: Girofalci, sacri, gentiles peregrini, gentiles et laynerii, quae quidem sub vno genere comprehenduntur, videlicet falcone.

Sunt et de auibus rapacibus austrures, speruerii, et istae comprehenduntur sub accipitre. Omnes autem aues rapaces, tam istae, quibus homines vtuntur, quam aliae, quibus non vtuntur, sub istis duobus generibus comprehenduntur, scilicet in falcone et accipitre. Et quamuis hoc nomen accipitris plures attribuant soli austruri, nos tamen dicimus ipsum esse genus omnium auium rapacium, quae



quae capiendo et non feriendo, vt falco, venantur, sicut praedicti austur et speruerius, vtpote hoc nomen ab accipio accipis deriuatum, et super hoc loquimur latius in libro de austure, vbi loquimur specialius et diffusius, dicentes de conuentiis et differentiis.

### CAPITVLVM III.

#### *De combinatione ipsarum ad pullificandum.*

**A**ues rapaces pullos suos a se abiiciunt, quam statim possunt volare, et diuidunt se vna ab alia per diuersa loca, propter quod raro aut nunquam insimul reperiuntur, vt expressius dicetur infra. Et ideo raro possunt se inuenire, nisi ad certum locum expectant se inuicem aliquando, in locis prope nidum suum consuetum, qui a quibusdam area dicitur, pluries enim visus est mas prius venisse ad nidum, expectans illic foeminam per multos dies, quousque veniret, et similiter foemina expectat marem, et aliquando simul veniebant ad nidum.

### CAPITVLVM IV.

#### *In quibus regionibus et locis nidificant.*

**A**ues omnes rapaces nidificant in septimo, sexto, quinto et quarto climate, et credimus, quod in aliis climatibus nidificent. Aliae autem in vno climate, et aliae in alio. Girofalci autem quia sunt maiores, fortiores, audaciores et velociore omnibus aliis falconibus, ideo primo de ipsis tanquam de dignioribus tractare volumus, et subsequenter de aliis speciebus falconum. Nidificant autem girofalci in fine septimi climatis et vltra, in rupibus altis, videlicet in fixuris, cryptis, foraminibus saxorum, montium, quorum quidam nidificant in saxis remotis a maritima, et quidam in rupibus propinquis maritimae, et isti sunt meliores et nobiliores illis, qui nidificant in remotis a maritima: et quidam nidificant in insulis maris septentrionalibus, scilicet in altis rupibus ipsarum, videlicet in quadam insula, quae est inter Noroegiam et Gallandiam, et vocatur Teutonice Yslandia, et Latine interpretatur contracta, seu regio glaciei, et isti sunt meliores omnibus aliis, Girofalco enim dicitur a Hiero, quod est sacer, inde Gero-falco, id est, sacer falco, vel a Kyrio, quod est Dominus, inde Kyrofalco, id est, Dominus falco, secundum Graecam linguam. Citra septimum clima neque nidificant, neque morantur etiam, neque elongantur ab ipso, versus sextum, quintum aut quartum, sed a septimo climate vltra versus polum arcticum nidificant et morantur. Falcones vero sacri nidificant in minus frigidis regionibus quam girofalci, qui nidificant in septimo climate et citra, et frequentius in Britannia et Bulgaria. Audiuimus etiam, quod, vbi nascuntur, nidificant super arbores, quia in partibus dictis non sunt montes, sed arbores tantum. Credimus



tamen, quod, si in dictis regionibus essent montes, libentius in rupibus nidificarent, cum sint de genere falconum. Falcones autem, qui dicuntur gentiles peregrini, nascuntur in septentrionalibus regionibus valde longinquis, vtra septimum clima prope Oceanum, et nidificant in insulis septentrionalibus, et in altis locis, sicut nidificant girofalci. Falcones autem absolute gentiles nascuntur a septimo climate versus regiones meridionales, et nidificant sicut et peregrini. Peregrini vero dicuntur, quasi de pelago venientes, pro eo quod veniunt de remotis et per Oceanum transeunt, dicunt autem multi, quod falcones gentiles peregrini, et falcones absolute gentiles, sunt duae diuersae species falconum, et non vna, vident enim maiorem diuersitatem inter falcones peregrinos gentiles et gentiles absolute, quam inter peregrinos ad inuicem, et quam inter gentiles ad inuicem, videlicet quod peregrini tardius mutantur, et maiores et pulchriores sunt. Nos vero nullam videntes substantialem differentiam inter ipsos, dicimus, quod sit vna species falconum, non diuersae, sed sunt similes et propinqui et vtrique gentiles: diuersitas vero, quae est inter ipsos, accidit propter diuersitatem regionum, in quibus nascuntur, nam peregrini tardius mutant, quia tardius nascuntur, tardius autem nascuntur, et maiores sunt et pulchriores, propter frigiditatem locorum, in quibus nascuntur, diuersitas enim regionum, colorum et morum non facit homines aut animalia esse diuersae speciei. Falcones autem laynerii nidificant in omnibus climatibus, et in locis praedictis, sicut et alii falcones, et si nidificant in illis regionibus, in quibus sacri, nidificant in arboribus, sicut et sacri. Praedictae vero species falconum generaliter nidificant in rupibus altis et in locis praedictis, vt aues, quas capere volunt pro pastu suo et pullorum suorum, quas et per violentiam longi volatus, quem habent, acquirunt facilius, videant, et auantagium habeant capiendi eas, et quod homines et aliae aues rapaces, seu animalia alia ipsos offendere nequeant.

## CAPITVLVM V.

### *De accipitribus.*

**A**ustures et nisi nidificant in omnibus climatibus, in nemoribus videlicet supra arbores, et quanto sunt magis imae, tanto creduntur esse audaciores, et communis opinio est, quod hoc faciunt, quia capiunt magnas aues, vt eas ad nidum facilius deferant, et in conuallibus, vt praedam, quam capiunt in locis altioribus circumcirca nidum, ad nidum suum volando a sursum deorsum facilius ferant, imo quando capiunt praedam in planis, aut in conuallibus, ipsam, licet cum labore, trahunt et deferunt trahendo ad locum altiolem nido, et de illo loco volant descendendo ad nidum facilius cum praeda, et propter aquas, quae plus sunt illic, quam in altis locis, praecipue tempore suae nidificationis, aestiuo scilicet, tunc, quoniam illas aquas frequentant aliae aues propter potum et balneum ipsorum, et sic non multum recedunt a nido quaerentes praedam, et propter locum  
humi-



humidiorem et frigidiorē, quo defenduntur a calore solis, et quia sicut rapaces et calidae naturae affectant locum superiorem. Vniuersaliter autem omnes aues rapaces, quae nascuntur in septimo climate, et vltra, versus polum arcticum, sunt maiores, fortiores, audaciores, pulchriores, meliores et velociores, quaelibet autem in specie sua. Maiores, quia in septimo climate et vltra est frigus intensum, contemperans caliditatem intensam, quam habent ex eorum natura, et ex contemperatione caliditatis augmentatur humiditas, et ex augmentatione humiditatis dilatantur membra, et sic efficitur corporis magnitudo, quod probatum est apertius et plenius in praecedenti capitulo, vbi dicitur, quod foemina est maior masculo. Fortiores, quia boreas et frigiditas illic dominans corpora constituit fortiora, claudendo enim poros cutis naturalem calorem et spiritus exhalare non finit, quae duo conseruata in corporibus ipsa reddunt fortiora, robore in neruis consistente, et conseruatur sanguis et alii humores puriores: in calidis vero regionibus spiritus, calor et humores euaporant, et vis deficit; item membra sui corporis sunt grossiora, quod est signum fortitudinis in animantibus. Item audaciores sunt in frigida regione, quia sentiunt se habere vires, et habent sanguinem calidum et purum magis, quam in calida regione; aues enim ipsae, per conseruationem caloris et spirituum in intrinsecis, fortius digerunt, et calidiores generant humores, item habent cor magnum respectu sui corporis et calidissimum, quae duo faciunt ad audaciam, et per appetitum vehementem habent audaciam inuadendi aues, quas rapiunt, et probatio huius est, quia vidimus corda accipitrum quorundam de septentrione grossa, et inferius habentia duos corios, et hos accipitres vidimus audaces valde. Pulchriores, secundum formam membrorum, quia, cum in huiusmodi auibis sint magis et melius contemperati et proportionati humores, sicut superius dictum est, et ex humoribus nutriantur et foueantur membra, et membra ipsa in auibis istis magis et melius sunt proportionata, et propterea aues istae sunt pulchriores: item secundum speciem plumagii aues istae sunt pulchriores, quia, cum ex humiditate pennae proueniant in auibis, et ex eo proueniat calor, ex quo calore color rubeus generatur, et aues istae calidiores sint naturaliter omnibus auibis, color in istis inuenitur magis rubeus, quam in aliis, qui color rubeus pulchrior iudicatur in auibis istis, secundum quod inferius plenius dicetur. Item meliores et velociores sunt ex rationibus supra dictis. Dicimus ergo, aues rapaces, quanto nascuntur propinquiore septimo climati, tanto sunt maiores, fortiores, audaciores, pulchriores, meliores et velociores, quaelibet tamen in specie sua.

## CAPITVLVM VI.

### *De ouatione.*

**T**empus, quod est inter conceptionem et ouationem, non distinguimus, cum de die conceptionis constare non possit. Aues de rapina ponunt oua quan-



doque tria, quandoque quatuor, quandoque quinque, et de istis non semper veniunt filii ad perfectionem, aut quia quaedam de illis sunt oua venti, aut quia tonitrua permutant ea, aut ex aliquo accidenti corrumpuntur.

## CAPITVLVM VII.

### *De cubatione.*

**D**e tempore cubationis ouorum auium rapacium certi non sumus, pro eo quod plures de auibus rapacibus nidificant in regionibus longinquis et nimis remotis a nobis, de quibus notitiam habere non possumus, opinamur tamen, ipsos cubare oua sua infra quadraginta dies.

## CAPITVLVM VIII.

### *De plumis, lanulis et pennis.*

**I**nnascuntur primo pullis auium de rapina nouiter genitis illae, quae non sunt ut pili, neque ut lanulae, sed habent naturam inter vtrumque, quae cooperiunt eos, et a frigore quoquo modo defendunt. Secundo innascuntur lanulae, et a quibusdam dicuntur dumae, hae sunt exiles et molles, densiores et longiores primis, hae plus cooperiunt et plus defendunt illis, et his natis cadunt illae. Tercio innascuntur eis pennae, quas pennas non firmant ita cito, pro eo quod sunt siccioris naturae caeteris, et siccitas repugnat velocitati crementi, et quia omnes aues de rapina longiores ponunt pennas respectu sui corporis, firmant autem pennas ipsas circa duos menses, quas pennas primo anno suae natiuitatis, in quo dicuntur saurae, semel mutant, non bis, secundum quod mutant caeterae aues non rapaces. Pennae vero maiores, quae sunt in alis et cauda ipsarum, in pluribus sunt sub certo numero, non rapacium vero non sic.

## CAPITVLVM IX.

### *Quomodo pascuntur a parentibus.*

**M**odus matris rapacium in pascendo pullos suos talis est: quousque pulli firmiores fiant, quod possint volare, dum sunt adeo nouelli et teneri, quod non possint rumpere carnes, portat ipsis carnes in gutture suo, et euomit carnes deponendo eas ante ipsos. Carnes autem hae sunt de auibus, aut, si defuerint aues, de quadrupedibus, quas capere possit, calefactas itaque huiusmodi carnes in sia, quae dicitur gorgia, decisas, minutas et inceptas digeri dat pullis suis, nam sic alteratas et minutas carnes facilius digerunt pulli, et in quantitate debita pascunt eos, et horis conuenientibus, mane scilicet et sero. Postquam vero iam fortiores sunt rostro et aliis membris, non amplius portat ipsis escam in gorgia sua,



sua, sed portat in pedibus suis aues deplumatas, et ponit ante ipsos, et aliquando deplumat eas ante ipsos, aut carnes, si auiculas non habuerint.

### CAPITVLVM X.

#### *Qualiter mater docet eos aucupari.*

**Q**uando pulli in nido iam sunt facti maiusculi et fortiusculi, mater portat ante eos auem morticinam, et docet illos eam deplumare, et pasci ipsa deplumata, et hoc facit pluries. Postquam vero iam sciunt deplumare, et cognoscunt iam aliquantulum, portat eis auem viuam partim deplumatam, vt non possit bene volare, quam, priusquam ostendit eis, finit volare, vt potest, et filii insequuntur eam, et si aliquis capiet eam, mater conuocabit alios, vt alii pulli pascantur de ea ipsa aue, et si forte aufugiet auis illa, volat mater et iterum capit, et dimittit eam ante filios, et statim cum aliquis ceperit illam, et erit intentus circa praedam occidendam et comedendam, mater alios prohibet, vt non impediant illum. Et sic docet volare pullos suos et aucupari.

### CAPITVLVM XI.

#### *Quomodo expellantur a parentibus, et quare.*

**P**ulli autem postquam sciunt volare et aucupari, mater fugat eos a tota contrata, quia, si venarentur vna cum matre in vna contrata, non rapaces aues fugerent, et minus inuenirentur de ipsis, et sic vix parentes haberent cibum sufficientem sibi et filiis, et si mater caperet aliquid, filii auferrent ei, et vnus alii. Sic ergo postquam docuerint ipsos aucupari praedam, expellunt eos a se et a tota contrata; ipsi autem fugati diuiduntur a parentibus et a se inuicem, vnusquisque singulariter intendens venationi suae, et praedantur grillos, bruchos et scarabaeos, et in defectu bruchorum et huiusmodi, quos mori contingit aut fugere ad . . . et modica frigora, capiunt auiculas et bestiolas, quascunque retinere possunt.

### CAPITVLVM XII.

#### *De loco, quem eligunt, donec in regione morantur.*

**P**ulli auium rapacium, postquam expulsi sunt a parentibus, in quacunque regione morantur, semper sibi eligunt vnum locum altum, eminentem et expeditum, videlicet aut in arbore, aut in petra, aut in gleba, vt longius videre valeant, et facilius capiant praedam pro esca ipsorum, ad quem locum libentius redeunt ad quiescendum, dum fuerint in eadem regione, nisi per aliquam causam cogantur dimittere regionem.

CAPIT.



## CAPITVLVM XIII.

*Quomodo exeunt ad praedandum et ad acquirendam sibi escam.*

**A**ues rapaces mane exeunt ad praedandum, quae postquam comederint, redeunt ad loca propria suae mansionis; quod si cibus, quem mane sumpserint, non sit eis sufficiens vsque in crastinum, quia forte non ceperunt magnam praedam, sed priusquam complerent sibi pastum, cogebantur ipsam dimittere, post nonam iterum exeunt ad praedandum. Visum fuit etiam aliquando, quod falcones venabantur et praedabantur per noctem, maxime in plenilunio, quoniam de die nihil rapere poterant, ex quo potest coniecturari, quod et caeterae aues rapaces idem faciant aliquando, non naturaliter, sed necessitate urgente, vel quia propter aliquod aliud impedimentum, quod habuerunt, in die aliquid capere non potuerunt.

## CAPITVLVM XIV.

*De transitu ipsarum, et quare transeunt, et de modo transeundi.*

**A**ues rapaces solitarie transeunt, timentes de aliis rapacibus, ne auferant sibi praedam, propter quod nunquam vadunt cum aliis rapacibus, siue sint suae speciei, siue non, quia natura rapacium est, auferre praedam aliis rapacibus, si simul se inueniunt; transeunt autem rapaces et propter temperiem aëris, sicut et caeterae aues, quamuis calidiores sint caeteris auibus, et melius possint sustinere frigus, et quia oportet eas transire, nam, cum viuunt de aliis auibus non rapacibus, quas rapiunt, et illae aues transeant, quae sunt sibi esca, ipsae sequentes ipsas transeunt.

## CAPITVLVM XV.

*De tempore anni, et temporum qualitatibus.*

**A**ues rapaces transeunt in tempore anni, videlicet in autumnno, et in qualitatibus temporum, sicut caeterae aues non rapaces, siue de nocte, siue de die, cum habile tempus habuerint, et dimittunt omne id, quod faciunt, siue pascantur, siue dormientes quiescant, et arripiunt iter suum cum ventis, vnde vidimus rapaces, quibus proiecimus praedam, quod dimiserunt praedam, quam sibi parauerant et comedere volebant, adueniente sibi vento conueniente ad transitum.

*Rex Manfredus.*

Necessitas vero, quare venentur falcones de nocte, est haec: cum adueniente tempore transitus properent falcones ad transitum et festinent, ne forte tempus aptum ipsi transitui turbetur, et fiat ineptum, et potius velint aliquo dierum non pasci,



pasci, quam perdere tempus transeundi, accidit quod transeundo in die non current de pastu, unde, si contingat plenilunium esse, ut falcones videre valeant, auem venantur, et capientes ipsam pascuntur.

### CAPITVLVM XVI.

*De quibus locis transeunt, et ad quae loca, quare morantur in locis, ad quae transferunt, et quamdiu.*

**D**e quibus locis transeant aues rapaces, et ad quae loca, et quare morantur in locis, ad quae transferunt, et quamdiu, non facimus speciale capitulum, quia vniuersaliter id, quod dictum est in capitulo de quibus locis transeunt, et ad quae loca transeutes descendunt generaliter omnes aues, conuenit tam rapacibus quam non rapacibus.

### CAPITVLVM XVII.

*De reditu ipsarum, et quare, de modo redeundi, tempore anni, et temporum qualitatibus.*

**A**ues rapaces redeunt solitarie, et circa tempora veris propter temperiem aëris, et redeunte esca sua, quemadmodum transferunt cum eadem, et in temporum qualitatibus, sicut redeunt caeterae aues; redeunt et ad pullificandum et generandum sibi simile, ut saluetur species, secundum quod dictum est in generali capitulo de reditu auium. Aues rapaces magis abundant in frigidis regionibus, ut in septimo climate et ultra, maxime tempore veris et aestatis, pro eo quod sunt calidissimae naturae, et aer septimi climatis magis conuenit suae naturae, quam aer calidae regionis, maxime cum tunc intendunt ad nidificandum, et aues, quae sunt praeda et cibus ipsarum, tam aquaticae, quam terrestres, tunc magis abundant in regionibus supra dictis, et quia inueniunt illic arbores multas, syluas et rupes altas, in quibus possunt nidificare, et se a nocumentis tueri, syluas et arbores pro genere accipitrum, et rupes pro genere falconum, pro eo etiam quod regio septimi climatis et ultra adeo est spatiosa et ampla, quod aues rapaces possunt ibi melius nidificare et praedari sine contrarietate vniuscuiusque. Tempore vero autumnii et hyemis magis abundant in calidis regionibus, pro eo quod aer ipsarum regionum eo tempore magis est eis temperatus, quam frigidarum regionum, et tunc magis abundant in ipsis regionibus caeterae aues, quae sunt cibus et esca ipsarum, ut dictum est in capitulo de transitu auium non rapacium.



## CAPITVLVM XVIII.

*De cognoscendis falconibus per formam membrorum et plumagium, comprehendens tantum formam et colorem pennarum, et de electione pulchriorum.*

REX.

Cum saepe legeremus et relegeremus hunc librum, vt fructum scientiae caperemus, et ne vitio scriptoris aliquid remanserit corrigendum, finito prooemio, inuenimus quod Dominus pater noster subsequenter ordinauerat capitulum istud inter alia capitula, videlicet de modis, quibus habentur falcones; tamen inter capitulum istud et prooemium erant chartae non scriptae, quibus repertis existimauimus aliquod aliud capitulum deesse et omissum fuisse, quod scribi debebat in eis; post spatium vero temporis, dum quaereremus quaternos et notulas libri istius, eo quod videbamus ipsum ratione scriptoris correctione egere, inuenimus in quibusdam chartulis quoddam capitulum, intitulatum de plumagio falconum. Quo capitulo docebantur differentiae falconum per membra et plumagia ipsorum: nos autem rememorantes dubietatis, quam habuimus, cum perlegendo librum peruenimus ad capitulum praedictum, quod prooemium sequebatur, vbi credebamus aliquem fuisse defectum, propterea quod chartas non scriptas videramus ibidem: visum fuit nobis, quod capitulum de forma membrorum et plumagio falconum illic locari debebat, eo quod capitulum de cognoscendis falconibus capitulum de habendis ipsis praecedere debet, et quod ignota et incognita, si quaerantur, reperiri non possunt, quia, quod est incognitum, qualiter reperitur? et, si accidit inueniri, non est ratione scientiae, sed fortunae, propter quod vt inuentoris intentio non frustretur, et auem vnus speciei loco alterius non acquirat, vidimus praeponendum esse capitulum, quo docetur, qualiter cognoscantur falcones, et in quibus conueniant et differant ratione plumagii et membrorum, capitulo, quo docetur, qualiter habeantur.

## CAPITVLVM XIX.

*De Girofalconibus.*

Melior forma membrorum et melior proportio in Girofalconibus est haec: quod superior pars capitis sit aequae iacens, non tumida in sursum, posterius capitis amplum et spatiosum. Anterior pars capitis, quae est supra oculos, sit ampla, supercilia exeuntia forinsecus, oculi concaui, nares largo foramine amplae, rostrum grossum, curuum et durum, collum versus caput gracile, versus spatulas grossum, amplitudo et spatiositas ab vno humero ad alium per latitudinem dorsi, iuncturae alarum mediae tendentes versus caput, quae a quibusdam dicuntur pulsiones alarum, dum alae non sunt expansae neque extensae, tendant versus



sus caput in sursum et non deorsum, corpus eius descendat vniformiter in subtilius et acutius vsque versus caudam; hanc formam dicunt Geometrae formam pyramidalem, tenet alas ambas comprehensas et eleuatas ad dorsum, non decidentēs neque dependentes, vna ala versus caudam supponitur alteri, et interfecant se in modum crucis. Pennae maiores alarum, tam cooperientes alias, quam illae, quae sunt coopertae, hoc est, tam superiores, quam subteriores, sunt latae et durae, pennae cooperientes quanto plures subteriores cooperient, et quanto longius versus extremitatem coopertarum, tanto erit melius, omnes pennae caudae, quando non volat, sunt reollectae et adunatae sub duabus superioribus, quae dicuntur coopertoria. Locus gorgiae est amplus et profundus, gorgia post multum cibum parum turget, et plena cibo est rotunda, pectus forinsecus prominens et carnosum et densum, anachae spatiosae, tibiae curtae et grossae, palma grossa et ampla, digiti longi, macri, asperi, squamosi, distantes ab inuicem, spatiosi, ungues macri, curui et acuti, plumae, quae sunt sub maioribus pennis caudae, quae vocantur bracalae, sunt densae et tendunt versus extremitatem caudae, vt suppleant et claudant interualla maiorum pennarum caudae, quando volant, plumae coxarum, quae sunt a genibus supra, sunt longae, et tendunt versus caudam. Vniuersaliter omnes plumae et pennae magnae et paruae non sunt hirsutae neque horripilatae, sed comprehensae ad corpus, et reollectae inuicem, item totum corpus eius maius est quam in caeteris falconibus et ponderosius.

## CAPITVLVM XX.

### *De plumagio Girofalconum.*

**P**lumagium Girofalconum sic se habet: alii enim sunt grisei coloris, alii albi coloris aut subalbidi, maxime in pectore, alii sunt medii inter album et griseum, ab aliquibus dicuntur cannauacii. Albi plus albescunt circa pectus, sed, dum sunt infra primum annum, super dorsum habent colorem in plumis partim album, partim subruffum vel subrubeum; postquam vero sunt mutati, subruffedo mutatur in nigredinem, et albae pennae sunt albiores et clariores, et rostrum albi girofalci et ungues tendunt ad albedinem plus, quam in caeteris girofalcis. Grisei, antequam sint mutati, sunt diuersi plumagii, nam alii sunt fusci seu subnigri, alii sunt subrubei, et hi duobus modis: nam quidam eorum sunt non guttati super dorsum et caudam, et quidam sunt guttati super dorsum et caudam, quidam plus, quidam minus. Subnigri post mutationem fiunt grisei, obscuri, subrubei; non guttati fiunt grisei clari, subrubei; et valde guttati fiunt cannabacii. Medii inter albos et griseos pluribus modis fiunt, quam alii: nam quidam eorum tendunt plus ad albedinem, alii magis, alii minus, et quidam tendunt plus ad grisitatem, et horum alii magis, alii minus.



## CAPITVLVM XXI.

*De laudabiliori plumagio in Girofalconibus.*

**D**e laudabiliori plumagio in girofalconibus vix possemus dicere, quale sit, quoniam visi sunt de omni plumagio eorum boni. Et nos iam habuimus de omni plumagio bonos, sed albi, quoniam sunt pulchri, et raro habentur de eis, quia apportantur a magis remotis locis, quam caeteri, habentur rariores, post hos cannaucii secundum eundem modum. Quicumque igitur girofalconum habebunt ea, quae diximus, laudabiliores erunt. Qui vero approximabunt his, quanto plus approximabunt, tanto laudabiliores erunt post illos.

## CAPITVLVM XXII.

*De sacris.*

**S**acri secundum formam membrorum sic se habent: approximant enim girofalconi in magnitudine corporis plus, quam caeteri modi falconum, sunt tamen minores girofalcis; habent caput magnum, rotundum, rostrum breuius, corpus subtilius et longius in proportionem suam, alas longiores, caudam etiam longiorem, pectus minus carnosum et minus densum respectu sui corporis, quam girofalci, digitos pedum habent breuiiores. Per bonam formam et proportionem in sacris, et per pulchrum plumagium eorundem, non potest haberi certum signum de laudabilitate ipsorum, quemadmodum habetur in girofalconibus et caeteris modis falconum, multoties enim visi sunt falcones sacri bonae formae membrorum et pulchri plumagii, qui non erant veloces, nec in aliis bonitatibus laudabiles: et e contrario visi sunt sacri indecentis formae et turpis plumagii veloces et in caeteris bonitatibus laudabiles, ut igitur habeatur certitudo bonitatis eorum, ad alia signa recurrendum est.

## CAPITVLVM XXIII.

*De plumagio.*

**S**acri, dum dicuntur sauri, hoc est, antequam sunt mutati, inueniuntur de diuerso plumagio: nam alii fiunt bruni, tendentes ad nigredinem, alii sunt subrubei, alii sunt flauii, qui omnes post mutationem parum dissimulantur in plumagio a se non mutatis.

## CAPITVLVM XXIV.

*De gentilibus peregrinis.*

**G**entiles peregrini sunt minores falconibus sacris, et conueniens forma et melior est in eis, qui habent quaedam de melioribus formis girofalconum, scilicet



licet rostrum grossum et curuum seu aduncum, nares amplas, supremum capitis planum et aequum, non eleuatum neque tumorosum, oculos concauos, supercilia foris prominentia, posterius capitis spatiosum, collum curuum, et prope caput subtile, et versus spatulas grossius, partem colli inter spatulas eleuatam, fossam inter pectus et collum habet amplam et profundam, in qua locatur pars meri recipientis primo cibum, et in qua fossa praeparatur, antequam ad ventrem pertranseat, vt illa fossa post cibum multum sumptum non inflatur nimis, et sit rotunda, pectus prominens foras, et plenum, densumque carnosum. Illae plumae, quae vocantur bracalae, sunt longae et copiosae plumis, et sunt eis pendentes sub genibus versus caudam, crura grossa et curta, palmae pedum sunt amplae, digiti sunt expassi, longi et macri, vngues autem magni. Ab vna spatula vsque ad aliam est amplitudo et spatiositas per medium dorsi. Loca in tertia iunctura alarum, vnde incipiunt nasci pennae longiores alarum, quae quando alae non sunt expassae, videtur altior prior pars alae, sunt eleuata ad superius in directo capitis. Alae sunt eleuatae super dorsum, non decidentes, cum debent se interfecare super renes. Plumae dorsi sunt amplae et rotundae in extremitate sua. Pennae maiores alarum, tam coopertae, quam illae, quae cooperiunt, quas cooperientes vocamus vanos, et coopertas vocamus cultellos, sunt planae, non crispae, amplae et durae. Omnes pennae et plumae sunt comprehensae et constrictae ad totum corpus. Pennae maiores sunt reollectae sub duabus, quae dicuntur coopertoria. Falconum gentiliū peregrinorum, dum sunt sauri, quidam sunt bruni simpliciter et absolute, qui nullam marginem habent in pennis, aut tendunt ad rubedinem secundum magis et minus, habentes marginem rubedinis, aut tendunt ad pallorem secundum magis et minus, habentes marginem palloris. Item ruffi aut sunt ruffi simpliciter et absolute, non habentes vllam marginem neque in dorso, neque in cauda, aut tendunt ad brunedinem secundum magis et minus, habentes marginem tendentem ad brunedinem, aut tendunt ad faluedinem secundum magis et minus, cum margine simili. Item falui aut sunt simpliciter falui et absolute, qui non habent marginem in dorso neque in cauda, aut tendunt ad rubedinem secundum magis et minus cum margine simili, aut tendunt ad pallorem secundum magis et minus cum margine simili. Maculae, quae sunt in anteriori parte falconis, quae scilicet sunt a gula per totum pectus vsque ad ouariam, aut sunt grossae omnino aut minutae omnino, aut partim grossae et partim minutae, scilicet a collo vsque ad furcam pectoris minutae, sed a furcā pectoris vsque inferius grossae. Item ipsorum peregrinorum quidam sunt desuper guttati in pennis, quae sunt in dorso, in alis et cauda, quidam non sunt guttati. Item habentium guttas, quidam eorum habent guttas subrubeas, quidam subpallidas; item quidam rotundas guttas, et quidam oblongas; item quidam maiores, et quidam minores; item quidam multas, quidam paucas. Item peregrinorum brunorum alii habent plumas et pennas in dorso, alis et cauda marginatas subalbedine cum pallore, quidam



dam marginatas subrubedine, et horum quidam habent marginem ampliorem, quidam strictiorem, et praecipue in extremitate pennarum. Item peregrini subrubei et falui possunt diuidi, quantum ad maculas, quantum ad guttas, quantum ad margines pennarum, secundum suum modum, quemadmodum peregrini bruni.

Incipiemus itaque de brunis, id est de fuscis, qui tendunt ad rubedinem, quamuis sint aliqui credentes, quod huiusmodi falcones non sint de manerie illorum, qui dicuntur gentiles peregrini, tum quia pauci inueniuntur de ipsis, tum quia sunt fusci, et dissimiles valde subruffis et faluis, de quibus habetur maior copia, quam de ipsis brunis et fuscis: nos vero ipsorum opinionem contradicimus, quod isti bruni sunt de melioribus et pulchrioribus peregrinis, maxime si habuerint formam membrorum praedictam et plumagium, quod dicemus in praesenti. Sciendum est igitur, quod huiusmodi fuscos seu brunos tendentes ad rubedinem vocamus illos, qui habent colorem brunum permixtum rubedini, adeo quod nec ille color sic mixtus possit dici brunus, nec vere rubeus. In melioribus de istis suprema pars capitis debet habere quasi coronam quandam in circuitu capitis de plumis rubeis, pars illa corii, quae est inter duritiem rostri et primas plumas capitis, scilicet vbi sunt nares, quam vocamus ceram, debet tendere ad viriditatem. Plumae, quae sunt in maxillis sub oculorum parte, sunt subrubeae, sequentes vero, quae sunt circa aures, debent esse faluae et tendere ad rubedinem. Pennae supra dorsum debent esse brunae brunedine, quae tendat ad rubedinem, et debent esse marginatae margine rubedinis, et quanto talis margo erit amplior, tanto erit conuenientior et melior, et debent esse sine guttis. Pennae maiores alarum sint brunae et marginatae, vt diximus. Pennae caudae eiusdem coloris cum pennis dorsi, et similiter marginatae, et sine guttis, laudabiliores et pulchriores erunt, quanto margines pennarum caudae maiores erunt: item margines pennarum caudae si tendunt ad rubedinem, melius erit, de illis dico, qui habebunt pennas caudae marginatas, quamuis in omnibus sint minus rubeae pennis dorsi prope extremitatem. In omnibus falconibus habentibus pennas caudae marginatas consueuerunt esse illi margines in pluribus subalbidi et pallidi magis, quam in extremitatibus dorsi, et hoc accidit, quia margines pennarum caudae remotiores sunt a corde et a principio caloris naturalis, qui est in corde, vt extrema foliorum in arboribus pallefcunt ex diminutione caloris et defectu nutrimenti, et extrema capillorum in canitie; item dicti margines in cauda si pallidi, si corrosi inueniantur, accidere potest ex eo, quod falco frequentius percutit terram et alia corpora subiecta cum eis, quam cum extremitatibus pennarum dorsi. Maculae nigrae in plumis sub gutture sint grossae et non multum longae, et sint aequalis magnitudinis et similis coloris circa guttur, per totum pectus. Plumae sub alis debent tendere ad rubedinem. Plumae super partem coxarum debent habere amplum satis illud brunum, quod habent per medium sui, ita quod residuum ex vtraque parte plumae dictae sit rotundum et faluum, tendens ad rubedinem.

Plumae



Plumae coxarum habeant maculas coloris macularum pectoris, neque subtiles, neque acutas, sed sint conuenientes in ordine, quantitate et colore, non confusae: item eadem maculae plumarum coxarum debent longitudine sua esse ordinatae et similes inuicem. Color pedum solet respondere colori plumagii falconis hoc modo: quod si falco fuerit brunus, color pedum consuevit esse viridis, et quanto brunior est falco, tanto magis habebit pedes colore virides, et quanto plus tendet ad rubedinem, tanto pedes tendent magis ad viriditatem citrinam, et in hoc quidam magis, quidam minus, et si fuerit rubeus, viriditas pedis tendet magis ad citrinum, et si fuerit de faluis, viriditas tendet plus ad albedinem, et in hoc quidam plus, quidam minus, secundum intentionem et remissionem coloris plumagii. Color autem pedum respondebit colori illius loci in rostro, qui dicitur cera; accidit tamen, quod color pedum et cerae in aliquibus falconibus discordent a plumagio et inuicem, scilicet color pedum a cera, sed hi non consueuerunt esse laudabiles, quemadmodum illi, in quibus concordat: et si color cerae concordat plumagio, et pedum non, minus malum est, quam si neutrum concordaret plumagio.

### CAPITVLVM XXV.

*De peregrinis brunis, et de subruffis et faluis, qui retrahunt ad colorem meliorem, et ad meliorem formam.*

Quicumque peregrinorum fuscorum seu brunorum plus retrahent ad supradictum plumagium et ad supradictam formam, illi plus laudabuntur, et chariores erunt et pulchriores. Illos vocamus brunos tendentes ad rubedinem, qui plus tenent de brunedine, et sunt plus bruni, quam rubei, et illos vocamus rubeos tendentes ad brunedinem, qui habebunt plus de colore dicti plumagii in dorso, in plumis et pennis, et in aliis, quae diximus; et qui habebunt plura conuenientia secundum suum plumagium, de ipsis melior spes erit.

### CAPITVLVM XXVI.

*De disconuenienti plumagio et disconuenienti proportionem membrorum in peregrinis.*

Peregrini falcones, qui sunt pallidi guttati, et maxime guttis liuidis, et finis pennarum non est marginatus, et, si est, margo est pallidus, et cauda grisei coloris, dissimilis colori dorso, et maculae ante pectus sunt minutae, et plumae super partem coxarum habent maculam, quae est per medium sui, adeo strictam, quod residuum ex vtraque parte maculae plumae est quasi continuatum, et plumae sub alis sunt pallidae tendentes ad liuedinem, et plumae coxarum non habent similitudinem, neque ordinem, neque in quantitate, neque in colore, sed potius confu-



confusionem, et maxime, qui habent colorem croceum in cerâ et pedibus, et reliqua signa erunt contraria signis laudabilibus supradictis, tales, inquam, falcones peregrini habent plumagium disconueniens, et de quo non est spes, quantum ad signum coloris. Item quicumque peregrinorum habebunt formam in membris et figuram dissimilem praedictae, quae conuenientior est inter omnes, illi erunt minus chari, et minus laudabiles, et quanto plus habebunt de contrariis bonae formae, tanto erunt illaudabiliores. Falcones peregrini, postquam mutati sunt, efficiuntur corpore grossiores, et pennae alarum et caudae fiunt curtiores, ampliores et duriores, quam saurae, et in anteriori parte eueniunt albae, et super dorsum bisei coloris, et aliqui ipsorum falconum, illorum praecipue, qui non sunt pulchrioris plumagii, habent maculas super dorsum et caudam per transversum, tendentes ad brunedinem, et hoc secundum magis et minus, respectu coloris, quem habuerunt, quando fuerunt saurae, et quanto plus saurae tendunt ad pallorem, tanto magis mutatae sunt albae, et quanto plus saurae tendunt ad brunedinem, tanto minus mutatae eueniunt albae, et maculae circa gorgiam, sicut erant saurae per longum, sunt similiter et mutatae, sed sunt subtiliores, et omnes aliae maculae a gorgia inferius, quae fuerant saurae per longum, mutatae eueniunt per transversum, et sic tam istae quam aliae super gorgiam efficiuntur brunae, et hoc secundum magis et minus, videlicet maculae, quae in sauritie fuerunt brunae, in mutatione efficiuntur bruniores aliis maculis, quae in sauritie non fuerant tantum brunae, et pellis circa oculos et pedes illorum, qui mutantur syluestres, efficiuntur crocei coloris.

## CAPITVLVM XXVII.

### *De falconibus gentilibus absolute.*

**F**alcones gentiles absolute, quando sunt sauri, secundum maneriem plumagii trium modorum sunt, sicut et peregrini, et qui plus tendit ad illa duo, scilicet ad plumagium et formam falconis peregrini bonae formae, laudabilior habebitur. Et licet dictum sit, quod falcones gentiles absolute sint eiusdem speciei cum falconibus peregrinis, tamen in aliquo differunt, videlicet quod sunt corpore minores, habent caput rotundius et minus, rostrum curtius, pedes minores in sua proportionem, quam peregrini, et color cuiusque maneriei in falcone gentili non est ita viuis et pulcher, sicut in peregrino eiusdem maneriei. Et ad illam pulchritudinem plumagii et illam decentiam membrorum, quas diximus, omnes peregrini magis appropinquant, cuiuscunque maneriei sint, quam gentiles, et aliqui eorum habent eam totaliter, gentiliū vero vix aliquis aut nunquam. Et quia sunt multae conuenientiae inter gentiles et peregrinos, secundum plumagium et formam membrorum, et paucae differentiae, et illae differentiae inter se tantum parum distant, quod non potest adeo lucidum declarari, vt cognoscatur per pluma-



plumagium et formam gentilis a peregrino, et quod aliquando etiam aliquis in hoc non erraret, nisi ex longo usu: in operationibus vero, quia multum differunt inter se, et differentiae ipsae sunt inter se valde distantes, per eas de leui potest cognosci vnus ab altero, secundum quod apparebit in capitulis de operationibus ipsorum. Quando vero falcones gentiles sunt mutati, eueniunt pennae eorum in omnibus sicut et pennae peregrinorum, sunt tamen plus guttatae in dorso et cauda, quam pennae peregrinorum, quia non sunt ita pulchri, sicut peregrini.

### CAPITVLVM XXVIII.

#### *De Laneriis.*

**F**alcones Lanerii minores sunt gentilibus falconibus absolute, et habent caput et collum grossiora ad proportionem suorum corporum, quam alii falcones, sunt longi et subtile, parum carnosum, pedes habent paruos, digitos pedum grossos et curtos et coloris flauum, et eorum quidam sunt bruni, quidam tendentes ad rubedinem, et pro maiori parte pallidi, et generaliter omnes sunt guttati in dorso, sed quidam plus, quidam minus. De his vero dicere non possumus, qui sunt meliores secundum formam membrorum et maneriem plumagii, quia de qualibet forma et manerie membrorum inueniuntur boni et minus boni: nos tamen illos reputamus pulchriores, qui secundum formam membrorum et maneriem plumagii magis assimilantur falconibus sacris. Falcones lanerii postquam mutati sunt, eueniunt albi ante pectus, et super gorgiam habent maculas nigras, paruas et rotundas, et a gorgia inferius habent maculas nigras, et per transuersum et super dorsum. Et quidam sunt grisei coloris, et habent maculas grossas, nigras, albedine marginatas, et per transuersum, qui post mutationem efficiuntur deteriores, quam fuerant in sauritie, quia non sunt ita audaces, neque ita veloces.

Dicto de falconibus secundum genus suum et de omnibus speciebus ipsorum, quibus homines vsi sunt, videndum de austure et niso. Dicendum est et de speciebus accipitrum, quibus vtimur, sed quia intendimus specialem tractatum de eis facere, exinde tacemus ad praesens, dicemus tamen differentias, quas habent falcones inter se nidafios et ramagios.

### CAPITVLVM XXIX.

*Dicto de forma et plumagio conuenienti austurum saurorum et eorum, qui mutati sunt: dicendum est de sperueriis.*

**S**peruerii sunt minores aliis auibus de rapina, quibus frequentius vtuntur homines, et quia secundum formam membrorum et maneriem plumagii assimilantur austuribus, licet sint alterius speciei, tamen illi, qui appropinquant formae membrorum conuenienti et pulchro plumagio austurum, sunt laudabiliiores, ha-

M

bent



bent tamen maculas per transfuersum, et maculas caudae similiter per transfuersum, et si aliquis inuenitur, qui maculas caudae habeat, vt dictum est de austuribus, pulchrior iudicatur. Speruerii mutati habent maculas per transfuersum in anteriori parte, sicut erant saurae, et illi sunt pulchriores, qui habent plumagium, sicut dictum est de austuribus mutatis. Vnum tamen sciendum est, quod, quando austures et speruerii infigunt aciem ad videndum aliquid, nigredo pupillae oculorum videtur magnificari, et, quando non, minorari. Et aliquando vidimus austures et speruerios habentes pupillam oculorum magnam ad modum falconum, sed falcones nunquam visi sunt habentes oculos ad modum austuris vel speruerii.

### CAPITVLVM XXX.

#### *De differentiis falconum nidasiuorum et ramagiorum.*

**F**alcones differunt inter se, quando sunt nidassii, a ramagiis, nidassii vix possunt nutriri, quin in membris laesionem aliquam patiantur, et si non laeduntur in membris, vix esse poterit, quod ita producant totas pennas amplas et claras et viridis coloris, sicut ramagii, et raro producant eas, quod non sint aliquae ex ipsis corrosae vel affamatae, nec producant eas ita proportionatas ad inuicem, sicut ramagii, et hoc contingit, quod non pascuntur ita bene ab hominibus cum conuenienti cibo et hora, sicut a parentibus, neque custodiuntur neque nutriuntur in sic puro aëre, sicut in loco, vbi nidificant, et color pedum et cerae est magis albus in nidassiiis, quam in ramagiis, nec ungues nec rostrum nidasiuorum sunt ita politi, lucidi et acuti, sicut ramagiorum, item nidassii sunt magis clamorosi et hiantes, quam ramagii, et quando nidassii pascuntur, horripilant pennas, cooperiendo passum ipsorum et rostro et pedibus, cum manus custodis eis porrigitur, passum defendunt, qui dicuntur griniosi, et quanto citius extrahuntur de nidis, tanto plus habent de praedictis proprietatibus, et quanto tardius extrahuntur, tanto minus habent de ipsis proprietatibus, et magis simulantur ramagiis, et differunt inter se inuicem in operationibus. Quod infra dicetur in capitulo vniuscuiusque per se.

### CAPITVLVM XXXI.

#### *De modis, per quos habentur falcones nidassii.*

**S**equitur dicere modos, per quos habentur falcones nidassii. Modi autem, secundum quos habentur, plures sunt. Vnus modus est, quando extrahuntur de nido. Alius modus est, quando iam exierunt nidum et capiuntur cum caeteris instrumentis, adhuc non multum elongati a nido. Tertius modus est, quando capiuntur tempore veris, quando scilicet fugientes frigus mutant se, et transeunt ab vna regione



regione in alteram. Quartus modus est, quando etiam tempore hyemis capiuntur in regionibus, in quibus remanserunt ad hyemandum. Quintus modus est, quando capiuntur tempore veris, quando scilicet redeunt ad loca natiuitatis suae, vnde recesserant, vt dictum est, propter frigus; et tam inter illos, qui transeunt, quam inter illos, qui redeunt, capiuntur sauri, et aliqui mutati vna muta vel pluribus. Illi vero, qui habentur a nido, habentur similiter pluribus modis. Vnus modus est, quando accipiuntur oua de nido et submittuntur auibus domesticis ad cubandum, sed iste modus, quoniam aues sic exclusae pauci vel nullius valoris sunt, nullatenus est approbandus. Alius modus est, quando ipsi extrahuntur de nido non habentes plumas vel pennas aliquas ad volandum, sed tantummodo illas, quae dicuntur lanulae, ad tuitionem sui corporis contra frigus. Alius modus est, quando lanulae iam deciderunt, quamuis non omnes, et tunc sunt quasi varii de lanulis et plumis simul mixtis. Alius modus est, quando, lanulis prorsus depositis, pennae et plumae sunt augmentatae eis, sed nondum exeunt extra nidum, neque ad volandum, neque ad venandum. Inter omnes istos modos illi, qui minores et iuniores extrahuntur, sunt deteriores ad id, quod intenditur. Quapropter quanto maiores poterunt extrahi, extrahantur a nidis, quanto enim diutius nutriuntur a matre, tanto erunt meliorum membrorum et meliorum pennarum et fortiores, neque fient clamorosi seu frequenter hiantes, neque erit tantum periculum in nutriendo ipsos postmodum parentes, siquidem pro nutriendis pullis suis venantur carnes conuenientes, et dant eis ad comedendum in tempore conuenienti debitam quantitatem; et propter hoc pulli nutriti meliori nutrimento habebunt pennas et plumas meliores, et singula eorum membra et totum corpus augmentabuntur in melius. Si vero extrahuntur paruuli de nido, quoniam homo nutriens nescit habere modum in his, quae necessaria sunt, quantitatem et qualitatem, tam in pascendo, quam in custodiendo, erit periculum nutriendi, quoniam de facili morerentur, et ad paruam occasionem quamlibet, vel fierent laesi laesione perpetua in aliquo suorum membrorum, vel erit periculum, si euadant sani, quod raro accidit, non erunt fortes neque pennae eorum firmae, quantum illorum, qui nutriuntur in nido, propter quod, quanto tardius poterunt, extrahantur de nido.

## CAPITVLVM XXXII.

### *De modo accedendi ad nidum.*

**M**odus accedendi ad nidum, vt inde extrahantur, diuersus est, secundum quod nidi in diuersis locis erunt: nam si nidus erit super arbores, ascendet homo super arbores, et extrahens ipsos de nidis ponet eos in calathis, et portabit eos ad loca, in quibus nutrire volet eos: si vero nidus erit in fixuris rupium, ligatur homo cum funibus, et ligatus demittitur de cacumine rupis vsque ante cryptam,



in qua est area nidi eorum, et intrans accipit eos: et sunt alii, qui alios modos excogitant accedendi ad nidum, vbicunque sit. Illi autem approbandi sunt, in quibus omnis diligentia omnisque cautela adhibetur, dum capti salubriter portentur ad locum, in quo nutriendi sunt.

### CAPITVLVM XXXIII.

#### *De praeparatione loci, in quo nutriuntur, et modo nutritionis eorum.*

**D**ictus est modus, quo habentur extracti de nidis: dicendum est, quomodo praeparandus est locus, in quo nutriuntur, et quomodo nutriuntur, deinde dicentur alii modi, secundum quos habentur, postquam dimiserint nidum. Locus itaque, in quo nutriendi sunt paruuli falconum, sit in loco campestri, distante ab arboribus et a syluis, in turri aut in domo alta solitaria, nutriebantur enim a parentibus suis in altis locis longinquis a sylua, praeterea falcones naturaliter diligunt loca campestra, multitudine arborum carentia, et in talibus locis venantur, vnde, si nutrirentur in syluis aut inter arbores, postquam creuissent, licet nondum firmi, huc et illuc extra suum locum volarent ad loca campestra, quoniam naturaliter condelectantur in eis, neque redirent libenter ad locum, in quo nutriebantur, quamuis pulli falconum, sicut et caeterarum auium, dum adhuc sint teneri, nutriantur per alium, si aliquando auolauerint et consuetudinem habeant redeundi ad locum, in quo nutriuntur. Ex quo sequitur, quod pulli falconum non possint de facili re haberi, cum libentius in campestribus morentur, quam ad syluosa loca redirent, et ex vsu recedendi a loco arboroso, in quo nutrirentur, possent aufugere et amitti. De loco vero, in quo nutriri debent pulli accipitrum, secus est, vt dicitur in tractatu de accipitribus. Item inuento loco, vbi conuenienter nutriri possunt, praeparatur eis locus parvus ad similitudinem nidi sui, et de simili materia, de qua erat nidus, aut de alia conuenienti. Locus autem hic parvus debet esse apertus in tribus partibus, vt ventum septentrionalem, orientalem et occidentalem recipiant, et solem ab oriente et occidente: a parte vero meridiei sit clausus, ne Austerni venti noceant eis, dissoluendo humores de capite, reddendo eos pigriores et debiliores, et ne calor solis . . . . . pennarum et malorum humorum. Esca vero quae sit conueniens, dictum est, qualis debeat esse, dicatur nunc. Carnes, quae debent dari pullis falconum, sint crudae, quia resistent melius fortitudini caloris ventrium ipsorum, quam coctae, talibus enim vtuntur, qui genuerunt eos, et isti deberent vti talibus iam etiam maiores. Sint tenerae carnes, imo teneriores, quae poterunt haberi, et propter hoc debent carere neruis, venis, arteriis, cartilaginibus, ossibus et pinguedine, quae omnia dura sunt digerere, praecipue a nouiter genitis, erunt autem teneriores, quae erunt de pinguioribus et non macilentis auibus, bestiis domesticis et non domesticis. Sint recentes, quoniam, dum recentes suas proprias retinent qualitates et sunt adhuc calentes calore naturali,



rali, suum saporem bonum non mutant, quae si diu stetissent, postquam fuissent separatae de animali, cuius erant, exhalante et exspirante calore eorum naturali, calor extraneus subintrans humiditates earum corrumperet, vnde faceret malum saporem et corruptos humores generaret. Sed si tamen non poterunt semper haberi recentes, illae, quae parum steterunt et refriguerunt, dari poterunt hoc modo, quod tantum calefiant primitus in aqua dulci calida, donec perueniant ad caliditatem similem suae caliditati, quam habebant in animali, cuius fuerant, sic enim minus erunt nociuae. Sint de animali sano, nam carnes infirmorum animalium, pro eo quod malas habent qualitates, malum nutrimentum facerent. Sint de auibus aut bestiis mediocris aetatis, quoniam bene digeruntur, et bene incorporantur, ex quo pennae confurgunt duriores et firmiores, et si essent de nouiter genitis et iunioribus, tam volucribus quam bestiis, tam domesticis quam non domesticis, molle et minus firmum facerent nutrimentum, quaedam plus, quaedam minus; vnde videmus, quod carnes pullorum gallinae parum nutritificant ipsos, et molles carnes generant, et cito de corpore dissoluuntur, et signum est, quod dantur aliquando carnes de iunioribus ad hoc, quod venter falconum solubilis habeatur: et si carnes essent de senibus aut senioribus, nimis siccum et durum facerent nutrimentum, et non sine multis superfluitatibus, quia essent durae ad digerendum. Habitis carnibus dictarum qualitatum, pro eo quod pulli rapacium, quamdiu sunt in aetate nouiter geniti, carent fortitudine rostri et vnguium, et cum ipsis non possunt decidere carnes neque minutare, sicut sibi expediret, conuenit, vt, priusquam dentur eis, minutatim incidantur, et minutatim ante eos ponantur super tabulam vnā ligneam, et haec fiant tanto diligentiori cura, quanto erunt iuniores, nam periculum est in nutriendo tam paruos, et eslo, quod nutriantur, minus boni confurgunt, et tardius habentur ad id, quod intenditur, quia minus habuerunt de nutrimento matris, propter hoc dictum est supra, quod, quanto maiores poterunt extrahi de nidis, extrahantur.

Iam vero adultis et maioris aetatis poterunt dari carnes minus tenerae et minus minutatae, quam prius, quia cum rostro et vnguibus minutabunt eas, quod enim caetera animalia comedentia carnes faciunt cum dentibus suis, hoc faciunt aues rapaces cum vnguibus tenentibus et cum rostro scindente; ad hoc autem incidunt et minuant, vt melius transglutiant et digerant. Illi vero, qui non habent carnes, et propter hoc dant caseum recentem aut recoctam, minuant et ponunt ante eos, et cauent omnino, quod neque caseus neque recocta sint saliti aliquo modo. Et illi, qui in defectu carniū dant oua cum lacte, hoc modo faciunt: accipiunt oua gallinarum et rumpunt ea, et in cacia vel capice lignea aut ferrea, quae tamen sit stagnata, ponunt ea, sed in rumpendo ouum remouent summitatem testae oui, et albumen et vitellum, postea deponunt in cacia, et implent lacte eandem testam, et miscent cum ouo in cacia, et quot erunt oua, tot testas implebunt lacte et miscebunt, et simul mixta super agitando decoquant ad



lentum ignem carbonosum, vt neque fiant dura, neque mollia, et huiusmodi esca tepida data pullis rapacibus melior est, quam recocta vel caseus. Et de esca, qualis esse debeat, et qualiter praeparata, dictum. Quantitas autem cibi neque sit superflua, neque diminuta: nam si erit superflua, aut euoment, aut non euoment, si euoment, non nutrit eos et debilitabuntur, si non euoment, non poterunt digerere, quia multus, et ex cibo non digesto sequetur suffocatio caloris naturalis, et ex hoc malum nutrimentum, et debilitas virium, et grauitas membrorum, et generatio malarum pennarum. Si erit cibus diminutus, calor naturalis tendet ad extinctionem, sicut ignis per subtractionem lignorum, et erunt macilenti, debiles, et generabuntur in ipsis pennae corrosae, et inconuenientes in forma et longitudine. Oportet igitur ex his, quae dicta sunt, quod neque sit superflua neque diminuta, sed sit quantitatis, quae ipsis conueniat, scilicet pullis maioribus corpore aut aetate maior, minoribus minor, et similiter illis, qui erunt calidioris naturae et calidiorum ventrium maior, secundum quod vna species calidior est, quam altera, et vnum indiuiduum vnus speciei, quam aliud eiusdem: illis vero, qui erunt minus calidae naturae, minor. Caloris autem naturae sunt signa, quod sint bene digerentes, vt dicit Hippocrates in aphorismis: eorum, quae velociter et copiose nutriuntur, veloces et copiosi secessus fiunt, calidorum ventrium erunt, quae citius digerunt, et citius et bene egerunt, et bonam egestionem faciunt, secundum portionem quantitatis cibi assumpti: minus calidorum ventrium sunt, qui tardius digerunt, dummodo non impediantur in sua digestionem per malitiam cibi aut per infirmitatem. Et propter ea, quae dicta sunt, non potest dici certa mensura quantitatum cibi exhibendi, sed habeatur haec consideratio circa hoc, quando incipit eis dari cibus, videatur appetitus, quem habebit tunc vnusquisque, et auiditas comedendi, bona enim natura tantum appetit vel circa, quantum digerere potest, vnde, cum datur cibus, videatur, quando hic appetitus obtunditur, et haec auiditas comedendi, attendendo simul cum hoc plenitudinem suae gorgiae, quo viso, non amplior cibus dandus est illa vice. Et si carnes erunt bonarum qualitatum, amplius poterit dari de eis, si malarum, minus, hoc modo tamen, quod gradatim subtrahatur quotidie de quantitate malarum, et postquam habebuntur carnes meliores, addatur paulatim et gradatim aliquid quantitatis, vt restauretur in tantum in bonis, in quantum subtractum fuit in malis; et si in praecedenti comestione amplius datum erit, in sequenti detur minus et tardius; aut si in praecedenti comestione, siue sero, siue mane, fuerit minus datum, in sequenti detur amplius, et praeueniendo horam. Et si bis pascere debet quis, et carnes habeat malas, mane detur minus, et sero restauretur ei de bonis, quod minus datum fuerat in mane. Et haec de quantitate cibi dicta sunt.



## CAPITVLVM XXXIV.

*De vicibus cibandi ipsos, et de horis conuenientibus cibationi.*

**D**e numero autem cibandi ipsos et de horis conuenientibus cibationi ipsorum dicatur. Isti pulli nouiter geniti et iuniores, cum non habeantur sic paruuli; nisi in fine veris, et per aestatem, quando scilicet dies sunt longi, cibandi erunt omni die bis ad minus, nam si semel tantum daretur eis cibus, non sufficeret propter longitudinem dierum et fortem calorem, quem habent, et si multum daretur et semel, calor diei debilitaret stomachum, et indigestionem paterentur propter multitudinem cibi, bis itaque detur, sed secunda vice non detur, nisi, quod prima vice sumpserint, digestum fuerit, appositio enim crudi super inceptum digeri et non digestum naturalium virtutum ordinem perturbaret, et operationes confunderet. Digesti autem cibi signa erunt in huiusmodi auibus: flatus exiens per os non foetebit grauitur, de cibo nihil tenebunt in gorgia, imo postquam cibus de gorgia descenderit ad stomachum, et de stomacho ad intestina, et diu in eisdem steterit, egerent pluries, et maxime secundum quod conuenit qualitati assumptorum ciborum, et in egestionem, quam faciunt, illud nigrum durum, quod consuevit esse in ea, erit modicum et granulosum, et illud album molle, quod consuevit esse in ea, erit multum liquidum et multum album, et egestio non erit foetida. Signa vero indigesti cibi sunt contraria praedictis: nam flatus erit grauis, et si aliquid tenuerint in gorgia, nondum digesserunt, et postquam etiam totaliter descendisset cibus de gorgia ad ventrem et intestina, et pluries egressissent, non bene digesserunt, si nigrum in egestionem fuerit multum, et liquidum, molle vero fuerit foetidum valde, et in quantitate minus quam in egestionem digesta, multiplicatio autem nigri et diminutio albi in egestionem accidit per calorem incipientem digerere, et non perfectam digestionem, quod contingit videre in igne incipiente decoquere lapides in fornace calcinaria, qui in principio denigrantur, sed, postquam peruenerint ad digestionem perfectam, nigrum minoratur et album multiplicatur.

## CAPITVLVM XXXV.

*De horis conuenientibus cibationi.*

**H**orae conuenientes in cibatione talium sunt horae matutinae, ante horam tertiam, dummodo hic sit vacuus primo cibo, ne feruor caloris meridiani comprehendat cibum in gorgia vel in ventre, deterior namque per hoc fieret digestio. Et horae serotinae conuenientes sunt ante occasum solis, ut nocte superueniente quiescentes dormiant, et melius digerant, nam et in similibus horis mater eis dabit escam, quod vero dabitur mane, sufficiens sit usque sero, et quod dabitur sero, detur iteratum, quod sufficiat usque mane. Qui vero ministrabit eis escam,



escam, non permittat accedere illuc multos homines, sed solus accedat ad ministrandum escam, et ad faciendum caetera, quae facere oportebit, et quanto rarius poterit, accedat illuc, nam per hoc neque fient clamorosi neque frequenter hiantes. Item ille, qui nutrierit eos, vt dictum est, in tantum, quod percreuerunt, et volare poterunt huc et illuc, non statim debet accipere illos ad mansuefaciendum, neque ad docendum, sed permittat eos volare huc et illuc, ad loca propinqua illi, in quo nutriti sunt, duriores enim pennas et meliores proinde habebunt, quoniam serenum, pluuia, aër et sol faciunt bonas pennas, et ipsi fortiores erunt propter hoc, et melius volabunt, ad quaecumque volare debebunt; neque est timendum de fuga ipsorum, redibunt enim ad locum, in quo ministrabatur eis cibus, imo stabunt fere quantum stant volitantes circa nidum suum, et plus poterunt dimitti volitare, cum non sit, qui fuget ipsos ab ipso loco, sicut erat mater, quae fugabat a nido et a locis vicinis. Stabunt autem volitantes circa illum locum, neque aufugient, quousque scilicet firmi erunt, et sufficientes per se acquirere sibi cibum.

### CAPITVLVM XXXVI.

*De praeparatione locorum, a quibus recolligi debent falcones, postquam nutriti sunt in eis.*

**Q**uando vero capi debebunt de loco, in quo nutriti sunt, aliis aperturis illius loci clausis, vna remaneat aperta, et habeat regiola, quae clauditur sero, per hanc namque regiola capi poterunt facilius et sine laesione; et hoc non fiat de regiola, nisi cum iam tempus aduenerit mansuefaciendi ipsos super manum, possent etiam imponi laquei, qui dicuntur iacti, in pedibus ipsorum, antequam possint volare, et possent dimitti cum iactis volare huc et illuc: nam, quando capi deberent, posset homo securius accedere ad capiendum ipsos in obscuro, et possent facilius capi. Veruntamen si hoc fieret, esset eis periculum volare deforis huc et illuc, propter aquilas et alias aues rapaces, quae caperent ipsos propter laqueos, quos crederent esse praedam, aut defugarent ipsos extra regionem, propter hoc non approbamus fieri illud, quod dictum est de iactis imponendis.

Circa vero tempus, in quo capi debent et extrahi de illo loco, per tres dies ante claudantur aperturae loci, et vna sola remaneat, quae non claudatur, sed fiet vna regiola, cum qua clauditur triplici sero; illo vero sero quando capi debent, hoc modo debet homo accedere ad capiendum ipsos, si tamen firmi sint, quod debeant capi, de nocte accedendum est ad locum cum lumine et duobus sociis, vel ad minus cum vno socio. De nocte dicimus, quoniam, si de die accederetur ad ipsos capiendos, ipsi videntes hominem velle ipsos capere, cum sint iam facti agrestes ex frequenti volare ad campos tantum, allident se huc et illuc per locum, in quo sunt, quod non effugerent laesionem membrorum aut pennarum, aut

vtro.



utrorumque, propter hoc accedendum est de nocte ad capiendum ipsos, lumen portatur, ut cum lumine videatur, in qua parte loci sunt, et remota candela capiantur, ubi sunt, cum duobus sociis accedi debet, quoniam iuuabunt in ciliando et in ponendo iactos. Intrabit itaque homo et capiet vnumquemque eorum cum ambabus manibus, apprehendentibus ipsum per dorsum, et peruenientibus digitis usque ad subteriora pectoris, et summinopere caueatur, ne in capiando neque in tenendo recipiant aliquam laesionem in membris vel pennis.

## CAPITVLVM XXXVII.

### *De ciliatione seu bluitione ipsorum.*

**P**ostquam vero capti sunt, priusquam ponantur ad standum super manum, sunt ciliandi, et sunt vngues eorum hebetandi, et iacti eorum pedibus imponendi, et campanella in altero pedum imponenda, et tornetum, si oportet, et longa. Sunt itaque oculi eorum contegendi et claudendi, ne hominem videant, et huiusmodi actus appellatur ciliare seu bloire; si enim non clauderentur eis oculi, dum viderent faciem hominis et ea, quae videre non consueuerunt, fierent magis immanis et magis agrestes, quando deberent fieri mansueti. Ciliare autem est detinere oculos auis clausos cum palpebra inferiore superinducta usque ad cilium. Dicitur autem ciliare pro eo, quod cum palpebra inferiore contegitur oculus usque ad cilium; et si dicatur, quod hi sint nidarii, neque est opus ciliare ipsos, cum iam sint quasi consueti cum hominibus, satis stabunt quiete, dicendum, quod, quamuis sint nidarii, tamen sunt ciliandi et bloiendi, nam per ciliaturam citius et melius mansuefiunt, et retinebuntur saluius in membris et pennis, et tolerabunt melius, quae conueniunt fieri circa ipsos in principio. Ciliantur autem hoc modo: ille, qui capit ipsum, teneat ipsum cum ambabus manibus, per dorsum suauiter constringens alas et dorsum, cauens a nimia constrictione, nam per nimiam constrictionem non bene possunt habere flatum, et sic teneat ipsum cum digitis descendentes ad pectus, aliquis teneat crura ipsius, et procuret, quod auis cum pedibus suis non possit impedire ea, quae debent fieri circa ipsum. Si vero in calore diei capi debet, et fieri debeant ei ea, quae diximus, oportet, quod ille, qui capere debet, madefaciat pannum vnum lineum, et manibus suis intrinsecus velatis ipso panno amplectatur auem, ita quod pannus tangat auem, et manus super pannum sit, et capiat, ut diximus, et alius accipiat crura, et ea comprimant suauiter versus ouariam, donec sic tenetur, et tunc alius, qui ciliare volet, faciet hoc modo: habebit acum rotundum, nam cum triangulari noceret, quoniam non duraret ciliatura propter incisuram palpebrarum, cum cuspide vero acus accipiet inferiorem palpebram, et incipiendo ab interiori parte perforabit eam perducendo acum ad exterius: nam si e conuerso fieret, pupilla laedi posset cuspide acus: in perforando etiam cauendum est, ne illa pellicula pannosa, quae subest inter palpebram et oculum,



lum, perforetur, sed tantummodo palpebra, nec accipiat modicum de ipsa, ne rumpatur ciliatura ante tempus, nec accipiat multum de ipsa, nam multum scinderetur de ea, quod esset nocuum tutelae oculi. Recte igitur accipiat sub margine palpebrae, vbi est medietas longitudinis eius, et magnam partem fili a parte intrinseca palpebrae immittat, deinde acum cum filo super caput ducat, et palpebram inferiorem alterius oculi ab intrinseco ad extrinsecum perforet, tunc acu remota, ambae extremitates fili coniungantur super caput falconis, et attrahatur vtraque palpebra tantum sursum versus cilium, quod totum oculum cooperiat, et falco nihil videat; extremitates itaque fili tunc ligentur strictae super caput falconis tantum, quod palpebrae retineantur sic cooperientes totum oculum, et duae extremitates fili prope nodum incidantur, deinde cum alia extremitate acus plumae capitis superponantur filo: nam filum sit coopertum plumis, minus poterit rumpi vnguibus falconis raspantibus caput. Acuitas vero vnguium falconis cum forficibus amputari debet et hebetari; et vtrum hoc debet fieri statim, quod captus est falco, an postquam ciliatus est, an postquam iactis impositis sibi iam positus est ad standum super manum, non curamus: in amputando vero caueatur, ne nimium amputetur de vnguibus, nam propter hoc posset sanguis fluere, quod esset nocuum falconi. Sola igitur acuitas obtundenda est, nam propter hoc minus nocebit manibus portatoris, et si chirothecas habuerit, non infiget vngues suas chirothecis, neque futuris chirothecarum, sicut noceret, si vngues remanerent acuti, nec staret tam conuenienter super manum cum acutis vnguibus. Et quando etiam continget, quod aliquis falco ceperit praedam suam, et hic alius iactabitur cum ipso, si accidat, quod, cum volet capere praedam socii, capiet ipsum suum socium, cum vnguibus hebetatis non nocebit ei tantum, quantum noceret cum acutis, et ad multa alia valet, quae dicuntur infra.

### CAPITVLVM XXXVIII.

*De iactis, qualiter fiant et quomodo apponendi sunt in tibiis falconum.*

**S**equitur dicere de iactis, longa, tornetto et campanella, quae omnia habenda sunt circa falconem tenendum; et dicatur primo de iactis, quid sunt iacti, quomodo meliori forma fiant, quis eorum dexter, et quis sinister, ut quisque vnum pedem conuenienter teneat, quomodo ligantur ab tibiis falconum, quae sunt utilitates iactorum. Iacti sunt laquei de corio facti, imponendi pedibus falconum, ut cum eis retineantur et iactentur ad praedandum, qui ob hoc iacti dicuntur, quod cum eis iaciuntur falcones et emittuntur ad praedandum. Formantur autem huiusmodi iacti a diuersis diuersimode, sed ille modus, quem dicemus iam, melior est, pro eo quod secundum nostrum modum iacti formati fortiores erunt, et durabiliores, et falconum pedibus aptiores. Hoc modo pro falconibus facimus iactos: accipitur corium molle et forte, et scinduntur duae corrigiae de ipso  
aequales,



aequales, vnaquaeque longa secundum vnum palmum, et lata secundum latitudinem, quam inferius distinguemus. De his duabus corrigiis formantur iacti in hunc modum: extremitas corrigiae, quae debet amplecti tibiam falconis, latior esse debet, quam reliqua extremitas pendens inferius, et vltimum illius extremitatis, quae debet circumire pedem, scindatur ex vtroque latere modicum, vt illic fiat aliquantulum strictior, quam in latitudine, quae erit circa tibiam, quod autem latum erit de ista corrigia circa tibiam, pro girofalcis et sacris sit latius latitudine digiti minoris, pro peregrinis, gentilibus et laneriis parum minus, ita quod latitudo iactorum in parte illa proportionaliter respondeat maioritati et minoritati falconum; pars autem iactorum, quae a tibia descendet inferius, in tantum efficiatur stricta, quod sua strictura redeat fere ad medium latitudinis illius, quod erit circa tibiam; corrigiis igitur sic aptatis, extremitas corrigiae latior prope suam vltimitatem perforetur per medium sui foramine oblongo, quod foramen tantum sit, vt alia extremitas corrigiae transire possit per ipsum vsque ad id, quod de ipsa circundat pedem: hoc autem foramine facto, illic fiat in eadem corrigia vnum aliud foramen ad similitudinem prioris, et tanta debet esse distantia inter vnum foramen et aliud, quantum sufficiat amplecti tibiam falconis, vnde ad probandum ponatur illa pars corrigiae circa tibiam falconis, vt melius sumatur distantia inter vtrumque foraminum, reducatur itaque extremitas corrigiae perforata ad aliud foramen desuper, et intromittatur per secundum foramen, et tantum transeat de illa extremitate per secundum foramen, quod totum suum foramen exeat extra secundum, et tunc reliqua pars corrigiae, quae non est perforata, replicetur ad superius, et introducatur per primum foramen, quod primum intrauerat per secundum, vt sic veniant ista duo foramina inter sese, quod de ipsis fiat quaedam tricatura nodosa, ex hac autem forma replicationis extremitatis perforatae super corrigiam ad secundum foramen fit ambitus iacti, in quo continetur tibia, in superiore parte sui strictior, et inferiori largior, quae amplitudo inferior ad hoc valet, quod, quando falco distrahit pedem suum ad superius, non laeditur pes per stricturam coniunctionis corrigiae, nec eius circuitiois quod amplum erit, sit tam amplum, quod pes exire possit, quod vero strictum, non sit tam strictum, quod stringat tibiam falconis, vnde illi, qui faciunt aeque strictum superius, vt inferius, in hoc nocent, quod pedes falconum ex strictura inflantur persaepe, et podagrici efficiuntur. Amplius habeantur duo annuli, seu maculae loricarum, et hi annuli siue sint ferrei, siue aenei, non curamus. Illa igitur extremitas iacti, quae non est perforata, et debet pendere inferius, ad posteriora pedum intromittatur per annulum, et quod intrabit per annulum de hac corrigia, replicabitur, et suetur cum reliquo corrigiae, quod non transiit, vel nodabitur. Sutura autem haec seu nodus fiat tam prope annulum, quod annulus non possit discurrere huc et illuc, debet autem esse tanta distantia inter suturam, quae continet annulum, et nodum prius factum prope tibiam falconis, quanta est longitudo digiti medii manus, quae



longitudo mensurari debebit hoc modo: ponetur futura distringens annulum super illam iuncturam digiti, qua iungitur cum palma a parte exteriori manus, et debet extendi digitus in longum super hanc corrigiam, vt extremitas ipsius digiti pertingat vsque ad nodum iacti prope pedem; similiter fiat de alio annulo in alio iacto. Haec est forma iactorum pro falconibus. Horum autem iactorum alter dexter, alter sinister est, et oportet, vt cognoscatur, quis dexter, et quis sinister est, vt dexter dextrum pedem conuenienter teneat, et sinister sinistrum, quemadmodum enim falco agilior et expeditior est per iactos, si distribuatur quisque suo pedi, sic econtra erit, si distribuatur dexter sinistro, et sinister dextro pedi. Discernitur autem dexter iactus a sinistro hoc modo: illarum partium iacti, quae circundant tibiam, quae breuior est, vadat ab interiori pedis ad exterius, quae vero longior et teneri debet inter digitos, veniat ad partem intrinsecam. Ligabuntur autem iacti ad tibias falconum hoc modo: dissolutis nodis iacti, qui debent esse prope tibiam, illa pars iacti, quae est inter vtrumque foramen, circunducatur tibiae, et, perfecto gyro, pars superior iacti perforata superducatur corrigiae ad aliud foramen, et intromittatur per secundum foramen, quousque primum foramen, quod erat in illa parte, introeat et transeat per secundum, quo facto reducatur pars inferior corrigiae non perforata super partem, quae transiit per secundum foramen, et introducatur per ipsum primum foramen, quantum intrare potest, vt fiat ex eis sic intransibilibus in se tricatura supradicta nodosa, et tunc suatur corrigia iacti inferius, vel nodetur super annulum ea distantia, quam diximus, vt sic appositi iacti secundum partem superiorem sui amplectantur tibias, et cum parte sua inferiori continente annulum, pendeat inferius ad posteriora pedum falconis, et hoc, quod pendet de iactis, est id, quod recipitur ab extrinseco manus, ad intrinsecum inter duos digitos inferiores manus, et alios duos superiores eis. Vtiles autem iacti sunt ad hoc, quod per eos retinetur falco, ne recedat praeter voluntatem tenentis, et quod longa alligatur eis.

### CAPITVLVM XXXIX.

*De longa, qualiter fiat, et ad quae est utilis.*

Sequitur de longa: vnde videndum est, quid sit, quomodo formatur, quomodo ligatur ad iactos, et recolligitur circa digitum breuiorem, quae sunt utilitates eius. Est autem longa quaedam corrigia, qua ligantur et retinentur falcones ad sedem suam quamcunque, et haec sua longitudine comparata ad iactos meretur dici longa: fit autem hoc modo: scinditur ex corio molli et forti vna corrigia longa, aequaliter stricta per totum, praeterquam in extremitate inferiori, in qua debet esse parum strictior, et tantum stricta, quod possit transire sufficienter et large per ambos annulos iactorum: in extremitate vero superiori longae fiat nodus vnus, qui non permittat longam totaliter annulos pertransire ex parte nodi; postquam



quam facta est longa, vt diximus, intromitti debet extremitas strictior per vtrumque annulum iactorum, et tantum introducatur de illa longa, quod quasi duae partes eius pertranseant, in tertia parte residua versus nodum scindatur corrigia longae, et fiat ibi foramen vnum oblongum, per quod intromittantur duae partes longae strictiores vsque ad annulos, ita quod ex huiusmodi immissione et recombinatione annuli iactorum firmiter retineantur in longa, vel sic, et tunc ex vtraque extremitate longae fiat vnus nodus, retinens et distringens annulos iactorum, ligata longa, vt diximus, dum portatur super manum falco, recolligantur ambae partes longae, reuoluendo eas in plures aliquot reuolutiones largas et longas, circa digitum breuiorem, vt commodius portetur, et, quando non portatur, ligabitur cum hac longa super sedem suam, vt docebimus infra. Sunt autem quidam homines, qui hanc longam ligant cum iactis non habentibus annulos, sed cum nodis factis de eisdem iactis in sua extremitate: nos autem approbamus omnem illum modum alligandi longam iactis, quo citius et expeditius ligatur et soluitur longa, quem modum dicimus esse de annulis iactorum. Vtilitas autem longae est, quod cum hac ligatur et retinetur falco ad sedem suam, et huic longae alligatur filaria, quando primo loyratur, et per longam retinetur falco, quando balneatur.

### CAPITVLVM XL.

*De tornetto, qualiter factum sit, et ad quid sit utile.*

Sequitur de tornetto. Est autem tornettum quiddam duobus annulis compositum, gyrantibus in se inuicem, et hoc modo est factum: sunt duo annuli ferrei, aut aenei, aut argentei, aut de alio metallo facti, magni ad quantitatem annulorum, qui sunt in iactis: veruntamen circumferentia vtriusque debet esse lata aliquantulum in aliqua sui parte, et in illa parte debet esse foramen, ita quod vnum foramen erit in circumferentia vnus annuli, et aliud in alia, et etiam vnus clauellus intrans per foramen vtriusque, ex vtraque sui extremitate sic firmatus, quod non possit exire neque ex vna parte neque ex altera, ex hac autem coniunctura sequitur, quod vnus annulus inuoluitur libere super circumferentiam alterius, quoties igitur timebitur, ne falco intorqueat se iactis, alligabitur hoc tornettum annulis iactorum cum quadam corrigiola subtili et forti, quam prius poterit alligari cum annulo suo superiori, annulo vero eius inferiori alligabitur longa, sicut alligabatur annulis duobus iactorum. Est autem vtilitas torneti in hoc, quod falco non possit vexari per intortionem iactorum in pedibus suis.

### CAPITVLVM XLI.

*De campanella et utilitate ipsius et modo ligandi eam.*

Sequitur de campanella, quae etiam nola dicitur. Haec autem est de aere, et debet esse sonora, et magna vel parua secundum magnitudinem falconis, aut



alterius auis rapacis, quae debet eam portare, et debet habere foramina sua adeo stricta, quod falco non possit intromittere acuitatem rostri sui in ipsa foramina, et sic impediri per campanellam, et debet esse quoddam foramen paruum in ansa campanellae, per quod foramen intromittetur corrigiola, cum qua corrigiola alligabitur campanella ad quemuis pedum falconis, in altiori parte tibiae, quam sit iactus, et ligabitur ita, quod non distringat tibiae, neque quod multum pendeat, sed prope tibiae. Utilitas vero campanellae multiplex est, per sonum namque campanellae percipitur cito, si falco stans in sede sua se diuerberat, quo percepto succurritur ei citius, etiam, si perdatur falco, per sonum campanellae facilius a remotis audietur, ubi erit, et facilius poterit recuperari, et illi, qui docti sunt et experti in sonitu campanellae, cognoscunt, si se diuerberat falco, aut scalpit, aut mordicat iactos aut campanellam, aut aliquid aliud facit. Modum autem ligandi campanellam, quem faciunt quidam ad pennas caudae, perforando vnam vel duas de pennis caudae, et corrigiolam campanellae intromittendo, nullatenus approbamus, quoniam falco per huiusmodi alligaturam campanellae tenet caudam male pendentem, et pennae caudae minus sanae habentur.

## CAPITVLVM XLII.

*De modo, quo portari debet super manum, et forma retinendi manum.*

**H**is factis circa falconem, dicendum est, quomodo poni debet nidarius ad standum super manum et ad portandum; ad quae praesciendum est, qualiter portitor debet tenere brachium et manum. Teneat igitur partem brachii, quae est ab humero vsque ad cubitum, quae dicitur armus, descendentem recte iuxta latus, non tamen coniunctam lateri, nam, si coniungeretur ei, mouendo corpus suum moueret et brachium, quomodo inquietaret auem, reliquam vero partem brachii, quae est a cubito versus manum, replicet ad anteriorem partem corporis, vt ex replicatione huius partis brachii et superioris fiat angulus rectus, manum vero, quae est a brachio vsque ad extremitatem digitorum, non plicet interius neque exterius, sed in rectitudine brachii teneat, coniungendo pollicem extensum indici, et replicet indicem ad extremitatem pollicis, et erit modus, secundum quem abacistae tenent septuaginta cum manu, et alii digiti eiusdem manus replicentur in palmam sub illis duobus digitis, vt firmiter sustententur, ad similitudinem tenentis numerum ternarium, et sic ex replicatione indicis super pollicem, et trium digitorum in palma sub illis, teneat manum ad formam abacistae tenentis septuaginta tria, et haec forma conuenientior est sustentandi auem super manum; manus etiam haec opponatur summitati humeri, vt non approximetur faciei hominis; nam auis timet ad faciem hominis, quam naturaliter refugit et abhorret, quando sic portaretur deciliata aut sine capello. Item sicut diximus de forma tenendi vnam manum cum suo brachio, sic dicendum est de alio brachio



et alia manu, expedit enim, quod portitor sciat portare falconem super vtramque manum, vt, si ventus venerit a sinistris, portet super dextram, et, si a dextris, portet super sinistram, quoniam sic semper opponetur pectus falconis vento, nam, si veniret a cauda et tergo ventus, horripilaret pennas caudae et totius corporis, maiores scilicet et minores, quod non sustineret falco, sed se reuolueret. Item sunt homines quarundam regionum, qui consueuerunt portare falcones in manu dextra, et tantum suum modum approbant et aliorum modum vituperant. Nos vero non facimus vim in huiusmodi diuersitate, sed vtrumque modum laudamus, dummodo ventus non irruat in falconem a tergo; ideo laudamus, sicut supra diximus, quod sciat portare cum vtraque manu, nam scire portare cum vtraque manu iuuat propter custodire auem a vento venienti a tergo falconis, et propter vicissitudinem alleuiantem manum falconarii, propter etiam aliam manum permutandam, si aliquando patitur, propterea cauendum est a quibusdam malis diuerberationibus falconis, vt infra dicetur. Debet autem falco posthac erigi super pedes suos et collocari super manum inuestitam chirotheca, ita quod duo pedes falconis locum teneant super manum a iunctura vltima brachii per manum vsque ad extremitatem digitorum replicatorum in forma, quam diximus. Et hoc modo erigatur, si teneatur auis super manum dextram, quod caput, rostrum et pectus et anteriora pedum teneat versus sinistram. Erecto igitur falcone et posito super manum inuestitam chirotheca, vt dictum est, intromittantur laquei iactorum inter pollicem et indicem inter manum, et fiat, vt exeant ad exteriorem partem manus inter duos digitos inferiores et duos alios, qui sunt supra eos, quamuis sint aliqui, qui faciunt exire iactos inter quoscumque digitorum indifferenter, melius tamen tenentur et firmitus et strictius inter duos et duos digitos, vt diximus, quam inter tres et vnum. Et si contingat, quod falco de manu se deiiciat et deponat, et non reuertatur per se ad standum super manum, iterum supponatur ea forma, quam diximus. Longa vero recolligatur circa digitum minorem per circuitiones paruas, hoc facto et teneri poterit diu falco super manum, et portari conuenienter, et absque impedimento auis, et reflexiones ipsius longae, factae sic circa digitum minorem, pendeant aliquantulum inferius.

### CAPITVLVM XLIII.

#### *De modis, quibus habentur falcones ramagii.*

**D**icto de falconibus nidasiis, quomodo habentur, et quomodo nutriuntur, et parantur ad portandum super manum, et quomodo portantur: dicendum est de illis falconibus, qui sunt syluestres et dicuntur ramagii, quomodo habeantur, et quomodo aptentur ad portandum, et quomodo portantur super manum. Hi vero extra nidum capiuntur cum retibus, laqueis aut aliis instrumentis et artificiis, quae captio non sine magna arte et non sine magno studio fit, quam artem et quod



quod studium, tanquam impertinentia nostro libro, dimittimus expertis: propositum enim nostrum est principaliter de captis falconibus, quomodo mansuescant et doceantur praedari, et esse cum homine. Istud tamen dicimus, quod inter omnia instrumenta, cum quibus capiuntur extra nidum, illa sunt laudabiliora, cum quibus capitur maior numerus falconum, et specialiter saluius et sine laesione capiuntur, nam de sic captis merito poterit haberi maior fiducia, qui autem in capiendo laeduntur, videlicet dum retenti conantur euadere, aut dum male extrahuntur de retibus, vix aut nunquam euadent, quin ex illa laesione aut moriantur, aut per multa tempora inutiles, et forsitan semper. Propter hoc consulimus, ut exercitati in arte capiendi falcones caute et sine laesione, quanto plus poterunt, capiant ipsos, et post captionem teneant et tractent eos, quanto plus possunt saluius. Capiuntur autem his quinque temporibus: primum tempus est, scilicet quando volitant circa nidum; aliud est, postquam dimiserunt penitus loca vicina nido, parentibus expellentibus ipsos, et tamen volant per contratam, in qua nati sunt; aliud est, quando transeunt et instat passagium ipsorum; aliud est, quando hyemant in regione, in qua capiuntur; aliud est, quando redeunt. Qui enim circa nidum volitant et prope nidum capiuntur, incipit captio eorum a medietate Iunii usque ad Iulium; sed illi, qui dimiserunt loca nido vicina et volant per contratam, in contrata, quae est circa nidum, et non prope nidum capiuntur, et ipsorum captio quasi per totum Iulium usque ad principium Augusti durat; hi etiam capiuntur, postquam sunt in transitu suo; veniente vero Augusto et prima mutatione temporis ad frigus, sunt in suo transitu, et qui capientur ab hoc tempore usque ad medietatem Nouembris, dicuntur capti de passagio, et a medietate Iunii usque per totum Septembrem capiuntur plures de gentilibus in sexto, quinto et quarto climate, quam de peregrinis, ita quod, quanto loca erunt propinquiora tertio et secundo climati, tanto plures de gentilibus capientur, tunc est namque transitus eorum versus meridionalia climata, a Septembre vero in antea, scilicet Octobri, in eisdem climatibus capiuntur plures de peregrinis, quam de gentilibus, quoniam gentiles iam transierunt, sed peregrini, qui nati erant in tardiori tempore, et in remotioribus septentrionis locis, tunc transeunt, et secundum quod climata sunt calidiora, et passagium eorum et captio durat plus, et in superioribus locis durat minus, quoniam frigus instat, et ipsi properant fugere loca frigida, et cum in transeundo mutant loca falcones, non possumus dicere specialiter vnum locum, in quo capiantur solum, nam in multis tunc capiuntur, et similiter, quando redeunt. Tempore vero hyemali si aliqui capiuntur, erunt de illis, qui aliunde venientes remanserunt in illa regione, in qua capiuntur, et non transierunt cum aliis, sed remansio eorum fuit illic, aut quia aer illius regionis est conueniens eis in hyeme, respectu loci, in quo nati sunt, aut quia praedantur sufficienter sibi illic tempore hyemis, aut quia laesionem aliquam patiuntur, propter quam cum aliis transire non potuerunt, et illi capiuntur circa loca, in quibus abundant aues, quas praedantur.



tur. Tempore vero veris capiuntur illi, qui redeunt ad loca natiuitatis suae, et dicuntur capti de reditu. In omnibus vero temporibus anni accidit, quod capiuntur fauri et mutati, et in tempore reditus pauciores, nec possumus distinguere captionem maiorem gentilium vel peregrinorum, sicut faciebamus in autumnis, magis enim inordinate redeunt, quam transierint, et plures de ipsis transeundo et post transitum capti fuerunt, et plures mortui. Generaliter autem de captione falconum speciei cuiuscunque dicendum, quod illi, qui citius nascuntur, citius capi possunt et debent, qui vero tardius, tardius capiantur. Girofalci itaque, sacri et gentiles, quia nascuntur citius, capiuntur citius. Girofalci enim, licet in frigidioribus generentur locis, non tamen nascuntur tarde, sed habent naturam generandi cito, quantum gentiles, qui nascuntur in calidis regionibus. Si vero aliqui de girofalcis capiuntur tarde, non accidit, quod nascantur tarde, sed quod non tam cito recedunt a loco natiuitatis suae, pro eo quod melius sustinent frigus, quam caeteri, et nascuntur in remotiori et frigidiori loco, quam alii girofalci, qui cito capiuntur. Lanerii vero capiuntur in eodem tempore, in quo capiuntur gentiles, et capiuntur aliqui de ipsis prius, quam de gentilibus. Peregrini vero pro eo, quod in remotis nascuntur et tarde, capiuntur tardius caeteris, et sic illi, qui citius nascuntur, citius transeunt, et citius capiuntur, qui vero tardius, tardius.

## CAPITVLVM XLIV.

### *De locis, in quibus capiuntur.*

**L**oca vero specialia, in quibus capiuntur, sunt diuersa, secundum quod species falconum sunt diuersae, et vtentes diuersis cibis. Peregrini namque pro eo, quod nascuntur in regionibus longinquis, frigidis et aquosis, in quibus paucae sunt terrestres et plures aquaticae, quas venantur, et de quibus sunt consuetae viuere, capiuntur saepius iuxta aquas et riuerias. Sacri vero et lanerii, quoniam vsi sunt venari per campaniam largam et spatiosam aues campestris, mures, lacertos, et grillos, et huiusmodi animalia, saepius capiuntur in campania larga et spatiosa, et non iuxta riuerias. Girofalci, quoniam vsi sunt venari quandoque aues campestris, quandoque aues de riueria, capiuntur et in campania spatiosa, et prope riuerias, sed saepius in campania, quoniam viuunt saepius de generibus anserum, quae pascuntur in campis herbosis. Gentiles vero, quoniam viuunt saepius auibz campestribus, saepius capiuntur in campania. Statim quod falco captus est syluester siue agrestis, si hic, qui ceperit ipsum, solus est, ponet ipsum primitus in malleolo, stabit enim quietius in eo, et hoc iuuabit maxime, quando sperabit eadem die capere alios, priusquam ad domum suam redeat; etiam in malleolo positum poterit solus ciliare, ungues aptare, iactos et campanellam imponere: et si sunt duo, potest primo ciliare, et postea in malleolo ponere, vel e conuerso, si libet. Est autem malleolum sacculus quidam lineus, capax longitudinis et grossitiei corporis



poris falconis, perforatus ex vtraque extremitate, foramen autem, per quod debet exire caput, sit tam largum, quod sufficiat exire caput per ipsum, sed foramen inferius, per quod intrabit corpus falconis, sit largius, et sit longum malleolum, ut ab armis totum corpus comprehendat usque ad genua, et habeat laqueos stringentes ipsum in circuitu foraminis inferioris. Apprehensis igitur pennis alarum et caudae cum corpore falconis, intromittatur falco in facculum capite exeunte per foramen superius, et vterque pes et extremitates alarum et cauda remaneant deforis a parte inferiori. Intromisso falcone in malleolum, constringatur malleolum per laqueos circa foramen inferius, et colligantur laquei simul. Iuuat autem malleolum in eo, quod falco sic potest seruari, et portari saluius et sine laesione, usque ad domum eius, qui ceperit ipsum, et iuuat ad supradicta, nec diu debet detineri in malleolo, nam, si diu detinetur, vix possit egerere, et egestio retenta deficcaretur in ventre et adureretur, quod esset valde nocuum.

## CAPITVLVM XLV.

### *De ciliatione ipsorum.*

**F**alcone posito in malleolo, cum captus sit agrestis, protinus ciliandus est, nam, si non ciliaretur, statim fieret agrestior ad visum faciei humanae et caeterorum, quae videre non consuevit, et vteretur magno conamine ad euadendum, ex quo conamine distraheret et disrumperet pennas suas et sua membra, et ob hoc haberet hominem odio, credens haec mala sibi accidisse per hominem: inde est, quod multi, cum capiunt falcones, dum sunt detenti retibus, aut laqueis, aut aliis suis instrumentis, accedunt ad ipsos non opponendo faciem eis, et cauent, quantum possunt, ne faciem suam videat falco, et ciliabitur vel ab vno solo vel a duobus, eo modo, qui dictus est supra de nidasiis. Et hic tanto magis indiget ciliari, quam nidasiis, quanto magis agrestior est nidasio, et minus vsus hominibus. Postquam portatus est in malleolo ad domum, et postquam ciliatus est, potest conuenienter remoueri de malleolo, et debet remanere ciliatus. Est autem iuuatiua ciliatura ad multa, per ipsam enim falco non se inquietat neque se diuerberat tam saepe, cum non videat causas, propter quas hoc debeat facere, nec homo efficitur falconi tam odiosus, cum non videat ipsum, quousque iam affectet comedere et manere cum homine, et per ciliaturam in membris et pennis saluius custoditur, et mansuefit facilius, et assuefit facilius ad capellum, et non solum utilis est ciliatura pro agrestibus falconibus, sed vniuersaliter pro omnibus auibus, quae se non sinunt portari aut tractari circa principium. Ciliati vero et melius portantur, et melius sinunt se portari.



## CAPITVLVM XLVI.

*De modis tenendi eos et portandi super manum.*

Vngues etiam amputandi sunt, et iacti imponendi pedibus ramagiorum, priusquam ponantur super manum, eo modo, qui dictus est de nidasiis; et falconarius debet tenere manum et brachium, vt dictum est in capitulo de nidasiis, et postea debet erigi huiusmodi falco super pedes suos, et cum alia manu accipiendus est per pectus, et super manum collocari debet, et si deponit se de manu, reflectatur manus, vt reuertatur super eam, qui, quoties per se non redierit, iuuandus est cum alia manu posita ante pectus eius ad redeundum super manum. Debet autem homo portans falconem sic regere manum suam et firmam tenere, vt falconem portet suauiter, nam, si dure portabit, aut manum mobilem habuerit, falco inquietabit et diuerberabit se ex malo portamento, et debilitabitur coxis et renibus, et non solum requiritur, quod falconarius sciat portare, vt conuenit, sed etiam, quod exercitium habeat et vsum portandi, et omnia faciendi, quae facere conuenit circa falconem, per scientiam, quam praehabuit ex hoc libro nostro, vt in theorica sit peritus et in practica exercitatus. Signa autem, per quae cognoscitur, quod brachium et manus bene regant, et falco bene portatur, sunt haec: falco tenet alas reollectas in se et altas ad dorsum suum, et cauda descendit inferius in directo dorso, nec ipsa cauda facit gibbum aliquem in loco, in quo continuata est dorso, et tenet omnes pennas caudae reollectas et coadunatas inuicem, et tenet pedes aequaliter distantes, et non firmat se plus super vnum pedem, quam super alium, et non stringit cum vnguibus suis manum portantis, sed leuiter sustentat se in pedibus, et si manus falconarii commoueatur hinc inde, aut gyretur, vt collocet falconem, falco facile commutat pedes suos: si vero brachium et manus non bene reguntur, nec auis bene portatur, nec bene tractatur super manum, erunt in eo signa contraria supradictis.

## CAPITVLVM XLVII.

*De falconariis, quales esse debeant.*

Habito, quomodo et vnde habentur falcones, tam nidassii, quam capti syluestres seu ramagii, et quomodo aptantur in suis membris ad standum super manum, et quomodo ponuntur et portantur super eam, priusquam dicatur, quomodo mansuefaciendi sunt, antequam de manu dimittantur ad volandum, oportet nos dicere, qualiter debet esse falconarius, et quam intentionem debet habere ad mansuefaciendum et habendum falcones. Quicumque itaque vult discere et exercere artem venationis cum auibus, ad hoc vt possit esse sufficiens, in nutriendo et custodiendo, mansuefaciendo, portando, docendo ipsas, vt venientur alias aues, in vtendo eis in venationibus et in curando eas, si opus fuerit, oportet, vt in se ha-



beat ea, quae dicentur iam, et praeterea scientiam huius libri, quae omnia cum sufficienter habuerit, a digniori nomen accipiens, falconarius poterit merito nuncupari. Qui sit mediocris staturae, ne propter magnitudinem superfluam plus lassus et minus agilis habeatur, neque propter paruitatem nimiam sit nimis agilis tam equester quam pedester, sit mediocris habitudinis, ne propter extenuatam maciem deficiat sustinere laborem aut frigus, neque propter corpulentiam et pinguedinem nimiam fastidiat laborem et calorem, et pigrior, et tardior habeatur, quam conuenit huic arti, non fastidiat artem neque laborem, sed diligat et perseueret in ipsa, in tantum, quod etiam, quando deuenerit ad senectutem, non minus intendat arti, quod totum procedit ex amore, quem habebit in arte, cum enim ars longa sit, et plura in usu secundum eam nouiter incidant, nunquam debet homo desistere ab exercitio huius artis, sed perseuerare, quam diu vixerit, ut ipsam artem perfectius consequatur. Debet esse perfecti ingenii, ut, quamuis didicerit plura et a doctis huius artis, circa ea, quae sunt necessaria auibus, tamen ex suo naturali ingenio sciat inuenire et excogitare, quae necessaria fuerint incidenter, non enim esset possibile scribere singula et nouiter emergentia in operationibus bonis et malis auium rapacium: nam cum diuersorum sint morum longe, durum esset scribere omnia, pro qua re singulis ex suo ingenio, et ex arte huius libri, quidquid erit expediens, ministrare tenetur. Sit bonae memoriae, ut bonum vel malum, quod aliquando circa operationes auium et circa exercitium huius artis contigerit, causa sui vel causa auis, vel alterius rei, memoriae commendet, quatenus alia vice, quod bonum fuerit, sectetur, quod vero malum et inconueniens, caueat. Sit acuti visus, ut visu comprehendere valeat etiam a remotis, in qua parte sint aues, ad quas intendit venari, et auem suam, quando elongatur a se, visu sequatur, et caetera subtiliter videat, quae necessarium est videre. Sit levis auditu, discernet enim facilius, in qua parte sint aues, quas quaerit, ex vocibus auium, quas audiet circumquaque, et socios suos audiet facilius, et campanellam auis suae, quando erit absens, imo per voces auium quandoque scire poterit, versus quam partem erit auis sua, quae est absens. Sit homo magnae vocis et fortis vocis, nam auis sua, quae aliquando stabit remota ab ipso, ad reuocationem suam, quam audiet, et socii sui facilius comprehendent. Sit agilis et promptus in suis moribus, ut cito succurrat aui suae, quoties expedierit. Sit audax in tantum, quod non timeat pertransire loca aspera, quando conueniet. Sciat natare, ut, si auis sua transuolauerit aquam inuadabilem, ipsam aquam natando transeat et auem sequatur, et ipsi, ubi oportuerit succurrere, succurrat. Non sit moris nimium iuuenilis, ne pueritia inducat ipsum aliquid facere contra artem, nam pueri consueuerunt esse gulosi, et delectantur videre plurimum amoenos volatus, et plures: nec tamen pueros ex toto repellimus, cum possint esse prudentiores, non enim pueri sufficiunt mansuefacere aut aliter docere aues, aut cum eis venari, cum non constet eos esse prudentes in his, sed discant a doctis, quousque perueniant ad perfectio-



fectionem huius scientiae et aetatis. Item non debet esse somnolentus, requiruntur etenim multa, in intrando tarde lectum, in requirendo de nocte pluries auem suam, et in surgendo ante diem, et leuitas somni in audiendo campanellam auis, et motum alarum suarum, et inquietationem suam. Non sit gulosus nec nimis deditus gulae, si extra domum siue in campania fuerit, aut etiam, quando perdidit auem suam, cogatur per gulositatem suam domum redire citius, aut etiam, si in domo fuerit, non obliuiscatur auis suae habendo intentionem ad gulositatem suam. Non sit ebriosus, quoniam ebrietas quaedam insania est, per quam auem suam facillime deuasabit, quamuis etiam se credat eam bene tractare, et ab ebrio et fatuo custodienda non est auis. Non sit iracundus, neque facilis ad iram, accidit enim per saepe, quod auis facit ea, per quae ille, qui custodit eam, ad iracundiam prouocatur, et, nisi illam iracundiam dimittat, malo motu moueri poterit, ex quo malo illato aui per iram, auis ipsa, cum sit res debilis, certissime deuasabitur. Non sit piger aut negligens, quoniam ars ista multorum laborum est et magni studii. Non sit gyrouagus, ne per suos motus erraticos auem non requirat frequenter, vt conuenit: auis namque in modico tempore laesionem recipiet, si neglecta fuerit, aut non fuerit saepe saepius requisita. Habeat chirothecam in manu, super quam portare debet falconem, longam vsque ad cubitum, et amplam, vt cito possit indui et exui, quae debet esse de corio grosso: nam falco cum vnguibus suis minus adhaerebit chirothecae, et cum rostro et vnguibus, eamque minus poterit penetrare, et quando continget, quod falco iactetur de manu ad volandum, firmiter recedet de talibus chirothecis. Habeat praeterea vnam bursam ad cingulum suum, in qua reponet carnes et tiratoria, quae ideo dicitur carneria.

### CAPITVLVM XLVIII.

*De intentione, quam habere debet falconarius ad tenendum et mansuefaciendum.*

**I**llorum autem, qui operam exhibent venationi exercendae cum auibus rapacibus, multiplex est diuisio. Alii namque intendunt in hoc, vt aues et quaedam de quadrupedibus, quae capient cum suis auibus rapacibus, edant gulose, aut sibi quomodocunque aliter lucrifaciant. Alii intendunt in hoc non causa gulae, nec causa lucri alterius, sed vt habeant inde delectationem solatiofam, in videndo scilicet amoenos volatus auium. Alii intendunt in hoc, vt glorientur et iactent, se multas cepisse aues. Alii intendunt in hoc neque causa gulae, neque causa lucri alterius, neque etiam causa delectamenti visus sui, sed tantum, vt habeant suas aues rapaces bonas et meliores, quam caeteri, ex quo acquirunt sibi famam et honorem prae caeteris, et in hoc habent magnum delectamentum, scilicet quod habent bonas aues. Intentio prima redarguenda est, pro eo, quod, cum multum



vexent et fatigent aues suas, vt ex multitudine praedae gaudeant, bonas aues rapaces diu habere non possunt. Secundorum similiter intentio non est approbanda, volentes enim videre frequentius amoenos volatus suarum auium, et quasi circa hoc suam intentionem explere nequeunt, cogunt eas subire multos labores et intolerabiles, per quos deficiunt, et hic modus puerorum est, et non conueniens arti. Tertiorum intentio reprobatur, pro eo quod non faciunt, vt conuenit, et vexant eas vltra modum. Quartorum vero intentio approbanda est, ipsi enim habentes suas aues meliores, non abutuntur eis, sed diutius et perseverabilius in sua bonitate manebunt, et ipsi modum sequuntur conuenibilem magis arti, faciendo volare aues suas, eo modo, quod non multum vexantur, et custodiendo ipsas aues diligentia meliori. Intentio itaque, quam debet habere falconarius, debet esse, vt habeat aues rapaces arte doctas ad capiendum alias aues, et quaedam quadrupedum, in quo ars procedet vsque ad finem intentionis. Sed quoniam aues rapaces sunt penitus secedentis naturae ab homine, et etiam secundum proprietates et mores naturales suos alienantur ab ipso merito, timent enim retineri per hominem, cauentes in hoc ipso pennis suis et suae personae, semper et naturaliter absistunt ab homine: propter hoc ad habendum propositum nostrum de eis, necessaria est ars, et instrumenta, et artifex, per quae priuentur, quamuis non ex toto, aues rapaces ab hac sua natura, et per quae suas proprietates desinant naturales, et acquirant in se proprietates et mores artificiales, standi cum homine, et reuertendi ad ipsum, qui mores acquisiti per assuefactionem, processu temporis et assiduitate, vertantur eis in habitum et consuetudinem et naturam alteram. Ex parte vero auis rapacis, quae doceri debet has proprietates contrarias suis naturalibus, aliquid esse oportet, quod sit quasi medium, per quod mutetur de sua natura in contrarium. Illud autem est sensus gustus, cum caeteri sensus sint repugnantes in hoc, videntes enim faciem hominis sibi caeterisque animalibus terribilem et caetera, quae conuersantur cum homine, insueta videri sibi, et tangere ea, quae tangere non consueuerunt, et tacti, palpati tractatique ab insuetis et horribilibus sibi, et audientes voces hominum et alios tumultus insuetos sibi, inducuntur ex ipsis eisdem sensibus, visu, auditu et tactu, esse semotim longe ab hominibus: nam quod detineantur ab homine, quod habeant iacticios laqueos in pedibus, quod stent ligati in sede sua, quod pascantur super manu hominis, quod cum homine stent, quod volentes recedere, vt earum moris est, de sede sua prohibeantur recedere, et quod teneant campanellam aut capellum, quod, postquam iam dimissi sunt et sui iuris, ad hominem redeant, quod hominem vadentem ad ipsam expectent, quod clausi detineantur in domibus, haec omnia contraria sunt naturae suae: proinde restat solum, per gustum assuefacere ipsas ad videndum, tangendum et audiendum hominem et caetera, quae conuersantur cum homine, et ad omnia modo dicta. Non solum falconarius debet esse, qualis diximus, et habere intentionem dictam circa falcones et alias aues rapaces, verum, ne operam perdat



perdat in mansuefaciendo falcones, et in habendo eos, si sani non essent, conuenit, vt sciat signa, per quae cognoscat falcones esse sanos, quae sunt huiusmodi. Falco sanus omnes pennas et plumas constrictas ad se retinet, non hirsutas neque lassas, sed illas minores plumas, quae videntur quasi pili, et sunt inter locum rostri, qui cera dicitur, et oculos, et inferiores plumas, quas vocamus barbam, habet hirsutas et horripilatas, et qui quiescit et assecurat se, pennas caudae tenet reollectas sub duabus mediis superioribus, quae duae vocantur cooperacula, stat erectus super pedes et firmus, postquam assecurat se, oculos habet rotundos, palpebras non frequenter mobiles, et quando aperientur aut claudentur palpebrae, cito redeunt ad locum suum, et pellicula illa subpalpebralis pannosa, illa scilicet, quae exit a lachrymali oculi, cito redibit ad locum suum, iuncturam autem illam alarum, a qua incipiunt decem pennae maiores forinsecae, quam iuncturam quidam vocant humerum, et alii buctum alae dicunt, teneat eleuatam ad caput, motus sui et suorum membrorum sunt veloces, hiare suum clarum est, et non raucum, quando vociferabit, excutit se, et plumas suas, et ungues in vtroque suo latere, siue non fuerit balneatus, siue fuerit, bene replicat caput suum ad capiendum perunctum desuper caudam, auide comedit, bene digerit, large egerit, et sine sonitu sibiloso, maior pars egestionis suae est alba et mollis, et reliqua pars, scilicet nigrum, quod est in medio egestionis, granulosa est et dura. Accidit etiam, quod mutat egestionem et facit eam alterius modi, in colore et substantia, quando comedit carnes madefactas, et quando vescitur diuersis carnibus, et praecipue, si comedit oua. Plumatam, quam deglutiuit, sine excussione capitis euomit, et ante se cadere dimittit, non cum excussione capitis, vt astur et nifus, egerit prope, non longe, propter hoc super perticam falconum, quando lata est, inuenitur saepe plumata egestio. Quantitas egestionis respondet proportionaliter quantitati cibi, quem comedit. Quando balneat se, submittit totum caput aquae, indubitanter et saepe et velociter, verberat cum alis suis fortiter aquam balnei, gratanter, et hilariter balneat se; quando dormit, stat super vnum pedem, et tenet caput in spatulas dormiendo, quamuis hoc faciat aliquando propter famem, et post diuerberationem suam rediens ad locum suum, suauiter anhelat, et non fit anxius anhelando, quemadmodum aeger, ex pinguedine tamen anxie anhelat, sed, dum tenet os apertum, tenet eodem modo, dum anhelat, et anhelat frequenter, non mouens caudam motu anhelitus, quemadmodum faciunt aegri.

### CAPITVLVM XLIX.

*De modis mansuefactionum falconum ad standum super manum, et ad alia facienda, vt mansuefiant.*

**H**abito, quomodo falco ponitur super manum, et quomodo manus regi debeat in sustinendo falconem, dicendum est deinde, quomodo mansuefaciendus est  
ad



ad standum super manum, et ad caetera facienda sibi, vt incipiat mansuescere. Mansuescere igitur nihil aliud est, quam inducere falconem ad sustinendum esse cum homine quiete, et omnes suas operationes facere. Multipliciter quidem fit hoc. Sunt enim quidam, qui nunquam ciliant falconem, neque cum capello cooperiunt ei oculos, et ipsum mansuefaciunt, et inducunt esse quiete cum homine, falco tamen, qui hoc modo videtur esse mansuefactus, et quietus stat, potius est defatigatus et deuictus, nec potuit induci ad hoc sine magna sui laesione. Huius signum est, quod falco sic mansuefactus nunquam est fortis ad aliquas suas operationes. Quapropter istum modum penitus reprobamus. Fit etiam mansuefactio falconis aliis modis duobus, qui ambo conueniunt in eo, quod a principio ciliant falconem, sed etiam multis aliis differunt. Nam primus modus cum ciliatura mansuefacit falconem, nullo modo vtendo capello. Secundus modus ciliatura vtitur circa mansuefactionem falconis et capello. Differunt etiam hi duo modi in hoc, quod ille modus, qui est mansuefaciendi falconem sine ciliatura et sine capello, antiquior est et difficilior et tardior, et fatigat magis falcones, quam ille modus, qui est cum ciliatura et cum capello. Nos igitur vtrumque horum modorum docebimus, pro eo quod ambo hi modi temporibus nostris consueti sunt inter homines, et dicemus tanta de vtroque modo, quanta sufficere possunt circa mansuefactionem cuiuscunque falconis. Cum enim falconum alii sint agresiores, et propter hoc difficiles ad acquirendam mansuefactionem, sicut sunt plures de illis, qui capti sunt syluestres, alii vero sint minus agres, et propter hoc ad acquirendam mansuetudinem obedientiores et velociores, quemadmodum sunt nidasii et multi de aliis, ad omnia siquidem citius mansuescunt minus agres, sed agresiores tardius: quae dicemus, sufficient agresioribus et ferocioribus, qui vnquam possint esse inter falcones, minus agresibus vero pauciora de eisdem sufficient. Et dicemus primitus de mansuefactione, quae fit sine capello, ipsa enim prior est tempore et antiquior: et scito, quomodo fiat facillime, poterit sciri, quomodo fiet mansuefactio cum capello. In mansuefaciendo igitur falconem sine capello, procedendum erit hoc ordine et hoc modo: postquam falco ciliatus est, et positus super manum, vt dictum est, debet diu teneri super manum, et deportari suauiter per domum obscuram et solitariam, et tota prima die et prima nocte, si possibile erit, teneatur super manum, nec ponatur ad sedendum super aliquam perticam vel aliam sedem, quod vt melius fieri possit, transmutandus erit falco de manu ad aliam, aut de manu vnius hominis ad manum alterius, per has namque vicissitudines diutius poterit sustentari, et portari super manum, et si non poterit tam diu detineri super manum, deponetur de manu super sedem vnam, secundum modum, quem dicturi sumus in capitulo de perticis et sedibus. Amplius, illa prima die et illa prima nocte nihil cibi dandum est ei, quatenus die sequenti magis esuriat, et minus aliquantulum pauescat, in qua die dissoluendus erit de sede, et super manum resumendus, quomodo dicemus. Et antequam inuitetur ad co-

mestio-



meffionem, ipfe falconarius habeat in carneria fua coxam vnam gallinae aut alias carnes idoneas fupradictas in capitulo nutriendi falcones nidafios, quando autem primitus inuitari debbit ad comeffionem, falconarius portet ipfum ad domum non claram et folitariam, illic namque facilius affuefiet ad comedendum primitus: et fi dicatur, quod ciliatus eft, poterit teneri, et etiam dari ipfi cibus in domo clara, vt non videat, respondendum eft, quod, quamuis ciliatus fit, tamen tenuitas palpebrarum non impedit, quin oculi percipiant lumen diei, quo percepto, minus libenter comederet falco, dum recordaretur aëre claro, in quo efle confueuerat, propter hoc iuuat, vt in domo non clara inuitetur primitus ad comedendum; in domo etiam folitaria prodeft, nam fi audiret voces hominum aut canum, aut caeteros tumultus infuetos audiri ab ipfo, minus libenter comederet, timens de huiufmodi fonis. Mane vero inuitandus eft ad comeffionem, nam hac hora et venari confueuerat et comedere, et fi tardius inuitaretur ad comeffionem, non reftaret tempus fufficiens ad dandum fibi pluribus horis cibum, vt conuenit fieri, inflaret enim nox, in qua falconarius non poffet efle tantum affiduus circa falconem, quantum in die. Hoc modo autem inuitabitur ad comeffionem: ponentur carnes ante falconem, vt odoratu fentiat eas, cum eifdem etiam carnibus tangatur roffrum, pectus et pedes falconis, vt ex hoc tactu fiat ei taedium, et aperiat roffrum ad mordendum, vt, dum credet et volet mordere rem, quae tangit ipfum, mordeat carnes, et mordendo faporet, faporando enim allicitur ad comedendum, praecipue cum efuriat. Quando vero iam inceperit mordere carnes tam auide, quod per fonum non impediatur in comeffione, falconarius proferat fonos ad libitum fuum, planos et fine ftrepitu, quos quoties audierit, addifcat recordari comeffionis, et allici per eos ad intendendum comeffioni. Qualefcunque autem fint foni, non curamus, dummodo eiuſdem modi fint. Iuuat etiam affuefacere falconem ad huiufmodi fonos, non ſolum pro inuitando ipſum ad comeffionem, ſed etiam ad praeferuandum falconem a malis inquietationibus, ſi enim falco aliquando volet inquietare ſe, aut inquietabit ſuper manum vel ſuper ſedem, ſi non habeantur carnes dandae ſibi, vel non ſint dandae tunc, proferantur huiufmodi foni, datus intendere fonis, ceſſabit ab inquietationibus, intendens et ſperans comedere, et per huiufmodi fonos prolatos ſibi citius permittet fieri circa ſe aliqua neceſſaria, quae debent fieri circa ipſum. Non eſt autem permittendum in principio, quod vna vice comedat illam totam coxam gallinae, aut totaliter illas carnes, quae ſibi ſufficerent pro vno paſtu, ſed aliquid ſubtrahetur de ſuo paſtu et reſeruetur, de quo reſiduo poſtea multis vicibus in die detur ſibi ad mordicandum, vnaquaque vice parum, proferendo ſimiles fonos illis, qui proferebantur, quando dabatur ſibi paſtus, per huiufmodi ſcilicet mordicationes, ſiue, vt ita dicam, abbeccationes ſaepe ſaepius iteratas amabit plus hominem, et affueſcet citius et libentius recipere cibum de manu hominis, et minus inquietabit ſe. Hae etiam carnes, quando dantur falconi ad comedendum, teneri debent in eadem manu, quae ſuſtinet auem,



scilicet quod partim sint et retineantur sub tribus digitis, qui concludebantur in manu sub pollice, et partim exeant inter hos digitos et pollicem ante pedes falconis, et, si opus erit, iuventur etiam retineri firmiter cum alia manu submissa praedictae: si enim carnes non tenerentur firmiter, falco nimis auide nimisque gulose posset carnes comedere et deuorare, qui modus comedendi sibi esset nocuius ad digerendum, cum consueuisset foris tenere carnes cum pedibus et vnguibus, et eas rostro morsellatim incidere et deglutire. Mordicationes vero seu abbecationes, quas facturus est falco, faciat in eadem coxa gallinae, aut in carnibus pastui suo debitis, cauendo, ne pluries dando sibi cibum, aut pluries faciendo ipsum mordicare, detur sibi ultra debitam quantitatem pastus, quem dicturi sumus. Dum vero sic pauitaret mordicat, assuefaciendus est ad permittendum se tangi et tractari manibus: nam cum ipse attentus est comestioni, si tangatur suauiter aut tractetur manibus, minus pauescet ex illo tactu, et assuescet etiam permittere se tangi et tractari audacius alio tempore. Cauendum tamen est in tangendo aut tractando, ne cum manibus foetidis tangatur aut tractetur, quoniam proinde pennae suae fordidarentur, et citius madefierent et deflorarentur. Debet autem deportari per domum huc et illuc: nam per deportationem huiusmodi firmiter et securius sciet stare super manum. Circa sero etiam aut de nocte dandum erit sibi, quicquid restabat post abbecationes pluries factas in die de pastu suo sibi debito, conuenienter tamen priusquam tollatur desuper manum, ponendus ad sedendum: sic namque complebitur sibi pastus sufficiens usque mane, et superdormiet libentius, et quietus super sedem suam. Si tamen tamdiu et tam suauiter teneatur de nocte super manum, quod dormiat ibi, longe melius erit in dormiendo super manum, assuescet amplius manum diligere, et non fastidiet stare super eam. Quantitas autem cibi est sufficiens coxa vna gallinae mediocris quantitatis, aut aequalis quantitas de carnibus aliis conuenientibus, haec enim quantitas sufficiens pastus est circa principium pro falconibus mediocribus in quantitate, ut cum hoc pastu valeant macrescere, et per macrefactionem et per famem doceantur facilius assuescere cum hominibus, et citius mansuescere; girofalcis vero plus pertinet, sacris etiam, quamuis sint maiores de numero falconum post girofalcos, sufficit eadem quantitas, scilicet vnius coxae, fortes enim sunt, et possunt esse contenti huiusmodi quantitate et difficilius minorantur de sua pinguedine: cum enim pusillanimes et debiles sint, non capiunt magnas aues, quando sunt syluestres, sed paruas, ut sturnellos et huiusmodi, vermes et lacertos, de quibus se pascunt et continent aliquando, sed quod huiusmodi parum possunt habere, ita quod interdum sustinent tota die cum valde modico cibo, et aliquando cum nullo, et sic assueti facilius possunt esse contenti praedicto pastu, scilicet vnius coxae gallinae, sed tertiolis et minoribus inter falcones dari debet pro pastu sufficienti minor quantitas carniū, et minoranda est quantitas, secundum proportionem conuenientem quantitati sui corporis, computando scilicet quantitatem pastus ad pastum et corporis ad corpus. Vniuersa-



uersaliter autem dicendum, quod maioribus maior quantitas conuenit, minoribus minor, sed maioritas pastus et minoritas dicitur ad quantitatem coxae gallinae mediocris quantitatis referendo. Veruntamen quoniam carniū quaedam sunt impinguentes magis et melioris nutrimenti, quaedam minus et peioris nutrimenti, de magis impinguantibus potest dari minus, vt, quod reciperent ex bona natura ipsarum carniū, subtrahatur eis ex quantitate modici, de minus autem impinguantibus potest dari maius simili ratione. Si etiam falco syluester plurimum pinguis captus est, de quo dicimus, quomodo debet primo assuefieri ad cibum et macrescere, diminui potest de quantitate pastus sustentationis suae debita, et paulatim in tantum, quod fame scat plus et plus, et ad minorem pinguedinem seu ad maciem deueniat: nam ex huiusmodi fame et macie illatis sibi affectabit cibum amplius, et ab homine minus aufugiet, sperans semper sumere cibum de manu hominis. In macrefactione autem falconis certum terminum macri, ad quem deducendum sit, dare non possumus, cum falcones alii maiorem maciem, alii minorem tolerare sufficiant, secundum fortitudinem et debilitatem virtutum suarum: hoc tamen omnino cauendum est, ne ad immoderatam et extenuatam maciem venire cogatur: nam per tantam maciem debiles fierent viribus et defecti, per defectum nutrimenti, tantum, quod non sufficerent facere ea, quae volumus ipsos facere, et vix possent postea retrahi a tanta macie, et recuperare carnem sibi debitam, et maxime per quam affectant esse cum homine, et sufficerent facere, quae volumus ipsos facere. Immoderata autem macies et extenuata dignoscitur in lacertosis carnibus, quae sunt vtrique iuxta medium pectoris: nam istae carnes, quae sunt per longum pectoris, diminuerentur descendentes vtrique in vallum quoddam, et medium pectoris fiet inde acutius et siccus, quae duo cognoscuntur et tactu et visu, et color pennarum et plumarum et pedum et rostri mortificabitur quodammodo, et falco faciet exinde debiliter et remisse et impotenter diuerberationes et excussiones et caeteras operationes suas. Non itaque ad immoderatam maciem deducendus est neque cogendus, neque paulatim neque multo magis repente, sed ad illam moderatam maciem, quae non prohibeat ipsum facere, quae volumus, imo inducat falconem ad effectum conuersandi cum homine et ad hominem redeundi, tanquam ab homine cibum recepturum. Sunt tamen falconarii, qui per nimiam famem et extenuatam maciem velociter et quasi repente mansuefaciunt falcones. Et sunt alii plures, qui quadam consuetudine et paulatim assuefaciunt, et ad mansuetudinem inducunt eos. Primo modo habetur mansuetudo falconum celerius: secundo modo tardius. Sed mansuetudo acquisita celeriter periculosior est et deterior: illi namque falcones, qui tam subito macrescunt, odiunt proinde hominem, et si contingat, quod recedant aut aufugiant ab homine quocunque modo, difficilius recuperantur et rehabentur, et praecipue, si pascunt se foris, et longe difficilius, si contingat eos pernoctare foris. Mansuetudo vero acquisita paulatim est laudabilior, est enim salubrior in eo, quod paulatim acqui-



ritur, nam per hoc falco recipit eam in quandam consuetudinem, quae fit ei quasi altera natura, et per hoc trahitur ad amandum hominem, et est minus nociua, in eo quod non repente macrescit falco, repente namque calefacere aut macrifacere, aut aliter quomodocunque corpus mouetur, naturae est inimicum, paulatim vero naturae amicum. Huic autem mansuetudini acquirendae in falconibus infissimus, quoniam non timetur in ea de periculis supradictis.

## CAPITVLVM L.

*De sedilibus, super quibus ponendi sunt falcones, postquam de manibus deponuntur.*

**E**t quoniam tenere falconem semper super manu non est possibile, tum propter falconarium, qui non potest se semper dare falconi, cum necesse habeat dormire et comedere, et alia sua necessaria facere, tum propter falconem, quem taederet semper esse super manum, cum naturaliter esse consuevit et stare super firmiores sedes, oportet, vt dicamus de sedibus, super quas ponendus est ad standum, quando de manu deponitur. Est igitur sedes falconis id, super quod falco ligatur ad quiescendum, quando de manu deponitur. Sedium autem vna est, quae pertica dicitur, alia est, quae approbato vocabulo sedile seu seditorium nuncupatur: perticarum autem alia est alta, alia est ima: sedile vero non nisi vnum; prius vero dicamus de pertica alta, deinde de ima, deinde de sedili. Alta igitur pertica debet esse lignea, ampla desuper ad mensuram vnus pedis, vt falco, qui habet magnam ponderositatem respectu quantitatis sui corporis, coxas et tibias breues, ligatus curte vt dicetur in medio latitudinis perticae, se de pertica deicere non possit, neque ante retro, hic enim si non ligaretur curte, aut si pertica esset strictior, quam diximus, cum se diuerberaret et de pertica deiceret, non esset de facili promptus diuertere se, sed penderet, ex qua suspensione noceretur pennis suis et toti suo corpori, praecipue renibus. Debet autem esse exaltata super terram ad quantitatem staturae hominis vsque ad oculos, vt homo possit videre facilius super perticam, quod necessarium est videre; egestionem vero falconis factae quandoque super perticam, et purgatura seu plumatura, quam euomit super eandem perticam, et inuolutio, quae contingit quandoque iactis, facilius videbuntur; quod si pertica esset altior, non possent haec conuenienter videri; et si esset inferior, non esset similiter conueniens, quoniam visus hominis superueniret ex opposito visui falconis, vnde plus timeret falco, et si canes etiam et alia animalia, de quibus timet falco naturaliter, transirent sub pertica, longe magis timeret propterea falco, cum transirent et propius essent sibi, magis diuerberaret se. Sola etiam debet esse pertica, vt nulla alia pertica sit sibi collateralis vicina neque remota in eadem camera: nam si essent duae sic collaterales, vicinae aut distantes in eadem camera,



camera, secundum eundem situm locatae, falco, qui sederet in vna earum, semper haberet voluntatem diuerberandi se et deiiciendi ad aliam perticam, et nos semper intendere debemus, quod se non diuerberet, et propter hoc, si erunt duae aut plures, locentur prope parietes diuersos in eadem domo, melius tamen est, quod sit vnica. Situetur etiam tantum distanter a parietibus domus, quod falco sedens in ea non possit diuerberando se cum alis suis tangere parietem, et situetur firma super pedes suos, ne motu eius, si facile fieret, causa foret inquietationis falconis, bonum est tamen, quod sit portabilis et de loco in locum mutabilis, in alio enim loco domus ponenda erit, dum falco agrestis erit et nondum mansuetus, quoniam in obscuro et remote a ianuis, et in alio, postquam falco mansuetus erit, quoniam in clariori loco domus poni poterit, potest etiam firma et immobilis permanere, et aer in domo per apertionem et clausuram fenestrarum fieri minus clarus aut magis, in loco etiam, ad quem fumus non possit peruenire, neque caetera inconuenientia, quae fiunt in domibus, poni debet, et longa poterit esse multum vel parum, attendendo spatium domus, quod comprehendere debet. Pertica vero ima duobus modis esse potest; lignea rotunda, aut lignea quadrata, et debet esse exaltata super terram tantum, quod cauda falconis stantis super eas, non possit tangere terram, longa vero potest esse parum vel multum. Et si plures erunt, locentur, vt diximus de altis. Sedile vero vocamus, quod de ligno vel de petra fit, et eius superficies latior plana est et aequa, comprehensa in circuitu circumferentia columnari, et debet esse sedile rotundum descendens in acuitatem, ad modum figurae, quam Geometrae dicunt pyramidalem, in acuitate huius sedilis infigatur ferrum longum vno palmo, grossum grossitudine digiti pollicis, ferrum sit siue quadratum siue rotundum, inferius acutum, vt citius possit infigi in terram, et firmitus adhaerere, altitudo, quam debet habere super terram sedile, tanta sit, quanta erit perticae inferioris; item circulus vnus ligneus aut ferreus habeatur per se, absolutus ab hoc sedili pyramidalis, qui deponitur in terram, et ferrum sedilis per medium eius in terram infigatur. Huius vero circuli utilitas est, quod longa alligatur ad ipsum, quatenus in reuolutione longae circulus reuoluatur, ne possit longa impediri in aliquo circa sedile, et iste circulus portandus est et habendus semper cum ipso sedili, et si plura erunt sedilia locanda in eadem domo, sic locentur, quod falcones de diuersis sedilibus se non possint tangere. Quidam sunt, qui hoc sedile quadratum de petra faciunt, quod non est tamen conueniens forte, namque contingit, quod falco deiicit se de sedili quadrato, et longa retinetur in vno angulorum, vnde falco de facili allidit pennas caudae et alarum angulis sedilis diuerberando se, praeterea quando falco balneatus imponitur sedili quadrato, et expandit alas, pennae alarum madefactae et tangentes angulos sedilis plicantur de facili; amplius non potest ligari ad sedile quadratum cum circulo aliquo, sicut ad sedile rotundum, sed oportet quod caudilia vna lignea infigatur in terram prope sedile quadratum, ad quam alligatur longa; amplius non com-



mode fertur a loco ad locum petrinum hoc quadratum, quod commode fieri potest ligneum pyramidale. Rursus pertica alta et sedile locanda sunt in domibus prope parietes, ut non sint in passagiis hominum, aut aliorum animalium domesticorum, non tamen debent in tantum viciniari parietibus, quod falcones diuerberando se possint allidere pennas suas parietibus. Item sub pertica ima et circumcirca sedile sternenda est palea, vel herba, vel sabulum, quoniam, si falcones diuerberando se ad terram delicerent asperam, possent de facili excoriare plantas pedum et dirumpere extremitates pennarum, quae sunt in alis et cauda. Tot igitur modis sunt sedes pro falconibus et tales, et sic poni debent. Pro accipitribus vero, quales debent esse sedes, suo loco dicetur.

### CAPITVLVM LI.

*De diuersis iuuamentis diuersorum sedilium, et de perticis, et qualiter ligentur in ipsis.*

**D**icatur nunc, in quibus est iuuamentum vnus perticae plus, quam alterius, et perticarum, quam sedilium, et e contra. Iuuat autem pertica alta plus, quam ima, in hoc, quod plures falcones ligari possunt ad altam, quam ad imam, et minus impedit domum alta, quam ima: et falco stans super perticam altam minus pauescet ad aduentum hominis, et aliorum animalium de domo, quam stans super imam, canes enim et porci et huiusmodi, si contingat, quod accedant versus perticam altam, etiam absente custode, falconi minus nocebunt, quoniam non poterunt attingere sursum, quamuis desubtus transeant, quam versus imam aut sedile, propter hoc idem pro semideciliatis et pro nouiter deciliatis et agrestibus melior est alta, quam ima, et quam sedile, pro ciliatis vero non est alta melior, quam ima, aut quam sedile, cum indifferenter possint poni in quauis sedum: super imam tamen aut super sedile melius, quam super altam, quia super alta posset intorquere iactos, et allidere personam suam et pennas. Sedile etiam et ima pertica in hoc melius sunt pro ciliato falcone, quam pertica alta, quoniam, si contingat, quod falco immittat rostrum suum in foramen campanellae, pendere poterit ex alta, ex qua suspensione multum poterit laedi: in sedili vero et in ima hoc non eueniet; ima vero pertica iuuat plus, quam alta, in hoc, quod falco non potest pendere ex ea, neque dirumpere suam personam, neque suas pennas, quemadmodum potest super altam, et in hoc, quod de ima potest descendere et iacere in terra, si indiget, ut quiescat, et in hoc, quod longa, cum qua ligatur falco ad imam, non tam de facili intorqueri poterit, eo quod ligatio longae ad vtrumque, scilicet imam et sedile, fit longa, et in hoc, quod, si falconarius non possit esse praesens aliqua hora, ianuis domus clausis, securius dimittitur falco super imam, quam super altam. Ima etiam melior est, quam sedile, in hoc, quod potest fieri longa multum, et recipere plures falcones, super sedile vero vnus solus falco ponitur ad sedendum.



dum. Sedile vero iuuat plus, quam pertica alta et quam ima, in hoc, quod falco securius et sine maiori laesione stare potest super sedile, quam in quauis perticarum, nam in perticis si plures sedeant falcones, laedere possunt se inuicem facilius, quam super sedile, vbi non est nisi vnus solus, et in hoc, quod, quando etiam vnus falco staret super perticam, maius periculum est sibi, quam super sedile, ad perticam namque pro eo, quod longa est, potest diuerberare se dextrorsum aut sinistrorsum, et vtrunque laedere personam suam et pennas, ad sedile vero non poterit, cum locus circa sedile sit expeditus. Deinceps dicamus, qualiter alligandi sunt falcones istis suis sedilibus, non enim eodem modo alligandi sunt ciliati, vt deciliati, neque eodem modo perticis, vt sedili, proinde videnda est diuersitas. Falco itaque, quando ciliatus est, indifferenter poni potest ad sedendum in quauis pertica aut sedili, cum enim non videat, non habebit maiorem causam inquietandi se et aliter diuerberandi in vna sede, quam in alia. Hoc autem modo poni debet ad sedendum in pertica alta et longa, posita longa per ambos annulos iactorum et nodata circa ipsos, eo modo, qui dictus est in capitulo de longa, facies falconis et pectus non debent apponi perticae, quando salire debet ad standum; cum enim ciliatus sit et non videat, sic oppositus perticae non saliet super eam, quamuis perticam cum pectore suo tangat, sed falconarius debet exaltare manum suam, super quam est falco, ante perticam et prope ipsam, et postea debet humiliare manum eam paulatim iuxta perticam, tali modo, vt cauda falconis et ouaria ipsius super sit perticae et coxae falconis, et posteriora genuum cum manu falconarii tangant perticam, post haec relaxentur iacti aperiendo manum, in qua sunt: falco enim hic ciliatus frequentius et libentius descendet a posteriori, eo modo, qui dictus est, ad standum super perticam. Interim autem, dum fiunt haec cum manu portante falconem, falconarius cum alia manu accipiet longius caput longae, et proiciat desuper perticam vltra, et cum eadem manu accipiat vtrumque caput longae subtus perticam et trahat inferius, vt nodus longae continens annulos possit peruenire descendens ad medium amplitudinis perticae, et tunc suauiter remoueat manus, quae portabat falconem, vt falco de manu super medium perticae suauiter descendat, et post hoc longius caput longae regyretur alia vice circa perticam, quod debet implicari cum alio capite longae subtus perticam, et innodari prius vno nodo post alium nodum solubilem, quem nodum falconarius cito possit soluere, cum opus erit: ex his autem duabus complicationibus capitum longae fit vnus nodus. Duae vero regyrationes de dicto capite longae fiunt circa perticam, vt nodus longae constringens iactos firmiter stet in medio perticae, quod, si sic non fieret, nodus iactorum cum longa discurrere posset ad partes perticae hinc inde, et, si falco diuerberaret se, non posset facile redire, vnde posset potius se laedere. Hoc modo ponitur falco ciliatus ad standum super perticam altam, et ligatur, ligato falcone recedere potest falconarius a falcone, secundum quod voluerit, dummodo neque impetuose neque cum tumultu recedat: cauere namque debet, ne aliquo



aliquo modo timere faciat falconem, aut inquietare in recedendo. Quando autem falconario libebit ligare falconem ciliatum ad perticam imam, hoc modo faciet: traducet longam per ambos annulos iactorum, vsque ad nodum extremitatis longae, nec innodabit annulos iactorum cum longa, sicut fiebat, quando ligari debebat falco ad perticam altam, inclinabit se et genu flectet ex illo latere, vnde non tenet falconem, et cum illa manu, cum qua non portat falconem, ponat extremitatem longae non nodatam circa perticam, et traducet longam in tantum per perticam, quod a pertica vsque ad iactos non restet de longa, nisi quantitas vnus pedis et medii, et nodabit ipsam longam cum pertica tali modo, quod, quando trahetur extremitas longae, solvatur facile, hoc facto approximet plus manum, quae sustinet falconem perticae, vt manus falconarii et coxae falconis tangant perticam: ouaria vero et cauda falconis super sit perticae, hoc modo, a posteriori falco, cum ciliatus sit, libentius ascendet super perticam, quam anteposita facie vel pectore, ligato falcone sic relaxet iactos, et permittat falconem ascendere, deinde falconarius surgat suauiter et sine mora recedat. Rursus quando falconario libebit alligare falconem ciliatum ad sedile, hoc modo faciat: longa pertranseat annulos iactorum vsque ad extremitatem nodatam, et non nodetur cum annulis iactorum, sicut nec supra: accedat falconarius et inclinet se et genu flectat cum falcone ante sedile, quemadmodum ante perticam imam, sicut circa perticam nodabit longam, et ad eandem longitudinem, sic in annulo sedilis alliget longam, et ponat falconem ciliatum ad sedendum supra sedile, vt faciebat ad perticam imam, et recedat, quemadmodum a pertica. Et licet dixerimus, quod falco ciliatus indifferenter posset poni ad sedendum super quam sedem voluerit falconarius de tribus dictis, tamen pro falcone melius est et saluius super sedile, vt dictum est supra in operatione sedium et perticarum ad inuicem. Hi itaque tres modi alligandi falconem communicant in eo, quod falco ciliatus conuenienter ligari potest ad quamcunque de tribus, et in eo, quod falco ciliatus ponitur super has sedes a posteriori conuenientius, et in aliis etiam communicant. Differunt autem in eo, quod alligatura ad perticam altam fit cum curtitate longae, ad imam vero et ad sedile cum longitudine longae vnus pedis et medii: alligatura vero falconis ad perticam imam et ad altam differt ab alligatura, quae fit falconis ad sedile, quoniam ad sedile ligatur vnus solus falco, ad perticas autem imam et altam ligari possunt plures falcones simul, plurium etiam falconum ligatura ad altam perticam et ad imam differentiam habet, vt patebit, dicto de ligaturis ipsis, quemadmodum habere se debent. Ad altam vero perticam plures falcones simul sic ligabuntur: ligato vno falcone, secundum modum, qui dictus est, alius falco eiusdem speciei aut propinquae debet ligari tam distanter a primo, quod nec cum alis aut cum rostro possint sibi inuicem nocere, vnde inter maiores falcones maior debet esse distantia, inter minores minor. Patet igitur, quod ligaturae ipsae tantum distant, quantum et falcones, et eodem modo possunt ligari plures ad eandem perticam,



ticam, secundum quantitatem perticae. Ad imam autem plures falcones sic simul ligabuntur: ligato vno falcone ad eam, vt praedictum est, alius falco ponatur distanter ab illo, sed tamen ambae ligaturae longarum ad perticam imam fiant vicinae inuicem, quanto plus poterunt: tertium autem quando ligare voluerit ad eandem perticam, in tanta distantia liget ipsum, quod nec cum rostro nec cum vnguibus, nec etiam cum alis possit tangere aliquem de duobus, qui prius sunt ligati. Quartum autem ligabit cum tertio, quemadmodum ligauerat secundum cum primo. Et sic facere debet de pluribus per ordinem, binis et binis ligatis secundum longitudinem perticae. Differunt namque istae ligaturae in eo, quod plures ligantur ad altam perticam curtis ligaturis longarum ad perticam, et distantibus ab inuicem, ita quod singulae ligaturae per se factae sint, et dislent, quantum falcones: ad imam vero bini et bini ligentur, non curtis ligaturis longarum ad perticam neque distantibus, sed quibuscunque duabus inter se vicinis et propinquis valde. Adhaec autem duae ligaturae falconum collateralium in ima pertica vicinae sunt, quia cum ligatura cuiusque longarum ad perticam fiat secundum longitudinem vnus pedis et medii, si distarent ipsae ligaturae, ita quod falcones possent in diuerberando pertransire alter ad alterum, accidere posset quandoque, quod ambae longae in modum crucis alligarentur inuicem falconibus se conferentibus altrinsecus, et haec intricatura longarum esset magno nocumento ambobus falconibus, sed quando ligaturae quorumque duorum sunt vicinae, non potest hoc contingere, imo si longae illigant sese, colligantia non stabit in sursum earum, sed descendet in deorsum ipsarum prope nodos earum, qui sunt super perticam, et remanebit longitudo longarum sic intricatarum non damnosa falconibus. Si tamen volet falconarius plures falcones ligare ad imam perticam singulos semotim et tam longe, quod non possint sese altrinsecus super perticam diuerberando pertransire, vt sit ad altam perticam, fieri potest secure nec erit nocuum ipsis falconibus, neque per se ipsos, neque per ligaturas sic distantes, attamen plures sedebunt in vna pertica ligati bini et bini, vt dictum est. Aut igitur ligentur plures ad imam perticam, tantum distantes, quod nullo modo sit eis nocuum, aut sic prope, quod intricatura longarum non incidat ad damnum falconis. Sunt igitur ligaturae tales falconis vnus ad sedile, et vnus aut plurium ad perticas, et hoc modo differunt inter se ligaturae: quomodo autem leuandus est falco de huiusmodi sedibus, accipiatur ex capitulo de ciliatis, quomodo leuantur de sedibus.

### CAPITVLVM LII.

*De inquietationibus et diuerberationibus, quas facit falco ciliatus:  
et de differentiis inter inquietationem et diuerberationem.*

Postquam falco ciliatus positus erit et ligatus ad perticas vel ad sedile, vt stans in aliqua illarum sedium quiescat et dormiat, falconarius debet esse attentus

Q

requi-



requirere et visitare falconem, eo enim, quod falco sentit se captum, cupiens expellere se, aliquando inquietat se, et aliquando diuerberat se. Inquietationem autem dicimus omnem illam defatigationem, quam facit falco non conando recedere ad volandum de loco, super quem sedit. Diuerberare vero dicimus, quando de manu vel sede sua conatur recedere ad volandum. Quod diuerberare, quoniam acrius facit, quando deciliatus est, et periculosius pluribus modis, dicetur, postquam erit falco deciliatus: nunc autem de inquietationibus suis dicamus, ut doceamus praeservare ipsum ab illis, pro eo quod inquietationes possunt causae esse multiplicis laesionis in persona et membris falconis. Inquietat autem falco ciliatus se multipliciter super manum aut sedem suam quamcunque: aliquando enim mordendo iactos et campanellam aut chirothecam portantis; aliquando raspando cum unguibus caput suum, maxime ubi est ciliatura; aliquando circumeundo super locum, ubi stat, unde intorquentur iacti in pedibus suis; aliquando flagellando. Causa autem, quare mordeat iactos, aut campanellam, aut chirothecam, est: cum non fuerit usus habere ligamina huiusmodi in suis pedibus, neque superesse chirothecae, cupit removere ligamina mordendo, ex quo sequitur, quod, dum mordendo trahit iactos, nocet aliquando suis pedibus per strictionem ligaminis, et aliquando mordet digitos suos aut crura, et fatigat se, et accidit, quod rostrum suum immittit quandoque in foramina campanellae, si ampla sint; ut autem non mordeat, anteponatur rostro suo testa vna, aut lignum durum, aut lapis, quando mordere volet, ut per fastidium et per durtiem rei oppositae desinat mordere: foramina campanellae sint ampla tantum, quod rostrum falconis non possit intercipi. Raspat autem, ubi est ciliatura, per duas causas, vna est, quia vult removere ligamen ab oculis, ut possit videre, alia, quia ex ciliatura dolent palpebrae, et, ubi dolor, illic pedes eius, unde accidit, quod immittendo pedem inter caput et ciliaturam, et rumpit ciliaturam, et dilacerat palpebras. Hoc tamen raspare non omnes falcones faciunt. Succurritur autem huic inquietationi hoc modo: ligantur digiti utriusque pedis, qui dicuntur pollices, cum corrigiola, distantes a se invicem, sit autem distantia, quantum est amplitudo trium digitorum, et plus vel minus, secundum quantitatem falconum. Maioribus namque maior distantia convenit, et minoribus minor: hoc modo non poterit erigere pedem usque ad ciliaturam. Intorquet autem iactos suos, quando quaerit mutare locum, et quia ligatus est, non potest recedere, circuit super manum aut super perticam, ex quo circuitu sequitur intortio iactorum, propter quam intortionem constringuntur pedes falconis, et accidet, quod non poterunt stare super pedes, sed cadunt stantes super genua sua, ex hac etiam intortione sequitur inflatio pedum, et aliae laesiones in pennis et membris. Huic autem succurritur in hunc modum: quando percipit falconarius, quod falco ciliatus super manum circuire parat, sic vertat se, quod ex circuitu falconis et ex motu falconarii et brachii falco inveniatur stans super manum ea dispositione, qua convenit, vel ponatur ad sedendum super perticam



ticam imam, aut super sedile, illic enim pro eo, quod ligatur falco longius, non possunt intorqueri iacti, et ipse sentit se magis liberum, quoniam ligatus est longius, vel, si non vult ponere ipsum ad standum super perticam imam, neque super sedile, sed retinere ipsum super manum, et iacti iam sint intorti, cum alia manu distorqueantur iacti, et, si opus erit propter aliquid ponere ipsum super manum, tollat ipsum mordicantem tiratorium, quousque fecerit, quod debet, et postmodum si voluerit falconarius, liget ipsum tunc, sicut prius ligauerat ipsum. Et quoniam non potest assiduus semper esse falconarius in custodiendo falconem, super perticam potest ligare longam ad iactos, mediante tornetto vno, et non poterunt iacti intorqueri, ita tamen curtum sit tornettum inter longam et iactos, quod falco per diuerberationes non possit transire perticam ex aliqua parte sui. Si vero sine tornetto ligabitur, saepius requiratur, nam intortio iactorum causa est, quod falco mordeat iactos, quemadmodum ciliatura causa est, quod falco raspat eas. Flagellat autem alis, quoniam voluntatem habet volandi, et, cum sentiat se ligatum, non attendit diuerberare se, neque dimittere locum, in quo sedet, cuius simile videtur in falconibus iunioribus, priusquam possint volare, siue sint de illis, qui sunt in nido, siue de illis, qui nutriuntur in domibus, ipsi enim non sunt ausi recedere timore cadendi, sed desiderio volandi flagellant alis frequenter, et tamen locum suum non dimittunt, quod volare non possunt. Inde est, quod existimamus hanc esse occasionem flagellandi, et in ipsa eadem flagellatione falco assuefacit alas suas ad volandum, vnde saepe accidit, quod post flagellationem diuerberent se: flagellatio vero non erit periculosa, nisi quando ipsam sequatur diuerberatio. Cum itaque videbit falconarius, quod falco flagellat alis, et timet, ne inde sequi debeat diuerberatio, si falco super perticam aut sedile flagellabit, soluat ipsum, et tollat falconem super manum, nam omnes inquietationes et diuerberationes minus periculosae sunt super manum, quam super perticam aut sedile, quia melius potest succurri. Et si super manum flagellauerit, et postea velit se diuerberare diuerberatione, quae prohibenda sit, inuitandus erit cum vocibus, et si non sufficit, dabitur sibi tiratorium non carnosum aut carnosum: et si per inquietationes calefit, et non cessat inquietare per ea, quae docuimus, oportebit, quod irroretur aqua frigida, aut quod inuitetur ad balneum, secundum modum, quem diximus in capitulis mansuefaciendi ipsum falconem deciliatum.

### CAPITVLVM LIII.

#### *De mansuefactione falconum ciliatorum ad gustum, auditum et tactum.*

**D**ictus modus dandi cibum et abbectiones plures, et assuefaciendi falconem ad suauem tactum cum manibus per rostrum, pectus, alas, caudam et pedes, circa principium faciendus est, per aliquos dies in domo non clara et solitaria,



vsquequo se assuescat comedere, et aliquantulum auide, et iam incipiat mansue-  
 fieri: deinde vero portetur ad domum claram, cuius fenestrae et ianuae sint  
 apertae, et in qua sint multi homines loquentes, et canes, et caetera multa, inter  
 quae debet conuersari, et ad quae audienda debet assuefieri, et debet sibi dari  
 pastus et abbeccationes pluries in die, sicut fiebat in domo obscura et solitaria;  
 tangatur etiam suauis tactu, dum pascitur aut mordicat, vt melius assuescat se tangi,  
 et pluribus diebus fiat hoc. Postquam vero iam comedit secure, vnaquaque vice,  
 dum pascitur, debet assuefieri ad sonos diuersos et tumultus, qui consueuerunt fieri  
 inter homines, vt assuetus eis, quoties illos audierit, non pauescat, et debet depor-  
 tari per diuersa loca domus die et nocte, vt assuefiat melius ad audiendum diuersa,  
 et firmiter stare super manum. Hic autem modus habendus est circa falconem,  
 donec cognoscatur bene assuetus ad sustinendum portari super manum, tangi, et  
 audius comedere, quam prius, et audire securius sonos et tumultus diuersos. Pa-  
 tet igitur, quomodo assuefaciendus est falco ad gustum, scilicet vt cibum affectet  
 accipere de manu hominis, quod non consueuerat, et per gustum ad permitten-  
 dum se tangi ab his, a quibus non consueuerat tangi, sed potius horrebat tangi ab  
 eis, et per gustum et tactum ad audiendum sine timore, quae prius audire timebat,  
 et ad haec omnia assuefit prius, quam decilietur et quam permittatur videre in-  
 sueta sibi, nec esset facile assuefacere ipsum ad omnes sensus sine laesione. Hoc  
 vero irrationabiliter quaeritur, scilicet quod, sicut fuit necessarium ciliare falco-  
 nem, ne videat horrenda et insueta sibi, et pro illis visis se inquietet aut distrahat,  
 sic fuisset vtile obturare aures falconis, vt non pauesceret ad audienda horrenda sibi,  
 quae non consueuerit audire, et propter quae audita pauescit et inquietatur. Ad  
 quod respondendum est, quod falco assuefit ad tolerandum obiecta caeterorum sen-  
 suum, insueta prius sibi, et quoniam in dando sibi cibum iuuat proferre sibi sonos  
 blandientes et allicientes, quos quoties audierit, recordetur facilius et inuitetur ad  
 gustandum cibum, oportuit, quod haberet aures apertas et non obturatas, vt audiret  
 huiusmodi sonos. Amplius magis erat consuetus audire voces hominum et alio-  
 rum, quam videre facies hominum aut interiora domorum, et quam tangi ab aliqui-  
 bus insuetis, et tangere insueta, omnia enim volentia tangere ipsum horrebat et ti-  
 mebat, credens ei nociua plumis et pennis, nec non et suis membris. Amplius ea,  
 quae audiebat, non dabant sibi tantam discretionem rerum nociuarum, quantam da-  
 bant, quae videbat, nec timebat tantum ea, quorum sonos audiebat, quantum tangen-  
 tia ipsum et ea, quae videbat. Et melius cognoscuntur per visum non esse placabi-  
 lia, quam per auditum. Haec ergo mansuefactio facienda falconi, dum est ciliatus,  
 sufficit, vt ad tres sensus faciliores primus mansuefiat, scilicet auditus, gustus et tactus.

### REX.

Amplius intentio falconarii debet esse assuefacere falconem, vt vtatur sine  
 horribilitate sua omnibus sensibus suis secum, ad quod faciendum oportet, quod  
 auferat



auferat sibi sensum, per quem magis horret ea, quibus non est vsus, scilicet visum, et dimittat sensus, per quos minus horret ea, quae sentit, scilicet auditum et tactum, quia, licet per hos sensus aliqua horreat, sapor tamen gustus adeo delectabilis est, quod ipsos mansuefacit, quod de visu non accidit, cum maiorem horribilitatem reportet ex visu eorum, quae videt, quam per delectationem ex gustu. Et amplius, si clauderentur ipsi aures, esset indomesticus, quando aperirentur sibi aures, sicut priusquam audiret ea, quae non consueuerat audire. Et sic falconarius amisisset intentionem suam mansuefaciendi ipsum falconem.

### CAPITVLVM LIV.

*De mansuefactione falconum ad visum, quando paulatim deciliari incipiunt.*

**D**iximus, quomodo mansuefaciendus est falco ciliatus ad gustum, tactum et auditum: dicamus, quomodo mansuefaciendus est ad visum. Paulatim autem mansuefaciendus est ad visum, sicut ad alios sensus paulatim mansuefactus est, et tanto indiget amplius paulatim mansuefieri ad visum, quanto magis horribile est ei videre insueta, quam gustare, tangere, vel audire. Paulatim vero mansuefiet ad videndum insueta, si paulatim deciliabitur, non repente: nam si repente deciliaretur totaliter, non solum non mansuefieret ad videndum insueta, sed potius ad caetera, in quibus iam erat mansuefactus, magis insuetus fieret, et magis agrestis, aut si contingeret, quod mansuetus fieret sine ciliatura aut cum deciliatura subita, non eueniret hoc ex arte, nec ex consuetudine, sed falco fatigationibus et conaminibus suis esset deuictus potius quam mansuefactus, quod non posset accidere sine laesione sui tanta, quod vix vnquam posset redire ad fortitudinem suam: ideo oportet primitus relaxare paulatim ciliaturam, et non simul ex toto deciliare. Relaxetur autem ciliatura vsque ad medietatem oculorum hoc modo: apprehendatur per spatulas et tenebitur falco, sicut tenebatur, quando ciliabatur, si palpebrarum foramina, in quibus est filum, non sint desuper putrefacta aut corrosa in tantum, quod non possit timeri de arruptione foraminum, vsque ad tempus, quo ex toto debet deciliari, dissoluatur nodus concipiens duo extrema fili super caput falconis, et iterum fiat nodus, ita tamen, quod ambae palpebrae, quas detinet filum, descendant vsque ad medietatem oculorum, et reapten- tur plumae super nodum ipsum, vt fiebat, quando ciliabatur, sed si foramina palpebrarum adeo sunt corrosa et desuper putrefacta, quod non possint durare vsque ad tempus id, in quo debet deciliari, filum dissoluendum aut scindendum est, et ex toto a palpebris auferendum, et alia duo foramina propinqua primis erunt facienda et operanda cum acu et filo, sicut in ciliando: tamen palpebrae non sunt eleuandae, nisi vsque ad medietatem oculorum. De nocte vero, aut in domo non clara, in qua domo non sint multi homines, relaxanda est ciliatura,



quae iuuabit in eo, quod falco non videbit manifeste hominem, qui portat ipsum, nec faciem eius, nec caetera insueta videri, et quia non videbit ea manifeste, minus pauescet pro eis, et paulatim et gradatim assuefiat videre ea, quamuis non clare, et quia paulatim et gradatim vertetur in quandam consuetudinem et naturam alteram, in hoc modo deciliationis incipiet melius assuefieri videre hominem et faciem hominis et motus manuum, tam ad non tangendum falconem, quam ad tangendum, et proinde facilius tolerabit se tangi, et praeuidens in sursum claritatem luminis diuerberabit se ad superius et non ad deorsum, cum non videat submissa sibi, et propter hoc assuefiat ad meliorem diuerberationem, de quibus dicetur infra, et addiscet stare erectus super manum per hoc, quod videbit et prospiciet ad altum. Relaxata itaque ciliatura, ut dictum est, et reposito falcone ad standum super manum, portandus erit falco huc et illuc per domum, per diem et noctem, priusquam ponatur ad standum in sede sua, et passus suus diuisus in plures partes dandus erit sibi pluribus vicibus, vnaquaque vice particula vna, et pluries abbecandus erit cum tiratorio, et tangendus erit suauiter, et assuefaciendus ad sonos diuersos, quos audiet, et caetera omnia erunt facienda per aliquot dies, sicut fiebant ei, quando erat ciliatus. Hoc facto per aliquot dies, transmutari poterit de non clara domo ad domum aliquantulum claram, ubi sint homines, et in illa domo aliquantulum clara tenendus est per aliquot dies et assuefaciendus, et de domo aliquantulum clara transmutandus erit ad magis claram, faciendo similiter, augmentato enim lumine paulatim, ut ipse paulatim incipiat assuefieri ad lumen et ad videndum caliginosa et homines et ea, quae sunt in domibus, et ad audiendum et ad permittendum se tangi suauiter. Quod autem diximus, per aliquot dies debere fieri circa falconem, intelligendum est hoc modo: si falco est agrestis valde, et ideo tardius recipiens assuefactionem, omnia, quae diximus, erunt facienda circa ipsum per plures dies: si vero minus agrestis, et ideo citius recipiens assuefactionem, per pauciores. Quando autem videbitur, quod falco semideciliatus iam non timet in domo non clara, nec in claritate esse, cum homine portari, et videre ea, quae sunt in domibus, quamuis non manifeste videat, oportet, quod semideciliatus assuefiat portari extra domum ad aërem liberum, primo a falconario pedestri, deinde ab equestri, fiet autem hoc modo: falconarius quando debet portare falconem semideciliatum extra domum pedester, surgat ante diem, et assumet falconem de sede sua super manum suam, et in transiendo per portam domus habebit illam diligentiam, quam dicemus infra, et morando deforis, et redeundo, postquam autem hoc erit factum per aliquot dies, portandus erit similiter extra domum ab equestri, et surgat similiter falconarius ante diem, et assumet falconem, et exhibet de domo, et ascendet equum, et portabit foras, primo prope et parum morando deforis, redire namque debet, postquam lumen diei aduenerit, alia vice longius, et morando plus deforis, cum lumine diei erit redeundus. Qualiter autem cauendum sit falconi in ascensu super equum,



equum, aut in descensu, dicetur, quando deportabitur foras deciliatus, semideciliatus enim non inquietat se tantum, neque diuerberat se tam acriter, neque motus sui sunt tam agrestes, quando semideciliatus est, cum non videat plene, quemadmodum quando plene est deciliatus. Quando autem falconario placuerit ponere falconem semideciliatum ad sedendum super aliquam de sedibus dictis, super altam perticam ponet ipsum: haec enim est magis conueniens ipsi, quam ima, aut quam sedile, pro eo enim, quod videt, quamuis non plene, magis timeret et diuerberaret se magis pro approximantibus ad ipsum, si esset in sedibus imis. Et iterum, quoniam videret, forsitan non sustineret esse quietus interim, dum ligaretur ad quamcunque de sedibus, ideo, dum ligatur, falconarius debet dare ei tiratorium, et postquam ligatura ad perticam vel ad sedile facta erit, auferet tiratorium ab eo, et facie falconis et pectore anteposito sedi, ponet ipsum ad sedendum, falco enim, qui iam videt et discernit sedem, libentius recedit de manu falconarii ad sedendum in sede, quam videt. De caeteris vero omnibus, quae conuenit fieri in ligando vnum vel plures simul, faciet, vt dictum est de ciliatis. In defectu autem perticae altae, poterit poni ad sedendum ad imam perticam aut ad sedile, scilicet cum longitudine longarum etc., cum maxima tamen diligentia custodiendus est et requirendus saepe, dum est in sedibus dictis. Qualiter autem suis inquietationibus succurri debeat, dictum est in capitulo praecedenti. Propter quas autem causas se diuerberat, et quomodo prohiberi debeat, ne se diuerberet, et quomodo succurri debeat diuerbationibus, quas fecerit, dicetur in capitulis de mansuefactione falconis totaliter deciliati. Et quomodo leuandus est de sedibus huiusmodi falco semideciliatus, haberi potest ex eisdem capitulis.

### CAPITVLVM LV.

*De mansuefactione falconum totaliter deciliatorum, qualiter deciliantur, et quo tempore, et de ipsorum inquietationibus.*

Postquam erit assuefactus in domo super manum pedestris semideciliatus, et extra domum super manum pedestris et equestris, assuefaciendus erit ad hoc, quod videat manifeste, et poterit ex toto deciliari. Illa autem die, quando debet deciliari totaliter, non est dandus sibi totus pastus mane, sed reseruandum erit aliquid de ipso, quod dabitur falconi nocte, statim cum erit deciliatus, sed tamen de aliis carnibus recentibus, vt tunc compleatur sibi pastus suus, priusquam deciliatus ponatur ad sedendum. Per diem autem non est deciliandus, quoniam per claritatem diei discernet euidenter et repente facies hominis et caetera, quae nondum videre consueuerat manifeste, et timeret valde, ex quo timore inquietaret se, et magno conamine niteretur euadere, ex quo conamine accederet sibi fatigatio et morbus, ex quibus cum accederet, abhorreret magis hominem credens, quod per eum haec mala sibi accidissent, et facile rediret ad suam pristinam agresti-



agressitatem, et multo tardius posset deinde mansuescieri. Per noctem vero deciliabitur multo conuenientius, quoniam tum propter obscuritatem noctis, tum propter palpebras, quae non poterant descendere subito et repente post deciliationem, cum diu steterint eleuatae, non poterit videre manifeste nec faciem hominis, nec caetera circumstantia, unde timere possit, sed videbit ea sub quadam caligine, vt consueuerat, et assecurabit se paulatim ad videndum ea. Nocte igitur deciliabitur conuenienter, tamen decet adesse lumen, quando deciliabitur, vt videatur, quomodo deciliandus est. Quando vero debet deciliari, fiet hoc modo: capiat falco et teneatur cum ambabus manibus, sicut fiebat, quando ciliabatur, et tunc dissoluatur nodus fili, aut ipsum filum scindatur, et totaliter ab vtraque palpebra remoueatur, remoto autem filo totaliter, falcone sic deciliato, statim remoueatur lumen, quousque positus sit ad standum iterum super manum, ad hoc autem remouetur lumen, ne statim, cum deciliatus est, repente videatur, unde timere possit, et diuerberare se, aut aliter inquietare, tunc enim, cum per detentionem et per deciliationem conturbatus fuerit, et ad suam aggressitatem quodammodo redierit, facile posset timere et inquietare se ad repentinum visum hominis et aliorum. Falcone vero posito ad standum super manum, statim proferantur ei soni consueti proferri, quando comedebat, et detur sibi id, quod reseruatum erat de suo pastu, vel tantum de aliis bonis carnibus, et quando videbitur, quod comederit libenter, poterit reaptari lumen, sed non tam clarum, vt prius fuit, in domo paulatim namque augmentandum lumen est, vt paulatim assecuret se ipsum ad visionem manifestam hominis et aliarum rerum, quae sunt in domo, lumen autem conuenienter esse potest in domo per noctem, vbi falco deciliatus est, vt per claritatem nocturnam discernat, et quoquo modo videat domum, et ea, quae sunt in ea, per visionem enim nocturnam, quam habebit circa haec, veniente mane, facilius recordabitur visorum in nocte, et si non vidisset ea de nocte, non esset tantum assuetus ad eadem in crastinum, imo potius recordaretur eorum, quae viderat, dum esset siluester in campis, ante scilicet, quam captus esset et ciliatus, quoniam illa longo tempore vidit, et traderet obliuioni ea, quae parum vidisset. Nocte autem, qua deciliatus est, falconarius debet vigilare plus aliis noctibus praeteritis, tenendo et deportando ipsum per domum huc et illuc, priusquam ponatur ad quiescendum per noctem in sede sua, vt, quemadmodum palpebrae paulatim descenderent, sic falco gradatim et paulatim assuescat videre faciem hominis et caetera, quae sunt in domo, et non repente videat diurna, et vigilatio proderit ad continuandam visionem nocturnam falconis visioni diurnae ipsius circa ea, quae sunt in domo. Et si contingat, quod, dum tenetur et deportatur per domum nocte, propter timorem, quem habebit de aliquo viso, se velit diuerberare aut aliter inquietare, falconarius percipiens hoc proferat sonos consuetos inuitando ipsum ad id, quod vocamus tiratorium, et detur ei tiratorium, vt attendens sonis et gustans de tiratorio brancet manum strictius, et obliuiscatur causae timoris: oblita  
vero



vero causa timoris, et ipso eodem iam nolente se inquietare, auferatur ab eo tiratorium, vt non fastidiat se de ipso. Et his omnibus factis per ordinem circa ipsum deciliatum cum vigiliis nocturnis, ponendus erit ad quiescendum per noctem in sede sua vsque mane, et tunc ante diem erit resumendus de sede super manum. Sed cum id, quod dicitur tiratorium, in mansuefactione falconis magnam vtilitatem gerat, praecipue in illa, quae fit sine capello, nullum enim aliud est, quod possit esse medium faciens falconem diligere falconarium, nisi hoc, videamus, quid est tiratorium, quot modis est, et ad quae est vtile. Est enim tiratorium quodcunque membrum auis aut alterius animalis, dandum falconi ad mordicandum in eo, ne inquietet se falco propter timorem aut aliam causam. Et est duplex tiratorium, vnum carnosum, quod debet esse recens et de bonis carnibus, vt de coxa, ala, collo, vel alio membro quocunque gallinae, aut alterius auis, aut de carne alicuius quadrupedis conuenientis: si enim erit de bonis carnibus, falco libentius et auidius mordicabit et gustabit de ipso, et saporando dulcedinem et bonitatem carnum affectabit et assuescet, et per hoc dimittet voluntatem inquietandi se. Aliud est non carnosum, quod debet esse ossuosum et neruosum, et munitum plumis aut pennis, quod datur falconi potius ad impediendum falconem circa ipsum et ad deplumandum in ipso potius, quam ad gustandum vel comedendum, et ad purgandum caput malis humoribus, vt patebit in tractatu morborum. Est autem tiratorium vtile ad multa, videlicet ad faciendum velle obliuisci et dimittere suas inquietationes, et diligere magis hominem, et assuescere cum ipso, et ad sustinendum videre insueta sibi, et ad multa alia, quae patent in mansuefaciendo. Falconarius itaque habeat semper tiratorium in manu, in qua non portat falconem, vel secum in carneria sua, aut in alio loco, a quo possit haberi cito, et non ostendat tiratorium falconi, nisi quoties viderit esse opus: cum autem videtur esse opus, dari debet tiratorium hoc modo: inuitabitur prius cum sonis cognitis et consuetis ad tiratorium, nec debet aspicere ad faciem falconis, dum est in sua agrestitate, nec antequam det tiratorium, nec quando dat: dando autem, cum alia manu ponet ipsum ante pedes falconis, retinendo ipsum cum vna manu, vel cum duabus, vt fiebat in pascendo falconem. Postquam autem datum erit tiratorium, et ipse erit attentus in gustando aliquid de tiratorio, poterit falconarius aspicere ad ipsum, vt videat, quae erunt facienda circa ipsum, et facere illa, dum gustabit tiratorium. Dimittendum autem erit tiratorium falconi, quousque causa timoris transeat, et eam obliuiscatur, tunc enim auferendum erit ab eo, nec permittendum erit, quod se satiet de tiratorio, quoniam alia vice postea, si opus esset tiratorio, nollet ipsum. Assuefacere autem falconem ad vsum tiratorii prodest in hoc, quod, quoties videbit aliquam causam timoris, poterit remoueri ab eo ille timor per tiratorium, et si non haberet vsum tiratorii, cum adesset aliqua causa timoris, non dimitteret per tiratorium suas inquietationes, et si male accideret sibi ex inquietationibus suis, alia vice minus



libenter aut nullo modo vellet tiratorium, quod esset valde contrarium mansuefactioni suae, cum non posset haberi aliquid aliud, per quod falco posset induci ad desinendum velle se inquietare, excepto capello, de quo suo loco dicetur. In dando autem tiratorium, aut antequam detur, aut postquam datum est, proderit, si remoueatur causa illa, de qua timet falco, aut propter quam se vult inquietare: nam si non remoueretur, accidere posset, etiam dum gustat tiratorium, quod ex nimio timore dimitteret tiratorium, et assumeret hoc in usum, quotiens timeret, vel ex toto nolle, vel dimittere ipsum, et sic difficilius posset mansuescere. Haec de tiratorio dicta sufficiant. Item dando carnes falconi, aut tiratorium, porrigantur ei ab alto, et prope faciem dantis, ut assuescat ad faciem hominis. Nocte etiam illa, qua primo deciliatus est, non est permittendus falco stare super sedem suam usque ad lumen diei sequentis, sed falconarius surgat ante diem et tollat falconem de sede sua, et resumat super manum ante diem; visio enim falconis nocturna per hoc continuabitur visioni diurnae, et quanto plus descendent palpebrae et lumen diei adueniet, ipse falco tanto amplius assecurabit se ad videndum hominem et caetera, propter hoc etiam tunc non portandus ad lumen diei clarum subito, sed per domum non claram portetur, in qua domo lumen diei proportionaliter respondeat lumini noctis, quod fiebat cum lucerna, et paulatim augmentetur lumen diei, non repente de obscuro in clarum, ideo secundum quod falco erit magis agrestis, per minus claram domum deportandus erit, et secundum quod minus agrestis, per magis claram. Sed quoniam falco, qui nouiter deciliatus est, veniente claritate diei manifeste videt faciem hominis portantis ipsum et alia, quae sunt in domo, euidentius discernit, quoniam palpebrae iam descenderunt, et naturam habet dimouendi se in die et quiescendi in nocte, accidit, ut in die longe magis inquietet se et diuerberet, quam in nocte, videt enim clare insueta sibi et horribilia, de quibus timet, et a quibus naturaliter appetit fugere.

## CAPITVLVM LVI.

### *De diuerberationibus ipsorum, et de diuerberationum modis.*

**D**iximus prius differentiam, quam facimus inter inquietare et diuerberare, et modos inquietationum, et quid sit faciendum contra inquietationes: restat, ut dicamus nunc de diuerberationibus falconis, quas acrius et periculosius et pluribus modis falco deciliatus facit, quam ciliatus aut semideciliatus faceret. Has autem facit omnis falco aliquando in domo super manum, et aliquando super perticam aut sedile, et aliquando super manum equestris. In dicendo autem de ipsis, dicemus prius omnes modos diuerberationum, et quae deteriores sunt, et quomodo assuescit falco ad minus malas, et quomodo retrahitur ad manum de iam factis, causasque dicemus, propter quas diuerberat se falco, et signa vniuscuiusque causae, et quomodo subueniri potest diuerberationibus suis, priusquam fiunt, aut eisdem, postquam



postquam iam factae sunt, nisi enim prohiberetur a suis diuerberationibus, tantum defatigaret se et debilitaret, et pennas suas deuastaret, quod inutilis fieret ad faciendum ea, quae post mansuefactionem volumus ipsum facere. Diuerberare vero dicimus esse, quando falco ligatus de manu vel de sede sua conatur recedere ad volandum, hoc facit pluries in domo super manum deciliatus, dum scilicet durat agrestitas et immanuetudo sua. Modi autem diuerberationum super manum sunt tales: falco stans super manum et videns, quare se debeat diuerberare, diuerberat se quandoque versus faciem hominis portantis ipsum, et talis sua diuerberatio est ad sursum, cum intendit transire super caput hominis, et hanc diuerberationem raro facit in principio agrestitatis suae, quoniam timet tunc faciem, sed eam facit saepius, quando assuefactus est ad faciem; quandoque vero diuerberat se in longitudine brachii versus humerum; quandoque diuerberat se recedendo a facie portantis in longitudine manus, extra manum scilicet. Et haec diuerberatio tribus modis esse potest, in sursum scilicet, aut deorsum, aut inter vtrumque. Quandoque vero diuerberat se de manu, super quam est, versus aliam, aut de sinistra versus dextram, aut e conuerso, hoc autem est de vno latere falconarii ad aliud, et est tribus modis, in sursum, in deorsum et inter vtrumque. Quandoque vero diuerberat se falco ad posteriora manus, et hoc similiter tribus modis, in sursum, deorsum et inter vtrumque. Hi sunt omnes modi diuerberationum, quas facere poterit falco super manum. Sed quoniam horum quidam sunt deteriores aliis, videndum est, quis modus diuerberandi minus malus est caeteris, vt, cum non possit omnino prohiberi falco a diuerberatione, assuefiat et doceatur saltem ad minus malam diuerberationem. Prima itaque diuerberatio, quae est versus faciem falconarii, minus est mala caeteris, quoniam est ad altum, et ex ea retrahitur falco facilius et citius ad manum; cum enim falco ponderosus sit, et omne ponderosum, quando est in alto, naturaliter petit deorsum, facilius descendit falco ad manum, quae substat sibi; amplius ex hac diuerberatione ad altum non potest falco habere laesionem in persona aut pennis, neque multam defatigationem. Diuerberatio vero, quae est de vno latere ad aliud, siue de vna manu versus aliam, peior est, quam praedicta, in eo, quod potest esse pluribus modis, quam praedicta, et in eo, quod, si falco consuetus esset solum portari super vnam manum, quando transmutaretur ad aliam manum, illam diuerberationem, quam consuevit facere ad aliud latus, faceret ad posteriora manus, super quam mutatus est, et esset difficilior ad retrahendum super manum, reuerso enim modo et per maiorem circuitum oportet ipsum redire; sed in eo, quod manus ipsa portans ex ea diuerberatione retrahet falconem ad standum super se, et facilius et citius, minus mala est caeteris. Diuerberatio etiam illa, quae est per longitudinem brachii versus humerum, in eo mala est, quod cauda falconis alliditur manui, in loco scilicet, in quo digitus index replicatur super pollicem, ex quo nocet caudae, falco enim in hac diuerberatione submittit sibi facile caudam suam, et quando retrahitur ad stan-



dum super manum, et quando diuerberat se, vnde cauda intercepta inter manum et falconem de facili laeditur. Diuerberatio autem, quae est per longitudinem manus ad extrinseca, mala est in eo, quod pluribus modis fieri potest, et in eo, quod falconem oportet facere quendam circuitum et quandam regyrationem sui ad hoc, vt redeat, ab interiori enim parte manus in quacunque diuerberatione retrahendus est ad standum super manum, quemadmodum stare debet super eam et conuenit. Illa vero diuerberatio, quae est ad posteriora manus, in eo, quod pluribus modis est, mala est, et in eo, quod falconem oportet facere maiorem circuitum et regyrationem sui ad hoc, quod redeat ab anteriori parte manus ad standum super eam, quemadmodum stare debet super manum et conuenit. Maior autem circuitus et maior regyratio pro eo, quod maius spatium obtinet, maius tempus requirit, antequam falco retrahi possit ad standum super manum eo modo, quo debet, et ex hoc ipso mala est, quod tardius retrahitur falco ad sedem manus, falconarius enim, quam citius potest, retrahere debet falconem de quacunque diuerberatione ad standum super manum. Quando enim tardat reducere falconem ad manum, falco pendet, et quanto plus pendet, plus nocet ei: inde est, quod haec diuerberatio, quae est ad posteriora manus, peior est omnibus. De modis vero diuerberationum tribus, vno sursum, alio deorsum, alio inter vtrumque, ad quamcunque partem manus sint, ille modus, qui est sursum, minus malus est aliis duobus in eo, quod ab alto facilius retrahitur falco super manum. Ille vero, qui est deorsum, peior est aliis duobus, quoniam falco pendet, et cum grauis sit, et grauia naturaliter tendant deorsum, et per violentiam sursum, laboriosius et difficilius est retrahere falconem de tali diuerberatione ad superiora manus, vt stet super manum, sicut debet. Ille vero modus, qui est inter vtrumque, minus malus est illo, qui est deorsum, cum falco non pendeat, sicut in illo, et cum possit facilius retrahi ad manum, quam in illo, sed deterior est illo, qui est sursum, et cum sit inter minus malum et peiorem, non est tam malus, vt peior, nec est tam laudabilis, vt minus malus. Ex praedictis patet, quod diuerberatio falconis ad posteriora manus deterior est caeteris, vnde illa, quae in eandem partem manus fit deorsum, peior est peioribus. Cum autem falco, qui vi detentus est super manum aut super sedem suam, non diu possit stare, quin se diuerberet, praecipue dum durat eius immansuetudo, expedit, vt saltem ad meliorem diuerberationem assuefiat, erit enim iuuamentum hoc in eo, quod a deterioribus abstinebit, et in hoc, quod ad minus malam assuefiat, quae est diuerberare sursum, assuetus enim diuerberare sursum non laeditur tantum. Assuefit autem ad diuerberationem versus faciem hominis, scilicet falconarii, multipliciter: vno modo, vt, quoties falconarius vult, quod falco mordicet seu abbeccet, ostendat ei carnes ab alto ante faciem falconarii, vt falco conuolet desiderio comedendi, et se diuerberet ad altum, vbi sint carnes: alio modo, vt, quoties volet falconarius ponere falconem ad sedendum super perticam altam, ponat tergum suum a parte perticae, inter  
perticam



perticam scilicet et falconem, et replicet manum suam, in qua portat falconem, ad anterius pectoris tantum, quod falco videns perticam et affectans volare in eam, diuerberet se illic: sic enim assuescet diuerberare se versus faciem falconarii. Hoc autem modo faciet falconarius, si pertica erit altior capite suo: si vero non erit altior capite suo, humiliet se falconarius tantum, quod pertica super sit capiti suo. Ex hoc assuescet diuerberare ad altum et videre faciem hominis. Hoc autem faciat falconarius frequenter in die, non tamen toties, quod cedat ad superfluum laborem falconis. Alio autem modo docebitur falco diuerberare se versus faciem hominis. Quando enim falco stans super manum in domo, aspicit ad fenestras domus et ad caetera loca domus luminosa, falconarius vertat dorsum suum ad illa loca, ex hoc namque accidet, quod se diuerberabit ad illa loca ad faciem hominis, et sursum se diuerberabit, in quo assuescet meliorem diuerberationem. In istis vero tribus modis falconis diuerberantis se falconarius consentiat falconi, cum manu sua sequendo ipsum, nam si rigidam tenet manum, noceret renibus et coxis falconis. Alio modo docetur etiam falco diuerberare se ad altum, hoc modo: si plures sunt fenestrae in domo, obturentur omnes praeter vnam, et illa vna sit opposita perticae vel sedi, quibus alligandus est falco, et sit illa fenestra altior, quam pertica vel sedes. Statuenda est ergo pertica vel sedes in tali loco domus, quod opponatur lumini alto, sic enim falco perticae alligatus seu sedi, capite suo existente versus illud lumen, desiderans exire ad aërem liberum, libentius se diuerberabit ad illud lumen, et esto, quod se non diuerberet, stabit erectus super pedes suos, sic enim faciendo falco dimittet alias diuerberationes malas, et assuescet bonas, unde istae diuerberationes bonae, quas assuescet, vertentur per consuetudinem in quandam naturam, et ex hac consuetudine amabit diuerberare se ad altum. In caeteris suis omnibus diuerberationibus, huiusmodi diuerberare minus est nocuum ei. Quando vero diuerberat se in longitudine brachii versus humerum, falconarius sic plicet brachium, et manum ad faciem suam sic vertat, quod oporteat falconem vertere se versus faciem, et tunc retrahendus erit cito ad manum, super quam stabat, quemadmodum, quando diuerberabat se versus faciem. Et quando diuerberat se per longitudinem manus, extra manum, falconarius vertat se, et manum suam retrahat taliter, quod per gyramentum suum falconem oporteat esse versus aliud latus falconarii, et tunc cito retrahat falconem ad manum, quemadmodum in diuerberatione fit, quae est de vno latere ad aliud. Si autem falco se diuerberat versus aliud latus, ut minus noceat ei, falconarius debet assentire falconi cum manu, portando ipsum, quam manum lassam et assentientem falconi teneat, non rigidam, quod etiam prodest in omni diuerberatione, postea debet retrahere manum eandem suauiter et cito in loco, in quo primo erat, dum portabat falconem, et si falco diuerberauerit se ad altum, faciet hoc modo: assentiet cum manu, et post retinebit eam, quoniam in retrahendo falcone falco descendet facilius. Sed si diuerberauerit se falco inter sursum et deorsum, oportebit



tebit, vt declinet manum: nam falco conuenientius retrahetur ad manum, si suberit pedibus suis; et si diuerberauerit se in deorsum, primo consentiet ei cum manu, et deinde aliquantulum eleuet manum, vt cum adiutorio ipsius manus subleuantis et attrahentis falconem melius et altius se releuet, et postquam se releuauerit, humilietur in tantum manus, quod sublit falconi, falco enim rediens ad sursum, ad deorsum conuenientius semper redit super manum. Quod autem dictum est de consentiendo falconi cum manu, et de submittendo manum eandem, de eleuando, vbi expedit, et de retrahendo falconem, falconarius sine mora faciet, et quam citius poterit, mora enim in talibus trahit ad se periculum. Contra illud vero, quod dictum erat, si consuetus esset portari in vna manu et altera, iuuat assuescere portare falconem super vtramque manum, quoniam addiscet facere diuerberationes de vtraque manu ad aliud latus, et non ad posteriora manus. Quando vero falco diuerberabit se ad posteriora manus, oportebit falconarium gyrare se tantum et manum suam, quod falco veniat ad retractionem sui super manum, eo modo et ea dispositione, sicut quando se diuerberat de manu ad aliud latus, retrahendo falconem ad manum, sicut retrahendus est. Iam igitur dicti sunt modi diuerberationum, quas facit falco super manum in domo, et qui minus mali sunt, et qui deteriores, et quomodo assuescit falco ad minus malas, et quomodo retrahi debet ad manum de vnaquaque diuerberatione.

## CAPITVLVM LVII.

### *De diuerberationum causis.*

Causae vero, propter quas falco nouiter deciliatus diuerberat se super manum in domo, ad quod diuerberare inducitur propter agrestitatem suam, sunt multae: aliae enim causae sunt propter falconarium portantem ipsum, et propter ea, quae videt in ipso: aliae vero propter multa alia, quae videt, et non sunt in falconario, vnde cum necessario habeat diuerberare et aliter inquietare se, propter hominem portantem ipsum, pro eo, quod impossibile est ipsum non esse cum ipso, cum mansuefiat ab eo, sed propter alia non habeat necessario diuerberare se, cum falconarius possit procurare, quod aliqua non approximent falconi, oportet, vt dicamus primo de illis, quas facit propter hominem et propter ea, quae sunt in homine: cum enim falco erit assuetus in illis, facile poterit postea per hominem mansuefieri ad alia, et nimis esset difficile mansuefacere ipsum finiul ad omnes causas diuerberationis. Has vero diuerberationes dicendas intelligere oportet in falcone capto syluestri seu ramagio, quoniam plures sunt et periculosiores in ramagio: in nidasio vero paucae sunt et minus periculosae, si tamen nidasius faciat aliquas diuerberationes, subuenitur ei, quomodo et ramagio. Falco itaque captus agrestis seu ramagius, propter agrestitatem suam, et propter timorem, quem habet, statim quod deciliatus est, praesertim veniente lumine diei, videt in ho-

mine



mine multa, propter quae inquietat se et diuerberat, et conatur diffugere. De his autem est tota persona hominis portantis et tenentis ipsum, quam non consuevit manifeste videre, et multo magis facies hominis, quae facies namque humana terribilis est falconibus, sicut et aliis animalibus, vnde illud: facies hominis facies leonis, propterea deciliatus recordatur illius temporis, quo captus fuit syluester ab homine, qui tunc videns faciem hominis perterritus fuit ex ea, propter hoc ad faciem hominis magis timet, tanquam insuetam sibi et horridam: de persona vero hominis magis timent et inquietant se illi falcones, quorum ciliatura non paulatim, sed repente remouetur simul totaliter, et longe magis illi falcones, qui sine ciliatura penitus et sine capello mansuescunt, quem modum iam reprobauimus. Rursum de his, quae in homine videt, sunt motus manuum ad tangendum falconem in aliqua parte sui, et alius motus manuum, qui fit non ad tangendum falconem, sicut ille gestus manuum, qui a quibusdam consuevit fieri loquendo, aut indicando, aut alia circa hominem faciendo, et motus totius personae ad sedendum, vel inclinandum, vel surgendum, vel gyrandum dextrorsum, sinistrorsum, vel ad eundum, et tussire, et sternutare contra falconem, et ambulare duriter cum strepitu pedum, sunt de causis in homine, propter quas falco super manum in domo circa principium deciliationis diuerberat aut aliter inquietat se.

### CAPITVLVM LVIII.

#### *De diuerbationum signis.*

**S**igna autem, per quae discernere poterit falconarius vnamquamque causam per se similiter, haec sunt: quando falco aperit rostrum, extrahit linguam cum quodam sonitu et sufflatu, plumas, quae sunt circa fauces in ceruice, collo aliisque partibus corporis, horripilat, et aliquando proiicit voces timorosas, et aperit alas et caudam, et respiciendo faciem hominis et personam quaerit diffugere, et hoc modo se diuerberat, quod stans desuper manum deiicit se de manu retrorsum, et cum reducitur ad manum, quaerit iterum diffugere retrorsum. Aliquando etiam se diuerberat isto alio modo, quod deiicit se extra manum et per longum manus, et tunc sciri potest, quod non hoc facit nisi propter personam hominis, et magis propter faciem, a quibus tanquam agrestis et timidus diffugere conatur. Propter motus vero manus, quando videbit ipsam, aperit rostrum, et facit caetera, quae faciebat propter faciem hominis, quamuis non tam fortia, et eo modo diuerberat se, sicut propter faciem. Sed quando tangitur a manu in aliqua parte sui, et non praeuidet motum manus tangentis ipsum, si plumas tenuerit lassas, dstringet eas ad se, et, si constrictas ad se tenuerit, magis constringet eas, et subleuat alas, et respicit manum tangentem ipsum, qua visa, stans super manum, ut debet, diuerberat se ad fugiendum, vnde venit tactus, timens tam de motu manus, quam de tactu. Motus autem si adfuerit repentinus in tota persona falconarii,



narii, aut si tussierit aut sternutauerit contra falconem, aut ambulatio dura et cum strepitu adfuerit in falconario, accidit, quod falco attendit ad faciendum aliqua de signis praedictis, sed statim eo modo, quo stat super manum, diuerberat se ad fugiendum de manu. Quando tamen tussitur aut sternutatur contra falconem, statim retrorsum, aut per longum manus se diuerberat, non enim contra causas aduenientes, sed ab eis fugiendo recedit.

## CAPITVLVM LIX.

### *De occurrendo inquietationibus et diuerbationibus.*

**D**ictis causis, modis et signis diuerbationum, quas falco facit in primo deciliationis propter ea, quae videt in homine, de quibus timet: dicatur, quomodo debeat occurri sibi contra huiusmodi inquietationes et diuerbationes, priusquam fiunt, et impediri, ne fiant, et quomodo debet subueniri falconi, postquam factae sunt, ut non iterum faciat, neque facere assuescat. Cum igitur falconarius cognoscat per signa dicta, quod falco propter personam hominis et maxime propter faciem velit se diuerberare, aliquo modo diuerbationum dictarum, causam timoris amoueat primitus, si poterit, hoc enim est, quod attendi debet in hac causa et in omnibus aliis. Deinde deueniendum erit ad id, quod per causam illam accidit in falcone, unde in tali causa auertat falconarius faciem suam a falcone, quantum potest, et auersa facie proferat sonos falconi consuetos proferri sibi in comestione sua, et si falco per hoc deseret voluntatem, quam habet inquietandi se, non offeratur ei tiratorium, alioquin detur tiratorium, ut supra docuimus, et auferatur ab eo secundum modum praedictum; ut etiam assuescat desinere timere propter hominem et propter faciem hominis, proderit distribuere cibum in plures vices, et dare sibi multoties abbeccationes, siue de pastu, siue de tiratorio carnosio: nam in expectatione cibi a falconario, et desiderio ipsius cibi, et in receptione ipsius cibi saepe saepius iterata, personam falconarii et faciem minus timebit, et hoc potius confert falconi, qui potest deciliatus manifeste videre. Falconarius vero, dum est in principio deciliationis, et quamdiu durat agrestitas, et in mansuefaciendo falconem, non opponat neque ostendat faciem suam faciei falconis, et si opus erit aspicere falconem pro aliqua causa, inclinato capite vel auerso et obliquo oculo aspiciendum erit ad pedes falconis et non ad faciem, et retrahendo manum cum falcone ab aspectu falconarii, falconarius teneat quandoque galerum super caput suum, et quandoque remoueat, ut falco assuescat videre ipsum cum galero et sine pileo; sed quando falconarius per dicta signa cognoscat, quod falco propter motus manuum vult se inquietare et de manu aufugere, non faciet aliquem motum manuum loquendo, neque demonstrando aliquid, sed si expediat facere, sit omnis motus manuum suavis, non repentinus, neque tangat falconem, dum est in sua agrestitate et in principio deciliationis, et si oportuit, quod



quod tangatur cum manu, causa situandi plumas, aut pennas, aut pedes super manum, aut causa faciendi circa ipsum aliqua alia, non fiat hoc prius, quam proferantur ei voces inuitatoriae ad escam, et quam positum sit tiratorium in pedibus eius, et quam gustet de tiratorio, et hoc facto, suauiter ducatur manus ad tangendum falconem, tunc quando falco non respicit versus manum, et si contingat, quod videat manum extentam ad ipsum, non vltra protendatur manus ad tangendum, nec retrahatur, ne propter manus motum falco se inquietet aut diuerberet, sed quando falco respicit ad aliam partem, manus ducatur ad ipsum, vt deciliatus nouiter paulatim assuescat et motum manus, et se tangi a manu, et desinat voluntatem, quam habuit, diuerberandi. Et quando per motus repentinos in tota persona aut in membris timetur, ne se diuerberet, postquam faciet aliquid de signis praedictis, falconarius non faciat hos motus, et si indigebit facere, prius opponat tiratorium in pedibus falconis, et prius gustet falco de ipso, quam faciat aliquid de motibus, quibus indiget, et tunc suauiter moueat se ad sedendum, ad inclinandum, ad surgendum, ad gyrandum se dextrorsum vel sinistrorsum, et ad eundem, et ad tussendum, et sternutandum, si tamen improuise veniat tussis aut sternutatio, ita quod non possit dari prius tiratorium, non tussiat aut sternutat contra falconem, sed quanto suauius poterit et minus repente, retrahat manum portantem falconem et auertat caput suum a falcone, quando tussiet aut sternutabit. Sic ergo poterit praeseruari falco a diuerberationibus illis, ne fiant, quas parabat facere falco propter hominem et faciem eius, et alia, quae sunt in homine. Et si contingat, quod falco sine voluntate diuerberandi vertat se super manum in aliam partem, quam in qua stare debet et conuenit, vt stet, falconarius non tangat ipsum cum manu sua ad faciendum ipsum reuerti, sed ipse de se vertat in illam partem, ad quam se diuertit falco, et eo modo faciat gyramentum suum, quod, si portat falconem super dextram, pectus falconis in complemento gyramenti inueniatur versus sinistram, et e conuerso, et hoc faciat, vt defendatur a diuerberatione, quam posset facere post manum, fit etiam hoc modo: proferantur soni consueti ad escam, et porrigatur tiratorium, vertet se, et stabit, vt debet, super manum, hoc modo mansuefit falco, et assuefit ad non inquietandum se aut diuerberandum, neque propter falconarium portantem ipsum, neque propter ea, quae videt in falconario, de quibus propter agresitatem suam timebat, et pro eisdem inquietabat aut diuerberabat se ipsum. Postquam vero falconarius mansuefecerit falconem deciliatum, et assuefecerit ad ea, quae sunt in ipso eodem falconario portante falconem, propter quae falco diuerberabat se et inquietabat super manum in domo, potest melius et facilius assuefacere falconem ad reliquas causas, quae non sunt in homine, propter quas falco nouiter deciliatus diuerberat et inquietat se super manum in domo: hae autem sunt subitus et improuisus aduentus alterius hominis, canum, aut aliorum animalium domesticorum, ab anteriori parte ad falconem, et multo magis a posteriori et a tergo falconis, de his namque omni-

S

bus



bus falco, cum sit agreslis et nouiter deciliatus, timet. Signa vero, per quae discernitur, quod se inquietat et se diuerberat per causas dictas, quando veniunt ab anteriori parte, sunt haec: falco, si prius percipit haec, quam homo portans ipsum, saepe saepius respicit et insigit intuitum in rem aduenientem, et applanat caput, dum remota est, et quando appropinquat ei, declinat caput, horripilat plumas capitis, colli et personae, et quanto plus appropinquat causa timoris, tanto amplius facit haec signa, deinde diuertendo caput suum hinc inde quaerit, quo diffugiat, et diuerberat se retrorsum. Sed quando causae dictae venient a tergo falconis, quas prius percipit falco, quam homo portans ipsum, cum voluat caput suum frequenter ante, retro, dextrorsum, sinistrorsum, facit haec signa, vertit faciem suam dextrorsum, sinistrorsum et retrorsum, vt videat rem aduenientem, de qua timet, applanat plumas capitis, grossescunt oculi et prominent, extendit collum suum et graciliat, destingit ad se plumas suas, erigit se super pedes suos, diuerberat se anterieus et de manu deiicit, quaerens fugere a re postueniente. Falconarius itaque, quando cognouerit per signa, quae sunt in falcone, aut per circumspectionem suam, rem aduenientem ante, statim proferat sonos consuetos falconi, et apponat tiratorium pedibus eius, vt attendat tiratorio, et non rei aduenienti, et dum falco attentus erit tiratorio, ipse falconarius procuret, quod res illa non veniat, si potest, et non vadat ad ipsam rem, aut saltem sic recedat in partem aliquam, quod res illa transeat, quanto remotius poterit a visu falconis. Et quando aliquae de eisdem rebus cognoscuntur per signa dicta, quod a posteriori veniant, statim falconarius voluat caput suum ad posterius, et cognoscat, quae sit illa causa, qua visa, proferat sonos, et inuitet falconem ad tiratorium, vt attendat ipsi et gustet de ipso, et dum falco gustabit, falconarius procuret, si potest, quod res non veniat, alioquin diuertat se, quam citius poterit, a re illa postuenienti, et eo modo secedat, et cedat rei, quod, si portauerit falconem super dextram manum, res veniens transeat a sinistra, et si super sinistram, res transeat a dextra, minus enim malum est, quod res transeat ante faciem falconis, et minus inde pauescet falco, quam si transiret a tergo falconis, et statim, quod res transierit, auferatur tiratorium a falcone, et abscondatur in loco debito.

### REX.

Et si in hoc, quod superius dictum est, videlicet quod minus malum esset, si res transiret ante faciem falconis, quam retro, opponatur hoc modo, cum superius dictum sit, quod peior diuerberatio, quae fieri potest, est retrorsum, et quae fit ante, minus mala est, videtur, quod minus malum esset, si res transiret retro, quam ante, cum ex transitu posteriori falco diuerberaret se ante, et ex transitu anteriori falco diuerberaret se retrorsum: respondendum, quod hac de causa minus malum est, si res transit ante faciem falconis, quam retro: etsi falco diuerberet se retrorsum ex transitu anteriori, falconarius paulatim retrahendo manum assentit



assentit sibi ad fugiendum a re, de qua timet, et reuocato falcone ad sedendum super manum, persona falconarii opponit se visui falconis et rei, de qua timet, et sic falco, quia non videt rem, de qua timuit et expauit, moratur quiete super manum, et non habet materiam iterandi diuerberationem, si vero falco se diuerberat ante ex transitu posteriori, oportet falconarium volendo reducere falconem ad sedendum super manum suam, retrahet ipsum ad illam partem, vnde vidit rem, de qua timuit et expauit, et sic licet reducatur ad sedendum super manum, tamen quia credit, quod res, de qua timuit, sit in illo loco, vbi prius illam vidit, cum non possit post ipsum plene videre, si de loco ipso recessit, aut non iterato diuerberat et inquietat se. Diuerberationibus vero, postquam fecerit eas falco, propter aliquam de causis dictis, sic subueniendum est: si falco neque per sonos consuetos ad escam, neque per tiratorium dimiserit, quin se deiiciat de manu retrorsum timore faciei, falconarius auertat faciem suam et retrahat manum cito, et vertat se sic, quod falco possit redire super manum, vt prius stabat, non vi retrahendo falconem ad manum, nam per hos retractus subitos et coactos laederetur, et ex hoc fieret agrestior, et postquam redierit ad manum, ipse non respiciendo ad falconem directa facie det sibi tiratorium cum alia manu suauiter et non repente, posset enim inquietare falco se ex ipso motu manus, et esset hic error nouissimus peior priore. Illis etiam diuerberationibus, quas facit propter motum manus, siue fiat ad tangendum, siue non, cum similes sint praedictis, subueniendum est, sicut praedictis, et sine mora retrahendus est falco suauiter, vt in praedictis. Illis vero, quae fiunt propter motus, qui sunt totius corporis et personae, et propter tussire et sternutare, cum se deiiciat de manu aduersus partem illam, ad quam aspicit, diffugere enim nititur eo modo, quo stat super manum, vnde, si stabit alio modo super manum, quam debet, diuerberabit se aliter, quam ad anteriorem partem manus, et difficilius erit retrahere ipsum, vt dictum est, si vero stabit, sicut stare debet, in suis diuerberationibus, non erit tam difficile retrahere ipsum ad manum, nec tam taediosum falconi, cum non sit opus falconarium se vertere ad retrahendum falconem, solum enim cum manu retrahendo ipsum vertitur ad manum. Si vero propter hominem aduenientem, vel canem, vel aliud animal deiecerit se retrorsum, reducendus est ad manum, sicut dictum est: et si propter hominem vel aliam rem aduenientem a tergo deiiciet se ad longum manus vel ante, vt stat, reducendus erit, vt docuimus. Ad causas igitur, quae sunt in homine, et ad causas, quae sunt extra hominem, de quibus timet falco deciliatus, et se diuerberat super manum in domo, debet falco assuefieri successiue et paulatim per aliquot dies, prius in domo non clara, quousque signa agrestitatis remissa sint in eo, et non pauescat neque se diuerberet ad illas causas, sed quiete sustineat videre eas et stare cum eis: deinde poterit falco commutari ad domum aliquantulum claram, et deinde ad domum clariorem, assuefaciendo ipsum falconem deciliatum magis ac magis ad plura et diuersa, quae consueuerunt esse cum hominibus in domo, dan-



dum est sibi tiratorium in domo clara, tanto saepius, quanto per claritatem magis discernit causas, unde timere potest, quousque assuetus sit eis, in hac enim assuefactione, quae fit ciliato falconi, et semideciliato, et totaliter deciliato, sic paulatim, sic successiue, sic sufficienter et gradatim procedat falconarius in mutatione, quae fit de domo non clara ad claram et clariorem, et in omnibus aliis mutationibus et operibus faciendis circa ipsum, quod propter festinantiam et insufficientiam assuefactionis non sit opus reducere falconem insufficienter mansuefactum de clara domo ad non claram, de deciliatura ad ciliaturam, et similiter de aliis, nam hic modus in mansuefaciendo non sequeretur ordinem, sed falco fieret exinde vitiosus, et malorum morum et inutilis. Amplius, praeter causas diuerberationum, quae dictae sunt, est et alia causa, quam dicemus nunc. Cum enim omnes falcones, tam mansueti, quam immansueti, taedio standi super manum cupiant recedere de manu et ire ad sedendum, qui, si non permittantur ire, inquietabunt se et diuerberabunt se: illi tamen, qui male portati sunt et per longum iter, affectant magis recedere de manu ad quiescendum super aliam sedem, et faciunt magis signa ad hoc, quam caeteri falcones. Signa itaque, quae facit falco volens recedere de manu, sunt haec: falco circa sero plus, quam aliis horis, diuerberat se, ad hoc, quoniam eadem hora naturaliter ibat ad sedendum super ramos vel alia loca alta et tuta, ideo sero respicit circumcirca, vt videat locum, in quo sedere et quiescere possit, si est in domo locus aptus ad sedendum, quo viso, ad ipsum se diuerberat, et si est foris, similiter, et si non ponatur ad sedendum, faciet diuerberationes multas, proinde nociuas sibi. His autem diuerberationibus falconarius sic subueniet: si viderit signa praedicta, deponet falconem de manu ad sedendum in loco conuenienti, si vero nolet ipsum ponere ad sedendum, dabit ipsi tiratorium, vt intentus eo desinat voluntatem, quam habet, inquietandi se aut diuerberandi, et vt placeat falconi stare super manum amore tiratorii, praeterea recedat falconarius a loco illo, in quo est, ne falco videat locum conuenientem sessioni suae, et propter hoc cessabit inquietatio falconis volentis ire ad sedendum.

### CAPITVLVM LX.

*De deciliatis falconibus, qualiter ponantur ad sedendum ad perticam, et leuentur ab ea, et inquietationibus et laesuris eis contingentibus in ipsa.*

#### REX.

Cum non contineretur in hoc libro, qualiter falco deciliatus poni debeat ad sedendum in pertica, et leuari ab ea, et de diuerberationibus et laesuris, quae possent in ea contingere, sed esset in margine eius scriptum, quod addi deberet praesens capitulum, tanquam necessarium praelibatis documentis de falconibus editis, prout melius expedire vidimus, duximus inferendum. Vnde si falconarius  
volet



volet ipsum ponere ad sedendum, ponet eum hoc modo: locabit enim ipsum in pertica alta, situata et posita, prout superius est expressum, et locus, in quo ponitur ad sedendum, non sit clarus nimium vel obscurus, sed in tantum, quod falconarius, quae facturus est circa eum, plene videat, et discernat, et diligenter attendat, ne aliquod foramen siue fenestra opponatur falconi ex transuerso perticae, quia, si se diuerberaret ad illam, illa diuerberatio periculo esset ei. Si vero in longum opponitur, diuerberatio ad eam, si qua contingeret sibi, non fuerit tam nocua, eo quod, quando se diuerberat in longum, alae eius vadunt ex vna et altera parte perticae, et sic a pertica non laeduntur, et nullo modo in longum perticae diuerberare se poterit, quando diuerberat se in sursum, quia deorsum non potest se diuerberare, nam pertica obstat ei, nec in directum, quia ipsum subleuari oportet. Diuerberatio vero ex transuerso perticae periculosa est, quia, quando se diuerberat ex transuerso, alae tangunt ex utroque latere perticam, ex illo tactu falco de facili incurrere poterit laesionem pennarum: et si alae excederent latera perticae, quod non tangantur ab ea, et se diuerberabit in reditu, quem faciet super perticam, propter retentionem iactorum non assentientium sibi, alae, quae remanerent extra latera perticae, laederentur in ea, et posset de facili, cum se diuerberat ex transuerso perticae, pectus in extremitate eius percutere, cum pertica lata esse debeat vno pede tantum, et sic in grauem incurreret laesionem. Et haec inter diuerberationum species, quae accidere possunt, omnibus speciebus diuerberationum periculosior est. Appropinquabit autem falconarius perticae et apponet tiratorium sapidum falconi, inuitando ipsum semper consuetis sonis circa illud, mediando personam suam inter perticam et falconem, ne falco videns perticam diuerberet se ad eam, priusquam falconarius ad ipsam perueniat, vt est dictum, ad quam accedat tergiuersus, quia, si aliter accederet, non posset congrue se opponere falconi et perticae, et cum fuerit sufficienter vicinus perticae, et falco erit intentus circa tiratorium, accipiet longius caput longae cum manu non tenente falconem, suauiter, quantum poterit, super perticam, cum falcone intendente ad tiratorium, et accipiat caute dictum caput longae, et iterum iactabit ipsum et inuoluet circa perticam, quo facto subtrahet sagaciter tiratorium falconi, et accipiat leniter ambo capita longae cum manu tenente falconem, et deinum seducet ita manum a pedibus falconis suauiter, vt falco se inueniat super perticam motu subtractionis manus aliquatenus non turbatus, quibus subtractis ligabit ea, sicut dictum est in capitulis de ligandis falconibus ad perticam altam. Et caueat falconarius, vt, dum praemissa omnia faciat, non respiciat falconem in faciem, sed haec faciat capite inclinato, semper proferendo sibi sonos consuetos, quibus ad tiratorium inuitatur, a quo recedat sine aliquo strepitu et inspectione in faciem ipsius, vt falco, sicut positus est in pertica, tranquillus remaneat et quietus, non tamen ita longe discedat ab eo, quod, si falconem aliquo modo inquietari contigerit, ipsi non valeat celeriter subuenire. Sit igitur attentus falconarius et diligenter inspiciat, si



falco protendet signa aliqua diuerberandi se, quia possibile esset, quod falco haberet voluntatem diuerberandi se aut causa famis, quam pateretur, et vellet sibi cibum acquirere, vt consueuerat tempore libertatis, aut oppositione alicuius foraminis aut fenestrae, per quod euadere intenderet, aut quod aliquid in domo videret, quod esset sibi timori, vt murilegos siue canes et huiusmodi, aut aliquid, quod praedari vellet, vt murem et similia, aut quia voluntatem volandi haberet eo, quod diu non volauerit. Quod autem falco se diuerberare velit causa famis, falconarius sic cognoscet: quia tunc falco deambulabit per perticam, respiciet circumcirca, suauiter alas aperiet, nec violenter diuerberabit se, et haec diuerberatio minus periculosa est aliis, quas faciet super perticam: si vero oppositione foraminis seu fenestrae falco diriget et continuabit intuitum ad fenestram, et semper se reuoluet ad illam, ex quacumque parte sit perticae, et motus et contractus faciet ad volandum et exeundum per eam, diuerberando se versus fenestram. Si causa alicuius rei visae, quam timeat, signa diuerberandi se faciet, quae consuevit facere stando super manum, quotiens terrebatur, vt superius dictum est. Nam diuertet caput a re sibi terribili, et nititur effugere id, quod timet. Si causa praedae, quam videat, figet aspectum suum versus illam partem, in qua aspicit dictam praedam, et cum subita apertione alarum vno eodemque motu se diuerberat versus praedam. Praeter hos quatuor modos diuerberationum, quas facit falco super perticam, contingit eum inquietari in ea fine diuerberatione, circuiendo nodos iactorum supra perticam, et hoc facit saepius causa famis, aut beccat iactos et campanellam, aut quia sentit se ligatum, et vellet soluere vincula, vt volaret et euaderet, aut quia ipsum taedet campanellae pariter et iactorum, et aliquando facit haec omnia causa famis. Et si falco volet se diuerberare oppositione foraminis seu fenestrae, vt dictum est, per clausuram ipsorum remediatur eidem, et dum fenestram clauserit falconarius, se falconi opponat, vt fenestram non videat, proferens sibi consuetos sonos, quibus alienetur falco ab intentione, quam habet ad fenestram. Si vero causa timoris rei alicuius, quam viderit, attendat falconarius, quae causa sit, vnde timuerit, inter quam rem et falconem statim falconarius se opponat, vt eam videre non possit, sonos allicientes eidem proferat, et rem, de qua timuit, expelli faciat interim, quod falco et propter sonos sibi prolatos, et propter aspectum, quem amisit, rei praedictae, ab illo, quem habuit, pauore quiescat. Et si causa praedae, similiter faciat falconarius, quousque falco quiete pristina potiatur. Et si forte falco his remediis a diuerberationibus huiusmodi resipiscere noluerit, tunc cognoscere poterit falconarius, quod falco voluntate volandi faciat, eo quod diu non volauerit, quare ipsum, sicut dicetur inferius, subleuet et recipiet super manum. Si vero falco quietus manserit super perticam nec se diuerberauerit, dimittat ipsum quiescere vsque ad horam congruam, qua leuandus et recipiendus est super manum. Et quoniam ex praedictis diuerberationibus et inquietationibus posset falco incurrere tam personae periculum quam pennarum, et



et obesset etiam mansuefactioni, falconarius, sicut superius dictum est, non debet a falcone tam longe abstinere, quin sibi valeat, si necesse fuerit, infra scriptis remediis subuenire. Nam si falconarius viderit, quod falco se velit in aliqua specie praedictarum diuerberare, consuetos sonos eidem proferat, et si propter consuetos sonos, quos sibi protulerit, quieuerit, falconarius remaneat, et falconem permittat quiescere, sed non tantum, quod propter nimiam requiem et moram, quam traxerit sine falconario, aliquod vitium agrestitatis acquirat. Et si forte propter huiusmodi sonos falco non quieuerit, falconarius approximet perticae opponendo se faciei falconis, suauiter praedictos sonos proferens, et si propter hoc ipsum quietari contingat eum, permittat quiescere et recedat. Et si nondum propter ista quieuerit, ipsum leuet et recipiat super manum hoc modo: accipiat autem tiratorium in ea manu, qua portare debet falconem, et elongata facie sua a facie falconis versus aliam manum, ponat manum, cum qua tenet tiratorium, ante falconem super perticam, ostendendo sibi tiratorium sic aperte, quod falco ipsum plene videat et discernat, et manum ante falconem teneat valde firmam, proferendo sibi iugiter assuetum sonum, quousque falco tiratorium capiat cum becco aut cum pedibus, quod si cum becco ceperit, teneat tiratorium ita firmum, quod sibi de manu non possit surripere, et ita etiam firmet manum et ipse immobilis maneat, quod falco se affecuret pedes ponere super manum, et cum receperit tiratorium cum pedibus, approximabit aliam manum suauiter, et dissoluat nodum factum sub pertica, et antequam longae capita derelinquat, accipiet cum manu tenente falconem iactos, si poterit, et si forte non poterit, tenendo curtum caput longae, dissoluat longum caput longae a pertica, et habitis ambobus capitibus longae, trahat manum, in qua non tenet falconem, versus nodum iactorum et longae, et iactos capiat prope nodum, et aptet sibi iactos in manu, sicut dictum est, et subleuet manum a pertica cum falcone sine strepitu, et trahat retrorsum manum, ita quod pertica remaneat ante pectus falconis, sic, quod, si falco se velit diuerberare ad redeundum in perticam, se ante diuerberet et non retro. Et falconarius, quam citius poterit, mediet personam suam inter perticam et falconem, et in eadem mediatione recedat, quousque in tantum distet a pertica, quod falco occasione visae perticae non habeat materiam se diuerberandi ad eam, et deinde poterit tuto subtrahere tiratorium a pedibus falconis. Cautus sit tamen falconarius, quod in mutando falconem deciliatum de domo parum clara ad claram, et de clara ad clariorem, formam et regulam traditam de mutatione falconum deciliatorum seruet et teneat, sic gradatim hoc faciendo, quod falco se affecuret et assuescat manere in domo clara.



## CAPITVLVM LXI.

*De mansuefactione falconum deciliatorum facienda super manum in domo, et sine capello.*

**M**ansuefactio facienda falconi super manum in domo a principio suae deciliationis per aliquos dies, debet fieri secundum modum, quem diximus; approximante vero tempore, in quo portari debet foras ad aërem liberum, quia videbit multa, quae videre non consuevit in domo, et apertius per claritatem ipsius aëris, et sentiens se esse sub aëre libero facile recordabitur agresstitatis pristinae, et quia habebit illic multo plus occasionem inquietandi se, quam in domo, oportet per aliquot dies distringere ipsum, et ad maiorem famem conducere, priusquam portetur foras, ut ad maiorem famem conductus tanto libentius foris accipiat tiratorium, quanto magis erit necesse per causas praedictas. Consideranda tamen erunt in distringendo ipsum agresstitas falconis, macies et auiditas comedendi maior vel minor, illum enim falconem, qui magis auidus erit, minus debemus distringere: illum vero, qui minus auidus, magis; et si auiditas tanta erit, quod superet agresstitatem, quod cognoscatur in eo, quod pro agresstitate, vel cum aliqua causa, unde timere debeat, adfuerit, non desinet tiratorium, tanta erit auiditas sua, poterimus ipsum minus distringere: sed si agresstitas vincat auiditatem, cuius signum erit, quod non erit tanta auiditas ad tiratorium, quin se inquietet, si adfuerit aliqua causa, unde debeat timere, magis erit distringendus, et minus macer minus, et nimis agresstis magis.

## CAPITVLVM LXII.

*De mansuefactione falconum facienda a pedite super manum foris in aëre libero, et inquietationibus et diuerberationibus, quas facit in eo.*

**C**um itaque mansuefactus erit sufficienter in domo et ad maiorem famem conductus, ut dictum est, portari debet foras ad aërem liberum, primo a pedite, deinde ab equite, ut ad ea, quae sunt extra domum, mansuefiat, fiet autem hoc modo: falconarius habito tempore conuenienti, de quo docetur in sequenti capitulo, surget ante diem, et resumet falconem de sede super manum suam, exhibitque de domo, dum erit adhuc obscurum noctis, ut, quemadmodum paulatim et non subito lumen diei adueniet, sic ipse falco paulatim assecuret se ad videndum ea, quae sunt extra domum, sub quadam caligine prius, deinde manifeste, demum manifestius, propter hoc etiam iuuat et melius est, si falconarius incipiat portare extra domum foras falconem semideciliatum, et portet ipsum sic per aliquot dies, deinde deciliatum portabit foras pedester, attendens et faciens, quae sequuntur.

CAPI-



## CAPITVLVM LXIII.

*Qualiter intrandum est et exeundum per portas cum falcone.*

**A**d exeundum autem de domo foras tempus nubilum aut pluuiosum pluuiis pauca, quae descendat ut ros, conuenientius est, quoniam in tali tempore non poterit falco videre nimis manifeste ea, quae foris erunt, et pennae et plumae madefient, et sic minus timebit, et minus attentabit diuerberare se, cum se sentiet madefactum, et a tali etiam tempore reddetur piger, sicut et caetera animalia. Sed quoniam in exeundo de domo foras falconario portanti falconem transitus est per portam, et de facili posset malum accidere falconi, maxime si se diuerberaret illic, dicamus, quomodo transeundum est cum falcone per portam, ut non noceat falconi. Quoties igitur falconarius cum falcone debet transire per portam, intrando vel exeundo, cum vocibus consuetis ad escam apponat prius tiratorium in pedibus falconis, et quando falco intendet mordicare tiratorium, ipse latus suum, in quo non est falco, intromittat prius in portam, longando a porta et a se manum, super quam est falco, et capite suo intromisso similiter in portam, prospiciat circiter loca illa, ad quae vult transire, si sit illic aliquid infuetum falconi, unde timere possit, et ne falco ex illo timeat, faciat id elongari, vel ex toto remoueri, si potest. Illo vero remoto vel saltem elongato, transeat per portam, et deinde tiratorium auferat, hoc autem faciendum est, quousque videbitur esse opus, quamdiu scilicet timebitur de agressitate falconis.

## CAPITVLVM LXIV.

*Ad quae loca deforis prius portandus est.*

**P**ostquam autem exierit portam falconarius, ipse vadat ad loca, in quibus nulla erit multitudo rerum infuetarum falconi, et si foris erit aliquis paries, unde non possit transire quis, illuc vadat, et vertat se sic, quod teneat dorsum falconis versus parietem, et tantum appropinquet parieti vel illi loco, quod nihil de infuetis transire possit a tergo falconis, inter parietem et falconem, vel inter locum et falconem, et si videt aliqua venire infueta, de quibus timere possit falco, non vadat ad illa falconarius, sed procuret, quod illa non veniant, si potest, aut quod transeant longe ante falconem, et si illa debent venire aut transire ante falconem, priusquam illa appropinquent, proferat falconi voces consuetas ad escam, et det tiratorium falconi, ut falco per tiratorium desinat timorem, quem habet, et multo magis est faciendum hoc, si res transire debeat a tergo falconis. Deportetur etiam falco huc et illuc paulatim ad diuersa loca deforis, ut diuersitatem locorum et animalium assuescat videre paulatim. Amplius, si in portando falconem foras aduenerit aliquis ventorum, de quibus in succedenti capitulo plura dicuntur, falconarius sic gyret se, quod personam suam ponat inter ventum et falconem,

T

cauens,



cauens, ne ventus vnquam veniat a tergo falconis, quoniam falco, veniente sibi vento a tergo, non staret quietus super manum, sed se multipliciter diuerberaret.

### CAPITVLVM LXV.

*Quando reportandus de foris intro.*

**E**x quo autem aliquandiu steterit deforis, et iam lumen diei inualefcet, et homines et animalia in maiori multitudine iam incipient ire huc et illuc, redeundum erit cum falcone foris intro, vt ad interiora et exteriora domus, et ad intrandum et exeundum assuefcet.

### CAPITVLVM LXVI.

*Reportandus de foris intro acrius inquietat et diuerberat se.*

**C**um autem falco portatus fuerit deforis, vidit plura, quae videre non consueuerat in domo, et vidit ea manifestius, et dum fuit sub aëre libero, recordatus est libertatis, quam habuit, dum erat per se in campis, et agrestitas ipsius nondum plene transierat, maxime si ipse erat de agrestioribus, propter hoc habuit plures causas deforis diuerberandi se et quomodocumque aliter inquietandi et fortiores causas, ideo cum maiori voluntate diuerberat se deforis, frequentioribus et acrioribus diuerberationibus, quam in domo, priusquam portaretur foras ad aërem liberum: reportatus etiam de foris intro, recordatur se fuisse foris, et agrestior proinde factus est, et affectat redire ad aërem liberum, et cum maiori voluntate se diuerberat et inquietat ad exeundum foras, et signum huiusmodi est, quoniam, postquam reportatus est ad domum, frequenter respicit ad fenestras et loca lucenia domus, inquietat et diuerberat se versus illa loca, et diuerberationes acriores, vehementiores, et frequentius, quam priusquam portatus fuisset foras, et acrius, quamuis in omnibus fere eosdem modos diuerberationum et inquietationum, dum est agrestis et reportatus in domum, quos faciebat in domo, priusquam portatus esset foras, propter enim agrestitatem maxime faciebat omnes illos modos: sed propter faciem hominis et propter ea, quae erant in domo, cum sit mansuetus ad ea, non facit diuerberationes aut inquietationes, sed illas diuerberationes, quas facit foris ad diffugiendum, et illas, quas facit in domo deportatus, pro voluntate quam habet ad exeundum foras, acriores et vehementiores et frequentiores facit.

### CAPITVLVM LXVII.

*De remediis et modis remediorum, scilicet tiratorio, irroratione et balneo, quae fiunt contra inquietationes et diuerberationes ipsorum.*

**O**portet itaque, vt mansuefaciamus falconem ad hoc, vt frequentiae et vehementiae suarum inquietationum et diuerberationum tam faciendarum quam factarum



ctarum succurramus, et dicamus, quomodo debet fieri, non enim est toties dandum sibi tiratorium carneum, quoties vult se diuerberare aut inquietare: nam si daretur toties, impinguaretur nimis, et non detineretur in illa macie, ad quam destringi debet et detineri. Et si non daretur sibi tiratorium, et inquietaret se, quoties appetit, multum esset nociuum plumis, membris suis suisque viribus. Sed hoc modo faciendum erit: quando volet se inquietare, quod cognoscitur per aliqua de signis, quae diximus, dabitur sibi cum vocibus consuetis ad escam tiratorium de aliquo membro plumoso, vt deplumet ipsum, aut de membro ossuoso et neruoso, vbi non possint inueniri carnes.

### CAPITVLVM LXVIII.

#### *De irroratione.*

**E**t si forte per huiusmodi tiratorium non dimittet diuerberationes aut inquietationes suas, pro eo quod viderit se pluries deceptum in tali tiratorio, aspergatur falco aqua frigida, et madefiant pennae ipsius. Fiat autem haec irroratio hoc modo: falconarius lauabit ter vel quater aqua frigida, vt omnis viscositas salivae et phlegmatis existentis in ore suo remoueatur, et aqua frigidior exire possit ab ore, si namque non sic fieret, viscositas salivae et phlegmatis exiret cum aqua, quando irroraretur falco, et adhaereret pennis et plumis falconis, vnde fierent inuiscatae et sordidae, et aqua exiret calidior ab ore, quae duo non essent conuenientia. Postquam autem os erit ablutum, implebitur aqua frigida cum sufflatu et impulsione labiorum, de illa aqua eiecta in minutas particulas pluribus impulsionebus irrorabitur falco, supra dorsum, et ante pectus, eleuatisque alis sursum irrorabuntur latera, quae sunt prope cor, et tantum irrorentur, quod pennae et plumae madidae fiant, sic namque cessabit vsque ad horam a voluntate quam habebit diuerberandi se, et si ex toto cessabit, non erit iteranda irroratio, si vero propter primam non cessat se inquietare, poterit irrorari secundo et tertio, si opus erit. Debet autem huiusmodi irroratio fieri falconi in loco obscuro, quamdiu durabit eius agrestitas. Iuuamentum autem harum irrorationum multiplex est: nam per irrorationes falco dimittit voluntatem quam habet inquietandi se, et etiam suas inquietationes, ex eo enim, quod irroratio madefacit plumas et pennas, efficit falconem pigriorem, quamdiu falco sentit pennas suas madefactas, non confidit iuuari per eas, vnde stat magis quietus neque attentat dimouere eas, neque volare ad diffugiendum, sentit enim se pigrum et impotentem volare, expectando, quousque pennae sint desiccatae. Et signum huius est, quia madefactus alas, caudam et plumas totius personae segregat, et excutit se saepius, vt aqua per excussionem cadat citius, et exsiccentur plumae. Iuuamentum autem in hoc est, quod falco refrigeratur per irrorationem, vnde in aestate, et quando calescit, quaque dieta saepius potest fieri haec irroratio. Et quia pennae desiccantur citius,



potest fieri pluries, et hoc etiam iuuat, quod per irrorationem parcitur tiratorio. Est itaque falco mansuefaciendus hoc modo, in casibus praedictis, et quando irrorandus, vt dictum est, et quando dandum erit sibi tiratorium non carnosum, et quando tiratorium carnosum, vt per ipsum carnosum alliciatur ad non carnosum: de carnosum autem parum accipiat, ne excedat debitam quantitatem sui passus. Prodest etiam ad alia irroratio, sicut dicitur in singulis capitulis de falcone irrorando. Praeterea cum eisdem fere modos diuerberationum et inquietationum quarumcunque faciat deforis super manum, et intra domum, postquam reportatus est de foris, quos faciebat in domo, priusquam portaretur foras, praeseruandus erit a faciendis, et succurrendum factis, eo modo, quo dictum est in illis, quae fiebant in domo, et tanto studiosius et pluribus modis aliis, quanto acriores et frequentiores facere volebat aut faciebat. Vnde istud addendum est in reductione falconis ad sedendum super manum, quod, quando erit deforis, et diuerberabit se post manum, considerandum erit, an sit ventus, an non, et si non erit ventus, reducendus erit ad sedendum super manum ex illa parte, vnde minor sibi est circuitus, si vero ventus erit, falconarius vertat se, quam citius poterit, et manum suam in quamcunque partem aptiorem contra ventum, vnde cumque veniat ventus, hoc modo scilicet, quod opponat tergum suum vento, quod si falco, qui iam per huiusmodi versiones ante pectus falconarii se inuenit, nec ventus iam venit ad ipsum a tergo, possit retrahi ad manum, sicut retrahebatur in diuerberatione, quae erat de vna manu versus aliam, facilius enim reducetur hoc modo, cum omnes aues semper habeant usum insidendi et sedendi contra ventum.

## CAPITVLVM LXIX.

### *De balneo.*

**B**alneum est etiam vna de causis, quae multum valet contra huiusmodi inquietationes et diuerberationes falconis, ad mansuefaciendum ipsum, et assuefaciendum ipsum cum homine: propter hoc dicendum est de balneo pro falconibus. Cum itaque falcones, sicut et caeterae aues rapaces, sint siccioris naturae et calidioris, quam caeterae aues non rapaces, assuescunt balneare se, quando per se sunt et immanfueti, quibus, si non balnearent se, acciderent plures morbi de nimia siccitate, vt dicemus in tractatu de morbis, ideo et nos debemus necessario offerre balneum falconibus, non solum dum mansuefiunt, sed quamdiu homo habet ipsos. Fiet autem hoc modo: habeatur tina vna ligneā, vel terrea, cuius diameter sit ad minus duorum pedum secundum longitudinem, et sit alta tina tantum, quod contineat aquam vsque ad locum ouariae falconis, et plus aut minus, secundum quantitatem altitudinis tibiārum et coxarum falconis balneandi. Aqua vero debet esse frigida, clara et dulcis, quae nullam habeat in se malam qualitatem, et vas nullam habeat ventositatem, quoniam attraheretur ventositas illa per aquam fluendo



fluendo ad pennas et plumas falconis, et sic noceret. Haec autem tina locanda erit in loco domus expedito, aut in horto, aut campo extra, ad quem locum canes aut porci vel alia animalia non veniant, neque incutiant timorem falconi. Tempus autem, in quo inuitandus est ad balneum, in aestate est magis conueniens; in hyeme etiam et in aliis temporibus potest balneari, sed in aestate, priusquam calor solis intensus sit, in hyeme vero, quando iam calor solis incipit ascendere, nam si tardius balnearetur, praecipue extra domum, timeretur de aquilis, vulturibus, milionibus, et aliis auibus magnis rapacibus, quae illa hora volant per aërem: et propter hoc falconem agrestem balneabimus conuenienter in domo. Sed tam in hyeme, quam in aestate, et in aliis temporibus, balneabitur, postquam iam comederit, debet tamen dari sibi minus de cibo, quam aliis diebus, in quibus non debet balneari. Si vero falco erit macer, et timetur, quod paucitas cibi addat sibi ad maciem, postquam balneatus erit et digesserit cibum prius sibi datum, poterit sibi dari de cibo circa fero tantum, scilicet quod ex hoc, quod dabitur, et ex illo, qui ante balneum datus fuit, sit vnus pastus sufficiens. Non autem erit balneandus singulis diebus, sed intermissis aliquot diebus inuitandus est ad balneum. Falconibus vero agrestibus, quando iam deciliati sunt, magis conueniens est balneum, et etiam postquam mansueti sunt, etiam quando relaxata est ciliatura, adhiberi potest balneum, etiam ciliatis, vnde si quis facere voluerit, ab eo tempore, quo ciliati sunt, incipere potest assuefacere falconem ipsum ad balneandum. Hic est autem modus permittendi ipsum balneari: si falco erit agrestis, ponatur sessorium vel lapis iuxta marginem tinae balneatoriae, et ligetur ad sessorium: si vero sessorium non habuerit, sed lapidem, figatur cauilla vna seu passillus in terra iuxta lapidem, et ad illum passillum ligetur longa, et tunc ponatur falco desuper sessorium vel lapidem ad sedendum, et teneat capellum, si mansuefit cum capello, longa sit autem tantae longitudinis, quod intrare possit balneum falco, et non possit pertransire tinam, et postquam positus fuerit falco ad sedendum, si est de illis, qui mansuefiunt cum capello, leuabitur capellum, et recedet ille, qui leuabit capellum, a falcone, stans tantum a remotis, quod falco, dum se balneabit, non possit timere de ipso, tamen videat falconem, dum se balneabit, si vero est de nouiter deciliatis, qui mansuefiunt sine capello, similiter deponendus erit iuxta balneum, vt se balneet, si voluerit, et non stabit falconarius cum ipso, quando falco agrestis se balneabit. Postquam vero balneatus erit falco agrestis et exierit de balneo, redeat ille falconarius ad falconem hoc modo, ambulabit in circuitu.

### *R E X.*

Dimittens falconem versus manum, ab illo latere manus, cum qua leuaturus est falconem, remouendo semper faciem suam ab aspectu falconis versus aliud latus, ex quo falco non est portandus, approximando ad ipsum paulatim, inuitans ipsum ad carnes, quas portabit ei in manu, cum qua leuari debet, seu tiratorium, et



subleuabit ipsum super manum, sicut debet subleuari fessorio, et tenebitur super manum ad solem, donec se perungat, et quousque exsiccentur pennae, si solis non taedet eum, quia tunc in umbra deberet teneri. Perungere autem dicimus, quando post balneum, aut etiam sine balneo, falco accipit cum rostro suo de pinguedine, quam habet super dumos et caudam, vbi scilicet sunt duo quasi testiculi, et modicum virgae, et de sic accepta pinguedine perungat cum rostro suo pennas et plumas suas et ungues suos ex utroque latere. Istud autem perungere facit falco, quoties balneatus est, et aliquando etiam, quando non est balneatus. Si vero, quando falconarius redibit ad falconem balneatum, porrigendo sibi carnes, ipse voluerit gustare de carnibus, approximet ei; quantum plus tolerare potest, ita quod non pauescat de tali approximatione, et sedeat tunc non in oppositione faciei falconis, sed collateraliter, ex illo scilicet latere, vnde leuari debet falco, expectando, quousque pennae exsiccatae fuerint, et tunc iterum praesententur sibi carnes, et subleuetur super manum, et si non perungit se, teneatur super manum in umbra, donec se perungat; si vero teneat alas apertas, et caudam et plumas et pennas apertas et segregatas, quod delectatur in sole, signum est. Si vero falco, qui debet balneari, ciliatus est, aut relaxata est ei ciliatura, manus, super quam sedet, approximetur balneo, et tunc percutiatur cum virgula vna lignea in aqua, sic quod falco audiat sonitum aquae, qui si appetit balneare, inclinabit personam suam ad aquam, et extendet rostrum suum versus aquam, et tunc manus, quae sustinet falconem, approximetur aquae tantum, ut pedes eius sentiant aquam, et iterum moueatur aqua cum virga, audiens enim sonitum aquae, et affectans ire illuc, mutabit pedes suos desuper manum, et intrabit balneum, et postquam introiuerit balneum, retrahatur manus, et permittatur balneari, et nihilominus iterum inuitetur ad balneationem, quandoque percutiendo aquam cum virgula. Postquam igitur balneatus erit et volet exire, quod cognoscetur ex eo, quod circumquaque mouebit se ad exeundum, accipiatur longa cum alia manu et trahatur, sic approximando manum, cum qua portari debet, quod iacti recipiantur in ipsa manu prope pedes suos, et sic tollatur super manum et teneatur ad solem, donec exsiccentur pennae, et donec se perungat. Si vero nollet se balneare, quod cognoscetur, quia mouebit se ad aliam partem, quam ad balneum, et inquietabit se, non balneetur, nec cogatur balneari, et alii falcones similiter non cogantur, quando nolunt. Si vero falco, qui debet balneari, iam mansuefactus est, ligabitur cum longa, sicut dictum est, aut tenebitur ipsa longa, et percutiatur aqua cum virgula, et permittetur balneari, et postquam erit balneatus, fiet ei, sicut dictum est, quod debet fieri aliis, statim enim sumatur super manum, quousque se perungat, et quousque pennae sint exsiccatae. Iuuamentum autem est in balneo, quoniam falco conseruatur inde sanior, et fit mansuetior, et si calet plus debito, refrigeratur per balneum, et multas inquietationes et diuerberationes dimittit falco per usum balnei, quas non dimitteret, nisi esset usus balnei. In eo etiam, quod tenetur super manum,



manum, quousque pennae et plumae sint desiccatae, et quousque se perungat, iuuamentum est non modicum ad mansuefactionem falconis. Balneatio itaque et irroratio, et frequens exhibitio tiratorii carnosissimi et non carnosissimi, sunt de causis, quae prohibent falconem tam frequenter diuerberare aut aliter inquietare se, qui falco assuefit portari foras a pedite, quibus diuerberationibus, quoties fecerit, falconarius subueniat, quemadmodum subueniebat factis in domo. Caeterum in factis extra domum, quando regyrat se falconarius pedes ad reducendum falconem super manum, et in aliis etiam diuerberationibus, in quibus non conueniat ipsum regyrare, attendat, quod in reducendo falconem super manum, quando ventus erit, ventum non recipiat a tergo falconis, sed semper ab anteriori parte, ventus enim veniens ab anteriori parte falconis iuuat ipsum redire super manum. Amplius, falconarius pedes assuescere debet falconem extra domum ad minus malas diuerberationes, quanto plus poterit, et defendere ipsum omnino a magis malis, ut faciebat, quando assuefiebat falco in domo. Causae vero speciales, propter quas se diuerberat aut inquietat falco extra domum, dicuntur conuenientius in capitulo succedenti, quando falco assuefit portari foras ab equite. Qualiter autem ponitur ad sedendum, et super quam sedem, et qualiter ligatur ad perticam, aut soluitur de pertica, dictum est in praecedenti capitulo, quando deciliatus mansuefiebat in domo. Haec igitur omnia, quae diximus debere fieri falconi, qui assuefit portari extra domum a pedite, fiant usque ad tot dies, quod falconarius cognoscat falconem iam bene assuetum et bene tolerantem portari foras a pedite.

## CAPITVLVM LXX.

*De mansuefactione falconum facienda foris ab equite, et temporibus aptis ipsi mansuefactioni.*

Postquam omnia, quae diximus facienda in mansuefaciendo falconem, portando ipsum foras, a pedite facta erunt per aliquot dies, debet idem falco mansuefieri ad eadem portandus foras ab equite, in quo obseruanda sunt praedicta, et praeterea, quae tempora sunt apta ad hoc, et quae non, quorum morum debet esse eques, quae sunt necessaria habere falconarium secum, quem modum debet habere in ascendendo super equum, quae loca debet cauere equitando, propter quas causas diuerberat aut aliter inquietat se falco, qui assuefit portari foras ab equite, et quomodo subueniendum est diuerberationibus ipsis, quando redeundum est ad domum, et quomodo de equo descendendum cum falcone, dicendum est.

Quamuis autem non omnia tempora sint apta omnibus falconibus, sed diuersa diuersis, tempus tamen tranquillum et quietum sine vento generaliter bonum est omnibus falconibus: sed si aestas est, melius est nubilum, quia minus calidum et tardius calefcit, falconibus etiam agrestibus et immansuetis, quanto  
magis



magis nubilum, tanto melius est: nam tempus nubilum, pluuiosum non grossa pluuiam, sed minuta, sine vento, bonum est semper ad portandum foras falcones nondum mansuefactos, tam ramagios quam nidafios, tempus namque tale mactat pennas et plumas falconum, reddit ipsos pigros et desides, et quia pigriores efficiuntur per hoc tempus, et pennae ipsorum ineptae ex pluuiam ad volandum, minus inquietabunt se, aut diuerberabunt se, quod satis est expediens ad mansuefaciendos falcones. Tempus pluuiosum, grandinosum, niuosum, ventosum ventis validis aut aliter malarum qualitatum, malum est; omnes tamen venti, qui veniunt a tergo falconarii, quoniam falco ex persona falconarii defenditur ab illis, siue super dextram manum siue super sinistram portetur, minus mali sunt, anteponi namque poterit manus portans falconem ante pectus falconarii, et ob hoc ventus, qui directe venit per medium dorsi falconarii, minus malus est aliis venientibus a tergo. Omnes venti venientes ab anteriori parte falconarii deteriores sunt, quoniam falco non potest habere aliquam defensionem contra huiusmodi ventos, unde ille, qui directe venit ad medium pectoris, deterior est caeteris venientibus anterieus. De omnibus venientibus a quouis latere falconarii ille, qui appropinquabit magis ad anterieus, peior erit inter ipsos, et ille, qui magis appropinquabit ad posterius, minus malus erit inter eos. De huiusmodi autem temporibus dicitur amplius in capitulo de portando falcones de regione in regionem.

### CAPITVLVM LXXI.

*De equite, qualis esse debeat, et quae secum foras portare debeat.*

**Q**uis et qualis debet esse, et quorum morum, dicitur plene in tractatu de venatione girofalconis ad grues. Falconarium vero necessarium est habere semper secum tiratorium non carnosum, et etiam carnosum, quod sit de illis carnibus, quas falco libentius comedit et melius digerit, de quibus dabit ad mordicandum falconi, quantum expedire videbit. Nos tamen non possumus dicere falconario, quae carnes sint appetibiliores falconi, pro eo quod non omnes falcones comedunt aequae libenter omnes carnes, quidam enim falconum comedunt quasdam carnes libentius, quidam alias; consideret tamen hoc falconarius in hoc, et videat, quas carnes libentius comedit falco et melius digessit de diuersis carnibus, quas diebus praeteritis exhibuerat ei, illas secum portet, aut tiratorium de ipsis. Falconarius volens assuetacere falconem ad delationem super equum, prima vice surgat ante diem, et capiat falconem de sede super manum suam, quam volet, qui, si vult ascendere super equum a parte sinistra equi, et sumpserit falconem super manum sinistram, transmittet falconem ad dextram manum, et sumens ipsum de sinistra, quemadmodum de sede ad manum assumpserat, postea det tiratorium falconi, inuitans ipsum vocibus consuetis ad mordicandum, deinde ponat pedem suum in stassa sellae, accipiens arcum sellae anteriorem cum manu sua



sua sinistra, super quam iam non est falco, posteriorem autem cum dextra super quam est falco, et postea firmet se super staffam sellae et ascendat, et antequam mittat crus suum dextrum ad aliam partem, remoueat dextram manum super quam est falco, de arcu sellae, et sedeat super sellam. Hoc modo enim non laedetur falco in ascensu falconarii super equum, et multo minus se inquietabit ex tali modo ascensus, et si se inquietabit, minus periculum erit sibi. Si vero falconarius assumpsit falconem de sede super manum dextram, et velit ascendere super equum a parte dextra equi, transmutet falconem ad manum suam sinistram et faciat e conuerso; quando etiam transmutabit falconem de vna manu ad aliam, quatenus cum minori periculo possit ascendere, vt diximus, oportet quando ventus erit, quod caput equi opponatur vento, et si non transmutat vt diximus, oportet quod cauda equi opponatur vento: nam his modis veniet ventus contra pectus falconis, quod autem ventus superueniat contra pectus falconis, dum ascendit super equum, melius est, minus namque inquietat se falco, si ventus veniat ex opposito ante ipsum, quod si falconarius aliter ascenderet super equum, verbi gratia, si cum manu cum qua portat falconem apprehenderet arcum anteriorem sellae, aut collum aut comam equi, vt plures faciunt, ascendendo posset falco intercipi inter pectus falconarii, et arcum sellae anteriorem, vel collum equi, aut falco per motum colli equi posset pauescere et se diuerberare aut aliter inquietare. Amplius, si falconarius teneret falconem super manum, et ita apprehenderet collum equi, aut arcum anteriorem sellae, facies falconarii directe supponeretur faciei falconis, vnde magis timeret falco, et haberet maiorem materiam diuerberandi, et si falco diuerberaret se super collum equi, accidere posset, quod equus ex motu falconis timeret et fugeret, et ex hoc sequeretur maior inquietatio falconis, et falconarius facile posset cadere. Est ergo melius ascendere super equum cum falcone, eo modo quem diximus. Ad hoc autem datur tiratorium falconi, dum ascenditur super equum, quod falco qui agrestis est, et nondum assuetus equo, neque ascensui falconarii in equum, facile diuerberaret se, si ascenderetur tiratorio non dato sibi. Est itaque dictus modus, quem debet falconarius habere in ascendendo cum falcone super equum. Amplius falconarius postquam erit eques, cum falcone equitet suauiter, et ad loca de quibus minus possit timere falco, etenim falco qui nouus est, ad motus equi et falconarii super equum posset de facili perterreri, ad ipsos scilicet motus equi dueros et incognitos, et ad loca forinseca, et ea quae sunt in eis. Loca vero ad quae poterit equitare cum falcone, huiusmodi sunt, in quibus non sunt vallones, neque syluae, neque aquae multae, neque currus, neque multitudo hominum, aut animalium aliorum, aut frutices, aut dumi, de quorum omnium sonitu, quando equitatur per ipsa, timet falco, de quibus omnibus iam dicetur plenius, scilicet in causis propter quas diuerberat aut inquietat se falco.



## CAPITVLVM LXXII.

*De portatione falconum non mansuefactorum de regione in regionem, horis, temporibus, et locis conuenientibus ad portandum.*

**D**ictum est quomodo mansuefiant falcones in domo et extra domum sine capello, quos non est opus portare de regione in regionem priusquam sint mansuefacti . . . quos opus est portari; falco namque qui nouiter captus est et ciliatus, priusquam portetur de regione ad regionem, assuescat comedere, et cognoscere sonos inuitantes ad escam, et interim dum assuescit ad haec, debet tractari huc et illuc, saepius quam si non esset transferendus de regione ad regionem, quatenus minus se inquietet ad transportationem quae fiet sibi. Cum etiam omnes falcones, et plus qui capiuntur syluestres, capiantur in aestate autumno et vere, vt dictum est supra, nam pauci ex incidenti capiuntur in hyeme; Si erit de illis qui capiuntur aestiuo tempore, debet portari per noctem, maxime in calidis regionibus, in nocturno enim tempore non possunt sentire splendorem aëris, quem splendorem in die sentiunt, quamuis sint ciliati, et per noctem non audiunt cantus auium, quarum aliquas rapere consueuerunt, ad quas se inquietant, nec audiunt aliquid vnde timere debeant, et naturaliter falcones pigriores in nocte efficiuntur, et libentius quiescunt, sicut et caeterae aues, et aër noctis minus calidus est, quam aër diei; omnia enim quae dicta sunt, si per diem portarentur, essent eis causae inquietationum et diuerberationum, quare minus conuenienter et difficiliter portarentur. Si tamen esset opus portare ipsos per diem, surgat falconarius summo diluculo, et portet falconem donec calor incipiat, et in calore permittat ipsum quiescere, et si oporteat ipsum portare dum calor erit, aspergatur frequenter cum ore aqua frigida, vt dictum est supra, quando etiam portabitur in calore diei, dabitur sibi pastus in via, et madefactus in aqua frigida, non dabitur totus vna vice, sed distribuetur pluribus vicibus, vt defendatur ab inquietationibus et diuerberationibus suis: quod si totus pastus daretur eis vna vice, nocium esset digestionem eorum, propter motum qui fit in portando: madefactionem autem carniū in aqua frigida conuenit fieri, pro eo quod omnes aues rapaces et falcones praecipue, calidi sunt et sicci, vnde si in feruore aestatis per diem portarentur, cum agrestes sint, necessario inquietarent et diuerberarent se, et sic calefierent et desiccarentur magis, quapropter si darentur eis carnes non madefactae in aqua frigida, adurerentur, et esset occasio morbi, propter hoc dantur eis carnes in frigidatae et humectatae in aqua frigida, ex eis enim sic praeparatis, resistitur caliditati et siccitati acquisitae per inquietationes. Hic ergo est modus portandi falcones qui capti sunt nouiter per aestatem; si autem erunt capti nouiter in autumno, et deportari debeant, quamuis tempus autumnī minus sit calidum, quam tempus aestatis, conuenientius portabuntur per noctem propter plures causas ex his quas diximus. Si vero opus erit portare per diem autumnī, faciat quaecumque



cumque diximus facienda in die aestatis, si viderit esse tempus. Si autem per hyemem portari debeant, portantur conuenientius per diem quam per noctem, cum nox multo magis sit frigidior quam dies, vbi non timeretur de inquietationibus suis quas facerent eo quod sentirent splendorem aëris. Vnde cum magis timendum sit de inquietationibus diurnis, quam de frigore nocturno, melius portabuntur de nocte hyemis, quam per diem. Quando autem in nocte hyemis portari debebunt, non eligatur nox serena, nam serenum noctis in hyeme conueit esse frigidius, et maxime in frigidis regionibus. Et quando per diem portari debebunt, serena dies congrua est sine vento magis et nubilo, et nubilesa dies sine vento et frigore: quamuis enim claritas aëris nociua sit, propter id quod dictum est, tamen calor per splendorem solis intenditur, qui prodest falconi in hyeme, idcirco tantum uti magis debet tiratorio in hyeme quam aestate, cum hyeme non sint irrorandi, vnde et falconarius non summo diluculo surgat in hyeme, sed orto iam sole. In regionibus autem frigidis, siue per diem, siue per noctem hyemis portare oporteat falconem, falconarius habeat chirothecas pilosas deforis in manibus, super quas sedeant falcones, per hoc enim habebunt pedes calidiores, et exinde totam personam, et minus laedentur a frigore. Quando etiam capti sunt in vere, et portari debent de regione ad regionem, faciendum erit in omnibus fere quemadmodum in autumnno, ver enim aequale tempus est et autumnus, quamuis non tantum aequalis. Ex praedictis itaque sequitur, quod in omni tempore nox est conuentior ad portandum falcones de regione in regionem. Tempus vero hyemis, siue per diem siue per noctem portari debeant falcones, minus conueniens est caeteris temporibus: nam per noctem est nimia frigiditas, et per diem inquietabunt se ad splendorem diei, nec potest subueniri eis ex aqua frigida, irrorando, multum enim infrigidantur, et asperitas temporum plus abundat in hyeme quam aliis temporibus. Aestate etiam minus conuenienter portantur quam vere et autumnno, nam si per diem aestatis portabuntur, intensus calor erit eis nocius, si vero per noctem, et habeat facere longum iter, non poterit iter suum perficere priusquam superueniat calor diei sequentis, praecipue in frigidis regionibus, in quibus noctes sunt multo breuiores quam in calidis. In vere autem melius est quam in autumnno, pro eo quod veri subsequuntur dies meliorum qualitatum, quam subsequuntur in autumnno. Qualitates autem aëris magis conuenientes ad portandum falcones in die, sunt hae: nebulosum tempus, nebula densa, et sine vento, conuenientius est, et tanto amplius quanto nebula densior est, tali namque tempore minus se inquietant et diuerberant, quoniam pigriores efficiuntur ex eo, et minus sentiunt de splendore diei, tempus nubilum, pluuiosum pluuia minuta, et sine vento, etiam in die bonum est, quoniam pennae falconum madefiunt, et propter rationes praedictas etiam bonum est tempus nubilum, sine vento et non pluuiosum bonum est, quamuis non tantum quantum praedictum. Huiusmodi siquidem tempora praedictarum



qualitatum, bona sunt et conuenientia, per ver aestatem et autumnum, et per hyemem etiam haec eadem tempora conuenientia sunt, praeterquam pluuiosum. Tempus grandinosum in omni tempore anni nocuum est, quoniam grandines percutiunt falcones, et raro accidunt grandines sine valido vento. Tempus pluuiosum pluua grossa, pro eo quod cum semper sit ventosum, malum est, et quoniam madefacit falconem plus debito. Tempus niuosum in autumnno et vere minus malum est, grandinoso et pluuioso, si est sine vento. Si tamen haec tempora mala incidant falconario equitanti, et viderit quod tempus transire cito debeat, recommendet se vel ad arborem, vel ad alium locum, quousque transeat, et si non, protegat et defendat falconem, cum persona sua et galero suo quanto melius poterit, approximando falconem pectori suo, et opponendo se inter falconem et malum tempus, et si deuenierit ab anteriori, vertat tergum suum contra malum tempus, et quousque pertranseat, si non habebit ubi se recommendet. Sed quia non potest esse, quin aliquando portetur in tempore ventoso, quod generaliter malum est, et vnus ventus peior est alio, oportet dicere qui venti deteriores sint aliis. Omnes autem venti qui veniunt a tergo falconarii minus mali sunt caeteris, quoniam falco defenditur ab illis per oppositionem falconarii, siue super dextram siue super sinistram portetur falco, anteponenda enim est manus cum falcone pectori falconarii, et si superueniant grandines, vel pluua grossa, non nocebunt ei, cum pertranseant dorsum falconis, pectore falconarii anteposita, non tangentes falconem propter oppositionem personae falconarii, et venientes a tergo debiliores fiunt, ex eo quod falconarius cedit eis in suo incessu, inde est quod ille ventus qui venit per medium dorfi falconarii, minus malus est aliis venientibus a tergo. Omnes autem venti venientes ab anteriori parte, deteriores sunt omnibus aliis, quoniam ex incessu falconarii contra huiusmodi ventos, fit eorum fortitudo maior ex alterutra percussione hominis ad ventum, et e conuerso, et quoniam falco non potest habere aliquam defensionem a falconario contra huiusmodi ventos, vnde ille ventus qui veniet ad medium pectoris, deterior est caeteris venientibus ab anteriori. De omnibus vero ventis venientibus a quouis laterum falconarii, ille qui magis appropinquabit venientibus a tergo falconarii, minus malus erit inter collaterales. Contra collaterales autem dextros, potest subueniri transmutando falconem ad sinistram, quatenus ventus non veniat a tergo falconis. Contra collaterales sinistros e conuerso, et ideo anteriores venti deteriores sunt collateralibus et posterioribus, cum neque possit subueniri per transmutationem falconis de manu in manum, neque ex oppositione personae, cum adueniat ex opposito ante hominem.



## CAPITVLVM LXXIII.

*De locis.*

**L**ocorum etiam quaedam sunt deteriora, aliis: in omni enim tempore per syluam melius est portare falconem; nam siue calor sit, siue frigus, siue ventus quicunque, siue grandines, siue niues, siue pluuiae, minus molestabunt falcones, dum portabuntur per syluam, et syluam dicimus quae sit de arboribus altis. Loca plana sine vento bona sunt, cum vento vero meliora sunt vallosa loca planis, quoniam ventus minus potest in conuallibus: colles vero et alta loca, tempore ventoso deteriora sunt, pro eo quod venti perflant alta magis, nemorosa et fruticosa loca mala sunt, propter sonum quem faciunt rami ex gressibus equorum, et non possunt defendere falconem a vento et pluuia, neque a calore, neque ab aliis: nemora dicimus de minoribus arboribus. Aquosa vero loca mala sunt propter sonitum aquae, praecipue cum falcones timeant aquam. Per ciuitates et villas non esset malum, nisi timeretur de transitu et caeteris sonis animalium, aliarumque rerum. Si autem falco qui debet portari de regione in regionem, ad tantam mansuefactionem sit deductus, quod relaxata sit ei ciliatura priusquam portetur, debet totaliter ciliari, quatenus dum portabitur, non videat causas per quas possit se inquietare, et postquam erit ciliatus, portetur, et fiat ei secundum quod de ciliato dictum est supra. Et si falco qui debet portari de regione in regionem ad tantam mansuefactionem sit deductus, quod totaliter sit deciliatus, priusquam portetur debet ciliari vsque ad medietatem oculorum, quia si totaliter ciliaretur, rediret ad suam priorem agrestitatem, et perderetur totum illud ad quod iam mansuefactus erat, et si non ciliaretur, inquietaret et diuerberaret se tantum in via, quod esset nocium ei. Postquam ergo erit ciliatus vsque ad medietatem oculorum, portetur, et fiat ei quod fiebat praedictis, et tanto plus subueniendum erit ei cum tiratorio et aliis, quanto ex eo quod aliquantulum videt, magis habet occasionem diuerberandi, se et inquietandi plus quam praedicti qui sunt ex toto deciliati. Si autem iter tam longum sit quod non possit durare ciliatura, et oportet ipsum pluries capi ad ciliandum, et pluries ciliari si ciliatus portari debet, pro eo quod ex frequenti ciliatione et ex frequenti captione fieret agrestior, et magis odiret hominem, et palpebrae vastarentur, expedit quod in portando mansuefiat, et fiant ei caetera quae fiebant in domo per aliquot dies, et tunc relaxetur ciliatura, et per aliquot dies portetur semideciliatus, et mansuefiat vsquequo totaliter decilietur, deinde portetur totaliter deciliatus et mansuefiat per viam: Quamuis hic modus non sine difficultate fiat, et non sine fatigatione falconis, cum non arte sed vi fiat, cum non possint sibi fieri ea quae fiebant ei in domo, nec eo ordine. Sed quando necesse erit fieri vt portetur, fiat sic: quod falco deciliatus portari debet in nocte, aliquot diebus, deinde falconarius surgere poterit ante diem, et portare ita falconem quod perueniat ad locum in quo ho-



spitari debet in aurora, et gradatim aliis diebus sequentibus, poterit ipsum portare cum maiori claritate diei, quousque secure possit eum portare per diem. Sed siue per diem, siue per noctem portari debeat deciliatus, habeat semper tiratorium paratum defendere ipsum ab inquietationibus et diuerberationibus, quoties erit necesse. Et licet portare per sylvas aut per valles sit conueniens ciliatis, pro eo quod non inquietant se ex illis causis, cum non videant: tamen deciliatis non conuenit portari per syluam nec per valles, cum naturaliter odiant esse in syluis et vallibus, semper enim alta petunt, vt videant a remotis. Et si falco qui debet portari de regione in regionem ad tantam mansuefactionem sit deductus, quod in omnibus aliis iam sit mansuefactus, praeterquam in loyro et caeteris quae sequuntur, portetur deciliatus temporibus debitis, siue sit nidarius, siue ramagius, et cum tiratorio et caeteris quae diximus praeseruentur ab inquietationibus et diuerberationibus.

### CAPITVLVM LXXIV.

*De inquietationibus et diuerberationibus, quas facit falco super manum, sedilibus, perticis, et signis ipsarum.*

**F**alco qui non erit mansuefactus secundum ordinem et secundum modum quem diximus, faciet haec signa in principio suae assuefactionis, et faciet eadem etiam diu post principium: quando falconarius accedit ad tollendum ipsum desuper perticam altam, falco distringit pennas et plumas ad se, et etiam applanat et distringit ad se plumas capitis, excutit se contra falconarium, insigit intuitum suum in visum eius, et quanto falconarius magis approximat, tanto amplius distringit ad se plumas, et exacuit se falco versus falconarium, et ex quo falconarius iam proximus erit vt extendat manus suas ad dissoluendum falconem, vel quando iam extendit, ad hoc falco diuerberat se per longum perticae, aut ex alia parte perticae, quaerens diffugere ab homine. Et si de pertica ima, aut sedili tolli debeat, facit eadem signa, et tanto amplius, quanto magis timet in sedilibus imis a rebus superuenientibus ei. Postquam iam est resumptus super manum, facit haec signa: respicit faciem portantis, et facies approximantium ei ab anteriori, et multo magis approximantium a posteriori, quaerens inquietare se, aut diuerberare, et vix aut nunquam stabit super manum plumis lassis, tenet enim eas semper districtas, raro erigit vnum pedem, vt saepe accidit bene mansuefactis, raro perungit se, raro perquirat pennas suas rostro, et raro excutit se super manum, diuerberat se deorsum et retrorsum, et aliquando exclamat, et facit caeteras malas diuerberationes quas diximus, et quando retrahitur super manum, respicit faciem portantis, quando autem pascitur, aliquoties mordicat carnes postea respicit faciem portantis, et aliorum circumstantium, et si nulli circumstant, respicit circumcirca. Et quotiens homo cum ipso ascendit in equum, inquietat se et diuerberat, et dum



dum portatur ab equestri, timet multum ab omni causa, de qua debet timere falco, et quando descendit cum ipso falconarius de equo, inquietat se et diuerberat. Vix vnquam balneabit se si falconarius stabit sibi propinquus; postquam autem balneatus erit, vix poterit tolli super manum quando se diuerberat, etiam cum tiratorio, cum omnis falco postquam est madefactus, minus velit tiratorium, quamuis sit carnosum. Qui autem ab huiusmodi vitio emendari debet, sic emendari debet contra ea quae facit.

### CAPITVLVM LXXV.

*De remediis faciendis contra inquietationes et diuerbationes falconum, super manu, sedilibus et perticis.*

**R**emedium contra ea, quae facit falco super sedes, est hoc: Falconarius debet saepe requirere falconem cum tiratorio carnosum, et offerre sibi tiratorium, et non debet approximare perticae, neque sedi sine tiratorio, et quando tollere debet falconem, tollat ipsum cum tiratorio, eo modo qui praedictus est, hoc autem faciat falconarius quousque falco iam non timeat de ipso, sed affectet videre ipsum. Remedium ad ea quae facit super manum est, quod falconarius non aspiciat in faciem falconis ex improviso, sed porrigat saepe sibi tiratorium super manum; et vt falco assecuret se ad videndum faciem portantis ipsum, quoties ipse volet intueri falconem, ponat tiratorium inter faciem suam et faciem falconis, vt falco accipiat tiratorium versus faciem hominis primo longius, deinde proximius, nam sic saepe faciendo, propter tiratorium assuescet ad diligendam faciem, de qua timere solebat. Remedium contra ea, quae facit quando ascenditur super equum est: quod detur sibi tiratorium quoties ascenditur super equum, et falconarius ascendat super equum quanto suauius poterit, illo modo qui dictus est supra. Contra vero ea quae facit super manum equitantis, est, quod falconarius sit sollicitus et attentus, percipere omnia de quibus timere potest falco, et porrigatur tiratorium falconi priusquam perueniat ad causam timoris, in descensu etiam de equo, porrigatur sibi prius tiratorium carnosum. Contra inquietationes et diuerbationes, fiat secundum quod dictum est supra. In balneando vero fiat quicquid dictum est, blandiendo ei cum tiratorio scilicet et cum aliis, quae dicta sunt, quousque assuescat ad balneandum se prope hominem. Illi autem falconi qui male mansuefactus est, vt timeat de facie hominis, et de aliis rebus supradictis, et tamen bene portatus est, ciliantur oculi, et fiat quicquid supradictum est in cap. assuefaciendi falconem ad videndum faciem hominis et ad caetera. Illum autem qui bene portatus est, et male mansuefactus, tantum quod timeat de facie hominis et de caeteris, et etiam defatigatus est ex longo itinere, oportet ciliare aut totaliter aut vsque ad medietatem oculorum, secundum agrestitatem quam habebit: nam si multum erit agrestis, totaliter ciliabitur, si parum erit agrestis,



agrestis, ciliabitur vsque ad medietatem oculorum, et debet poni ad quiescendum super sedem inam, faciendo ea quae diximus, nam si macer est debet impinguari, non tamen quod per pinguedinem redeat ad agrestitatem, et postquam sufficienter quieuerit, mansuefiat eo modo quem exigit agrestitas sua. Illum autem falconem qui non est male mansuefactus, neque timidus ad faciem hominis, et ad caetera, sed tamen eo quod portatus est longo itinere, et quandoque est de illis qui naturaliter se diuerberant, est fatigatus, debemus ponere in domo obscura ad quiescendum, et si per hoc non cessabit ab inquietationibus suis, neque quietem recipiet, debet ciliari, et debet ei succurri diuerberationibus suis factis et faciendis quemadmodum dictum est. Illi autem qui naturaliter diuerberant se, multum defatigantur plus longo itinere quam caeteri: nam ex itinere et ex suis diuerberationibus se multum fatigant, et hoc accidit pluribus ex eo, quod a principio mansuefactionis fuerunt nimis macrefacti.

## CAPITVLVM LXXVI.

### *De signis falconum male portatorum.*

**F**alco vero qui per longum iter male portatus est, vel diu male portatus est, facit haec signa: tenet alas demissas, cauda non descendit in directo dorso, appodiat se super manum cum cauda sua, et verberat manum cum cauda, cauda facit gibbum in loco in quo continuata est dorso, non tenet pennas caudae reollectas inuicem, neque coadunatas, non tenet pedes aequaliter distantes, firmat se super vnum pedem plus quam super alium, stringit cum pedibus manum portantis, si commoueatur manus super quam est, non audet commutare pedes suos, sed apprehendit striccius manum, timens ne cadat, excutit se, et diuerberat debilitate, non flagellat alis, sed extendit quandoque vnam alam, quandoque aliam, quandoque ambas, et crura similiter, tenet oculos lassos, et claudit quandoque vnum, quandoque ambos. Haec sunt signa quae facit super manum, et similia facit quando sedet super perticas aut sedile; plures diuerberationes et inquietationes erunt in falcone, qui consuetus erat bene portari, quando stabit super manum mali portatoris, quam in illo falcone qui semper male portatus est, quando stabit super manum mali portatoris: ille enim tanquam non vsus malo portatore, nescit esse super manum mali portatoris, et facit omnia supradicta, et diuerberat se, quamuis sit de illis falconibus qui naturaliter parum se diuerberant, et diuerberando deiecit se de manu mali portatoris, quoniam non libenter stat super manum eius. Hic autem tanquam deuictus et defessus, et vsus malo portatore, sustinet sua mala. Signum autem certum et euidens, quod falco diuerberat se et inquietat, ex malo portamento est, quod quando redit de manu mali portatoris ad manum bene portantis, excutit se super manum boni portatoris, et quiescit postmodum in ea, quemadmodum de manu bene portantis ad perticam vel ad sedile, excutit



cutit illic se, per quod excutere innuit quod membra quae erant defatigata reaptat, et pennas collocat quae fuerant desiccatae ex malo portatore, in pertica etiam aut sedili facit hoc idem libenter pro eo, quod pertica et sedile firmiora sunt sibi, quam manus quaecunque. Illi qui male portatus est, et tamen adeo est bene mansuefactus, quod non est timendum neque de facie hominis, neque de aliis rebus supradictis, remedium fiet hoc modo: non debet ciliari, cum non inquietet se neque diuerberet, sed utile est quod ponatur ad sedendum et quiescendum, et ad maiorem cautelam in domo non clara, et super sedem inam, et in hyeme ponatur palea, aut foenum, aut aliquod molle super terram, circa sedem, et in aestate sabulum ut quiescat desuper, et ut pennae saluiores sint et pedes, et dum est in domo obscura, falconarius visitet ipsum frequenter, blandiendo ipsi cum tiratorio, ne per obscuritatem domus, et per absentiam hominis posset redire in agrestitatem, vnaquaque vero vice quando debebit pasci, trahatur de domo obscura et pascatur inter homines, ut permaneat in mansuetudine sua, et si fuerit nimis macilentus, dentur sibi carnes, et impinguetur, non tamen tantum, quod per pinguedinem possit redire ad suam agrestitatem pristinam, si enim impingueretur tantum quod nollet tiratorium, defatigaret se multum, et non proficeret sibi quies, quae data fuerat ipsi, et si non est nimis macilentus, sed est in eo statu, ad quem reduci deberet si esset macer, non impinguetur, sed teneatur in eodem statu, et caveatur sibi a malo portatore, nam si rediret ad malum portatorem, rediret in peius, et non proficeret ei quicquid factum sibi fuisset. Falco vero qui captus fuit syluester, vel etiam falco nidarius, si male portatus est et male mansuefactus, in tantum quod inquietationibus suis fuerit debilitatus, et quasi deuictus, quod accidit pro eo quod non fuit ciliatus a principio, et per malum portatorem, ut ad aliquam bonitatem redeat, debet ciliari, et ponendus est ad quiescendum in domo obscura, super sedem inam, et debent dari sibi bonae carnes, et permittatur quiescere tanto diutius quanto magis est fatigatus, et postquam sufficienter steterit in quiete, debet tractari iterum suauiter, tanto plus, quanto magis male mansuefactus erat. Quandocunque etiam videbitur quod falco male portatus, aut diu, et per longum iter, faciet signa volendi ire ad sedendum, quae maxime facit circa sero, non detineatur super manum, sed priusquam se diuerberat aut aliter inquietat ad hoc, ponatur ad sedem, et permittatur quiescere, et reparare sibi vires per quietem super sedem suam. Signa autem haec dicta sunt in capitulo diuerberationum, quas facit falco dum mansuefit in domo, illic requirantur, et qualiter subueniendum est eis. Omnes autem hi falcones, postquam steterunt sufficienter in quiete sua, facient haec signa: tenent oculos alacres et rotundos, tenent alas altas, et in loco debito, tenent pennas suas collectas ad corpus suum, stant erecti super pedes suos, sunt veloces ad motus suos, excutunt se fortiter, flagellant rigide et saepe et fortiter, et quando videbuntur haec signa, possunt mansuefieri, unusquisque secundum id quod ex-



igit, eo modo quem diximus supra, perungunt se saepe, et perquirunt pennas rostro saepe.

### CAPITVLVM LXXVII.

*De mansuefactione falconum cum capello, a quibus gentibus capellum fuit inuentum.*

**H**ucusque dictum est quomodo falcones mansuefiunt sine capello: nunc dicatur quomodo mansuefiendi sint cum capello, vt audito de vtraque mansuefactione, quae fit cum capello et sine capello, eligatur modus ille qui magis placebit. Quare autem prius dictum fuit de illa mansuefactione quae fit sine capello, diximus supra, scil. quoniam est antiquior penes nos qua habita, facilius haberi poterit illa quae fit cum capello, quam e conuerso. Dicendum est itaque de capello a quibus sumpserit exordium, et quid est capellum, et qualis debet esse forma boni capelli, et qualis est vsus capelli circa falconem agrestem. In quo attendendum est, primo quid faciendum est falconi, priusquam imponatur sibi capellus, quando et vbi incipiendum est sibi imponere capellum, qualiter imponendus est, quas defensiones facit falco contra capellum, quid faciendum est contra illas defensiones, quos modos inquietationum facit postquam impositus est sibi capellus, quid faciendum est contra illas inquietationes, et maxime quomodo cauendum ne eiiciat capellum sibi impositum, per quae signa cognoscitur quod velit tolerare capellum, qualiter remouendus est capellus, quibus de causis, et quando debet carere capello, qui falconum assuefiendi sunt ad frequentem impositionem capelli, et ad frequentem extractionem, et qui non, quando relaxanda est eis ciliatura, aut ex toto tollenda, et quando foris assuefiendi sunt ad capellum a pedestri, et postea ab equestri, quod non solum agrestis, sed etiam mansuetus ad capellum, inquietat se pro capello, propter falconarium imperitum circa vsus capelli, et propter malam formam ipsius capelli, et quando mutatur de vno capello ad aliud, et quid faciendum est contra haec, quomodo cognoscetur de falcone nouiter habito, an fuerit vnquam assuefactus ad capellum an non, et si assuefactus fuerit ad capellum, an per peritum falconarium in vsu capelli, an per imperitum, et si per imperitum, assuefaciendus est iterum per peritum, de vsu capelli circa falconem portandum de regione in regionem, in quo est diuersitas ab illo vsu qui fit circa falconem non portandum de regione in regionem, de capello in quibus communicat cum tiratorio, et in quibus differt, quae sunt vtitates capelli.

Capellum autem sumpsit exordium ab orientalibus gentibus. Arabes enim orientales priusquam aliae gentes, de quibus nouimus, aliqui vsi sunt capello circa mansuefactionem falconum, et eorum quae sunt de genere falconum; et nos quando transiuimus mare, vidimus quod ipsi Arabes utebantur capello in hac arte.

Reges



Reges namque Arabum mittebant ad nos falconarios suos peritiores in hac arte, cum multis modis falconum: praeterea non negleximus ad nos vocare expertos huius rei tam de Arabia, quam de regionibus vndecunque, ab eo tempore scilicet in quo primitus proposuimus redigere in librum ea quae sunt huius artis, et accepimus ab eis quicquid melius nouerant, sicut diximus in principio, Vnde quoniam vsus capelli erat vnum de melioribus quae sciebant, et vidimus vtilitatem magnam circa mansuefactionem falconum in illo, exercuimus mansuefactionem falconum cum capello, et vsum capelli sic approbatum a nobis moderni nostri citra mare habuerunt, quare dignum esset a posteris non relinqui.

### CAPITVLVM LXXVIII.

*De capello et forma ipsius, de materia ex qua fit, et qualiter fiat.*

**E**st autem capellus quoddam formatum de corio, secundum formam capitis falconum, ad continendum caput ipforum vsque ad collum, rostro et naribus exclusis ab eo; de corio vero conuenientius fit, quod neque nimis sit durum, neque nimis molle; proportionatum vero debet esse formae capitis falconum, vt caput conuenienter contineat. Caput continere debet ne falco videat, rostrum et nares excludantur, vt sine impedimento falco possit anhelare, amplum debet esse super caput, vtrinque ab oculis elongatum, sub collo vero strictum, amplitudo vero superior non permittit oculos comprimi, et strictura inferior non permittit capellum facile cadere de capite, non tamen sit tantum strictum quod caput falconis non possit intrare, nec post introitum caput plene continere. Pars vero capelli, quae tegit sinciput falconis, perforata sit vno foramine, per quod foramen exhibit rostrum et nares solummodo, quod foramen debet esse largum seu strictum iuxta grossitiem rostri. Pars autem illa capelli quae teget verticem capitis, perforata sit vno foramine vel pluribus, quae foramina ad haec sunt vtilia, quod capellus non possit multum calefacere caput, et quod vapores ascendentes ad caput, exeant plenius. Haec autem foramina addidimus nos priori formae capelli, attendentes vtilitatem ipforum, quando enim capellus carebat foraminibus istis, et remouebatur capellus de capite falconis, caput quod fuerat calefactum sub capello, expositum post extractionem capelli, aëri frigido, rheumatizabat, et non solum rheuma inde accidebat falconibus, sed alii morbi capitis quam plures, qui morbi non tam saepe acciderunt falconibus postquam capellum fecimus desuper perforari, nec, imposito capello aut remoto, fuit tam subita mutatio in falcone de calore in frigus, aut econtra. Pars vero extrema capelli, quae tegendo occiput tendit ad collum, desuper tendat vtcunque in acutum versus extremum sui, cui adiungatur corrigiola vna stricta de corio tenui et molli, tantum longa quod sufficiat descendere per dorsum inter ambas alas vsque ad extremitatem pennarum caudae; talis debet esse forma capelli. Ea autem quae falconarius debet facere circa



falconem, antequam imponat sibi capellum, sunt: vngues hebetare, iactos et campanellam imponere, ipsum ciliare, et super manum erigere, quae nisi prius circa falconem fierent, valde difficile esset falconem mansuefieri ad capellum. Quando autem debeat falconi capellum imponi, diuersi sentiunt diuersimode; quidam enim dicunt quod falconi agresti postquam captus est et ciliatus, et de malleolo remotus, et super manum positus, statim imponendus est sibi, capellus priusquam quoquo modo tractetur manu, vel aliquo alio circa rostrum, pectus et collum, et dicunt hanc rationem: falco agrestis, eo ipso quod captus est de nouo, adeo timorofus est, quod de facili imponitur sibi capellum, quia perterritus paucam aut nullam defensionem facit contra capellum, et ex illa prima impositione capelli assuescit capellum, et potest imponi sibi post, dum tamen cum eo quoquo modo pertractetur vsque ad impositionem capelli sequentem; et sunt quidam qui dicunt, quod falco ramagius statim ac captus est, in malleolo positus et ciliatus, adeo est ab homine alienus, et ad tractandum repugnans, quod multimodam defensionem facit contra capellum, et nullomodo sustinet imponi sibi capellum, vnde dicunt, non statim imponendum sibi esse capellum, sed prius aliquot diebus pertractandus et pertangendus manu, vel aliquo alio circa caput, collum et pectus, et postmodum imponendus est sibi capellus, quoniam tunc melius sustinebit. Nos vero dicimus, quod falconum quidam sunt ex captione et ciliatione adeo perterriti, praecipue sacri et laynerii, quod nullam defensionem faciant a principio contra capellum: et quidam sunt adeo iniqui et feroces, ex eo ipso quod capti sunt et ciliati, quod multimodam defensionem faciant contra capellum. Et discernuntur hi ab inuicem per has causas: Falco qui in principio quando est ciliatus et super manum positus, tenet pennas capitis et colli et totius personae constrictas ad se, et alas retractas ad dorsum, et pro tactu capitis et rostri non aperit ipsum rostrum, nec sufflat, nec commouet caput, nec horripilat pennas capitis et colli, perterritus est; et huic potest imponi capellus a principio priusquam tractetur manu, sed pauci inueniuntur de his. Falco vero qui contra facit supradictis, ferox est, et prius tangendus est, et tractandus manu vel aliquo alio circa caput, collum et pectus, donec scil. perdat apertionem rostri, et horripilationem capitis et colli, et postea capellus imponatur, quoniam recipiet tunc facilius capellum, ex hoc patet, quando potest falconarius incipere imponere capellum falconi.

### CAPITVLVM LXXIX.

*De loco in quo debet imponi capellus, et de opere falconarii in imponendo ipsum.*

**V**bi autem debeat incipere imponere capellum, sit domus non clara, nam si esset clara, quamuis ciliatus foret, tamen percipiendo claritatem, inueniretur



tur agrellis contra capellum; sit solitaria, in qua non audiat voces aut tumultus de quibus terreri posset, per quas difficilior esset ad capellum. Falconarius quando debet imponere falconi capellum, taliter faciat: teneat iactos falconis strictius et curtius, quatenus falco stet firmus super manum, quando imponetur sibi capellus, sustineat autem capellum a duobus digitis suis, indice scil. et medio, quod pars capelli debens superesse occipiti, iaceat super ipsos digitos a parte intrinseca eorundem digitorum, et foramen vnde exhibit rostrum, stet superius, et pollex ponatur super partem capelli prope foramen vnde exhibit rostrum, ita quod illud foramen non sit inter pollicem et indicem, et corrigiola capelli pendeat ab interiori manus ad extrinsecum, ita quod duo digiti quos diximus, sint ex vno latere corrigiolae, et alii duo ex alio, et tunc quando debet imponere capellum, debet erigere, manum sic tenentem capellum ante faciem falconis, taliter quod id vnde debet intrare caput, veniat ante faciem falconis, et sic visetur, quod intrante capite, rostrum sine impedimento intret foramen, quod pro ipso factum est, et caueatur ne pollex intret foramen ipsum, quia non posset imponi capellus. Item cum duobus digitis inferioribus qui non sustinent capellum, scil. cum medio et auriculari, retineat falconem, ne imponendo capellum impelleretur falco ad posterius, ex hac namque impositione, aut se inquietaret, aut ad posterius caderet de manu, etsi pluries sic accidat quod impellatur, quandocumque debet imponi capellus. Plures falconum non solum ad suauem impositionem capelli, verum etiam ad solum visum huius capelli refugient et retrocadent, ideo imponitur adeo suauiter capellus quod falconem non taedeat, quoniam ex illo taedio, vt diximus, assuesceret se inquietare, quoties videret deberi poni sibi capellum, et ex hoc ipso hominem magis odiret. Corrigiola vero capelli quae tenebatur inter duos digitos inferiores manus, et alios duos digitos qui sunt supra illos, debet conduci suauiter per medium dorsi inter alas, et descendat inter alam forinsecam et caudam, ita quod cauda remaneat inter corrigiolam et hominem, et extremitas corrigiolae infra digitos recipiatur, manu tenentis falconem ab extrinseco digitorum, et hoc quando timetur ne falco expellat capellum de capite, propter hoc teneatur corrigiola inter digitos, et teneatur laxa, non tensa, quia si falco sentiret tensionem corrigiolae, inquietaret se, retorquens caput, caperet corrigiolam cum rostro et distraheret, aut quando crederet capere corrigiolam super dorsum, acciperet pennas suas, et deuastaret cum rostro, aut propter multam tensionem corrigiolae, excuteret caput frequenter, et deiceret se de manu. Iuuat etiam tenere corrigiolam inter digitos in hoc, quod si contingat capellum expelli de capite, quando falco scil. excutiet caput, aut scalpet se pedibus, aut aliquid aliud faciet contra capellum ipsum, capellus non poterit cadere in terram, corrigiola inter digitos retenta; veruntamen si falco suauiter sustineret capellum, et capellum adeo bene formatum est, quod non possit falco eiicere ipsum, melius est, non tenere corrigiolam, neque ponere ipsam inter spatulas



falconis, sed permittat ipsam descendere anterieus collateraliter collo. Est praeterea corrigiola utilis in hoc, quod cum eadem corrigiola capellum ipsum ligatur conuenienter ad perticam, et pendens seruatur ibi. Taliter imponendus est capellus, et taliter cum eius corrigiola operandum.

### CAPITVLVM LXXX.

*De inquietationibus et diuerberationibus et defensionibus, quas faciunt falcones in impositione capelli, et post impositionem ipsius, et qualiter succurratur eis.*

Cum autem impositio capelli in capitibus falconum, et retentio eiusdem in capitibus eorundem, sit eis insueta, horribilis et contra naturam eorum, necesse est quod plures falconum defendant se contra impositionem capelli, et quod inquietent se postquam capellus est eis impositus. Quidam non inquietant se; et quidam non defendunt se contra impositionem capelli, sed postquam est eis impositus, inquietant se multipliciter. Vtrique tamen pauci sunt, propter hoc expetit vt dicamus modos defensionum et inquietationum, quas faciunt pro capello, quatenus doceamus falcones cessare a defensionibus et inquietationibus suis. Defensiones igitur quas faciunt falcones contra capellum huiusmodi sunt: Quamuis sint ciliati aperiunt rostrum, sufflant, horripilant plumas capitis et colli, et etiam quamuis non videant, tamen statim quod sentiunt se tangi capello, faciunt ea quae diximus, quoniam ex tactu capelli habent quandam titillationem cum horrore; sed falconum aliqui faciunt has omnes defensiones, aliqui paucas ex his, et quidam diu perseuerant in faciendo has defensiones, quidam non. Illi igitur qui aperiunt rostrum, et sufflant et horripilant caput et collum, primitus debent tractari manu, vel penna, vel virgula, circa fauces, collum et pectus, vt assuescant ad tactus, et per hoc desinant apertionem rostri, sufflationem et horripilationem, capitis et colli, et sustineant sibi imponi capellum, et titillatio quam habent ex capello, non sit eis tam horrida, et posthaec assuescendi sunt ad frequentem impositionem et extractionem capelli, et frequenter debent tangi circa collum, rostrum et pectus, vt dictum est. Quando autem est eis impositum iam capellum, inquietant se hoc modo: excutiunt caput ad expellendum capellum, sufflant et strident, praecipitant se de manu vndecunque possunt, et per se non redeunt, sed si reponantur super manum, iterum praecipitant se, et si contingat quod stent super manum, stringunt eam pedibus, mordent iactos et chirothecas, et cum vno pedum suorum attentant accipere capellum, et quandoque accipiunt, per quas inquietationes facile possunt expellere capellum de capite suo. Et quidam falconum faciunt plures inquietationes, et quidam pauciores. In omnibus inquietationibus quas facient sub capello, cauendum est, ne per inquietatio-



tationes expellant capellum de capite suo, cauebitur autem hoc modo: corrigiola capelli recipiatur inter digitos, eo modo qui dictus est, et si excutiant caput, aut cum alterutro pedum accipere conentur capellum, aut scalpant se cum pedibus ad eiiciendum capellum, teneantur per iactos suos curtius et strictius, et apponantur digiti capello ante frontem, vt iuuent retinere capellum in capite, et reuoluatur manus super quam sedet, pro eo enim quod non sunt firmi super vnum pedem, oportet quod deponant alium, et sic cessabunt accipere capellum cum pedibus, aut scalpendo eiicere capellum. Si autem praecipitent de manu, et nolunt redire per se, reducantur ad manum, iuuando eos cum alia manu quoties haec fecerint, et si mordent, apponatur aliquid durum ante rostrum quod mordeant, nam per hoc cessabunt mordere. Istis tamen qui se multipliciter inquietant sub capello, deiiciendo capellum a capite suo, diu dimittendum est capellum, et non frequenter imponendum est sibi capellum aut promouendum: et dum tenent capellum, non debent tangi, ne per tactum incitentur ad inquietationes. Ex praedictis patet quid faciendum est falconibus, qui se defendunt contra capellum, et inquietant se sub capello. Et quid illis qui se defendunt contra capellum, sed non inquietant se, et quid illis qui non se defendunt contra capellum, sed inquietant se sub eo, post defensiones, inquietationes et diuerberationes multas, quas falco fecerit contra capellum. Signa quod falco velit tolerare vsum capelli sunt, quia ipse falco tenens capellum in capite, aliquando excutit se, et deinde aliquando perquirat penas et plumas suas, et aliquando perungit penas et plumas suas, et laxius stringit manum portantis cum suis pedibus quam prius faciebat, et quandoque dormit tenendo capellum, maxime quando diu vigilatum fuerit tenendo ipsum super manum, aut si fame scat aut si sit fatigatus; quando videbuntur haec, signum est quod falco velit tolerare capellum. Debet autem remoueri capellum de capite falconis taliter: apprehendatur capellum ante frontem falconis ex vtroque latere cum digitis, et non stringatur capellum in remouendo, nisi quantum sufficit ad extractionem eius, tollaturque de capite suauiter et non dure. Debet autem carere capello quoties debet pasci, et quoties dandum erit sibi tiratorium ad mordicandum siue ad beccandum, et quamdiu sedebit super sedile aut super perticam, et ad discendum exercitationem capelli, debet carere capello, vt quietius fideat, et melius quiescat, et quando balneandus est, et quando deiiciendus ad volandum, si aliquo modo inquietat se sub capello, non remoueat capellum a capite suo. Imo si contingat quod incipiendo remouere capellum quietus sit, sed in remouendo se inquietet, desistat falconarius, et non remoueat capellum, ne ex retractione quae tunc fieret, posset falco colligere malum vsum, dum enim aliquo modo se inquietat, si extrahitur capellum vt diximus, saepe faciet similem inquietationem, quaerens sibi remouere capellum. Ad frequentem autem impositionem capelli et ad frequentem exertionem, assuefaciendi sunt omnes illi falcones, qui se defendunt contra impositionem capelli, vt dictum



dictum est, et non illi qui se inquietant sub capello. Illi enim qui se defendunt contra capellum, frequenter imposito capello, et frequenter extracto, assuescunt rostrum suum et caput frequenter tangi cum capello, per quod perdunt titillationem quam habebant de capello. Aliis autem qui non se defendunt contra capellum, non est opus frequenter imponere capellum, nec frequenter extrahere. Falconi autem qui assuescitur ad capellum, non debet relaxari ciliatura, priusquam assuetus sit tantum ad capellum, quod nec se defendat ad impositionem capelli, nec se inquietet propter capellum impositum, et si contingeret quod deciliaret se priusquam assuetus esset ad capellum, iterum ciliandus est. Cum autem assuetus erit ad capellum, relaxari debet ciliatura, ut assuescat paulatim videre manum et capellum, et motum manus imponentis capellum: nam si falconi relaxaretur ciliatura priusquam assuetus esset ad capellum, accideret bene quod falco agresior fieret ad impositionem capelli, pro eo quod videret, quamvis non plene, et manum et faciem et caetera de quibus timeret, cum non videre consueuisset, et haec faceret si relaxaretur ciliatura, ante assuesfactionem eius ad capellum, multo magis faceret haec, et peiora, si deciliaretur totaliter et repente, ante mansuesfactionem eius ad capellum, addisceret enim multos modos inquietandi se et diuerberandi ad impositionem capelli. Relaxata itaque ciliatura ut conuenit, assuesciendus est falco semideciliatus ad impositionem capelli, quemadmodum assuesciebat ciliatus, fiet autem hoc modo: portabitur ad domum non claram, et in ea assuesciat ad frequentem impositionem et extractionem capelli, ut per obscuritatem minus videat et manum et faciem portantis, quas si videret, distorqueret caput quando deberet imponi sibi capellum, et aperiret rostrum, et aliter se inquietaret, quod totum faceret propter capellum, cuius signum est, quod imposito sibi capello, non iam inquietaret se sub eo, postquam autem factum erit hoc per aliquot dies in domo non clara, tantum quod falco semideciliatus iam sustinet impositionem et extractionem capelli, debet similiter assuesci ad capellum in domo aliquantulum clara, deinde in clariore, deinde portando ipsum foras, primo a pedestri postea ab equestri, et postquam erit hoc factum sufficienter, debet totaliter deciliari: et simili ordine et simili modo procedendum erit in assuesfaciendo deciliatum ad capellum, prius in domo, postea de foris, a pedestri et ab equestri: veruntamen quoniam sub aëre libero videt multa, quae in domo videre non consuevit, et recordatur agresstatis suae, quoties extrahitur sibi deciliato capellum, habet maiorem materiam inquietandi et diuerberandi se, quam in domo, propter hoc falconarius maiori studio sit attentus, ut prohibere possit inquietationes eius, et assuesfacere ipsum ad impositionem capelli. Hoc autem fiet melius, si porrigatur tiratorium quandoque falconi, et dum gustabit de tiratorio, et minus cauebit sibi, et minus se defendet, tunc falconarius imponens sibi capellum, et frequenter irroret ipsum aqua frigida, ut dictum est, et maxime in tempore dum etiam tenet capellum, et quandoque balneetur, sed tamen debet balneari sine capello.



capello. Hoc modo melius assuefiet ad capellum, deciliatus intus et foris, et melius cauebitur sibi a defensionibus et inquietationibus quas facit contra capellum. Non solum autem agrestis defendit et inquietat se, propter agrestitatem suam, contra capellum modis illis qui dicti sunt, sed et falco qui agrestis est, et ille qui iam mansuefactus est ad capellum, defendunt et inquietant se pro capello, si falconarius est imperitus in vsu capelli, et si capellum est male formatum, et si mutatur de vno capello ad aliud. Quandocunque igitur ciliatus falco, et semideciliatus, et ex toto deciliatus, assuefactus erit sufficienter ad capellum, non tamen propter hoc committendus erit alicui falconario imperito in vsu capelli, nam propter falconarium imperitum in vsu capelli, cum male ei imponat capellum et male extrahat, falco amittet omne quod primo bene didicerat ad capellum, et deinde difficilius erit assuefacere ipsum ad capellum, quam a principio: et si haec accidunt de falcone assueti ad capellum, propter malum impositorem, multo magis peiora accidunt falconi agresti, quando ab imperito falconario in vsu capelli assuefiet. De omni itaque falcone agresti vel assuefacto ad capellum, non est aliquatenus confidendum falconario imperito in vsu capelli. Si etiam capellum non fuerit formatum secundum formam capitis, vt diximus, falco defendet se contra ipsum, et inquietabit se sub ipso. Capellum vero male formatum premit falconem in aliqua parte sui capitis, et si premit in oculis, habebuntur signa ex his, quod falco propter hanc pressuram fricabit caput suum ad humeros, ex vtraque parte capitis, vel ex illa solum in qua est pressura, et capellum in parte interiori sui quae tangit oculum, humectatum erit ex aqua oculi: Si vero premit capellum rostrum falconis, signum habebitur ex hoc, quod falco tenens capellum in capite aperit rostrum, excutit caput, quasi volens euomere carnes, ducit ungues ad rostrum scalpendo se vbi dolet, et in parte superiore rostri apparet rubedo et tumor cum depilatione quadam, et inferiori parte rostri depilatio vtrinque circa fauces. Si autem in collo premat, signum est quod horripilat pennas colli, et videtur ingrossare collum suum, et semper attentabit expellere capellum cum vnguibus; propter malam formam huius capelli defendit et inquietat se falco multipliciter ad mutationem capelli. Falco assuetus ad capellum, quamuis capellum bene sit formatum ad quod mutatur, tamen inquietat se sub capello, aliquo modo inquietationis, quod cum faciat propter solam nouitatem capelli, non propter hoc desperandum est; modus enim inquietationis quem faciet sub nouo capello, non est similis modus inquietationis quem facit agrestis falco, nam agrestis et propter agrestitatem suam inquietat se ad capellum, cum nullius capelli vsum habuerit, et multo magis se inquietabit si de vno capello mutetur ad aliud, et tam agrestis quam mansuefactus ad capellum, si mutetur ad capellum male formatum, quam si mutetur ad capellum bene formatum. Remedium quod debet et potest fieri falconi contra imperitum falconarium in vsu capelli, est vt praediximus, quod neque falco incipiendus assuesieri ad capellum, neque iam mansuefactus ad capellum,



lum, committatur imperito falconario, et si per imperitum falconarium assuetus sit ad capellum, emendabitur vt dicemus paulo post. Contra malam formam capelli, non est nisi mutare ipsum ad capellum bene formatum, aut suum capellum emendare in eo quod male formatum est, ita quod non prematur ab ipso in aliqua parte. Bonam autem formam capelli docuimus in principio mansuefactionis fiendae cum capello. Contra mutationem capelli per quam inquietat se falco, sic erit faciendum: assuefiat falco a principio cum capello vfitato et bene formato, quod non oporteat mutare, et si necesse erit mutare, mutetur ad capellum bonae formae, et non malae, et caueatur quanto plus potest caueri, a mutatione capelli frequenti. De falcone autem nouiter habito, an fuerit vnquam mansuefactus ad capellum an non, et si fuerit assuefactus ad capellum, an per peritum, cognoscetur per haec signa: Ille falco qui non fuit assuefactus ad capellum, quando imponetur sibi capellum, permittet sibi imponi absque defensione, et postquam erit in capite suo, non sustinebit eum quiete, sed inquietabit se pro eo. Ille vero qui assuefactus fuit ad capellum, et per bonum impositorem, quando imponetur sibi capellum, nec defendet se ad impositionem capelli, nec inquietabit se sub eo, cum bene fuerit assuetus ad capellum; sed ille qui assuefactus fuit per malum impositorem, defendet se ad impositionem capelli, cum sciat quid sit capellum, et male fuerit sibi impositum, non tamen inquietabit se sub capello, cum assuetus fuerit tenere. In illis qui sibi permittunt imponi capellum absque defensione, et inquietant se sub capello, faciendum est sicut fieret quando a principio assuefierent ad capellum: in illis autem qui nec se defendunt, nec se inquietant sub capello, nihil faciendum est, ex hoc tamen cognoscitur quod bene fuerit assuetus ad capellum, quia nec se defendit nec se inquietat. In illis qui assuefacti sunt ad capellum per malum impositorem et imperitum falconarium, sic erit faciendum, ciliandi sunt iterum et tractandi suauiter, et capellum debet eis imponi quanto suauius poterit, vt dediscant malam assuefactionem ad capellum, et addiscant bonam, et debet relaxari ciliatura, et omnia debebunt fieri meliori ordine et meliori modo, quem diximus supra, et assuefiat ad capellum per peritum falconarium, et caueatur ne incidat in manus imperiti, et quod capellum bene sit formatum. Secundum ea igitur quae dicta sunt, debet mansuefieri falco ad capellum in domo et extra domum, qui non est portandus de regione in regionem. Qui vero deportandi sunt de regione in regionem, assuefiendi sunt ad capellum hoc modo: Illi falcones qui nouiter capti sunt, et debent portari, ciliantur, et eis ciliatis imponatur capellum, quoniam melius portabuntur, et sine maiori inquietatione, ad remota loca, et si dicatur conuenienter portari possunt ad remota loca sine capello, quoniam ciliati sunt, et sufficit ciliatura, cum non videant, nec est opus capello in eis potandis, dicendum quod ciliatura non sufficit quemadmodum capellum, quoniam non possunt adeo bene ciliari, nec palpebrae inferiores sursum eleuari, quod oculi claudantur penitus, quemadmodum  
per



per capellum, et esto quod palpebrae claudant oculum totaliter, oculi non percipiunt lumen aliquatenus, pro eo quod palpebrae sunt tenues, et falco percipit claritatem, et iterum lux subintrat a superiori parte, cum ciliatura non possit diu stare quin relaxetur propter elongationem fili, aut propter depressionem plumarum sub eo, et propter descensum palpebrae ipsius collateraliter ex vtraque parte fili, et cum caput sit magis expeditum sine capello quam cum capello, falco magis se inquietat sine capello, quamuis ciliatus sit, percipit enim per aërem quem attrahit cum naribus, se esse foris, et sub aëre libero. Praeterea aures concluduntur sub capello, unde minus audiunt propter hoc falco minus se inquietat cum capello quam sine. Patet igitur quod melius portabitur falco cum capello de regione in regionem quam sine. Ciliatus itaque priusquam portetur, assuefiat per aliquot dies ad capellum, sicut dictum est, quousque vel omnino dimittat defensiones et inquietationes, si possibile erit, vel satem peiores; debet assuefieri per illos dies plus ad tactum ad portandum huc et illuc, et ad capellum, quam si non esset portandus de regione in regionem. Et si est deportandus per aestatem, portetur nocte, et maxime in calidis regionibus, nam si portaretur in die, calefieret caput suum superflue ex capello, et per consequens reliquum corpus, per quam calefactionem incurreret morbum, et praecipue in capite, et vt praeservaretur ab huiusmodi calefactione, deberet ipsum frequenter irrorari, aut balneari aqua frigida, quam non esset possibile forte inuenire quoties esset opus; quamuis non esset opus irrorare ipsum propter inquietationes, cum eas minus faciat cum capello quam sine, tamen propter calefactionem irrorandus esset: et de nocte etiam melius est quam de die, quia poterit quandoque portari sine capello, et propter hoc assuefieri debet ad impositionem et extractionem capelli. Et si oporteat portare falconem per diem in tempore calido, portetur mane priusquam ascendat calor, et sero postquam descendit calor, circa feruorem diei nullo modo portetur, et dum portabitur praedictis horis diurnis, dabitur sibi pastus in via madefactus in aqua frigida, et pluribus vicibus, nam si simul totus daretur, esset nocium, propter causas quas supra diximus in capitulo portandi falconem sine capello. Et si debeant per autumnum portari, conuenientius portabuntur per noctem quam per diem, per diem enim autumnus quamuis non sit tantus calor quemadmodum in aestate, tamen eligendi erunt illi dies autumnales in quibus minus caloris est: consueuerunt enim esse intensi calores in autumnus, et tempus variabile de calore in frigus, et econuerso; si fuerit intensus calor, non portetur nisi de nocte, vel mane et sero vt dictum est. Si autem portari debeant in hyeme, portentur per diem, nec timendum est de inquietationibus quas possent facere per claritatem aëris, cum teneant capellum, et eam non percipiant. Per noctem etiam hyemis si portari debeant, non portentur in nimio sereno, nam consueuit esse frigus intensum, maxime



in frigidis regionibus, et quemadmodum ab intenso calore caueatur eis, sic et ab intenso frigore cauendum est eisdem, propter hoc portandi erunt super chirothecas pilosas, quemadmodum illi qui portabuntur sine capello: nam per chirothecas calefient pedes, et per capellum caput, et ex utroque per continuationem calefiet totum corpus, quod iuuamentum est eis, tempore frigido in hyeme, et praecipue in frigidis regionibus, et contra frigus faciet caetera, quae diximus fieri aliis portandis sine capello. Quando etiam vere portari debebunt de regione in regionem, faciendum est eis in omnibus fere, quemadmodum in autumno. De qualitatibus vero aëris, quas diximus supra, conuenientes vel inconuenientes falconi portando sine capello, qualiter conueniat aut disconueniat falconi portando cum capello nunc dicamus. Claritas aëris non est inconueniens falconi portando cum capello, cum non videat nec percipiat eam, quemadmodum sine capello percipiebat. Omni etiam falconi qui portatur cum capello, minus nocetur a vento, quam sine capello, et hoc accidit, quoniam omnis falco postquam impositum est sibi capellum, distrinxit alas et plumas suas ad se, ex qua distractione ventus minus potest subleuare falconem desuper manum quando portatur. De aliis autem qualitatibus aëris dicendum, quod sicut conueniebat et disconueniebat falconi portando sine capello, sic conueniunt et disconueniunt falconi portando cum capello. De locis vero per quae portari debet, dicatur quod per illa loca per quae portabatur conuenientius ciliatus quam deciliatus, per illa eadem portabitur multo conuenientius cum capello quam ciliatus, et longe conuenientius quam deciliatus. Caetera autem quae dicta sunt de falcone portando sine capello, usque ad relaxationem ciliaturae, et usque ad remotionem ciliaturae, si mansuefactus erat totaliter, fienda sunt similiter in falcone portando cum capello, et si falco portandus erit cum capello per longum iter, mansuefiendus est in via, eo modo quo mansuefiebat ille qui portabatur sine capello. Si autem contingat quod dum falco portatur a pedestri vel equestri per viam, expellat per inquietationem suam capellum de capite suo, et pro eo quod corrigiola non fuit retenta intra digitos ut docuimus, ipsum capellum cadet in terram, si falco est agrestis et non ciliatus, qui etiam sine capello nolit stare quietus, si falconarius qui portat ipsum est eques, det tiratorium falconi, dicens alicui, quod porrigat sibi capellum, ipse vero secedat a capello gyrando equum, taliter quod ille porrigat sibi capellum ex parte illius manus, super quam non portatur falco, et sic quod non veniat a tergo falconis, si vero solus est, dato tiratorio falconi, descendat de equo quanto suauius poterit, et accipiat capellum et imponat falconi, deinde ascendat super equum. Si vero pedester est, vel faciat sibi porrigi, vel ipse idem accipiat, et reimponat. Si autem falco iam assuetus est ad capellum, facile erit capellum recolligere et falconi reimponere. De capello autem in quibus communicat cum tiratorio, et in quibus differt



differt est dicendum, vt inde videatur in quibus vnum magis sit vtile reliquo. Conueniunt autem in hoc, quod sunt ad vnum finem, scil. ad mansuefaciendum falcones, nam per tiratorium et capellum se permittunt melius tractari et teneri ab homine, et in eo quod vtrunque prohibent falcones a modis inquietationum, quae supra dictae sunt, quae prohibitiones ab inquietationibus, sunt ad salutem eisdem falconibus, corporum, virium, et pennarum, et in eo quod ambo faciunt ad defendendum inquietationes per aliquem de sensibus falconis, et in hoc conueniunt, quod genera falconum omnia possunt mansuescere per capellum et tiratorium. Differunt autem, quoniam ad quem finem peruenit vnum per vnam viam, et vnam operationem, peruenit aliud per aliam viam et alio modo. Nam capellum claudendo visum falconis, eum prohibet inquietare: tiratorium vero delectando gustum falconis, facit eum cessare ab inquietationibus suis, et si ostendatur tiratorium falconi, et falco ipsum videat, assecurabit se magis, et plus sustinebit hominem appropinquare sibi, quam si ostendatur ipsi capellum, et cum tiratorio permittit se leuari super manum conuenientius de sede sua, cuiuscunque modi sit sedes, quam cum capello, et tiratorium inducit falconem ad habendam audaciam cum homine, capellum vero non, et cum tiratorio facilius praeparabuntur pennae et ungues falconis, si habuerit pennas laesas, aut ungues ineptos, sicut docebitur infra, et facilius parabuntur in suis partibus iacti et apponetur campanella, et caetera omnia tam de medicinis quam de aliis quae fienda sunt circa falconem, quorum scil. omnium taedet ipsum, habilius fient cum tiratorio quam cum capello. Capellum vero magis vtile est ad quaedam alia quam tiratorium, quoniam cum capellum claudat oculos falconis, si falco est pinguis, aut valde agrestis, aut timidus, ex quibus tribus causis forte nolet tiratorium, et se inquietabit, faciet cessare inquietationes, quod tiratorium tunc facere non poterit, cum falco nolit tiratorium, et cum capello tenebitur falco facilius in vno statu carnositatis, quam cum tiratorio. Nam cum tiratorio non poterit esse quin fiat augmentum pastui falconis, ex quo sequitur, quod erit carnosior debito. Etiam per capellum denegatur falconi videre, et visio sua est causa sibi plurium inquietationum: Sic per capellum prohibentur illae inquietationes quas facit ex eo quod videt: tiratorium vero non prohibet adeo bene ipsas, cum non prohibeat visum . . . . maior occasio inquietationum et diuerbationum . . . . per visum . . . . quam per alium de sensibus. Et falco habens capellum in capite, magis se permittit tangi et tractari manibus, et minus pauescit tangi, cum manus tangentis non videat, quam si haberet tiratorium et non capellum. Item cum falconem necesse sit dari, vt retineatur ab aliquo imperito, minus inconueniens sequitur si dabitur cum capello quam si cum tiratorio: imperitus namque cum capello poterit tenere et portare falconem, quod cum tiratorio facere nesciret, et leuius est ei imponere et extrahere capellum, quam vti tiratorio circa falconem, et falconarii possunt diuidere carnes pro pa-



scendis falconibus, et possunt pascere vnum in praesentia aliorum, si capellum teneant in capitibus suis. Cum enim falcones carnes exhibitas aliis vel exhibendas non videant, non se inquietabunt propter illas, et haec non possent fieri ita conuenienter cum tiratorio, et dum tiratorium esset datum vni, statim alius hoc videns inquietaret se pro auferendo tiratorio. Item duo falcones si capellum habuerint in capite, poterunt portari simul super eandem manum, si necesse fuerit, quod omnino non posset fieri cum tiratorio, quiuis auferret tiratorium alteri, et se inuicem comprehenderent et laederent. Item si duobus falconibus, quos contingit aliquando simul super vnam manum portari, . . . . .

*Reliqua in autographo desiderantur.*





# ALBERTVS MAGNVS

DE

FALCONIBVS, ASTVRIBVS ET ACCIPITRIBVS.

---

## I N D E X.

---

*Capit. I. De natura Falconum in genere.*

*Capit. II. De colore falconum.*

*Capit. III. De proprio actu falconum secundum genus suum.*

*Capit. IV. De vocatione qua vocant et vocantur falcones.*

*Capit. V. Quod 17. sunt genera falconum, et de primo quod Sacrum vocatur.*

*Capit. VI. De genere falconum qui gyrofalcones vocantur.*

*Capit. VII. De genere falconum quod vocatur Montanarium.*

*Capit. VIII. De falconibus qui peregrini dicuntur.*

*Capit. IX. De gibbofo genere falconum.*

*Capit. X. De falconibus nigris.*

*Capit. XI. De natura falconis albi.*

*Capit. XII. De natura falconum rubeorum.*

*Capit. XIII. De falcone qui habet pedes azurinos.*

*Capit. XIV. De falcone paruo qui Mirle vocatur.*

*Capit. XV. De genere falconum qui Lanarii vocantur.*

*Capit. XVI. De generibus permixtorum falconum, et de modo ipsius commixtionis falconum.*

*Capit. XVII. De regimine domesticationis, et regimine audaciae, et regimine sanitatis falconum.*

*Capit. XVIII. De curis infirmitatum falconum diuersis, secundum Guillelmi falconarium.*

*Capit. XIX. De curis infirmitatum falconum, secundum falconarium Frederici Imperatoris.*

*Capit. XX. De regimine accipitrum et infirmitatibus, secundum experta Frederici Imperatoris.*

*Capit. XXI. De regimine asturum, secundum experta Guillelmi.*

*Capit. XXII. De regimine domesticationis accipitrum et regimine aucupii.*

*Capit. XXIII. De regimine omnium auium rapacium, secundum Aquilam, Symachum et Theodotionem.*

*Capit. XXIV. De aliis duobus generibus falconum, et de locis habitationis eorum, et de definitione accipitrum.*

---



---

# A L B E R T V S M A G N V S

DE

## FALCONIBVS, ASTVRIBVS, ACCIPITRIBVS.

Ex libro eius

### XXIII. De animalibus.

#### CAPITVLVM I.

##### *De natura Falconum in genere.*

**F**alconum naturam, quam multi scire cupiunt, subtilius describere cupientes, primo naturam generis eorum describemus: Deinde diuersitatem describemus suarum specierum, et tertio de disciplinis aucupandi cum eis ponemus, et quarto et vltimo infirmitates auium rapacium omnium, cum suis congruis medicinis adiungemus. Incipientes ergo dicimus, quod genus falconum quatuor habet propria, quibus ab omnibus aliis rapacibus auibus discernitur, primum est figura corporis, secundum calor, tertium proprius actus, et quartum sonus vocis, figura enim in genere omnibus conueniens, grossius habere caput, et collum breuius, et similiter breuius rostrum, et pectus maius, cum osse pectoris acuto, et alas longiores, et caudam habere contractiorem, et crura breuiora et fortiora habere, respectu sui corporis, caeteris auibus rapacibus. Horum autem membrorum dispositionem determinantes, definimus ea quae conueniunt generi falconum respectu aliorum generum auium rapacium, quia licet dixerimus caput debere esse grossum, non tamen enormitas capitis laudanda est, eo quod hoc accedit ad figuram auium noctuarum, quae omnes capita habent enormia, et sunt timidae, eo quod enormitas capitis earum potius indicat materiae superfluitatem quam virtutis magnitudinem, et similiter est intelligendum de capite rotundo, non enim omnino rotundatur caput bonum alicuius animalis, eo quod in concauo sphaerico nimis diffuunt spiritus, et male adunantur, sed cum in asture anterieus capitis elongatum, stringatur paulatim et terminetur in rostrum, sicut et aquilae caput stringitur, caput naturale falconis non prolongatur, nec stringitur, ita quod rostrum quasi videtur sphaerae appositum, et frons eius ex rotunditate dilatatur, et superius cranei planum deficiens a rotundo, et maxillares partes bene rotundae et curtae, talis enim dispositio est humidi cholericici bene mobilis et bene audacis, quia etiam falconis inter aues proprium est cito moueri in praedam, et non discernere, et plus audere quam possit. Similiter autem dico de colli breuitate. In genere enim breuiatur collum falconis plusquam aquilae et asturis et nisi, sed immoderata breuitas vituperatur, quia attestatur aut phlegmaticae frigiditati aut siccitati melancholicae, cum virtutis diminutione, et accedit ad proprietatem noctuarum, et sicut diximus in physiognomia, non potest esse quod aliquod animal participet figuram alterius, et non habeant aliquid de moribus eius secundum naturam. Similiter autem licet dicamus crura secundum naturam falconum debere esse curta, tamen coxas longas in eis laudant omnes qui naturam norunt falconum, quia cum crus moueatur ex coxa, si coxa esset curta, dispositio esset complexionis frigidae et malae. Sit igitur coxa longa et bene pennata, et crus curtum et pes bene patulus et digiti fortes, et praecipue in nodis articulorum, et ungues fortes, et magis aliquantulum ad interius pedis curuati. Omni autem eodem modo, determinantes caudae breuitatem secundum genus, comparatione habita ad astures et nises loquimur, nimia enim breuitas in similitudinem vergit zuctae et bubonis nocte volantium. Sit igitur longitudo ita, quod compositae alae se super caudam attingant, vel fere attingant, in extremo longiorum anteriorum pennarum, et ab illa coniunctione cauda non multum descendat, nec dependeat sicut asturis cauda vel nisi, quia longitudo caudae super humerem nuchae descendens, attestatur et timiditatem designat.

CAP I.



## CAPITVLVM II.

*De colore falconum.*

**C**olor autem falconum generi conueniens, est in facie habere maculas nigras in maxillis, et albas circa foueas oculorum, vtrinque ex vtraque parte rostri, et cilia habere nigra, et cinereum subnigrum colorem in craneo, et dorso, et superiori colli, et exteriori alarum, et in exteriori caudae, et in aliis esse plenum varietate quasi virgulatim descendente, interruptis quinque virgulis, et ista varietas semper quidem habet nigredinem pro colore vno, sed in primo anno secundus color est rufus remissae rubedinis, et secundum quod saepius mutatur, magis et magis albescit. Color autem oculorum est vehementis croceitatis, ita quod rufedini appropinquat, et acies siue pupilla nigra, et color pedum optimus croceus, multum vergens ad albedinem, et quo minus albescunt eo ignobilior est falco, et si vergunt in hyacinthinum colorem siue saphyrium, est color ignobilis non significans nobilitatem, eo quod ille color fit ex resperso fumo terrestri super pellem pedum, et attestatur pigritiae et timiditati melancholicae, et ideo tales falcones eleuati in altum stant suspensi, et antequam ictum dent euadit ab eis praeda, et si quandoque tales boni inueniuntur falcones, fit ex multo labore et exercitio, sicut etiam aliquando homo iners per naturam, efficitur bonus exercitii studio. In dictis tamen coloribus pedum et pennarum differunt falconum species, sicut patebit in sequentibus, sed secundum genus, is qui dictus est color est falconum, tam in toto quam in partibus, et is quidem qui est in capite, secundum aliquid conuenit quibusdam nocte volantibus rapacibus auibus, et in tantum appropinquant generositati falconum, sed quia figura magis indicat complexionem quam color, ideo remouentur simpliciter a falconum nobilitate, haec igitur de colore dicta sunt.

## CAPITVLVM III.

*De proprio actu falconum secundum genus suum.*

**P**roprius actus falconis inter aues rapaces, est impetu ferri in praedam, et ideo cauendum est falconario ne statim falconi praedam ostendat, sed potius aue aliquantulum remota dimittat falconem, ne se subito praecipitet. Cum autem praedari vult, est falconis celeri volatu ascendere, et compositis vnguibus ad pectus impetu in auem descendere, ita forti conatu, quod sonum quasi torrentis venti descendens excitet, et tali impetu ferit non diame-traliter siue perpendiculariter descendens, sed ex obliquo, quia tali descensu percutiens, incidit vnguibus longum vulnus, ita quod aliquando auis a capite vsque ad caudam diuisa decedit, et aliquando toto capite truncato inuenitur. Cum autem inter omnes duos motus duae sunt quietes necessario, et motus falconis sit motus ascensionis et descensionis, est boni falconis inter ascensionem et descensionem quasi nihil quietis interponere, sed postquam descenderit aliquando auem inferius volando praeuenire et impedire, donec a socio qui ascendit feriat, sic enim optimum fit aucupium, quando duo socii falcones vel plures se inuicem ad inuicem adiuvant, fit etiam nonnunquam quod superior falco superius sequitur auem, donec videat eam esse in proportionato situ percussione, sed multum cauendum est, ne quasi alis suspensis stare assuescat, quia hoc signum est timiditatis, et quod non nisi reptilia terrae audeat inuadere; quia vero falconis est ictu pectoris percutere, dedit ei natura in anteriori lati ossis in pectore, additamentum triangulare forte, cuius prominens et rectus angulus est in superiori pectoris, et est durus valde angulus et fortis, et super illum sunt vngues pedum, et posteriori vngue findit quod percutit. Subito igitur in praeceps descen-dens est optimus. Stans autem in alto suspensis alis, degenerat in naturam auium quae la-narii a philosophis, a vulgo autem germanice Swemere dicuntur. Venatur autem solus bo-nus falco et est actus eius qui dictus est, sed melius venatur cum sociis vel socio, quia in ascendendo vel descendendo necesse est moram fieri, et in illa elongatur praeda si socius non impediat, et haec est causa quod licet falco auis iracunda sit, sicut et omnes aliae rapaces aues et diligit quod sit solitaria, tamen propter adiutorium tempore venationis diligit socios, et condiuidit cum socio praedam sine pugna, quod non facit astur vel nifus. Iste igitur fal-conis est proprius actus omni falconi secundum genus conueniens. Et quia sicut diximus temere attentat omne quod obuiat, oportet falconem habere mitram oculos tegentem quando



defertur in manu, et tempus non est volandi, ne nimis conetur ad volatum, quia cum sit bonae alae, frequenter volare desiderat, et ideo retardandus est a falconario; huius etiam alia causa est, quia cum oculos clausos habet, et postea mitra deposita aliquid apparet, quasi ex admiratione citius inuadit et magis audacter, et etiam ex hoc quietius domatur ad homines, et obliuiscitur societatis alienae.

## CAPITVLVM IV.

*De vocatione qua vocant et vocantur falcones.*

**S**onus autem vocis falconum generaliter est grossior et prolixior, et ab acuto in grauius procedens, quam asturum vel nisorum, et cum reclamantur a falconario non sibilo, sed voce magna ad modum reclamationis canum reclamantur, nec reuocantur ad modum canum sed potius circumducitur in chorda quiddam ex quattuor alis vel pluribus ad modum auis colligatum, cui caro recens superfigatur. Falcones tamen aliquando nimis vocant, et tunc aut iracundi sunt, aut nimis macie confecti ex cibi subtractione, et tunc vel capitegio sunt obumbrandi si iracundi sunt, vel amplius reficiendi si macie sunt confecti, quia nocet multum ad aucupium quando falco nimis clamat, eo quod ad clamorem eius fugiunt aues antequam falco in proportionali sit distantia ad capiendum. Similiter etiam quandoque cum reclamantur a falconario non redeunt, et maxime falcones qui dicuntur montanarii, et hoc contingit ex duabus causis, quarum vna est indignatio irae suae quod forte euasit praeda sua, alia est nimia repletio, propter quam cibum fastidit, et tunc si a bono falconario nutritus est a iuuentute sua, non oportet multum curare, quia deposita indignatione irae aut postea esuriens domum redibit, hoc enim fidelitatis habent falcones et nisi, quod bene nutriti, et edocti ad domicilium reuertuntur sicut columbae. Ego enim iam vidi falcones qui sine ligaturis intrabant et exhibant, et nobis comedentibus super mensam veniebant, in radio solis se extendentes coram nobis, quasi blandirentur nobis, et quando venandum erat, in tectis stantes et fenestris exhibant, in aëre super homines et canes volantes ad campum, et quando volebat falconarius redibant ad reclamatorium. Si autem non bene domiti sunt, tunc causa propter quam non redeunt est horror hominis, et in illis cauendum est, ne dimittantur nisi tempore famis, quia tunc consuecunt redire ex cibi desiderio. Haec igitur de voce qua vocant falcones, et de voce ea qua vocantur a nobis dicta sunt intantum.

## CAPITVLVM V.

*Quod 17. sunt genera falconum, et de primo quod sacrum vocatur.*

**Q**uae autem ad nos deuenerunt, sunt decem genera falconum nobilium, et tria alia genera sunt ignobilium falconum, et tria sunt mixta ex nobilibus et ignobilibus, et vnum quidem mixtum, quod quia non omnino est ex ignobili parente valde inuenitur efficax ad venandum. Primum autem genus nobilium falconum est quod quidam sacrum vocant. Symachus autem vocat ipsum Britannicum, et quidam vocant aelium, quasi aerinum falconem. Quidam autem hoc dicunt aeriphilum, quasi aërem amantem falconem, et de hoc superius diximus quod amat alte volare, indignans ad parua, crura habet grossa et nodosa, ungues crudeliores quam aquila, aspectum terribilem, oculos valde flammeos, ex citrino in rubedinem declinantes, caput magnum et rostrum fortissimum, iuga siue complicationes alarum magnas, et quasi super exhibitas, et hoc solum inter falcones habet caudam longam, est autem in magnitudine aquilae fere, et sub ipso nec aliqua volat, nec aliqua auium rapacium propter timorem, sed statim vt viderint sacrum caeterae aues, clamantes, fugiunt ad condensa arborum, vel ad terram, et potius permittunt se manibus capi quam ad aërem liberum veniant, volant autem duo simul, et ideo domestici efficiuntur, quod in vna peritica sedent, et sequuntur hominem, ac si nesciant esse nisi cum homine, et non est auis magna quam non statim deiiciant, nec vnā sufficit eis deiicere, sed quotquot obuias habent deiiciunt, capiunt etiam capreolos, et vnguibus lacerant oculos et cerebella eorum. Volunt autem delicatissime nutriri, semper recentibus, praecipue cordibus et cerebellis, et sanis valde carnibus, quod adeo recentes sint, quod adhuc calentes vitali calore, iam expirante animali sint allatae, et fere comedunt tantum quantum aquilae magnae, hoc genus falconum



falconum regale est, et diutissime volans, et sequens praedam, et non deferens ad duo vel tria, vel etiam quatuor horarum spacium. Socialiter autem praedatur melius, sed solitarium etiam optime venatur, et diligit hominem, et canes venaticos et praesentibus eis venatur libentius, quasi gloriatur in viribus in praesentia eorum. Habent autem ea quae diximus omni generi falconum conuenire, tam in guttis faciei quam in figura, quam etiam in proprio actu et voce, sed vox eius est et certifica, et raro vocat, et cum reclamatur, oportet quod reclamans ipsum alte clamet et voce sonora, eo quod alte et longe volat, et quod reclamatorium sit valde magnum vt longe videri possit. Si tamen non cito redit, non erit periculum, quia per seipsum redire consuevit ad domicilium, hoc igitur est genus falconum nobilissimum et primum.

## CAPITVLVM VI.

*De genere falconum qui gyrofalcones dicuntur.*

Genus secundum nobilium falconum est gyrofalconum genus, a sacrorum genere proximo gradu distans. Est autem gyrofalco figura et colore, et actu, et voce perfectam naturam habens falconis, sed quantitate maior est asture et minor aquila, et dicitur gyrofalco a gyrando, quia diu gyrando acriter praedam insequitur, nec dignatur ad parua, sed aues magnas insequitur sicut grues, et cignos et huiusmodi. Est autem hic falco auis pulchra valde, non longa secundum proportionem sui corporis cauda, alarum iuga valde habens decentia et fortia, et crura habet plana, non nodosa, ungues satis fortes, et praecipue posteriores, et solus venatur, sed melius cum alio, et inter caeteros falcones consuevit stare magis erectus, et pennae bene compositae, et in venatione diu insequitur praedam, et ideo venator indiget veloci equo in quo insequatur eum, et doctis ad hoc velocibus canibus qui auxiliantur ei quando praedam deiecit. Est autem hic falco praecipue docendus, ne in aqua praedae insideat, quia frequenter distat a falconario et laedi posset in aqua, et ideo non secundum longitudinem aquae iaciendus est ad praedam, sed tenendus donec aues extra ripam in aëre appareant, et tunc gyrofalco ex parte aquae iaciendus est ad ea, quia tunc propter motum gyrofalconis ad aquam redire non audent. Si autem ex parte campi dimittitur gyrofalco, tunc aues ad aquam fugiunt vel euadunt, et si percussae fuerint, in aquam decidunt, et tunc falco praedam sequens laeditur vel mergitur, et si euadit timidus efficitur propter venationis laesionem, sub isto etiam gyrofalcone alii falcones et astures non bene volant, nec etiam aquila de facili congregatur cum ipso. Vult autem cibari delicatis et recentibus, et adhuc vitali calore calentibus et sanis carnibus, delicatis autem dico sicut his quae cordi sunt propinqua, quia illae magis sunt digestae, huiusmodi autem signum est, quod quando syluester praedam accipit, non inuenitur comedere de praeda nisi cor, et postea quae cordi sunt propinqua, versus alam dextram, et raro versus sinistram. In calidae complexionis auibus, sicut in columbis et palumbis et huiusmodi auibus recentibus etiam vult vesci, et huius signum est, quia nullum genus falconum, vel asturum, vel nisorum, ad reliquias praedae suae reuertitur quando est syluestre, sed quod superest vni cibo dimittit, et cum iterato comedendum est nouam praedam insequitur, et hoc non faciunt aquilarum genera. Falcones autem, cadaueri non insident sicut aquilarum et miluorum genera. Vitali ergo calore calens adhuc caro confert gyrofalconi, et hoc probatur ex hoc, quod praedam syluestris gyrofalco prius comedere incipit, quam occidat, sana etiam carne delectatur, et ideo non approbo, quod quidam gallinae viucae coxam, vel alam extrahunt, et postea secunda die de eadem gallina extrahunt aliam partem falconi ministrandam, quia iam pro certo sanie infectum est gallinae totum corpus remanens, et infectum calore febrili, qui in omni corpore suscitatur in generatione saniei, et ideo gyrofalconi quae delicata est auis, huiusmodi non conuenit cibus, studere enim debet sapiens falconarius, vt in arte cibandi sequatur naturam quantum potest, quam naturam perfecte ostendit gyrofalco, quando sibi syluestris dimittitur, et sic diu gyrofalco in suo proficit vigore naturali. Si autem secus fiat, paulatim destituitur et infirmatur et moritur. Haec igitur duo quae dicta sunt falconum genera, sunt prima et nobilissima, inter ea quae ad nos venerunt.



## CAPITVLVM VII.

*De genere falconum quod vocatur montanarium.*

**M**ontanarium genus falconum nobilitatis est tertiae in natura. Est autem breue et spissum valde in corpore, et praecipue est brevis caudae, et valde spissae, pectoris valde rotundi et magni, et fortium crurium breuium respectu sui corporis, et nodosorum pedum, et fortium vnguium, et habet hoc in consuetudine quod frequenter respicit pedes, et est in dorso et exterius in alis coloris cinerei, et ille color secundum quod proficit per mutationes pennarum in annis, efficitur clarior et magis pallefcit interposita parua et fusca varietate. Est autem hoc falconum genus ferum et malorum morum, et iracundum inconstantis irae, et imo raro inuenitur falconarius qui ad plenum sciat mores eius, et ideo praeceptum est Ptolomaei regis Aegypti, quod raro teneatur in manu nisi in aurora, et tempore aucupationis siue venationis. Aliis autem temporibus teneatur in camera obscurissima, et in illis bis vel ter ignis clarus, non fumosus accendatur, nec teneatur in manu, praeter praeducta tempora, nisi cum cibandum est, quia ex hoc mitescit ad manum falconarii sicut ad beneficam, et mansuescit et iram deponit. Quando autem irascitur non est ei multum a falconario resistendum, quia ex hoc magis frangitur ira ipsius. Hoc autem genus falconis bene est in spissitudine accipitris siue asturis, licet sit multo breuius eo, et habet pedes valde pallescentes, et crura quasi squamosa squamis sese prementibus, et figura eius quando stat ab humeris, est quasi pyramidalis, si imaginetur pyramis aliquantulum in dorso compressa. Hoc genus falconum est, quod praecipue indignatur in euasione praedae. Ita quod aliquando ex ira reuocantem se inuadit, et lacerat falconarium in capite vel facie, et aliquando lacerat faciem equi cui insidet falconarius, et aliquando inuadit canem, et aliquando vnus falconum inuadit alium, et ideo oportet falconarium in tali casu valde esse patientem, et non aduersari, sed patienter dissimulare reuocationem, donec deposita ira mitescat animus falconis, et si etiam reuocatus montanarius, non rediret ad reuocatorium, non oportet multum curare, nisi quod caueat ne ab alio capiatur, quia deposita ira per se ad domicilium falconarii reuertetur, propter autem huiusmodi mores non est abiiciendum hoc genus falconis, quia mirae est audaciae in inuasionem magnarum auium, ita quod aliquando aquilam inuadit et occidit, et a sapiente falconario praecauendum praecipit Ptolomaeus, quia si ultra vires ad fortes aues frequenter dimittitur, quando incaluerit ira eius immoderate, praecipitat se in mortem, et talem casum iam in alpibus quidam de nostris viderunt sociis, Falcone enim montanario de rupe veniente, praedamque sequente auem quae perdix vocatur, aquila contra quam praedicta perdix volauit praedam praeripuit, ad quem montanarius falco impatientia iniuriae stimulatus a praedicta aquila praedam praereptam nitebatur accipere, sed cum aliquandiu nitens perficere intentionem non posset altissime ascendit, et deorsum torrendo veniens ictum in caput aquilae dedit, et seipsum peremit et aquilam. Ab huiusmodi ergo furore montanario semper praecauendum est. Iste falco frequentius inuenitur quam praeducta duo falconum genera, et mirabiliter gaudet in feritate sua, et imo frequenter de isto genere inueniuntur falcones, quibus non sufficit vulnerare vnā auem et deicere, sed gloriantur in hoc quod multas deiciunt, et adeo in sua feritate aliquando delectantur quod cibi obliuiscantur, et detinentur crudelitate occisionis auium, haec igitur de montanario dicta sunt.

## CAPITVLVM VIII.

*De falconibus qui peregrini dicuntur.*

**F**alconum genus quod vocatur peregrinum, praeducta genera sequitur in nobilitate quarto loco. Vocatur autem peregrinum duabus de causis, quarum vna est et vera, quia semper de terra in terram peregrinatur, quasi omnes peruolans terras, secunda est plus secundum opinionem falconariorum, quod videlicet nescitur nidus eius, nec inuenitur a falconariis, sed in volatu longe a loco suae capitur generationis, vtriusque horum causarum audiui ab expertissimo falconario, qui in eremo alpium iuxta iuga altissima montium multis annis habitauerat. Dicebat autem quod hi falcones quos peregrinos vocamus, in altissimis et praeruptis parietibus montium nidos construebant, nec aliquando patuisse adi-  
tum



tum nidi, nisi desuper a cacumine montium homine per funem submisso, quam submissione dicebat frequenter oportere fieri per chordam centum passuum, et aliquando centum quinquaginta, aliquando vero trecentorum vel ducentorum, et aliquando esse impossibile aut propter distantiam, aut propter asperitatem scopulorum, et propter hanc difficultatem euenisse opinionem quod nesciatur locus generationis horum falconum. Dicebat autem se saepius vidisse quod antiqui praedam pullis duxerunt in antra et rimas talium montium, addidit etiam esse consuetudinis horum falconum, quod parentes post completionem iuuenum expellunt eos de loco suae habitationis, propter paucitatem auium quae ibi inuenitur, et ideo statim iuuenes egrediuntur ad plana in quibus plures sunt aues, et perueniunt ad terras certam non habentes mansionem vel habitationem. Duobus autem modis hos vidi capi falcones, et eremita praedictus dixit mihi tertium modum. Vno namque communi modo fere in omnibus terris capiuntur ita, quod rete disponitur patulum, ita quod faciliter conuertitur cum chorda super id quod intenderit auceps, et ante illud extenditur chorda cui alligatur rubeus lanarius, quem vulgo sweimer vocant, et ad chordam dependentem ad eam, extensa chorda alligatur auis, vel laneum aut pilosum aliquod simile aui, ita quod quando chorda extensa trahitur et concutitur ab aucupe, videtur sweimerius auem insequi ad praedandum, et haec chorda saepe sic concutitur, quod videns falco, qui forte perinde peregrinatur, in impetu descendit, intendens praedam lanario praeripere, et sic deceptus cadit in rete. Alium vidi modum multo meliorem, fit lignorum duorum ad modum crucis compositio, et super extrema illorum curuantur duo alia semicirculariter, itaque extrema circulo infiguntur extremis lignorum, et inter illas quartas arcuum circulo alia curuantur ad locum intersecationis semicirculo, et inferius infiguntur in ligna ab angulis intersecationis crucis venientia, donec non nisi ad tres vel quatuor digitos distet lignum a ligno, et quodlibet istorum lignorum impletur laqueis a summo vsque deorsum, et hoc vas fiat ad altitudinem septem vel octo pedum, et ad latitudinem quinque vel sex pedum, et in ipso disponatur aliqua cauea sex pedum altitudinis, ita quod pede vno distent a se inuicem latera vasorum, quando vnum est in alio, et in interiori sint ligna per modum trabium super se ab inferiori vsque ad summum disposita, et aues sex vel septem ponantur in interiori; Illae enim continue ascendent et descendant in trabibus, et hoc totum figatur immobiliter super murum castrorum, vel portam, vel in campo libere, tunc enim falco qui peregrinatur, videns aues, et volens accipere, capitur laqueo, et hoc modo vidi capi falcones optimos. Eremita autem non dixit esse aliud faciendum nisi quod disponatur auis ante rete absque lanario, quia falco audius auis se ipsum in rete praecipitat, hoc enim modo dicebat se dictos falcones caepisse singulis annis. Est autem hic falco qui communiter habetur fere in omnibus terris, quantitatis minoris quam montanarius, et est curtae caudae et longarum alarum, et grossi capitis et longae coxae et brevis cruris, et si habet crura nodosa melior est, albescentia etiam dicitur habere crura et pedes, et est bonorum morum quando bene nutritur. Anas autem, vt communiter, est praeda sua, et si bene efficitur audax, per falconarium sapientem capiet ardeam et aliquando gruem, et hoc est summum audaciae ipsius, haec igitur de hoc genere dicta sunt.

## CAPITVLVM IX.

*De gibbofo genere falconum.*

Est autem quintae nobilitatis in genere falconum falco nobilissimus, quem gibbosum vocauit eremita praedictus, et tres mihi optimos de hoc genere falcones quos apud se habuit ostendit, et multos alios se vendidisse asseruit, hoc igitur genus falconum est valde paruum corporea quantitate, sed mirabile virtute et audacia et strenuitate volandi cum praedam insequitur; quantitas eius parum vincit quantitatem nisi, quem vulgus speruerium vocat, et habet in facie guttas sicut peregrinus et caetera falconum genera. Gibbosum autem vocatur eo, quod propter breuitatem colli sui caput suum vix apparet ante iuga alarum suarum, quando super latera dorsi componit, et hoc caput respectu quantitatis sui corporis est magnum, et rostrum valde breue et rotundum, et alas valde longas et valde exortas, caudam breuem, et coxas fortes, et crura aliquantulum respectu commensurationis aliorum membrorum suorum longa et quasi squamosa, sicut sunt squamae serpentum et lacertarum,



quae apparent in lateribus ventrium eorum, et pedes habent nodosos matriculis digitorum, et praecipue ad interius plantae pedis et oculos flammeos ardentes, et est in colore aliorum falconum qui peregrini vocantur, et caput suum in craneo est bene planum superius, et retro in capite non prominens sed quasi collo continuum, et est facile domabile et bonorum morum, et nidum facit in rupibus inaccessis, sicut et peregrinum genus, et capitur euolans de nido sicut et peregrinum, audaciae enim tantae est et strenuitatis, quod anseres siluestres deiicit et ardeas et grues, et est velocissimum genus istud et altissime ascendit, ita quod effugit visum hominis, nec contentus est iste falco quod vnam auem deiiciat, sed multas vulnerat, et in aucupio plures quaerit habere socios, propter sui paruitatem et auium quas venatur magnitudinem. Narravit mihi praedictus falconarius satis memorabile de hoc falconum genere, referebat enim quod de praefatis gibbosis tres cuidam nobili vendiderat, quos dum eremitam secum ducens probaret, casu inuenti sunt anseres albi siluestres et dimissis falconibus anseres altissime volauerunt, sed falcones tres qui dimissi fuerant anseres ascendendo transcenderunt, donec visus omnium qui affuerunt effugerunt, et cum post modicum dictus nobilis falcones conquereretur amissos, paulatim anseres vulneribus debilitati cadere circa eos caeperunt, et inuenerunt amplius quam viginti anseres decedentes, et tandem etiam falcones reclamati venerunt supra reclamatorium. Erant autem omnes anseres vulnerati letaliter, ac si cum cultello in diuersis partibus sui corporis fissi essent, et huius causa est, quia falco iste sicut alia falconum genera, cum descendit non statim percutit, sed potius cum a descensione reascendere incipit, et tunc posteriori ungula ante pectus disposita ferit, et imo longum vulnus facit et letale, et frequenter adeo fortiter ferit, quod ungulam amputat et seipsum valde laedit in pectore vel occidit. Est etiam genus falconum quod semper quasi ad volandum alas extendit, et est animositas eius pluraquam fortitudo ipsius et vult cibari valde recentibus et vitali calore adhuc spirantibus, et tunc multum proficit. Si autem aliis aliquando cibatur carnibus, caueat falconarius quod leues sint sicut carnes altitium, et recentes aut ad minus non putentes, et in aqua frigida recentes effectae, quia aues rapaces debilem valde et subtilis pellis habent stomachum et de facili alterabilem a malo cibo, et ideo ex modica occasione cibum indigestum euomendo reiciunt, et praecipue quando graui et melancholica carne cibantur, vel ab ea quae disposita est ad putrefactionem, hoc genus falconis diu mane et sero vult portari in manu, quoniam quando consuecit manum hominis, libentissime infidet manui et libenter redit ad manum, haec igitur de gibboso falconum genere dicta sunt a nobis.

## CAPITVLVM X.

*De falconibus nigris.*

Sextum gradum nobilitatis in genere falconum possidet falco niger, breuior quidem in aliquanto falcone peregrino, sed in figura similis per omnia, licet in colore dissimilis sit, quia in dorso et exteriori alarum et cauda totus fuscam habet nigredinem, et in pectore et ventre et lateribus fuscam habet varietatem; in facie autem guttas falconarias habet nigras, valde intensae nigredinis, quae circumfunduntur quadam caliginosa et fusca palliditate. Crura autem et ungues et rostrum habet sicut peregrinus. Accedit autem hic falco multum ad formam auis quae butorius vocatur, de qua in ante habitis fecimus mentionem, hunc falconem Fredericus Imperator sequens dicta Guillelmi regis Rogerii falconarii, dixit alium visum esse in montanis quarti climatis quae Gelboe vocantur, et deinde iuuenes expulsos a parentibus venisse in Salaminae Asiae montana, et iterum expulsos nepotes priorum deuenisse ad Siciliae montana, et sic deriuata esse per Italiam. Modo autem in alpibus apparent et in Pyreneis montibus, et deriuata sunt haec genera in Germaniam, licet adhuc rara sint eo quod pauci inueniantur. Sunt autem falcones nutriturae et audaciae falconum peregrinorum. Complexionis autem videntur cholerae, et quod adustum est de terrestri cholerico conuertitur in pennas, et ideo nigrae efficiuntur aetate accedente, per multas annos aliquantulum albescunt, et probabile est, quod etiam in climatibus calidis nigriores sint quam hi qui nascuntur apud nos, eo quod in calidis locis semen ouale forti calore decoquitur, et ideo quod ex eo producit plus denigratur. In frigidis autem regionibus plus habet aliquando humidum ouale, quod propter perspicuitatem causa est albedinis, et respersum in eodem terrestre



terrestre causa est varietatis. Cum autem duo sint quae exterius in corporibus consideramus, animantis figura videlicet et color figura magis indicat conformitatem vel differentiam speciei. Monedulas enim iam vidimus propter frigus habitationis nasci albas et similiter cornos, cum tamen figura ipsarum indicauerit eas vere de specie monedularum et coruorum esse, et hac ratione videtur hoc falconum genus multum simile esse generi peregrinorum, licet in colore differat, et praecipue quia sicut diximus, parentes in hoc genere filios cogunt peregrinari a loco suae generationis, haec igitur dicta sunt de nigro falconum genere.

## CAPITVLVM XI.

*De natura falconis albi.*

**G**enus septimum falconum sibi vendicat falco albus, qui venit a Septentrione et mari Oceano, a regionibus Norwegiae et Sweciae, et Estoniae, et finitimis syluis et montibus. Est autem hic falco ita in varietate subalbidus, sicut is de quo ante diximus est niger, et causa albedinis suae praecipua est frigus et humor habitationis in qua nascitur, et in dorso quidem et alis est subalbus, in aliis autem locis maculas siue guttas habet valde albas, interpositas aliis guttis subpallidis, et in quantitate maior falcone peregrino, multum accedens ad similitudinem lanarii albi, qui volat in campis insidiando muribus, adeo quod aliqui falconarii tradiderunt hunc falconem natum esse primum ex falcone peregrino patre, et lanaria alba matre, licet hoc non sit verum quod ostendit audacia ipsius, audax enim est valde et bonus, nec deficiens a natura falconis in aliquo, nec habet ex moribus lanarii, cum enim in venatione ascenderit, non stat suspensus alis ut lanarius, sed ferit statim ut falco, et figura in pedibus et unguitibus, et rostro et toto corpore, falconis demonstrat naturam, quamuis crura habeat grossiora et nodosiora quam falco niger, quod ei accidit ex complexionem magis humida, quae magis implet et ingrossat crura ipsius quam crura illius qui ex complexionem est siccus cholericus, quod autem iste falco minus videtur habere audaciae quam niger, et minus videtur esse velox, propter frigus et humorem complexionis non est omnino sufficiens signum, quia virtus omnis animati multiplicatur ex quantitate subiecti, quando naturalis quantitas terminos quantitatis naturalis non est excedens, et ideo virtutis maioris est iste falco quam niger, et ex confidentia virtutis innatae sumit audaciam, et si non est adeo velox in volando ut niger, tamen diutius durat insequendo aues quam niger, et hoc summe attenditur in falcone, corpora enim fusca calida porosa sunt et aperta, et de facili euaporant ab eis spiritus, qui sunt vehicula virtutis, et tunc lassantur et debilitantur, quamuis sint agilia per naturam, econtra autem alba frigida confertas habent carnes, et quia sunt multi humidi, multorum sunt spirituum, et propter carniū confertionem non cito euaporantes, et ideo diu durant in labore, praeterea humidum complexionale interius, infundit lacertos et nervos, et calorem qui ex motu fit, non permittit indurari nervos et lacertos, et ideo diu remanent mobiles et habiles ad volatum, et quoad ista falcones albi recuperant id, in quo videntur falconibus nigris postponi. Haec igitur de his dicta sufficiant, quoniam in nutritura et aucupio nihil vel parum ab aliis distare videntur.

## CAPITVLVM XII.

*De natura falconum rubeorum.*

**O**ctauum autem in falconum genere, habet is falco qui rubeus ab antiquis appellatur, non quod in toto rubeus sit, sed quia guttae quae in aliis albae sunt, in hoc genere sunt rubeae, et nigrae guttae sicut in aliis sunt interpositae, nec in dorso vel exteriori alarum hic falco rubeus apparet nisi quando alas exerit, tunc fusca in eis apparet rubedo, et hoc genus falconis etiam mendose quidam falconum scribes naturam spurium esse asserunt, ex lanario rubeo et falcone dicentes esse procreatum, quod omnino absurdum est, eo quod nullam penitus cum lanario nisi coloris habet conformitatem, sed potius ruboris causa est debilis calor infusus superficiei corporis, qui inflammet fumosum humidum, quod expellitur ad generationem pennarum, et hoc facit media inter album et nigrum complexio, sicut enim in aliis, ita nec in hoc genere de extremo in extremum non venit natura quae causa ordinis est nisi per media, et ideo in genere falconum, hoc tangit medium, alii enim colores mediū falconum



falconum generi non congruunt, eo quod viridis et hyacinthinus et croceus et huiusmodi, ab audaci et rapaci deuiant natura, quia viridis extremae et aqueae frigiditatis est indicium, sicut et in vrinis viriditas signum est caloris mortificantis et consumentis. Hyacinthinus autem aëream et euanidam indicat complexionem. Croceus autem corrumpentem choleram, et licet duo istorum in auibus inueniantur, et tertius in pauone, non tamen conueniunt audaciae, sicut diximus et agilitati volatus. Est autem hic falco non magnus, paululum minor peregrino, sed vnguibus et pedibus et rostro fortis, et est valde in volatu agilis, sed non satis diu perseuerans, et domesticatur multum, et efficitur melior, per mutas duas vel tres, sed non est adeo longae vitae vt alii, et imo oportet eum nutriri valde recentibus et vitali calore adhuc spirantibus, et non supra modum et multis vicibus in die sed in mane et in sero, et oportet eum multum custodiri, ab alterantibus complexionem eius, quia de facili alteratur nec oportet eum vltra mensuram cogere ad aucupium, complexio enim rubea facile vincitur et laeditur labore, quamuis facile faciat impetum a principio, propter quod et aetas accedens et aliquantulum temperans, et inflammatum humidum plurimum, huic complexioni confert auxilium, et praecipue per mutationem pennarum, penna est taliter rubea, fragilis et mollis est, et ipse laborem volandi diu non sustinet nisi frangatur, et haec omnia sapientem oportet aduertere falconarium, haec igitur de falcone rubeo commo-  
nuisse sufficiat.

## CAPITVLVM XIII.

*De falcone qui habet pedes azurinos.*

**N**onum falconum genus iam declinans a qualitate nobilium falconum est id, quod est hyacinthini pedis siue azurini, quod quidem in quantitate et figura simile est siue aequale falconi peregrino, sed dorsum eius et exterius alarum non est adeo nigrum, et etiam albius est in pectore genus istud quam falco peregrinus, et alae eius non adeo longae sunt sicut illius, sed cauda eius est longior aliquantulum, et vox eius est acutior, eo quod magis est humidae siue phlegmaticae complexionis, et audacia eius est multo minor in inuadendis auibus, quia id quod est azurini pedis, raro inuadit aues maiores quam est pica vel cornicula. Peregrini autem et alii falcones quaslibet aues inuadunt. Ex hoc autem contingit, quod quando istud quod azurini pedis est surgit in altum, vt det impetum, ex timiditate stare incipit, et suspendi alis, et non praecipitanter ruere in auem, et hoc quidem habet ex natura. Ex disciplina autem et adiutorio iuuantis ipsum hominis, frequenter sumit audaciam maiorem, sed non sicut verus falco, in auibus vero rapacibus est sicut in militum fortitudine, in militibus enim non desunt ex natura debiles, et ex complexione minus audaces, qui tamen ex scientia militandi et vsu frequentis victoriae, et experientia hostes aggrediendi et expectandi, et ferendi, et insidiandi, et declinandi, et ex confidentia sociorum adiuantium, saepissime nobiles faciunt triumphos, et similiter est de isto genere, quod licet sit timidum, per naturam tamen audaciam accipit a falconario sapiente, et vsu deiicendi et tenendi aues, et ex confidentia iuxta se positi falconarii melius et audacius ferit quam ex natura, sicut etiam et speruerius siue nifus, huiusmodi audacia etiam fortiores se multo inuadit, sicut est avis minor, et aliquando maior, nec mirum, cum etiam lanariorum genera hoc modo inuadentia et capientia efficiantur, quorum naturalis timiditas et tarditas tanta est, quod non nisi mures inuadunt, vel forte pullos auium non adhuc volantes, sed currentes in terra, vel nido iacentes. Qualiter autem avis timida per disciplinam, audax efficiatur, posterius erit manifestum.

## CAPITVLVM XIV.

*De falcone paruo, qui mirle vocatur.*

**D**ecimum et vltimum falconum genus est id, quod quantitate minimum est, quod et mirle vocatur, et vulgariter smirlin vocatur. Hoc autem genus licet a praecedentis quantitate deficiat, tamen a nullo eorum deficit in audacia viribus suis proportionata, et praecipue quando animositas sibi est ex peritia et vsu, et spe auxilii ex propinquo sibi perito falconario, ita quod Wilhelmus falconarius dicat, cum talibus se aliquando gruem caepisse,  
aues



aves enim suis viribus proportionatae sunt alaudae, et plus perdix et columba, nisi vt diximus vires ex arte iuuentur. Est autem hoc falconum genus guttatum in vultu, sicut alia omnia, et longissimarum alarum respectu sui corporis et caudae mensuratae, et crurium et pedum planorum citrinorum, et est minus quam nifus, habens quasi quantitatem nisi quem muschet vocant, et quando est sylvestre, capit carduellos, eo quod celerrimum est et infidiosum, et in capiendo ascendit et descendit feriendo sicut et alia falconum genera, quod quia fere omnibus notum est, haec ad cognitionem eius dicta sufficiant.

## CAPITVLVM XV.

*De genere falconum qui lanarii vocantur.*

Falconum autem ignobilium genera sunt tria, quae antiqui aucupes, vt Ptolomaeo tradunt. Aquila Symachus et Theodotion, lanarii potius quam falcones vocantur, et hoc vocabulum quidam germanicorum imitantes, eo suo idiomate lanete vocant. Quidam autem suuere vocare consueuerunt, et sunt butherii quidem mures in campis insequentes, per colores differentes, quia sunt albus et niger, in quantitate falconum, et rubeus, qui minor est qui mirle imitatur. Isti autem, in primis cum iuuenes sunt, propter humorem, et hebes calidum, nullius quasi sunt audaciae, sicut et pueri omnes sunt timidi. Cum autem mutauerint se bis vel ter, et pusillanimitas naturalis per artem medicamen acceperit, efficiuntur columbas et anates accipientes. Est autem pars ista praecipue tenenda, quod primo anno quando domesticantur, non cibentur nisi auibus viuis, et quando parum deplumauerint, dimittantur aues de pedibus eorum euadere, non ad volatum primo, sed ad cursum, et cum saepius has insequi didicerint, dimittantur euadere ad motum mixtum ex volatu et cursu: et cum iterum hoc frequenti iteratione didicerint, dimittatur auis euadere ad volatum tardum, qui est auis cuius curtatae sunt pennae alarum, et tandem dimittatur euadere ad volatum perfectum, et in omnibus his fortissime alta voce prouocetur et incitetur, et ad tenendam auem adiuuetur a falconario, qui ex his sumet audaciam, et tunc secundo anno paruae aues in magis grandiusculas commutentur, et tertio iterum in maiores, quia omnis auis ex huiusmodi, simul et peritiam et audaciam accipit aues quas falconarius voluerit capiendi, licet enim primae nobilitatis falcones hoc non indigeant, quae sunt octo primorum generum, tamen pro certo multum confert ad audaciam et peritiam omnium augendam, haec igitur dicta sunt de disciplina falconum.

## CAPITVLVM XVI.

*De generibus permixtorum falconum, et de modo ipsius commixtionis falconum.*

Cum autem quodlibet horum generum, cuilibet permisceatur, multa sunt falconum genera. Sed quae ad nos deueniunt, sunt quatuor: Falco enim peregrinus frequenter permiscetur ei qui est pedum hyacinthinorum, et quando haec permixtio fuerit ex peregrino patre et matre pedis hyacinthini, valde parum declinat a nobilitate, quia sperma masculi operans est et faciens, et formans per spiritum qui est vector paternae virtutis in subiectam faeminae guttam, et efficitur partus patrem imitans, licet parum coloris azurini respergatur in pedibus, quando autem econuerso fuerit ignobilis pater et mater nobilis, partus efficitur multum declinans ad ignobilem patrem, et parum habens nobilitatis maternae, et sicut diximus, quod horum duorum falconum fit permixtio, ita peregrinorum, qui ad omnia loca frequenter solitarii volant, fit aliquando commixtio cum lanariis nigris, et aliquando cum albis, et aliquando cum rubeis, et propter spermatum vicinam et consimilem complexionem, et impregnationis ouorum et fotionis, idem temporis spacium semina permixta se inuicem mouent et conuertunt, et complent, et permanet partus procreatus, et generat ex sibi simili, sicut fit in multis auibus et aliis animalibus, vt patet per ea quae in antehabitis huius scientiae libris conscripta sunt. Haec autem permixtio fit quando diuersarum specierum sibi in complexione vicinarum falcones tempore luxuriae conueniunt, non inuenientes suae speciei sexum, cui permisceantur, et licet diximus quatuor genera taliter permixtorum falconum ad nos deuenisse, ratio tamen exigit multa esse, et plura quotidie posse fieri talia falconum genera, et hanc putamus esse causam quod tam diuersa genera falconum, in di-



uersis regionibus inueniuntur. Quamuis enim climata mores et colores diuersificent, tamen specierum tam similium diuersitatem, causat praecipue permixtio quam diximus, sicut in generibus anserum, et generibus canum et equorum fieri vidimus temporibus nostris. Et non hoc solum fieri probabile est ex falconum generibus permixtis, sed etiam ex falconum cum asturibus et nisis, et aquilarum generibus, multas probabile est fieri diuersas compositiones ad diuersarum compositarum auium rapacium generationem, sed in dictis quatuor generibus praecipue diximus fieri falconis peregrini commixtionem, eo quod peregrini mox compelluntur e patria a parentibus, et frequenter separantur, propter praedam et iram, et cum suae speciei adiutorium non, inueniunt ad similius quod inuenire possunt alterius speciei se tempore luxuriae conuertunt, et cum conuertuntur ad id quod est pedis azurini, fere simile peregrino est id quod procreatum fuerit, dum autem conuertitur ad lanarium nigrum, efficitur ignobilis falco niger vel nigro similis, et dum conuertitur ad lanarium album, efficitur id quod generatum fuerit simile falconi albo, et dum permiscetur lanario rubeo, fit falconi rubeo in colore et figura similis, et hi quidem mixti falcones facilius iuuantur arte quam hi qui omnino sunt ignobiles, et praecipue si pater sit nobilis, eo quod multum habent ex altero parente nobilitatis, sicut etiam in praehabitis istius scientiae libris diximus. Si tamen econtra aliquando mater sit nobilis et pater ignobilis, erit quidem quod partum fuerit minus nobile, sed tamen per bonam disciplinam accipiet meliorationem, et praecipue post vnum annum vel duos, et modo prouocationis quem paulo ante diximus, haec igitur de falconum generibus et naturis dicta sunt, per haec enim et alia poterunt cognosci.

## CAPITVLVM XVII.

*De regimine domesticationis, et regimine audaciae, et regimine sanitatis falconis.*

**H**is ita discursis, de regimine et medicamentis falconum differamus; regimen autem falconum in tria diuiditur regimina, regimen videlicet domesticationis, et regimen sanitatis, et regimen infirmitatis. Domesticationis autem regimen duos habet fines quorum vnus est, vt assuescat manum hominis; Alter autem est vt audax et praeceps in captura auium efficiatur. Primum autem regimen perficitur, si nunquam nisi super manum cibetur, quia ex hoc manum consuescet et diliget, ex beneficio inclinante animum ipsius, sicut dicit Symachus. Primo autem quando domesticandus est, ab ante lucem pileo induatur et teneatur in manu vsque ad tertiam, et tunc detur ei coxa gallinae, et cum comederit pone eum supra gramen, et pone ante eum aquam; vt balneetur si velit, et post permittit eum stare ad solem, donec se bene purgauerit, et postea mittatur in locum obscurum vsque ad vesperum, et demum resumatur ad manum, et teneatur in manu vsque ad primum sonum, et reponatur in loco obscuro, et accende ignem clarum vel lucernam ante eum, per totam noctem vsque ad matutinum, et postea pilea eum, et sta cum eo aliquamdiu ad ignem, et scias quod hi qui in nidis completi sunt, meliores sunt, et fortiores habent pennas, si tamen aliquando de nidis accipiuntur ante complementum, ponatur in nido sibi facto, prout melius poterit ad similitudinem nidi de quo sumptus est, et detur ei frequenter caro pullina, quia est temperata, et aliquando detur ei caro recens vrsina, quia illa est faciens, et firmans pennas, et nisi hoc modo teneatur debilitatur alis et coxis, ita forte quod frangitur ala vel coxa, confert etiam multum quod manu ante completionem non tangatur, postea autem cum completus fuerit ad manum et ad capellum, caueatur primo ne vnquam aliquid duritiae experiatur in manu, sed semper beneficam et blandientem inueniat eam. Ad audaciam autem videlicet quod saepius aues viuas accipiat et comprimat et occidat, cum clamore quo incitari solet a falconario, et sicut superius diximus, saepe euadentibus de sub vnguibus eius, per solertiam falconarii iterum capiat, et dimittatur per se vincere aues, et caueatur ne aues possint eum laedere vnguibus vel rostro, quia si iuuenis falco sentit nocumentum ab auibus pusillanimus efficietur. Si autem crebro sine nocumento vicerit et occiderit, audaciam accipiet et crudelitatem in aues, semper etiam ista fiant cum magna incitatione falconarii, et in praesentia canum et mutantur aues continue, et per successionem temporis fortiores exhibeantur, et cum perfectus est ad aucupium primo in aurora orto iam sole digestus falco ad aues dimittatur, et siquidem est audax et bonae voluntatis ad capiendum



piendum inuenitur, custodiatur et teneatur in ea in qua tunc cum custodia et dispositione cibetur, de auibz quas tunc caeperit donec per se facietur, et hoc fiat tribus vel quatuor diebus in quolibet aucupio. Si autem in primo aucupio, forte piger et non voluntarius inuenitur resume eum ad manum, et intermitte aucupium, et illo die non ciba eum, nisi de dimidia coxa gallinae, et repone eum in obscurum, et sequenti die dimidiam coxam gallinae in aquam frigidam pone, et in illa coxam illam tene vsque ad tertiam, et tria purgatoria, quae vulgariter germani Guel vocant, et fiunt aliquando de pennis, sed melius fiunt de bombace, et in tertia da falconi dimidiam illam coxam, cum tribus purgatoriis dictis, et cum comederit pone eum in obscuro vsque ad vesperum, et in vespera iterum ciba eum cum purgatoriis, vt dictum est, et tunc in mane vade ad aucupium, et si audacter et auide caeperit, tene eum in tali in quali tunc est maceratione. Si autem nec tunc quidem voluntarius ad capiendum extiterit, resume eum ab aucupio, et non des ei illo die, nisi tria de quibus diximus purgatoria ex aqua frigida et nihil amplius, et si in crastino mane adhuc inuoluntarius sit ad capiendum, ciba eum de coxa parui pulli imposita in forti aceto, cum tribus purgatoriis de bombace factis, hoc modo pone in obscuro vsque ad vesperum, et postea tene eum in manu vsque ad primum somnum, et calefac aquam et balnea eum in aqua calida, et postea pone eum sub diuo ad serenum, si non est tempus pluuiiale vsque ad mane, et tunc calefac eum ad ignem super manum tuam, et tunc egredere ad aucupium, quia si tunc non praecipitanter capiet, pro certo infirmus est et languidus. Iste autem quem nunc docuimus modus maceratio vocatur falconum. Et attende quod quidam aliter quam nunc diximus conficiunt falconum purgatoria. Sumunt enim carnem, et repositam in aceto forti comprimunt in puluerem factum de pipere trito et mastice et aloe, et dant falconi, sed talia purgatoria nulli aui rapaci danda sunt, nisi quando viscera eius repleta sunt humore viscoso phlegmatico. Sanitatis autem regimen est, quod maxime sapiens falconarius, falconem cibet cibo et horis et quantitate qua siluestris cibari consuevit, et praecipue carne leui auium et adhuc calore vitae spirante, et teneat eum inter maciem et pinguedinem, quia macies nimia diminutis viribus aufert audaciam et inducit pusillanimitatem, et facit clamosum falconem, et quando dimittitur a manu, residet in terram iuxta falconarium et clamat. Pinguedo autem nimia pigritiam et fastidium aucupii inducit, teneatur ergo medium, ita quod gloria virium non desit falconi, et indigentia inanitionis stimulet ad praedam, non ex defectu, sed ex desiderio famis naturalis, et hoc optime fit quando non cibatur secunda cibatione, nisi prius digesta et egesta sit praecedens. In his tamen considerationem adhibeat homo peritus, quia quidam falcones melius capiunt, si medium transeant ad pinguedinem declinando, quam quando sunt infra mediocritatem in macie, et quidam econuerso melius capiunt macilenti. Sed nullus capit ex macie defectus, nullus etiam bene capit nimia pinguedine repletus. Amplius diuersarum complexionum sunt falcones diuersarum maxime specierum, et illi quidem qui nigri sunt melancholiae signum habent, et illis oportet dare magis cibum sanguineum, qui est calidus et humidus, sicut carnes pullorum, et columbarum, et haedorum et huiusmodi, et si medicatur, calidis medicinis vtendum est, sicut pipere aloes paulino et huiusmodi, albi autem sunt phlegmatici frigidi et humidi, et mali chymi quibus oportet dare calida et sicca, tam in cibis, quam in medicinis, sicut sunt carnes hircorum canicularum et mulorum picarum et passerum, et huiusmodi, et piper, et cinamomum, et galanga, et huiusmodi. Qui autem habent pennas rubeas, abundant inflammato sanguine, et his danda sunt frigida et humida, eo quod frigida sicca mortificantia sunt, sicut carnes pullinae et aues aquaticae, et aliquando gambari, et cassia fistula, et thamandi medulla, et haec omnia dentur in aceto. Sunt etiam quidam falconum nobiles in eadem falconum specie, quibus secundum hoc regimen suae vitae adhiberi oportet. Falco enim nobilis in qualibet specie falconum est, qui habet caput moderate grossum et superius planum, et alibi rotundum rostrum curuum, et bene grossum, et moderate longum, spatulas amplas, pennas alarum et coxas longas, pedes latos sparsos et macros, et qui frequenter pedes suos respicere consuevit. Ignobilis autem in eodem genere est, qui deficit ab aliquo vel pluribus istorum, et ignobilis aliquando tantum vel plus valet ad aucupium quam nobilis, et secundum hoc oportet considerare falconarium, ad ungues autem et pedes custodiendos, caueat ne vnquam permittat falconem stare, nisi supra lapidem viuum vel super murum, et caueat ne calce stet vel cemento calcinato, vnde non approbo, quidam in perticis,



quidam in cratibus tenent falcones, ars enim naturam imitari debet, et siluestres semper inueniuntur sedere in petris vel in terra. Caueat etiam a fractura pennarum saepe rigando eas aqua calida, de tertio in tertium diem ne nimis exsiccentur, et eisdem diebus detur ei aliquantulum de aloë, quia stomachum et intestina confortat, et purgat, et fortificat pennas, et si nimius humor in causa sit quod debitam fortitudinem non habent, caro qua cibandi sunt, primo ponatur per duas horas in succo facto ne contusis rafano et lumbricis terrae, haec enim ambo exsiccant et indurant pennas, sed praecipue caueatur ne violenta laesione pennae laedantur alarum vel caudae, haec igitur et huiusmodi considerata sunt in regimine falconum et aliarum etiam auium rapacium.

## CAPITVLVM XVIII.

*De curis infirmitatum falconum diuersis secundum Guillelmum falconarium.*

Nunc de medicinis morborum auium rapacium differamus. Vt autem ordinatius hoc faciamus, ponamus primo de medicinis falconum, deinde de medicinis asturum et nisorum, tertio quaedam medicinalia tractemus, quae vtrisque in communi conueniunt. Prima autem falconum infirmitas est dolor capitis, qui in hominibus sorda vocatur, huius signum est, quod falco claudit oculos, et mouet caput in partes diuersas, tunc igitur tollatur lardus et misceatur cum pipere trito, et detur ei manducare, et alternis diebus detur ei aloe aliquantulum cum carne pullina, quia iste dolor capitis est ex vapore stomachi et ideo per talem cibum curatur purgato stomacho. Quando autem aperit rostrum quasi extensiones habeat, et alices, et percutit cum rostro pedem vel econuerso, signum est quod habeat malum humorem in capite, et imò tunc torquendus est cum stilo argenteo vel aureo ad nares, vt humor exeat, et postquam exierit vngatur coctura oleo oliuae vel butiro, si oleum non habetur. Quando autem sternutat et proiicit aquam de naribus, signum est humefactionis cerebri immoderatae. Cura autem huius est quod tria grana saxifragiae cum totidem granis piperis in mortario lapideo, vel cupreo optime conterantur, et puluis idem confectus cum aceto forti distemperetur, et cum bombace in nares falconis, et in palatum ipsius eiiciatur, et postea cibetur carne pullina. Quando autem collum falconis inflatur, signum est guttae membra colli infundentis calidae, et ideo tunc deplumandum est collum, et minuendus de vena auriculari, vt gutta ad generationem regenerandarum pennarum extirpatur, et detur falconi rana ad comedendum, quam si digesserit, pro certo sanus erit. Quando autem guttur siue arteriam quae canna vocatur, inflatam habet et sufflat ac si suffocari debeat, pro certo reumatismum patitur, et sic curatur, sumatur de sanguine pauonis et muscatis, et mirabolanis chebolis, et de gariofilis, et de cinamomo et zinzibere aequaliter de qualibet vna vncia, et fiant inde nouem pillulae, et cotidie detur sibi vna ad tertiam, et postea ad nonam cibetur carne muris. Signum autem mali in renibus est et guttae, quae infundit renes quando non potest saltare, et alis extensis se a manu longe eiicere et redire, sicut aues facere consueuerunt, et haec gutta a quibusdam mortalis vocatur, tollantur enim grana quae crescunt in spina alba, quae germanice *Hagedorn* vocatur, quae sunt grana rubea, et contunde ea, et commisce cum pilis leporis, et hoc totum misce cum carne cocta, et ciba cum tali cibo vsque ad nouem dies. Si enim talem cibum retinuerit sanus erit. Est autem quaedam alia gutta quae filera aut nullis vocatur, quae quando decurrere incipit per corpus falconis, quasi veneni naturam habet, et tunc acumen rostri et acumina vngularum falconis dealbari incipiunt, et haec curatur ita quod accipiatur serpens niger, qui tyrus vocatur, et abscindatur a capite eius palmus, et tantundem a cauda et haec reiciantur, et quod remanet frigatur in olla noua, et pinguedinem quae inde eliquatur collige, et detur falconi calida cum carne pauonis successiue per octo dies, et postea accipe porcellum cum aqua calida depilatum, et sumatur tenebrum pectoris cum mure paruo, et detur ei comedere, quem cibum si bene digesserit absque dubio sanus erit. Quando autem falco leuato pede saepe percutit cum rostro crus suum, scias quod habet guttam falsam, et tunc minue sanguinem de vena, quae est inter crus et coxam et sanabitur. Quando autem falco pediculis grauatur accipiatur argentum viuum, et commisceatur cum sputo hominis, et commoue donec moriatur argentum viuum, et postea huic toti iunge anxugiam veterem et misce omnia, et inde vnge caput falconis, et intinge fila et circumliga collo eius, et morientur pediculi, vel aliter accipe piper et grana sylami et



et terè simul, et coque in olla noua, et immitte aquam, et inde laua eum et sanabitur, vel aliter, coque saxifragiam in aqua; et permitte eum balneari, et postea substerne ei linteamen album, et pone super gramen vel lapidem, quia super linteamen omnes pediculos excutiet, et similiter facit omnis auis rapax. Signum autem quod falco habeat febrem, est si pedes eius vltra modum calent, et tunc accipiatur aloe et auxugia gallinae, et mittatur in forti aceto, et detur ei interpolate ad manducandum, et alia vice detur ei testudo, quam limacem vocant, et si tenuerit hunc pastum sanabitur. Quando autem falco carnem quidem rostro laceratam accipit, sed statim vel post modicum non per digestionem, alteratam reproiicit, tunc procerto viscositatem duram habet in struma et stomacho et in intestinis, quae a quibusdam petra vocatur, tunc igitur fiat puluis de gariofilis et spargatur supra carnem passeris, et detur sibi alternis diebus, et alternis detur sibi pipio siue purgatorium, et si tenuerit hanc dietam sanus erit. Quando vero longe non egerit, istius eiusdem infirmitatis est signum, tunc detur ei cor porcinum cum seta porcina minutatim incisa, vsque in diem tertium et liberabitur. Si vero falco lumbricis affligitur in ventre, et in egestionibus eius aliquid apparuerit de talibus, limatura ferri et maxime chalibis depurati supra carnem porcinae spargatur, et falconi detur vsque in diem tertium et sanabitur. Si vero pennas eius tineae consumit, accipiatur cera rubea muscata, mirabolani, salgemmae, gummi arabici, grana tritici, et pone in forti aceto omnia haec et dimitte in eo per nouem dies in aliquo bacili siue pelui, et postea reponere in ampullam et laua quotidie de ipso falconem, siue aliam auem rapacem, donec bonam et emundatam senseris peruenire, et postea cum aqua rosacea laua auem et sanabitur, dum soli post loturam exponetur, de praedictorum autem quolibet pone in aceto aequaliter, sed de cera quae omnia continet, pone longe plus quam de aliis, aliter etiam dicunt quidam, quod si tineae cum acu de corio extrahatur, et deinde cum aloe lauetur, et postea haec lotura cum emundata fuerit, cum aqua rosacea deponatur, valet plurimum, sed caueatur ne rostro se tangat, quam diu aloe est supra eum, quia nocet plurimum. Aliquando enim infusionem patitur sicut equus, et huius signum est, quod pastum non accipit et habet oculos grossos, quasi ex ventositate eleuatos, et tunc fiat lixiuium de sarmentis vitis et coletur ter, et impleatur inde guttur falconis, et sic dimittatur donec egerendo se, cibum quem sumpserat digessisse demonstret, et postea detur ei lacerta ad manducandum. Vel aliter accipiatur vinum calidum cum pipere trito, et infundatur in gulam falconis, et teneat donec digestum teneat cibum, quo infusum fuerat et liberabitur.

Pedes falconis inflati non per violentiam, podagram significant, et contra hoc accipiatur butirum et oleum oliuae aequaliter, vtriusque vna vncia et aloe vncia vna, et ex his insimul commixtis vngantur pedes ipsius vsque ad diem tertium et ponatur ad solem, et da ei comedere carnem catti et sanabitur, vel aliter incende licinium factum de carne bombacina, et cum illo coque plantam pedis falconis, et tunc supra petram viuam pone, quae petra vncta sit cum auxungia veteri, et liberabitur, et interim da ei comedere mures. Si falco se pedibus peccit et scalpit, et pennas de cauda trahit et eiicit, patitur pruritus, et contra hoc accipiatur stercus anseris, et ouis, et aloe de quolibet aequaliter, et in forti aceto posita mittantur in vase aereo sub solem calidum et serenum per tres dies, vel ad ignem lentum, si calor solis non habeatur, et ex illo totus falco balneetur, et detur caro columbina cum melle et pipere, et reponatur in obscuro, et sic fiat per nouem dies, et quando apparuerit penna bona de cauda veniens lauetur cum aqua rosacea et sanabitur. Si autem fluit in eo gutta aëris et acuta, accipiatur stercus anseris vel columbae, cum cortice radicis vlni et buliatur radicis cortex in aqua, donec ipsa aqua rubea fiat, et tunc distemperetur stercus in aqua, et inde lauetur falco per tres dies et liberabitur.

Si autem falco vulneratus fuerit, accipiatur albumen oui et oleum de oliua, et haec simul mixta ponantur supra vulnus, et caueatur ne locus laesus ab aqua tangatur, et cum hoc superpositum mutare forte volueris, laua locum cum vino calido, et sic facias donec locus laesus acquirat crustam siue corticem qui vulnus claudat. Si autem vulnus ipse falco tetigerit, pone ibi aliquantulum de aloe, et si forsitan vulneratus fuerit sub ala, vel in petore, vel in costis, vel in coxa, imittatur stappa grassa bene trita cum cultello, donec mala caro corrodat, et postea accipiatur thus, et cera aequaliter, et sepum, et resina, et distemperentur ad ignem omnia haec in olla, et reseruetur, et quando necesse sit, vngatur, et de illo liquefacto ad ignem inunctio fiat cum penna, donec verruca claudatur vulnus, et



si apparuerit ibi mala carnositas, imitatur vrtica graeca vel viride eius, donec corrodat, postea vnge locum de vnguento albo, et sanabitur.

Si autem coquenda est avis rapax, antiquorum graecorum est sapientia, quod prima coctura fiat sub lachrymali oculi, hoc enim prodest visui. Secunda autem fit in summitate oculi, et prodest capiti. Tertia fit supra nodum alae, et valet contra guttam. Quarta fit in planta pedis, similiter contra guttam crurium. Vtiliores autem sunt omnes cocturae, si in mense Martio fiant. Si quandoque sanies de falconis naribus fluit, et comedere non poterit, et ipsa fames foetorem praetenderit, fistula est in loco, et sic medicanda, accipiat posterior pilus capitis, et auxugia, vel butirum, si auxugia non habetur, et vena quae de naribus ad oculos vadit, incidatur, et cum acu ferrea calefacta comburatur vena incisa ex alia parte quam a parte fistulae, et locus quotidie cum butiro perungatur, et falco in loco calido reponatur per nouem dies, et sanabitur. Si autem falco vngulam a radicibus perdidit, non recrefcit, sed digitus pedis in calido mure aperto est colligandus, et cum medulla pedis et digiti porcini postea inungendus donec sanetur, similiter quando falco balneatus fuerit, caueatur, ne supra lignum putridum reponatur, ne inuenenetur. Si autem inuenenatus fuerit falco, accipiat theriaca, et tria grana piperis, et dentur falconi contrita cum petra, et custodiatur falco per nouem dies, et tunc iterum theriacam et piperis grana combure in testa, et puluerem sparge super carnem, et sic cibetur falco. Si autem aliqua bestia falconem momorderit, oportet quod deplumetur locus ubi est morsus, et si est parua, amplificetur cum rasorio, et tunc vngatur cum butiro calido, et demum fiat commixtio de olibano resina, cera et sepo, et vngatur cum illo donec sanetur. In hac autem cura quam posuimus, praecipue experta Guillelmi Regis Rogerii Falconarii secuti sumus, pauca de nostris adiciunt.

#### CAPITVLVM XIX.

*De curis infirmitatum falconum, secundum falconarium Frederici Imperatoris.*

**D**e curis autem falconum aliter quidam, dicta falconariorum Frederici Imperatoris sequentes, determinauerunt sic: si caput falconis purgandum est, tolle picem mundissimam ad fabae quantitatem, et digitis calcas eam ad ignem, et postea tam diu cum ea palatum falconis frica donec ibi adhaereat, deinde accipe quatuor staphisagriae grana et totidem albi piperis, et fac subtilissimum puluerem, et impone eum super picem palato falconis adherentem, et de eo quod de puluere remanet, immitte in nares falconis, et cum sol bene incaluerit ipsum, in sole tamdiu dimittas, quousque omnem sui capitis malitiam et phlegma de capite defluens expurget per spumam, sicque per duas dies pasce eum suauis et dulci carne.

Ad palatum autem restringendum, si forte capitis humor in ipsum fluit, sume vetus butyrum et chelidoniam aequaliter, et exinde factum puluerem in calida carne da falconi. Contra maculam vero oculorum falconis, sume piper et aloe aequaliter trita, et super maculam pone, et si tempus fuerit vt acacia, quae sunt pruna spinarum syluestrium, habere possis, tres guttas acaciarum super macula instilla, quia valebit multum.

Si autem pulmo vel canna pulmonis falconis laesa sit, sume stercoris passeris et muris aequaliter vnciam vnam, et piperis albi grana quinque, salgemmae vncias duas, lanae succidae vnciam vnam, et haec tere omnia, et misce cum eis mellis et olei puri, vtriusque aequaliter sex guttas, et lactis faeminae masculum lactantis, et quae eundem peperit guttas nouem, et de butiro quantum sufficit, et misce haec omnia, et forma ex eis cum lacte tres pillulas ad quantitatem auellanae, et mitte in gulam falconis, et tene eum per duas horas in manu, vt totam euomat potionem, et cum totam vomuerit, post modicum pone eum iuxta aquas, et siquidem ex eis biberit post modicum pasce eum pulmone, et corde lactantis agni, et nondum herbam pascentis, et sit caro calidior quam esse poterit, postea alia carne suauis pasce eum assidue, in sero autem da ei sufficienter de passere et pullo, et sanabitur. Si autem ostenderit se bulsum siue infirmatum in pulmone, sume auri pigmenti triti vnciam vnam, piperis grana nouem, et haec tunc insimul cum carne calida, falconi tribue. Iterum autem tolle tria lardi frusta, qualia falco deglutire possit, et melle ea intinge, et eis limaturam ferri super asperge, et in gulam falconi immitte, et hoc fac per triduum, et nihil aliud omnino tribuas ei, quarto vero die tolle porcellum tenerum, et eundem vino forti et claro inebria,



ebria, et calefac pectus inebriati ad ignem, et cum bene calefactus fuerit, tunde pectus eius, vt sanguis vino infusus in pectus ascendat, et occide porcellum, et statim ipsum pectus sic calidum in calido caprae lacte intinge, et falconem per aliud triduum tali cibo pasce, et sanabitur. Si autem anguillae, hoc est, lumbrici longi, comedunt falconem, tolle tenerum pullum pudillum siue intestinum aqua bene lotum, et fac inde tres nodos ad mensuram medietatis pollicis, et ex vtraque parte firmetur liga tenui filo, et imple oleo lucidissimo, et ponatur in gulam falconis, sicut et alia potio poni consuevit. Si autem in crassinum adhuc laeditur lumbricis, sumatur rasura eboris et stercoreis, et passeris indici siue solitarii, et si non habetur, sumatur stercois alterius passeris communis, vtriusque aequaliter vncia vna, et haec puluerizentur et cum carne calida falconi tribuantur. In tertio autem die si adhuc perseverant, abstrahatur cruda pellis piscis quae tinca vocatur, quem germani Sligen vocant, et in calida testa sine fumo et flamma super carbones comburatur, et sumatur cum hoc rasura eboris, passerumque stercoreis aequaliter de omnibus, et terantur omnia haec, et simul mixta cum calida carne ministrantur, et si necesse sit, quarto die limatura ferri, et git contrita his addantur, et puluerizata cum carne calida ministrantur.

Contra omnia vitia renum, puluerem candriae, et si non habetur, nasturtii aquatici in corde pulli tribue et confert. Iterum sumatur arboris quae quercus dicitur, et boli aequaliter, et haec trita cum carne pulli calida, qui ex vino inebriatus sit, falconi ministrantur, et sanabitur de omni vitio epatis. Contra fastidium autem et siccitatem, ouum cum lacte caprino fac bullire vsque ad duritiem sine fumo in sartagine mundissima, et ad edendum sibi tribue, et si digesserit liberabitur, proficit enim contra omnem infirmitatem.

Contra tineas autem si pennas falconum deuorant balsamum purum in foramine de quo penna excidit imitte, et scias quod tinea remouebitur et penna noua suborietur. Adhuc autem croci orientalis puluerizati vnciam vnam, luti stercoreis anserini recentis per pannum colati coclearia tria, et totidem aceti fortissimi sumantur, et in vase aereo tamdiu dimittantur quousque cum flore ipsius ad spissitudinem deueniant, deinde per tres vices loca ex quibus pennae ceciderunt aceto puro lauentur optime, et cum illis loca perungantur. Aliter autem sanguisugae supra tegulas incenduntur, et fac puluerem, et pauonum pennas super fumum ignis pone, et de fuligine illis adhaerente fiat puluis simili pondere cum priori, et cum forti aceto, sed non multum liquidum confice, et deinde laua forti aceto loca vnde pennae ceciderint, et deinde lardi particulas intinge, in hoc quod confecisti de pulueribus quousque adhaereant, et perunge loca vnde ceciderint pennae bis in hebdomada quousque pennae reueniant. Item equi pilos longos contritos tenuissime supra carnem falconi in cibum tribue. Item piretri puluerem cum rafani succo et forti aceto distempera, et tineas inde punge et sanabitur.

Adhuc aliter vre bufonem, et fac puluerem, et in pastum falconi tribue, ad idem valet si ferri limatura falconi in pastum cum carne tribuatur. Si autem falco nascentias in pede habuerit, mediam iuniperi corticem sicca et puluerem fac subtilissimum, et tribue sibi per nouem dies alternis diebus cum carne, et curabitur. Si autem pedum patiatur inflationem, aloe et albumen oui simul tere, deinde quaere cotem in qua saepe acutum est ferrum, et in qua ferri aliquid inhaeret, et super illam ita diu puluerem frica, quod omnis acutio quae in cote est, in puluerem transeat, et tunc pedibus inflatis suppone, ita diu donec crustam faciat, et pedi haereat, et sequenti die optime sapone perunge, et tertia die age vt videris expedire.

Si autem mala caro alicubi in falconis corpore creuerit, accipe calchiam, et aloe aequaliter, et fac puluerem et superpone, et sanabitur, ad pedes etiam falconis sanandos millefolii saxifragae verbenae, et plantaginis aequaliter accipe, et puluerem tritum, cum calida sibi da carne, et pro certo sanabitur. Si autem famem inordinatam falco habuerit, muris sanguinem melapii semen aequaliter sume, et commixta da falconi, et sanabitur. Item scito, quod quando falconem accipis, et vis ire ad aucupium, debes dicere: In nomine domini volatilia sint sub pedibus tuis. Quando vero mane accipis falconem, dic: quem iniquus homo ligauit, dominus per aduentum suum absoluit. Quando autem fascinatus fuerit, ranunculum in puluerem redige, et da ei in carne calida. Vt autem hominem non deferat. Sume apium mentam nigram, et petroselinum, et simul tere, et cum calida carne sibi tribue. Ne autem laedatur ab aquila, dic: vicit leo de tribu Iuda, radix David alle-



alleluia, haec tamen vltima non ita rationabilia sunt sicut prima, haec igitur sunt quae de medicinis falconum dicta cum experimento prudentium inueniuntur, sapiens tamen falconarius per experimentum pro tempore his addat vel minuat prout auium complexioni viderit expedire, experientia enim optima est in omnibus talibus magistra.

## CAPITVLVM XX.

*De regimine accipitrum, et infirmitatibus secundum experta Frederici Imperatoris.*

In hoc capitulo conuenientia medicamina asturibus, quos supra accipitres nominauimus, ponemus, eo quod astures siue accipitres Theodotion ad Ptolomaeum Regem Aegypti scribens, in falconum generibus collocauit omnem auem rapacem, cuius vsus est in aucupio, falconem vocans. Quod igitur in antehabitis praetermissum est, hic ponemus, vt continuus, et completus sit tractatus. Dicamus igitur experta Frederici Imperatoris sequentes, quod substitiosus sit accipiter in pennis varia signa defectus producens, quae hunc grimal Germanice vocantur, pro certo hic morbus ab interioribus procedit corruptis, et est corruptio maxime in radice pennarum, fiat igitur commixtio de stercore hominis, quod vim theriacae habet, et de sale, et in illa intingantur plumae accipitris, et mittatur etiam de eo in fundamentum pennarum vbi carni infiguntur, et sanabitur, deinde aquam bibat, et caro qua cibandus est, intingatur in iure barbae Iouis. Item accipe maluam et sarutegiam cum adipe porcino, et coque multum, et in os accipitris immitte donec inde tria coclearia consumas, postea dabis ei integrum, fel porci vel pulli cum calido porci pulmone, eumque donec sanetur, quotidie ieiunum in mane potabis aqua, ad vesperum vero ciba eum butiro. Si autem accipiter frigore tactus in pectore laesus sit, ex causa frigoris illius, accipe grana staphisagriae et tere in mortario, et adiunge pisani et mel quantum sufficit, et frica inde palatum accipitris, et pone eum ad solem. Item semen eius herbae quae radix vocatur, accipe cum ruta agresti et pipere aequali pondere et tere, et cum melle pone commiscendo, et fac inde pillulas ad modum piperis, et da ei per triduum, et haec fac quotiens frigus eum tetigerit, aut ex frigore solutus sterces nimium fecerit. Item succum marubii et puluerem piperis et modicum mellis, et semen apii cribellatum commisce, sic vt duae partes sint de succo et vna de melle, et quando famescit et feruenter escam desiderat da ei. Item ad pectus accipitris curandum fac de menta puluerem, et cum melle misce, et da accipitri in escam. Item radicem sinapis et trifolium aequali pondere trita, et cum lacte et oleo hyssopino in escam dabis accipitri, quia multum prodest. Item nasturtium cum melle mixtum in carne porcina datum multum confert. Si autem asmaticus fuerit accipiter, regulam coctam contritam dabis illi cum carne calida et sanguine hirci, per tres dies, tollesque succum absinthii, et infunde eum inter pellem et carnem in coxa gallinae, et misce lac asini, et da sibi comedere. Quando autem accipiter cibum per tres dies in gutture sine digestionem tenuerit, fac lixiuiam de cinere sarmenti vinearum, et bene colata, da sibi cum carne calida per duos dies, et aliis tribus diebus, dabis ei carnem caprinam cum butiro et puluere mastice, quando autem cibum oblatum non vult sumere, sed carnem oblatam rostro a se remouet, commuta sibi aliam carnem, dando carnem de grue et granum vnum staphisagriae sub lingua eius pone, et statim emouet carnes sumptas. Si vero omnino vis eum soluere et laxare, sume illam quae radix vocatur, in qua non sit aliqua adhuc pullulans vena viridis, et scinde eam in tres partes, ad quantitatem auricularis digiti, et acue vtrumque ad modum grani hordei et inuolutum in butiro, da sibi comedere et demum pone eum ad solem et laxabitur. Vt autem sit sanus semper nec viscera eius restringantur, coque brachia et ramos maluarum in aqua, donec tota aqua consumatur, et postea siccatos tere fortiter et pone in aliquo vase butiro pleno, et in illo coquantur fortiter, et postea coletur haec sicut colatur cera, et de pinguedine relictam in colatura ciba accipitrem sigillatim per vices. Si autem pinguedinem istam refutauerit, detur ei cum carne de catto. Ad hoc idem aliud est expertum, accipe enim ebolum rutam maluam serpillum, et de roremarino plusquam de aliis aut de sauina si non habetur rosmarinus, et adipem porci qui nunquam comederit glandes, et omnia simul trita, et confusa fac bullire in vino, et postea exprimere quasi ceram, et da in cibum accipitri in sero per noctem, et non infirmabitur. Si autem accipiter per pluribus mutis fuerit, Kalendis Ianuarii in mutam mittatur.

Sed



Sed si pullus eiusdem anni fuerit, mittatur in mutam in Kalendis Iulii, et vescatur de auibus viuis si poterunt inueniri. Item gariofilos et semen foeniculi cum carne comedat, domus autem mutae apta et ampla sibi quaeratur, et de muta quando perfectus est trahatur. Si autem in muta pennas non cito proiecerit, serpentem varium qui inter alios minus habet veneni, et Germanice Huter vocatur, cum tritico coque, ex quo tritico et viru serpentis gallinam ciba et pota, et illius gallinae carnibus refectus accipiter, et pennas deponit, et morbum si quem habet expellet, Solidarum quoque nouarum pennarum plurimum decoratus longo viuet tempore, et iugiter sanus et hilaris erit. Item pisciculi minuti fluuiales puluerizentur, et puluis super carnes accipitri dandas aspergatur, et cum carnibus muris accipitri ad comedendum dentur, tunc enim proculdubio cito mutabunt. Item lumbi porci sanguine agni intincti, et incisi dati sibi idem quod dictum est citius operantur. Item puluis lacertae viridis combustae idem facit. Item grana sambuci in Septembri sub terra fodias, et postea ordeum in eis madefactum gallinis tribuas, et illarum carnes tribue, et si alias etiam tribueris in succo praedictorum granorum intinge, et confert plurimum. Item sanguisuga incisas per se vel cum carnibus offer accipitri, et si volueris comburendo fac inde puluerem, et offer ei cum carnibus. Item mures viui sibi dati seu etiam minutatim fracti, et in gula sibi positi profunt. Si vero pennas fregerit, incide aliam pennam illi similem, et fractae pennae inferas. Si autem fregerit pennam in concauo arundinis, pone aliam accipitris pennam, vel si habere non potes pennam, cornu in illam inferere cum acu ferrea, vel cuprina in medio quatuor angulos habente, ita quod ex ambobus partibus acuti fiant, quae quidem facere vsu et experientia melius discas quam doctrina libri istius. Si autem accipitrem volueris macrum fieri, da ei allium tritum cum pulegio, vel carnem macram de bacone falso sumptam, quae per noctem in aqua stetit comedat, et postea quater aquam bibat. Si autem econtrario impinguare volueris, dimitte eum per plures dies otiosum, et da ei lumbum porci, et carnem gallinae pinguium, et semper ab vno homine pascatur, et qui portat eum, ferat in equo ambulante, et detur ei saepius cerebrum veruecis siue arietis. Si vero a sole laesus sit, aquam rosaceam in naribus eius immittas, et mel cum carne caprina comedat, et exspue vinum quasi ex sufflando in faciem eius. Si autem quando post praedam vadit, laesus fuerit a tempestate, aquam tepidam super scapulas eius subiice, ita tamen quod pennas eius prius aperias, et sic de aqua superfundas tantum quod per renes vsque ad pedes eius perueniens, distillet hoc enim multum proderit. Si vero in interioribus pro venatione infirmatur, noctuas calentes adhuc et vespertilioes per triduum comedat, et si accipere voluerit tres offas carnis porcinae intinctas in aceto comedat, hoc enim etiam fastidium sibi tollit, et contra morbum capitis et pectoris plurimum conferens operatur. Si autem digiti articulum laeserit, scinde murem, et in viscera eius calida pedem accipitris immitte, et cum fasciola apta constringe, et si per hoc non sanabitur, dextram vngulam porci frange, et cum medulla pedem accipitris vnge per triduum, et sanabitur. Haec igitur secundum experta Frederici Imperatoris dicta sunt a nobis de asturibus.

## CAPITVLVM XXI.

*De regimine asturium secundum experta Guillelmi.*

**R**epetentes autem curam accipitrum, Guillelmi expertissimi in auibus rapacibus documenta ponemus. Dicit enim Guillelmus, quod asturem qui asma habet sic curabimus. Accipiantur gariofili cinamomum, zinziber, ciminum, piper, aloë, sal dragantum, olibanum de quolibet aequaliter in pondere, et fortiter terantur, et bene simul commisceantur et ponantur in tegula et calefiant ad ignem, et cum fistula de illo puluere proiciatur in naribus asturis insufflando, et de residuo pulueris eiusdem pone cum lardo bene claro aut cum butiro, ad quantitatem auellanae, et sit lardum bene tritum et pone ipsum per mixturam in palatum asturis, et postea fac eum stare ad solem, ita diu donec euomat potionem, et in sequenti detur ei comedere lardum idem ad quantitatem vnciae et tertia die detur ei pullus columbinus rubeus, et quarta die fac eum balnari et curabitur. Contra tineas autem asturis accipe millefolium et tere, et mitte in acetum, et misce cum hoc sterco anseris, et sic commixta permaneant haec tribus diebus, et demum pone totum hoc in panno lino et exprime succum, et vnge inde loca vbi tineas habet praecipue in alis et in cauda. Demum tere ferruginem



nem in puluerem et asperge in alis et cauda accipitris tribus vicibus de tertio in tertium diem. Quando autem astur pastum indigestum proicit, accipe cinnamomum gariofilos cuminum et folia lauri aequaliter de omnibus, et tere et mitte in ollam nouam cum vino albo, et fac multum bulire, ita quod parum de vino remaneat. Sed caue ne per ebullitionem effundatur efferuens de olla, et quod remanet pone in panno lineo forti et extorque succum, et de eo quod expresseris, infunde in guttur asturis quantum sufficit, illa die nihil des ei comedere et sequenti die pista et contunde foeniculos et exprime succum, et carnem quam daturus es ei intinge in succo illo.

Contra infirmitatem autem asturis quae fellera vocatur, et est idem quod corrupti humoris repletio, accipe de vrsae faeminæ felle ad quantitatem ciceris et impone cordi gallinae, et da ei comedere vsque ad nouem dies antequam ponas eum in mutam, deinde accipe fauinam, rosmarinum, satiregiam, bethonicam, mentam, et saluiam, de quolibet aequaliter, et de raphano plus parum et tere omnia simul, et impone parum mellis, et ieiuno dabis ei comedere inde, et postea mitte eum in mutam. Contra vitium autem lapidis asturis, accipe cinnamomum aloë gariofilos zucharum saxifragiam gerulam cicadam, aequaliter de omnibus, et omnia tere et distempera cum siropo rosaceo, et quando pascis asturem da sibi aliquid de isto cum carne ad quantitatem duarum fabarum, si accipiter proicit glanum siue crudam carnem indigestam, immitte in gulam eius lixiuiam de sarmentis, et immitte in gulam eius vnum cochlear, et si se angustiauerit accipe sirupum violaceum et distempera cum aqua frigida, et mitte ex eo in guttere eius cochlearia tria, et postquam vomuerit, et ad se redierit, balneetur in aqua, et hoc fiat tempore bene claro. Multum autem valet si aliquantulum salgemmae tritum cum lixiuia ponatur, quia bene mundificando facit vomere. Si autem astur guttam habeat, sumatur aurea alexandrina, quantum est media faba, vel sicut est media auellana, et detur sibi comedere, et die tertia detur sibi theriaca.

Si autem patitur aculeos siue puncturas acutas, accipe setas porcorum et minutatim incide, et sparsas super carnem asturi in cibum tribue, vsque ad nouem dies, et postea trifolium tere et succum eius carni infunde, et da comedere asturi. Si autem spumat in oculis, est melancholia ibi congregata, accipe siler montanum et semen cicutae, et pone super carbones et suffumiga inde carnem, et pasce eum super talem ignem, vt fumus veniat in guttur, et in oculos ipsius, et in sequenti die da ei comedere aloe ad quantitatem dimidia fabae, et viridem cicadam siue locustam, quam si viridem inuenire non poteris, tere siccam apud te reseruata et asperge super carnem, et da ei. Si autem ficum in ano patitur accipiter, accipe pinulas alarum, et desiccatas tere, et sparge super carnem, et de hoc ciba eum nouem vicibus. Si autem inordinatam astur sitim habeat, accipe liquiritiam Reubarbarum, Bethonicam, et syrupum violatum, et mitte in aquam, et sit ibi nocte vna, et mane da ei bibere quotidie de illo, vsque ad octo dies quantum voluerit, et pasce eum de rana. Si autem fasciatus putetur astur, accipe fungum myrti, et olibanum, et aspaltum, et palmam benedictam, et testae impone omnia haec, et exinde suffumiga asturem.

Si autem in capite aeger sit accipiter, accipe raphanum, fauinam, rosmarinum, sambucum, satiregiam mentam, rutam, saluiam, bethonicam, et misce haec omnia simul, et tere multum, et immitte mel, et da ei ex illo quantum est vna auellana. Si vis impinguare accipitrem, ciba eum frequenter carne anseris, et palumberum. Si pediculos habeat, mentam Romanam tere et distempera cum vino acri, et iunge saxifragiam, et si clarum tempus est et calidum, balnea eum ex illo, si autem turbidum et frigidum, tolle auxugiam gallinae, et impone in illa, et mitte super finum nocte vna, et die sequenti vnge asturem in alis, et in dorso super caudam, quod si nascentias astur habeat, accipe sanguisugas, et mitte eas in nascentias, et sequenti die accipe lac arboris, quae celsa siue ficus fatua dicitur, et vnge nascentias, et demum accipe radices herbae quae brancha lupi vocatur, et tere, et commisce cum lacte celsae, et superpone nascentiis, et stet desuper tribus diebus, et tribus noctibus, et postea accipe radicem caudae porci, et fac bullire, et da ei bibere mane et sero nouem diebus ad tres fabas. Si autem scabiosus sit accipiter, accipe auxugiam veterem, sulphur et argentum viuum, et tere simul cum aliquot gariofilis, et cinamomo, et ex eo vnge scabiem ad ignem vel in balneo.

Contra dolorem oculorum accipe zinziber aloe, olibanum aequaliter de omnibus, et tere fortiter insimul, et mitte cum albo vino in bacinum, vbi sit nocte vna, et postea mitte in



in oculos. Item accipe aloë et cerussam aequaliter, et de lardo veteri, rade de medio loco aliquantulum, et misce omnia haec, et mitte in oculos eius sero, cum eundum est dormitum. Quod si crus fractum habet accipiter, mastica olibanum bolum et serpentinam, et consolidam, et fortiter tere, et misce cum albumine oui, et distende totum super pannum lineum, et dirige crus fractum, et inuolue in panno dicto, et accipe pennam de ala vulturis, et scinde eam, et incanna ex ea crus fractum, et sic remaneat quinque diebus, et quinque noctibus. Iterum autem contra lapidem asturis, et renum corruptionem accipe centrum galli partem vnam verbenae partes duas, et tere, et exprime succum, et da de eo tertiam partem cochlearis asturi ieiuno, et sic dimitte eum a mane vsque ad meridiem, et si in angustia esse videatur, da ei cochlearia tria de sirupo violatio distemperato, vel de melle rosato, et quarta die accipe centinodiam, et centineruiam siue quinquineruiam, et tere, et accipe succum quantum est pars tertia cochlearis vnius, et mitte eum in guttur asturis ieiuni et curabitur. Si autem podagricus sit, tere titimalum cum melle et aceto, et aliquantulo calcis et liga super podagram, et postquam se mouerit, unge aloë cum vino, et sanabitur. Iterum autem contra felleram asturis simul et tineam, accipe conchas testudinum et ramunculos virides de iubis et saxifragiam, saluiam, et folia oliuarum et spumam poledri iuuenis, quam proicit de naribus cum nascitur et fel anguillae, et haec omnia mitte in ollam nouam, et ad ignem torre donec inde fiat puluis, et in mane ieiuno asturi, da inde comedere ad quantitatem dimidiae auellanae cum carne pauca, et accipe reubarbarum et pone in aqua per diem vnum, et da ei bibere, et istud fac de tertio in tertium diem tribus vicibus.

Si autem guttam habeat astur, accipe anserem bene pinguem et aufer adipem eius, et accipe adipem vrsinum et vulpinum, et excoria cattum, et eiectionis de corpore catti visceribus et ossibus carnem cum cultello diuide, et accipe parum cerae, et de laudano et de xilaloe, siue ligno aloe, et fac puluerem, et succum politariae maioris et minoris, et incide caepam albam, et omnia simul misce et totum mitte in ventrem anseris, et consue foramen fortiter et dimitte per vnum diem, et deinde fac anserem bene assari, et sagimen quod inde decidit, collige in vas terreum aliquod, et de hoc vnguento vngatur locus guttosus, et valet omnibus guttosis animalibus. Item ad clarificandos oculos, accipe dulcem herbam aloe, et cerussam aequaliter, et contunde fortiter, et trita cum oleo, et auxugia mitte ad ignem in aliqua testa donec lique scat, et misce cum his quae dicta sunt, et duc et commisce simul fortiter in vnum, et ex vnguento sic facto, mane et sero aliquid in oculos asturis impone, et clarificabuntur, haec igitur secundum Guillelmum experta sunt dicta de curis asturum.

## CAPITVLVM XXII.

*De regimine domesticationis accipitrum, et regimine aucupii.*

Cum autem cum asture vel niso aucupare volueris, caue prius quod bene ad manum assuetus sit accipiter sic domesticando, primo enim vinciendus est die ac nocte, et tenendo eum cum zona valde longa, facias vt saepius ad manum aduolet, et quotiens aduolauerit, semper aliquantulum ciba eum, vt assuescat manum beneficam. Cum autem eum aucupari volueris, primo die accipe columbam in alis depilatam, et fac eam saepius sub pedibus eius effugere, et vt iterum capiat eam, et sic muta eam in melius volantem, et melius, et debiles et paruas aues commuta in fortiores et maiores, sicut etiam de aucupio falconum docuimus, quia quo ad hoc vnus modus est in regimine omnium auium rapacium, quotiescunque autem accipit auem, dimittatur aliquid de sanguine eius bibere, cum prouocatione et sibilo aucupis, et in praesentia canum, quia per hoc sumet audaciam, quando autem aucupari volueris dimittendo ad aues siluestres, primo ciba eum carne tenerae vaccae siue lingua porcina, quae in aceto vel vrina parum steterit, et mane sequenti valde diluculo vade ad aucupium. Caue tamen vt non iactes accipitrem si poteris nisi contra faciem auis, et fac vt accipiter auem videat, et non longe ab ea existat quando iactas eum. Dicunt tamen aliqui quod si carnem, vt dixi, in vrina iacere permittas, et in mane cibes eum de illa et in sero parum de ipsa carne des ei, et in sequenti mane cibes eum de lingua porcelli, et ad vespertum vadas in rapariam, in qua sunt aues, audaciam habebit ad magnas aues capiendas, quando vero videris accipitrem venationem videntem quidem sed non appetentem, scias quod nimis est pinguis et pennas de pinguedine spissas habere, eo quod nimis delicate nutritus sit. Sub-



trahas ergo ei partem de dicta consueta, et dabis ei leuem digestibilemque dietam, et in minori quantitate quam prius, quia ex fame naturali surget appetitus magnas aues capiendi, et in dicta quam sibi bonam esse probaueris conserua eum continue, et si nimis est pinguis, albo trito cum pulegio maceratur, et caue ne defectum et pusillanimum facias. Accipiter namque ab Augusto vsque ad Nouembrem debet teneri mediocriter pinguis, et mediocriter macer non multum ad pinguedinem vel maciem declinans, sed a Nouembre in antea pinguis tenendus est et fortis, tenendus est etiam in die diu super manum, et detur ei hora tertia coxa vna de carne pulli, et postea per horam permittatur in aqua balneari, et postea dimittatur ad solem donec pennas componat se perungendo, et postea ponatur in obscuro vsque ad vesperum, et superponatur pannus lineus super perticam super quam stat ne vngues laedat, et ab hora vespertarum teneat in manu vsque ad primum somnum, et tunc superpone eum in pertica panno supposito sicut prius, et accende coram eo lucernam per totam noctem, et circa diluculum asperge eum vino, et postea pone eum ad ignem clarum, et orto iam die vade ad aucupium, et si videris eum aues appetere proice, sin autem, itera quod supra dixi, si vero capiat, ciba eum de praeda quantum vult comedere. Cauendum autem multum est ab afflatu et morfu et laceratione vnguium accipitris et falconis, et omnium rapacium auium, et maxime quando hae aues balneatae fuerint, et pennas rostro composuerint, quia pinguedo quaedam adhaeret rostro, quam accipiunt de cauda sua quae est venenosa, pennas enim et pedes et anhelitum habent venenosas aues istae, et si tunc cum vngue vel rostro percusserit poterit esse periculum, et iam quidam mortui sunt de huiusmodi vulnere percussione. Attende autem quod si accipiter plus debito clamorosus fuerit, cibetur vespertilionem pleno pipere trito. Si autem pipiat quasi pituitae sit infirmitatis, et clamare voce sonora nequit, cum acuta aerea nares eius perforabis, haec igitur sunt quae de falconum asturumque curis, de his qui tempore nostro in talibus studium posuerunt congregauimus, nec debet reputari superfluum quod deseruit delectationi multorum, qui in auibus caeli ludere consueuerunt. Vt autem perfectior sit nostra doctrina, etiam studia antiquissimorum his adiungemus.

## CAPITVLVM XXIII.

*De regimine infirmitatum omnium auium rapacium secundum Aquilam, Symachum et Theodotionem.*

Antiquissimorum quidem Aquilae et Symachi et Theodotionis extant Epistolae ad Ptolemaeum Philometorem Regem Aegypti, in quibus de moribus et medicinis auium rapacium in communi ista doctrina continetur, si enim infirmitas est in capite, et sit quidem in oculis, vnge saepius de oleo oliuae, et praecipue si dolor est in exterioribus oculi. Si autem albugo crescit in interiori oculi auis, iniice puluerem seminis foeniculi cum lacte mulieris masculum parientis. Si autem per senectutem caligat oculus, habili argenteo vel aureo instrumento coque eum super nares, vbi sinciput in medio oculo medio rostri coniungitur, si clausas nares habuerit, per fistulam paruae pennae insuffla in nares eius puluerem piperis et saxifragiae, si reuma in capite habuerit, rutam pone iuxta nares eius, et carnem quam comedit in succo rutae intinge. Item allium contusum cum vino per nares ei immitte, et in loco obscuro resideat tota die, et eum per vnum diem ieiunare permitte, si pituitam quam quidam pipiam vocant, habuerit, accipe linguam eius aperto ore, et frica eam cum puluere saxifragiae melle condito, et si dicta non profunt, dabis ei comedere butirum, puluis etiam densitate caulis ad idem valet, si vltra modum clamorosus fuerit, accipe vespertilionem, et piper tritum intus pone et da ei comedere, si vespertilio non habetur, alia auis eodem modo cum pipere parata, ad idem non oberit. Nimiis tamen clamor aut infirmitatis aut defectus ex macie, aut quia oua generata in se habeat, est signum, si fastidium habuerit sorices viuas da ei, vel catellum in proximo natum antequam videat. Si cibum frequenter non alteratum euomit, accipe scamoneam ad pondus quartae partis eboli, et tantundem cumini, et tritis illis asperge eorum puluere carnes porcinas pingues, et da in cibum. Si vero dictam carnem comedere non potest, tolle albuginem oui, et in ea pone dictum puluerem, et ori eius iniice. Item si cibum eiicit, accipe oua cruda, et frange in lac caprinum, et totum decoque, et da ei ter ad comedendum, et sanabitur, si mutare pennas incipit, exime eum ab omni labore, et abundanter ciba eum, quoties enim esurierit, tot signa fracturarum vel fracturas habebit

in



in pennis. Valent etiam tunc auibus glebae virides substratae pedibus, et solis calor cum aestu moderato. Nihil autem aestus nocet. Si febres habuerit da ei ter vel quater succum arthemisiae cum carne gallinae. Item ad idem liga ei dextrum crus fortiter, et tunc in medio cruris vena apparebit, et illam subtiliter minue. In crure enim talium auium quatuor sunt venae, vna quidem antierius, altera inferius, et tertia exterius magis, quarta posterius super vnguem maiorem. Signa autem febris sunt si alae dependent, et caput demissum teneat, et si vomit quasi frigore teneatur, si cibus absque causa eum fastidit, aut auide quidem sumit, sed male glutendo inducit. Si autem valde sitit, accipe puluerem caulis liuistici, et carnem de aneto et faenicolo, et coque cum vino, et commisce cum hoc cochlear vnum mellis, et colaturam huius da ei bibere vel iniice ori eius, et si bibere noluerit, vna die da ei carnem linitam melle, secunda die carnem linitam oleo rosaceo frigido. Si felle laborat, quam infirmitatem felleram supra vocauimus, puluerem florum salicis siue gemmarum salicis sparge super cibum eius, si ei alae praeter febrem pependerit, fume sanguinem, et adipem anseris, et de sanguine frica alas eius ad solem. De adipe autem ciba eum, vel melius fume oleum laurinum, et ex illo alis leuatis affellas eius vnge, et felle porci perunge alas ipsius, et succo verbenae vel saluiae cibum eius intinge, si alas guttosas habuerit, hederam terrestrem in aqua coque, et folia illa cocta, et bene contusa alis eius iuxta latera circumliga, et cibum eius in eadem aqua tinge, si pedes guttosos habet, vel si tineae comedant eius pennas, carnes hircinas comedat in aceto tinctas, et alas eius aceto calido, et oleo laurino saepius perfrica, si pennam fractam sine dolore extrahere volueris, accipe sanguinem animalis paruuli quod gruile vocatur, vel sanguinem muris, et vnge locum pennae, et cadet, et postea ex melle ad magnam spissitudinem decocto, fac virgulam ad modum foraminis in quo stetit penna, et iniice foramini, et exhibit noua penna. Item succo herbae papaueris calido, perunge pennas eius, et intinge cibum eius eidem succo, si os fractum habuerit in crure vel in alia parte, aloe calidum superliga, et dimitte vna die et vna nocte. Item stercurus galli in aceto decoctum superliga, si inquieta sit auis in pertica, vel super manum, miriam in aqua decoque, et ex ipsa aqua asperge corpus eius, et intinge cibum eius in ea vsque nouies, si infirmitate quae rampa dicitur infirmatur, succo Arthemisiae cibus eius intingatur. Item sanguine agni calido pedes eius perfrica, vel vino tepido in quo decoctae sint vrticae, et in ipso vino cibum eius intinge, si stercore non potest, fel galli da ei comedere, vel testudines albas decoctas. Si nimium laxatur, modicum de succo iusquiami da ei bibere, et intinge cibum eius, si pediculos habet, accipe succum absinthii, vel aquam coctam cum absinthio, et eo ad solem sedente, infunde plumas eius et corpus eius per totum. Si lapidem in ventre habuerit, da ei pinguedinem auxugiae comedere et butirum, ad idem aloe herbam cum puluere apii inuolue cordibus paruorum auium, et da ei comedere, sic igitur ex his similiter poteris de omnium auium medicina commode facere. Si autem vis habere pinguem, da ei de masculi carne bouis vel porci, si vero vis habere macrum, da ei gallinas iuuenes aqua madefactas, si vero vis habere temperatum, da ei gallinas veteres, si vis vt expeditus sit ad aucupandum, stude vt facias ei bonam vesicam gutturis, et include in tenebris accensa ibi lucerna modica, et aucupa alternis diebus: si vis vt leporem aut cuniculum capiat, oportet vt doceas eum in iuuentute, et gyros liga in cruribus eius prope pedes, interiecto spatio vnus palmarum, quae sit distantia cruris a crure, quia tunc sine laesione capiet. Syluestris accipiter citius mansuescit, si multum ieiunare permittatur, et si iuuenis est auis, nec nimis calidus, nec nimis frigidus sit locus in quo custoditur, et in loco in quo stat, habeat semper herbam mentam et saluiam, et si est accipiter, in primis in foliis salicis, deum super lignum salicis aut abietis semper sedeat, et si saepe sanguinem auium biberit, vires sumunt, et audaciam, et affectum capiendi, nec negetur ei balneum aquae frigidae quando nutritur, nec multum coniungantur alae eius nisi pendeant.

## CAPITVLVM XXIV.

*De aliis duobus generibus falconum, et de locis habitationis eorum, et de definitione accipitrum.*

**H**aec de falconum et accipitrum natura, et regimine a nobis dicta sunt secundum dicta antiquorum. Sed praeter omnia quae inducta sunt falconum genera. Duo adhuc apud nos genera falconum inueniuntur, quorum vnum est falco lapidaris, et alterum falco,




qui vocatur arborealis, primum quidem mediae quantitatis est, et vigoris inter peregrinum et gibbosum, et inuenitur in alpium rupibus, et est eiusdem nutritiuae cum peregrino. Alterum autem medium est quantitate et vigore inter gibbosum et mirle, eiusdem cum mirle regiminis existens, et ideo de his in speciali tractare non oportet. Praeter ea autem quae dicta sunt, forte multa apud diuersos inueniuntur falconum genera, sed ex his quae dicta sunt sufficienter de natura, et nutritura omnium habetur coniecturalis scientia. Sed hic adhuc adiiciendum, quod sicut in antehabitis libris dictum est, omne animal abundat in loco ubi sui proprii et conuenientis cibi est abundantia, propter quod cum huiusmodi auium cibus proprius sit venatio auium, abundabunt in locis ubi abundant aues quas venantur. Ista autem aues sunt aquaticae, quia et illae tardiores sunt ad volatum, et carnosiores ad escam, et ideo versus Septentrionem accipitrum et falconum, et aquilarum abundant genera, sicut est in Britannia, Suetia, Liuania, et finitimae his regiones Sclauorum, Prutenorum et Rutenorum, et quia frigidae sunt istae regiones, et in terris frigidis sint corpora magna, et ex multo sanguine multi spiritus, et ex his audacia et feritas vt in scientia de natura locorum habitabilium determinatum est. Ideo etiam aues rapaces in dictis regionibus magnae sunt, et cum audacia ferocitatem magnam habentes. In aliis autem locis proportionalem etiam accipiunt vigorem et quantitatem et audaciam, nec est silentio praetereundum, quod Aquila et Theodotion et Symachus socius eorum, omnia accipitrum genera falcones vocant, et ea quatuor esse generum determinant, asturem primae quantitatis ponentes in genere primo, et asturem minorem quem tercellinum vocamus, ponentes in genere secundo, et nisum in genere tertio, et muscetum in genere quarto, quibus nullo modo consentiendum esse, probat, quod tercellinus inuenitur in nido accipitris, et muscetus in nido nisi reperitur, et ideo et accipiter et tercellinus non differunt nisi sexu, non specie, quia accipiter est faemina, et tercellinus est masculus, et eundem modum differentiae habent nisus, et muscetus, nisus enim est faemina, et muscetus est masculus. Haec igitur de rapacibus auibus dicta sunt.

F I N I S.

---

LIPSIAE, EX OFFICINA BREITKOPFIANA.





A D  
RELIQVA LIBRORVM  
FRIDERICI II.

ET  
ALBERTI MAGNI CAPITA  
COMMENTARII,

QVIBVS

NON SOLVM AVIVM, INPRIMIS RAPACIVM, NATVRALIS,  
SED ETIAM SECVLI TERTII ET DECIMI LITTERARIA  
HISTORIA ILLVSTRATVR.

---

CVM

AVCTARIO EMENDATIONVM ATQVE ANNOTATIONVM

AD AELIANI  
DE NATVRA ANIMALIVM LIBROS.

AVCTOR

IO. GOTTL. SCHNEIDER, SAXO.

ELOQVENT. ET PHILOLOG. PROFESSOR.

---

TOMVS II.

---

LIPSIAE,


IMPENSIS I. G. MVLLERI HEREDVM.

1789.









## LECTORI.

**V**ltra fines primo consilio definitos euexit me studium augusti eiusdemque in sua arte eruditissimi scriptoris, amor historiae naturalis, et magis etiam copia librorum de arte falconaria, quam plane attingere nolueram, scriptorum paulatim succrescens, vnde artis dignitatem non eam quidem, quam magnates et principes superbiunt cum damno ciuium suorum, sed qua iure suo etiam inter litteras censi debet, fero agnoui. Auctus ita labor comparandorum singulorum librorum sensim me ad multa historiae et naturalis et litterariae argumenta deduxit accuratius inuestiganda, quam a quopiam hucusque factum esse reperi. In quo quidem studio nisi me nimis saepe librorum veterum copia defecisset, plura etiam argumenta rerum delibata ad liquidum potuissem perducere. Ex mutato paulatim consilio natum est incommodum illud, de quo lectores bene multos conquesturos esse sentio. Per multa enim loca



ca dispersae et disseminatae sunt disputationes, nec eae sibi omnes consentiunt vbique; quoniam non omnium eodem mihi tempore librorum copia erat; saepe etiam quod aliena antea tradideram auctoritate, multo grauiore ipsius naturae cultro anatomico inuestigatae deinde oppugnaui et refutaui. Cui malo vt aliquo tamen modo mederer, ipse operam conficiendi indicis rerum et verborum, quaecunque in his annotationibus explicantur, lubens suscepi; cui ipsi adeo intertexui quaedam antea omissa, aut quae in libris fero acceptis repereram. Accedunt tandem additamenta quaedam, anatomicis quibusdam annotationibus contexta, quibus supersedere poterunt, qui naturalem historiam ex specie corporum quorumcunque discunt, docent et iudicant.

Dab. Francof. Calendis Augustis MDCCLXXXVIII.







# ANIMADVERSIONES

AD RELIQUA LIBRORVM

FRIDERICI II.

PAG. 3.

**L***incos, Lincas.* Quam ob rem sexum distinxerit, non video; contra suspicor, *Lincas* esse varietatem scripturae rectiorem pro *Lyncas*. Deinceps *Furecti* sunt Gallorum *Furets*, cuius vocabuli vestigia seruauit nostrum cum Britannico idiomate.

\* *Modos leopardorum — Lincos, Lincas, Furectos.* *Furecti* sunt, quos *furunculos* appellat Gallicus libri de natura rerum auctor apud VINCENTIVM XIX. c. 57, putorio valde consimiles, mustela paulo ampliores, inter album et buxeum colorem. Commemorata deinde cuniculorum venatione, addit, coire prostratos dici; foeminam, si marem non habeat, quando luxuria stimuletur, tumescere et mori, partu foecundo septem vel octo foetus simul edere, vterum gerere 40 diebus, et cum nati fuerint, catulos coecos esse 30 diebus, a tempore vero, quo videre incipiant, vsque ad 40 dies venari incipere. De coitu quod tradit ex aliena relatione, VINCENTIVS ibidem sub ARISTOTELIS auctoritate ponit his verbis: *furonum foeminae sunt obediētes valde ad coitum, clamantque mares ad coitum tempore luxuriae. Nec coeunt mares cum foemina retro, sed mas eleuatur, et femina aequatur subiucendo.* Sed haec ARISTOTELES eadem de felibus tradit H. A. V. cap. 2; vides igitur, quam multi ex vetustis ARISTOTELIS interpretationibus illati fuerint in historiam naturalem animalium errores. — Modi leopardorum qui intelligantur, difficile est definire. Sunt enim in hoc rapacium animalium genere plures colore et magnitudine parum diuersae species, quas eo nomine comprehendunt scriptores recentiores; nec hodieque omnes felium species nouimus, quibus Asiatici in venatione vtuntur. Praeter eam speciem, quam illustris BUFFONVS *l'Once* appellauit, duae aliae ad eundem venandi vsum cicuratae adhibentur, quarum vnā *Guepard*, alteram *Caracal* appellauit. De lynce proprie dicta ad vsum venandi cicurata desidero adhuc scriptorum veterum

Frider. Rel. Tom. II. A rum



rum testimonia; quare suspicor, in vocabulis *Lincos*, *Lincas* vitium latere, cum praeterea ratio repetiti vocabuli eiusdem non appareat. Suspicio igitur, in his duobus vocabulis latere vestigia nominis alicuius ferae ad usum venandi cicuratae, ex quo Buffonianum *Once* factum est. *Lauzani*, bestiam aliquam crudellem, quae et ipsum leonem aggreditur, nominat Gallicus libri de natura rerum auctor apud VINCENTIVM XIX. cap. 65. Nescio, an idem sit, quod *unciam* appellat non edito auctore VINCENTIVS ibid. cap. 114.: *uncia*, inquit, est animal saeuissimum, non altius cane, sed longius corpore, canibus inimicum valde. Praedam non comedit, nisi eam in altum portet, sed quando ad arborem venit, ad supremum eam ramum defert, eamque pendendo comedit. Cum autem in calore coitus existens aliquem vulnerauerit, mures super ipsum conueniunt, ac super eum mingunt et moritur. Vnde quidam ab ea vulneratus se per cymbam in mare portare fecit, et mures ad mare venerunt, ut ad eum accederent, sed propter mare non poterant. — De leopardis quaedam tradit Gallicus libri de natura rerum scriptor apud VINCENTIVM XIX. cap. 76., quae apud illustrem BUFFONVM non reperias, seu falsa, seu vera; de quo nunc quidem non iudico. Domesticatur, inquit, ad venandum; itaque cum ad praedam in venatione ducitur, relaxatur; quam si quarto aut quinto saltu capere nequiverit, ferociter iratus subsistit, et, nisi statim venator furenti bestiam aliquam obtulerit, cuius sanguine placetur, in ipsum venatorem vel in quoslibet obuios irruit. Impossibile enim est, eum placari, nisi in sanguine. Sed in hoc prouidi sunt venatores, ut agnos penes se vel alia animalia semper habeant, quibus iratos placant. Huic autem furenti qui resistere vult, inter manus allia fricet, et statim ille resiliet, quia odorem allii sustinere non valet. — Leones Indicos iuba nigra erecta ad venationem mansuefactos et odoratu praestantes memorat AELIANVS XVII. c. 26.

PAG. 5. sq.

*Modi mergorum* videntur esse Colymbi LINNAEI. *Corui* vero *marini* Pelicani carbones, Gallis *Cormorans*, corui quasi marini, dicti. *Cinni* sunt cycni. *Pellicani* appellantur *Cofani* nomine Apulico, quod alibi non reperi. Sunt LINNAEI Pelicani Onocrotali. *Coriales* digiti sunt corio iuncti.

PAG. 6.

*Ad hoc aquilae piscatrices.* Videtur voluisse ab hoc scribere. *Pluerii* sunt Gallorum *Pluviers*; *Vanelli* eorundem *Vanneaux*; *Liuercini* dicti videntur aues ex eodem genere, quod circa Neapolin *Leverfina* appellari reperio in CHARLETONI Onomastico p. 110. Nocte etiam et singulos pastum euolare, scarabaeos, bruchos et huiusmodi comedere, digito posteriore carere cum plueriis et bistardis, infra tradit auctor; atque ex his indiciis referre has aues licet ad genus *Charadriorum* LINNAEI.

*Genera*



*Genera gruum, maiorum et minorum.* Quae praeter vulgarem minor hic intelligi grus debeat, difficile est coniectu. Ardeam tamen LINNAEI, Antigonom et virginem, intelligi suspicor, quas in Asiae paludibus habitare passim refert Cl. PALLAS Itinerar. Russici III. p. 220. Virginem vulgari grue paulo minorem a Mauris *Bukottaia* appellari, tradit REDI *Esperienze intorno agli Insetti* p. 174. Duplex gruum genus iterum Noster infra cap. 21. p. 24. memorat. — Ciconiam nigram nuper accurate descripsi marem in Promptuario Lipsiensi historiae naturalis anni 1786. p. 484. De eadem ALBERTVS p. 228. b., inuenitur, inquit, etiam genus ciconiae totum in dorso nigrum et in dorso (voluit ventre) subalbum. Sed hoc non nidificat in hominum habitationibus, sed in paludibus deserti.

## PAG. 7.

*Picarum, quae dicuntur ossa frangentes.* Intelligit ossifragas, quarum nomen infra p. 16. post vultures truncatum occurrit. Sed ad picarum genus inepte reuocantur hic, errore librarii, vt puto, cum aquilarum scribere voluisset.

## PAG. 8.

Pedes breues palmipedibus auibus cum collo longo ad natandum et piscandum datos annotauit etiam ARISTOTELES de Partibus Animal. IV. 12. Contra idem ibidem palustres aues longipedes facit. Recte. Sunt eae, quas LINNAEVS Grallas appellauit, cum Grallatores deberet. Sed recte praeterea de toto hoc genere admonuit ARISTOTELES: μακροσκελῆ καὶ μακροδάκτυλα καὶ τὰς καμπὰς ἔχοντες πλείους ἐν τοῖς δακτύλοις οἱ πολλοὶ αὐτῶν. Digitos scilicet longiores pluresque adeo digitorum articulos habere plurimum genus. Veram hanc annotationem, contra ac putabat nuperus Philosophi interpret gallicus, CAMVS, in plurimis grallatoribus reperi; extimus enim digitus quinque phalangibus seu articulis componitur, cum in reliquis terrestribus quatuor flecti soleat. In Pelicani genere, in scolopace arquata, laro hirundine atque aliis extimus digitus 5 articulis componitur, et numerus in sequentibus ad intimum vsque decrescit ad ternarium. In hirundine rupestri aliaque specie numerus solito minor reperitur. Si praeterea aues quaedam aquaticae habent pedes longos, vt fulicarum genus, et si quae sunt his similes, meminisse debemus, eas magis super aquis currere, quam natare. Eaedem etiam fulicae in terra celerrime currunt, sed tum metatarso ad terram horizontaliter deflexo insistent, quod etiam a charadrio oedicnemus longipede fieri vidi.

## PAG. 9.

Post verbum *rationabiliter* redit oratio Imperatoris parenthesi filii regis interrupta. *Ralli* sunt Gallorum *Rasles*, LINNAEO etiam in genere auium palustrium



strum aliquo dicti, iidemne, an diuersi, nescio. Infra cap. 9. modus rallo-  
rum terrestrium nominatur, qui dicuntur duces coturnicum; unde apparet, ral-  
lum ortygometram intelligi. *Ayrones*, *Airones* sunt Gallorum *Hérons*, Ardeae  
LINNAEI. *Maneries* (ex gallico *manières*) *cinnorum* indicant vtramque cycni spe-  
ciem, quam nuper accuratius distinxī in Promptuario Lipsiensi 1787. Quod ve-  
ro cycni dicuntur grana et fructus prius, quam comedant, in aqua emollire, ve-  
reor, vt ratio addita *propter teneritatem rostri* vera sit. Rostrum enim eiusdem  
plane structurae et naturae est cum anserino. In ciconia nigra femina, quam  
cicurem in corte saepe vidi, eundem morem obseruabam; quidquid enim illi in  
corte obicitur esui, aqua prius perlutum comedit.

*Modi picarum*, quae sunt aquaticae, neque natant, neque comedunt pisces,  
referri possunt ad genus Haematopodis Linnaeanum; sed praeter ostralegam  
species vernaculae aliae non sunt notae, quas tamen verba *multi modi* arguunt.  
Haec auis Gallis *Pie de mer* dicitur.

PAG. 10.

*Circellae* sunt Gallorum *Cercelles*, anates minores, Querquedulae LINNAEO.  
Confer CANGII Glossarium sub voce *Cercella*.

PAG. 11.

*Bernecelae*. Anserum genera plura commemorat ALBERTVS p. 79. b. An-  
feres, inquit, magni et parui, quorum 4 genera sunt apud nos; magni videlicet  
cinerei, et parui cinerei, et anseres albi, qui anseres grandinis siue niuis vocan-  
tur. Et sunt quarti habentes maculas nigras in vultu et cinerei sunt, qui anseres  
arborum vocantur, et omnes habent hoc, quod in grege volant. Idem de mi-  
grationibus earum VII. p. 81. a.: expertus sum, quod anseres secundum genus  
suum quadruplex recedunt a terra nostra, et veniunt in Slauiam ad loca humida  
harundinosa et paludosa, et pullificant ibi. In hiemis autem principio reuertun-  
tur ad nos propter pascua et aërem magis temperatum et tunc volant in gregibus  
maximis, ita quod milleni vel amplius videntur, et quando ventus est a septen-  
trione, volant ad meridiem, quando autem est a meridie, volant ad aquilonem,  
ita quod semper portantur flatu venti in volatu. Et ideo vulgus dicit, quod vo-  
latus anseris indicat ventum. Quatuor ab ALBERTO nominata genera definire  
non ausim, sed hoc mihi satis constare videtur, in eo numero esse etiam *Ber-  
necelas*, quas a *Blenectis* distinguit Imperator. Scriptura apud nostrum variatur  
inter *Bernicla*, *Bernicha*, c. 19 et 21. CANGIVS aliunde laudat *Bernacae* et *Bar-  
naces*; CHARPENTERIVS vero *Bernechae* et *Berneflae*. Easdem ALBERTVS libro  
XXIII. p. 228. a. *Barbates* appellat, quas, inquit, mentiundo quidam dicunt  
aues, quas vulgus *bonugas* (GESNERVS p. 108. recte legit *Bomgans*, *Baumgans*;  
i. e.



i. e. arborum anseres) vocat, eo quod ex arboribus nasci dicuntur, a quibus stipite et ramis dependent et succo, qui inter corticem est, nutritae: dicunt etiam, aliquando ex putridis lignis haec animalia in mari generari et praecipue ex abietum putredine, asserentes, quod nemo vnquam vidit has aues coire vel ouare. Et hoc omnino absurdum est: quod ego et multi mecum de sociis vidimus eas coire et ouare et pullos nutrire, sicut in antehabitis diximus. Haec auis caput habet quasi-pauonis, pedes autem nigros, vt cignus, et sunt membrana coniuncti digiti ad natandum et sunt in dorso cinereae nigredinis et in ventre subalbidae aliquantum minores anseribus. Apud VINCENTIVM XVI. c. 40. *Barthlathes* et *Bernacae* audiunt, cum eiusdem fabulae mentione. Idem ALBERTVS p. 227. b.: anser siluestris apud nos quinque specierum inuenitur. Est enim magnus anser, qui cinerei coloris est, et apud germanos *Gragans* (i. e. *Graugans*) vocatur: et est alius minor illo eiusdem coloris et eiusdem figurae, sed altius et longius volans propter corporis sui leuitatem: et est tertius totus albus praeter alarum extremas 4 vel 5 pennas, quae sunt nigerrimae, et hoc genus est paruum, late et alte et longe volans: et est quartum genus illo minus habens rostrum anseris, sed colorem capitis pauonis, praeter hoc, quod cristam de pennis non habet, et in dorso quidem est cinereus, declinans ad nigredinem. In struma autem nigrum et in ventre cinereum, quod vulgus dicit nasci de arbore. Quintum autem genus anseris ponit Plinius vocans ipsum comage. — Aliud autem genus addunt quidam, quod praeter strutionem maior est auis, vt dicunt, et hoc habitare in alpibus perhibent — anseres siluestris volant extento collo, et in hoc differunt ab ardea, quae volat collo contracto. — Apud nos anser, qui est sicut pavo, cum anseris domestico concubuit et pullificauit: sed omnes pulli patrem in colore secuti sunt, sed in quantitate erant maiores — vidimus enim anserem nutritum domesticum, qui plus habuit quam 60. annos. Ex hoc specimine cognoscent illi, qui fabulas crepare ALBERTVM clamant, non parum etiam bonae frugis inter steriles auenas et lolia latentis inde posse colligi. ADELINVM ille, IORACH vel IORATH et SOLINVM saepe ineptiarum arcessit, vbi experimentis suis confidit. — Ceterum de anserum migrationibus et reliquarum aquaticarum auium egregiae exstant observationes Cl. FALLAS in *Spicileg. Zoolog. VI.* p. 15 seqq. De exitu et reditu aquaticarum ad pascua raras reperio virorum doctorum annotationes. De anate mollissima OTHO FABRICIVS in *Fauna Groenl.* p. 69., pro more, inquit, habet mane de sinibus euolare, mari propiora petens, vespere autem reuertens.

PAG. 12.

Ex Gallico *Flaque* pro voce *Placteriae* legendum censebat CANGIVS *Flacteriae*, i. e. loca coenosa, stagnantia aquis. Dicitur etiam *Flactra*. Cf. CANGIVS sub h. v.

A 3

PAG.



PAG. 13.

*Modus hirundinum maiorum.* ARISTOTELIS locus, quem laudat, est in Histor. Animal. I. c. 1.: καὶ τῶν ὀρνίθων εἰσὶ τινες κακόποδες, οἱ διὰ τῆτο καλῶνται ἄποδες· ἔστι δὲ εὐπτερον τῆτο τὸ ὀρνίθιον, σχεδὸν δὲ καὶ τὰ ὅμοια αὐτῶ εὐπτερα μὲν, κακόποδα δ' ἔστιν, οἷον χελιδὼν καὶ δρεπανίς. ὁμοιότροπά τε γὰρ καὶ ὁμοιόπτερα ταῦτα πάντα καὶ τὰς ὀψεις ἐγγὺς ἀλλήλων. Φαίνεται δὲ ὁ μὲν ἄπας πᾶσαν ὥραν, ἡ δὲ δρεπανίς, ὅταν ὕσῃ τῆ θέρους. τότε γὰρ ὀρᾷται καὶ ἀλίσκεται· ὅλως δὲ καὶ σπάνιόν ἐστὶ τῆτο τὸ ὀρνεον. Ita enim in postremis recte Codex Mediceus pro ἄλλως habet; vbi male Gallicus Interpres: *ils volent très vite*: cum deberet: alas bene longas et fortes habent interpretari. Iterum ARISTOTELES IX. 3. apodes κυψέλλας etiam appellari ait, hirundinibus similes, a quibus nisi tibiis hirsutis non distingui: habitare in loculis luteis longo aditu et angusto contra ferarum insidias praemunitis, sub petris et speluncis: νεοττεύουσιν ἐν κυψελίσιν ἐκ πηλῆ πεπλασμέναις μακράς ὅσον εἰσδύσιν ἐχέσαις. ἐν σενῶ δὲ ποιῆται τὰς νεοττίας ὑπὸ πέτραις καὶ σπηλαίαις. Vbi Codex Mediceus habet μακρὰς ὅσον εἰσδύσεις ἐχέσαις. Recte. Sed praeterea ad ἐχέσαις retrahendum est sequens ἐν σενῶ; deinde continuanda oratio: ποιῆται δὲ etc. Ita enim ALBERTVS hunc locum interpretatur: *in tempore veris facit nidum longum et gracilem et parvissimae latitudinis, et collocat in parietibus sub prominentibus lapidibus.* Cypsellos ARISTOTELIS PENNANTVS etiam in Itinerario Scotico I. p. 378. vers. germanicae interpretatur Procellariam pelagicam LINNAEI, PLINII scilicet errore X. cap. 39. inductus, qui apodes in toto mari cerni et naues semper circumuolare tradit sua auctoritate. Gallicus contra Philosophi Interpres in ipsa versione pro δρεπανίς posuit *Martinet*, nomen hirundinis rupestris gallicum, deinde vero in Commentario apodem cum drepanide confusam gemino nomine ab ARISTOTELE indicari putabat; in quo me consentientem non habet. Apodem enim hirundinem ripariam LINNAEI esse puto, alteram vero hirundinem apodem LINNAEI, omnium congenerum facile maximam, eandem cum SCOPOLII rupestri, Gallis *Martinet* dictam, alarum flexura arcuata, a qua nomen δρεπανίς, i. e. falcula, sortita est, quod, vt ait Imperator, alas longas ad modum falcis habet. EUSTATHIVS ad Odysseam p. 176. ed. Basil.: καὶ παρὰ τοῖς Λυκίοις καὶ μέχρι νῦν, οἱ χελιδόνας τινὰς, αἳ οἱ ἰδιῶται πετροχελιδόνας φασίν, ἐκεῖνοι καλῶσιν ἄποδας. Ex quo loco possit aliquis suspicari, hirundinem apodem LINNAEI seu Gallorum *Martinet* in Lycia dictam fuisse apoda, a vulgo vero rupestrum hirundinem. Apodem etiam vespertilionem dictam fuisse licet suspicari ex loco PHILOPONI ad ARISTOTELEM de Anima Littera M. 6.: ἔτω καὶ ἄποδα φαρμένζωα, ἃ τὰ μὴ ἔχοντα πόδας, ἀλλὰ τὰ μικρὰς ἔχοντα. ἔστι δὲ πτηνὸν τι τοιοῦτον ὅμοιος χελιδόνι, καθ' ἑσπέραν πτάμενον, ὃ καλεῖται νυκτερίς. Sed hirundinum ripariarum et rupestrium plures esse videntur species, nec omnes adhuc satis distinctae. Facile esset decernere de specie, si digitorum structuram positionem-

que



que annotasset ARISTOTELES. Pluuio tempore vel post pluuias inprimis apparere ripariam, et in regionibus quibusdam pullos ad menfarum vsum conquiri, confirmavit illustris BVFFONI socius MONTBEILLARD. De hirundinum cibatu iam olim PLINIUS X. 24., eadem, inquit, demum sola auium non nisi in volatu pascitur. De coitu locus obscurus est AELIANI H. A. II. 3., vbi vide notam. Quidam etiam in volatu coire tradiderunt recentiores.

## PAG. 14.

*Syrenae* — *sturnelli* — *starnae* — *franquillini* — *facha*. Primum vocabulum ex Gallico *Serin* formatum esse facile apparet; sed non item, cui generi auium h. l. recte tribui possit. *Sturnelli* sunt Gallorum *Estourneaux*. *Starnae* Italicum perdicum nomen est, sed perdici h. l. iunctum dubitare licet cinereae an rubrae speciei proprium sit. Similis romanorum nominum confusio obtinet in hodiernis virorum doctorum libris de natura auium. COLVMELLA VIII. 12: ceterum siluestres gallinae, quae rusticae appellantur, in seruitute non foetant; et ideo nihil de iis praecipimus, nisi vt cibus ad satietatem praebeatur, quo sint conuiuiorum epulis aptiores. VARRO III. 9.: gallinae rusticae sunt in vrbe rarae, nec fere mansuetae sine cauea videntur Romae, similes facie non his villaticis gallinis nostris, sed Africanis, aspectu ac facie incontaminata. In ornatibus publicis solent poni cum psittacis ac merulis albis, item aliis id genus rebus inusitatis. PLINIUS semel tantum atque obiter meminit rusticulae X. sect. 54. Currunt, inquit, vt perdices, rusticulae. Vbi HARDVINVS, auctore CONR. GESNERO aliisque, rusticulam interpretatur ARISTOTELIS scolopacem, Gallorum *becassam*. MARTIALIS XIII. 76.: rustica sim, an perdix, quid refert, si sapor idem est? Carior est perdix, sic sapit illa magis. Vbi lemma habet rusticula inscriptum. Idem XIII. 62.: ponitur ausoniis perdix rarissima mensis. Hanc in lautorum condere saepe soles. Quae quidem omnia de perdice vulgari nostra grisea dici non possunt; ea enim Italiae non ignota nec rara fuit; sed graeca rubro rostro pedibusque insignis, dimidio maior, in Italia non fuit, teste ATHENAEO IX. p. 390., vbi de perdice graeca seu rubra agit: τῶν δὲ περδίκων ἐστὶν ἕτερον γένος ἐν Ἰταλίᾳ αἰμαυρὸν τῇ πτερῶσει καὶ μικρότερον τῇ ἔξει, τὸ εὐγχος ἐχὼ κινναβέρων ἔχον. De hac rubra Graeciae indigena, Italiae vero ignota loquitur vbique ARISTOTELES, et, vbi eum transtulit, PLINIUS X. §. 51., vbi recte etiam de ea re admonuit HARDVINVS. Recte vero, vt puto, AVG. NIPHVS in Commentariis ad ARISTOTELEM, rusticulae, inquit, PLINIO dictae sunt nostrates perdices; etenim proprie perdices sunt maiores, vt Hispanicae et Chienfes et Siculae. Contra vero CONR. GESNERVS p. 484. eandem facit σκολόπακα cum Romanorum rustica perdice vel rusticula. Scilicet p. 461. dixerat: alia videri potest gallina rustica, cuius COLVMELLA et VARRO meminerunt, alia vero rustica perdix, cuius MARTIALIS, eadem, ni fallor, PLINIO rusticula dicta. Recte hoc



hoc GESNERVS. MARTIALIS rusticula, quae in lemmate dicitur, est eadem cum PLINII rusticula; sed nulla est perdix rustica, quae a gallina rustica distinguatur possit. Nam in MARTIALIS loco Codices rectius habent *rustica sim an perdix*, nec, ut olim GESNERVS in suis editionibus legerat, *rustica sim perdix*. Praeterea ipse hic locus prodit cognationem perdicis cum rusticula, quam et PLINII locus arguit. Idem GESNERVS p. 461. suspicatur, gallinam rusticam esse gallinam nigram (*Moorhuhn*), sed in eam ipse suspicionem inciderat, quod gallinam rusticam a perdice rustica falso distinxit. Recte vero idem ipse p. 461. vidit, gallinam rusticam COLVMELLAE non esse scolopacem, quod ea plane est dissimilis villaticae. Deinde cibus scolopaci non praebetur, sed ipsa cum sibi quaerit in palustribus et limosis locis. Cf. omnino BOWLES Introduction à l'histoire naturelle de l'Espagne, p. 446. Denique ipse VARRO perdicem distinguit a rustica; nam infra cap. XI. 4. post aues aquaticas plures commemoratas addit: sic perdicem, quae, ut superiores, neque propter foecunditatem neque propter suauitatem saginantur, sed sic pascendo fiunt pingues. Rustica COLVMELLAE per aucupem decipitur. Sed haec puto sufficere ad demonstrandum, perdicem romanis scriptoribus graeco nomine dictam esse rubram seu graecam intelligendam; alteram vero Italiae indigenam, griseam, rusticam gallinam, ut nostris hominibus *Feldhuhn*, appellatam fuisse. Mansit itaque hodieque perdicis nomen graecae proprium; alteram proprio nomine Itali *starnam*, ut puto, dicunt. *Franquillini* sunt, qui vulgo *Francolini* audiunt, ex Tetraonum genere. *Facha*, alibi apud Nostrum *facheta*, *fakecha*, ex graeco *Φάσσα*, ut vult CANGIUS, est palumbus. ARISTOTELES H. A. IX. 7. turturibus similiter iungit *Φάσσας*, ubi Codex Mediceus *Φλάβας*. Iterum VI. 4., ubi ALBERTVS: turtures, columbas nigras, quae *vehicae* dicuntur. VIII. 3. *Φάψ*, *Φάττα* continuae leguntur, sed Mediceus cum regio Parisiensi Codice *Φάψ* omittit; similiter etiam versiones vetustae. Ibidem cap. 12. vetus Interpres *fatgae* habet, alibi *fassa*.

\* *Rallum terrestrem seu campestem et aquaticum* etsi definire nondum audeo, reperio tamen, Imperatorem secutum esse etiam hic nomina Gallica. Nominat enim CAROLVS D' ARCVSSIA saepenumero le ralle d'eau et ralle des champs, quas regem Galliae ope sparueriorum cepisse tradit. Idem etiam *syrenam* bis nominat, ut in excerptis inde locis monui, quam Imperatoris syrenem esse puto.

#### PAG. 15.

*Anates campestres.* Gallorum *Canards des prés*, Otis tetrax LINNAEI. Contra *Bistarda* vulgaris Auis tarda, Gallorum *Outarde*, est. Anates campestres ipse noster infra colore et forma membrorum et pluribus rebus similes bistardis, sed multo minores, tradit; bistardas cum liuercinis et plueriis digito posteriore pedum



dum carere. Capite 55, sunt, inquit, etiam aues, quae cum pedibus saltant super terram, vt aues rapaces sub se comprimant, vt bistardae et anates campestris. Similes sunt bistardis, sed longe minores et in aestate turpem sonum faciunt ad desiderium coitus. De qua quidem voce minoris tardae coitum desiderantis nullo traditum aliquid legi. Sed aequè memorabile est, quod Imperator habet cap. 26.: grossum, inquit, collum habent multae auium, quemadmodum masculi et feminae bistardae; sed masculis ingrossatur multo amplius tempore coitus, vt, quicumque viderit, possit iure admirari; nam aliis temporibus ad consuetam grossitiem reuertitur; feminis vero tempore coitus et aliis temporibus est eadem grossities. De qua quidem re nullam recentiorum scriptorum similem obseruationem reperio, nisi quod KLEINIVS noster marem incalescentem amore aut iratum barbam cutemque sub collo extentam inflare refert. Barbam in timore ira-que erigere marem testatur etiam, qui otidem maiorem Hungariae incolam descripsit et pinxit in *Promptuario Hungarico* Vol. I. Parte I. p. 466. seqq. Saccum gularem primus annotauit et pinxit in Otide vulgari EDWARDS, Britannus; eundem deinde in mare vidit aquaeque recipiendae dicauit Cl. PALLAS Itinerarii Russici T. III. p. 220. Sed nuper demum exstitit vir doctus, EL. BLOCH, qui feminae otidi eundem saccum communem assereret, in *Scriptis Societ. Berolin. Amicorum Naturae curios.* Vol. III. p. 376. Doleo, me nondum potiri potuisse hac aue satis in his regionibus frequenti, sed captu difficili, quo ipse oculis meis de dubitatione hac virorum doctorum decernerem. Si mas solus sacco gulari gaudet, potest tum in amore eum forte inflare, vt collum intumescat. Contra si femina eundem habet, quod vix credo, alium tum eidem vsum excogitare debemus. Illustris BVFFON etiam in Otidis historia obseruationibus alienis atque altercationibus immorari quam naturam ipse inspicere maluit. Refert tamen ex obseruatione SALERNI, anatem campestre sub tempus coitus nocte inprimis sonitum *Prout* alta voce repetere; quem num Imperator intelligi voluerit, incertum est. Easdem directe aërem ascendere in volatu, annotauit Imperator cap. 55, quod quidem falconariam exercenti facile fuit obseruare; vt reliqua etiam, quae de otidum variis generibus tradit memorabilia, potuit certa fide ipse cognoscere, cum falcones otidem maiorem minoremque insectantes comitaretur. Rationem otidum, qua se defendunt a falconum aggressu, posuit cap. 56.: speciales, inquit, defensiones insunt auibus et propriae, vt bistardis et anatibus campestribus est propria defensio emittere longe a se sterco suum in aues rapaces, quae sequuntur eas. Rursus bistardae et anates campestris contra aues rapaces horripilant plumas agrifando se (i. e. ungues ad impetum faciundum expedientes, ex gallico *s'agrif-fer*) et eleuant alas deponendo caput ad modum gallorum pignantium, quod propter timorem faciunt; sed tamen bistardae percutiunt alis in pectore aues rapaces. Similiter Arabs DAMIR apud BOCHARTVM Hieroz. II. p. 283. otidi, quae Arabice *hubâra* appellatur, sterco pro telo esse annotat; et ALKAZVINVS,



cum, inquit, eam insequitur accipiter; non cessat cum accipitre ascendere et descendere, donec in eius pupillam incidens sterco in eam coniecerit. Quo facto constrictus manet accipiter, ut qui manibus pedibusque victus est. Tum vero conuenientes otides accipitris plumas vellicant, unde illi certa mors. Postrema orationis pars num vera sit, dubito. Eandem otidem moestam esse, cum plumae post defluuium tarde recrecant, et aliena suis omissis oua fouere, ibidem tradunt Arabes et pag. 251. Sed postremam annotationem proprie ad mares pertinere, vult Arabs DAMIR. Ovis masculinis utebantur Arabes ad capillos denigrandos, et filo inserto mascula oua dignoscere sibi videntur, quod nigrum inde educi dicitur. Auctor ASSARIPH otidem auem esse ait magni colli, cinerei coloris, rostri utcumque longi, carnis inter gallinaceam et anserinam. Volatum celerrimum otidi Arabicae contra Graecorum narrationem scriptorum tribuit proverbium arabicum, et narrat DAMIR, eam longe euagari volando, quod, cum circa Basoram ad Euphratis ostia capitur, in eius ingluvie reperiatur granum viride, ex arbore terebinthi, quae in finibus Syriae Damascenae crescit, decerptum. Minor otis seu Tetrix LINNAEI in Hispania *Sison* vel *Sisa* audit, ut tradit Introductio in Oryctographiam Aragoniae p. 79. In Austriae regione aliqua sub nomine gallinae ericetorum (*Heidehühnchen*) offendit Cl. DE MOLL in Epistolis Itinerariis ad histor. natural. Austriae pertinentibus, Vol. I. Reliquam auis historiam discas ex CETTI Histor. natur. Sardiniae, T. II. p. 120. seqq.

*Piconum.* Scribere voluit *picorum*.

PAG. 16.

Post *alaudas* reliquiae vocabuli *couar...* videntur indicare *cozardos* vel *coftardos*, quos alaude iungere solet Noster cum aliis. De ipso vocabulo infra dicetur.

De sturnorum societate PLINIVS X. 24., sturnorum, inquit, generi proprium cateruatim volare et quodam pilae orbe circumagi, omnibus in medium tendentibus. Auctor libri de natura rerum Gallicus apud VINCENTIVM Bellouacensem, Speculi naturalis XVII. cap. 140., sturni, inquit, sunt aues paruae ad volandum extentae fusco nitentes colore. Cateruatim volant, et quodam orbe circumaguntur, omnibus in medium tendentibus, et hoc propter accipitres, qui eis insidiantur. Vespere quidem aggregantur etiam immensis turbis et murmurant, nocte silent, aurora rubente murmur excitant; demum vero diuisae per turmas ad cibum volant. ALBERTVS M., libro XXIII. p. 239. b., gregatim, inquit, volant et compresse, quasi ad aciei centrum, propter timorem accipitris contendentes. Accipitrem enim superius vel a latere accedentem alis euentant et subtus volantem stercorebus opprimunt. In arenis et paludibus assidue sedent,  
et



et cum armentis vaccarum etiam sunt propter pascua, quae de stercorebus colligunt. Paulo longior sed praeclarus eiusdem ALBERTI locus est libro I. p. 4. a. de auibus in societatem coeuntibus. Imitantur, inquit, ciuilitatem in habitatione congregata et defensione communi, sicut grus, anas et sturnus. Propter quod decipiuntur ab aucupibus talia animalia; positis enim quibusdam suae speciei auibus vel imaginibus auium iuxta retia statim adueniunt ad cohabitandum illis, et in retibus concluduntur. Sed simul existentia defendunt se ab accipitribus et aquilis, et a quibus solitaria existentia se defendere non possunt. Sicut videmus anates et aues aquaticas latos et membranales pedes habentes visa aquila congregari simul in aquas, et cum impetum facit ad rapiendum, demerso capite spargentes aquam in faciem aquilae prohibent accessum. Similiter autem sturni ad quemlibet impetum accipitris comprimuntur in aëre et vento alarum coniunctarum remouent accipitrem, et super ipsos (legendum *infra*) ascendens accipiter comprimitur stercorebus ipsorum et illuitur, itaque appropinquare non potest. Haec omnia de sturnis vere tradita mirabitur mecum lector. Contra in ordine volatus explicando nimis ingenium luxuriatur illustris BUFFONI, nulla PLINII aut alius auctoris facta mentione, Tom. VIII. p. 10. version. Berolin.

## PAG. 17.

Vultures non odoratu sed visu sentire cadauera, fere credo Imperatoris experimentis. In vulture grypho praeter nares transversas, quae in reliquo genere rotundae sunt, neruos olfactorios multo etiam tenuiores, quam in reliquis auibus esse solent, repertos mirabatur iam PERRALTVS T. II. p. 370. Modum deuorandi cadauera alibi annotatum nondum legi, vere tamen traditum esse ab Imperatore, eo magis credo, quod ita perspicere mihi videor consilium naturae, quae caluum caput collumque (inter romanos scriptores a solo MARTIALE velut insigne vulturum annotatum) vulturibus dedit cadaueribus immittendum impuris. MARTIALIS IX. epigr. 28.: cum depilatos Chreste coleos portes, et vulturino mentulam parem collo.

## PAG. 18. CAP. II.

*Ciconiae mediae* quae sint, dubito. De duabus reliquis iam dixi.

## IBID. CAP. 12.

*Xari.* Forte eadem planta cum ea, quam Barbam Aaronis, vel Serpentariam minorem, vel *iaronum* appellari tradit MATTHAEVS Syluaticus in Pandectis Medicis.

*Corlinorum.* CANGIVS sub hac voce videtur legendum censuisse *Corliuorum* ex Gallico *Corlieu*. Gallicum vocabulum idem significat cum *Courier*, ex quo



deflexum et corruptum *Corlieu* pro cursore posuit CHARPENTIER in Supplemento Glossarii Cangiani.

PAG. 19. CAP. 15.

*Columborum* modus rostro croceo, reliquis minor, qui dicatur, aliis decernendum relinquo, qui genera peregrina plura viderunt.

PAG. 22.

*Cardilli* sunt, puto, qui scriptoribus eius aevi *Carduelli*, i. e. Cardueles, etiam dicuntur, *Chardonnerets*. Deinceps *meruli* sunt, quae Latinis merulae; *maluitii seu turdi*, ex gallico *mauvis*, ut monuit etiam CANGIVS. Post grues nominantur *aprones*, quas nullas in Gallorum aut Italorum lingua reperio aues; igitur *ayrones* legendum puto. Easdem plane aues eodem ordine commemorat infra p. 24. linea 5.

PAG. 23.

Species anserum hic nominatas, *roferas* — *Carboneras* — et ultimam *Iantabum* ignoro; nec in Glossariis auxilium ullum lectori paratum est. Sed postremam speciem eandem puto, quae pagina sequente cap. 21. iterum cum *Bernichis* nominatur. Sed ibi est *Iancarum*. Suspicio legendum *Gantarum*. Vox *ganfa*, PLINIO X. 22. auctore, Morinis anserem significabat. Atque ita FORTVNATVS VII. Poëm. 4.: aut Mosa dulce sonans, quo grus, ganta anser olorque. Anseres agrestes gantas proprie dici, alio nomine Feles et Miletas, si vera est lectio, docent loca scriptorum allata a CANGIO sub voce Ganta. Sed auctore GYRALDO in Topograph. Hiberniae I. 18. anseres minores albi *Gantes* dicuntur. Ut breuiter dicam, gantae ubique ab anseribus distinguuntur; speciem definire non licet.

\* *Roferas* germanicus interpres Rothgänse, *carboneras* Graugänse, *Bernichas* Baumgänse explicat.

IBID. CAP. 20.

*Statim, quod venti.* Legendum esse *si venti*, sensus admonet.

PAG. 24.

*Aristoteles.* Hic de coturnicibus H. A. VIII. cap. 12.: διὸ καὶ βοῶντες πέτονται πονῶσι γάρ. Ceterum de auium peregrinatione totum illud philosophi caput cum disciplina Imperatoris conferendum est, semperque cogitandum, Imperatorem in Italia, illum in Graecia scripsisse.



## IBID. CAP. 21.

De migratione auium ALBERTVS VII. p. 81., ex his auibus, inquit, quae sunt apud nos, expertus sum, quod aues, quae dicuntur anseres, secundum omne genus suum, quod quadruplex esse diximus, recedunt a terra nostra, quae est latitudinis 47 graduum, et veniunt in Sclauiam ad loca humida harundinosa et paludosa et ibi pullificant. In hiemis autem principio reuertuntur ad nos propter pascua et aërem magis temporatum, et tunc volant in gregibus maximis, ita quod milleni vel amplius videntur, et quando ventus est a septentrione, volant ad meridiem; quando autem est a meridie, volant ad aquilonem; ita quod semper portantur flatu venti in volatu: et ideo vulgus dicit, quod volatus anseris indicat ventum. Similiter autem dicit AVICENNA, quod iam expertus est in terra sua, quod aues quaedam aquaticae veniunt in vere ad mare mortuum, quod falsius et calidius est alio mari, quod magnum vocatur, et hoc mare apud Arabes vocatur Ihemene, et abinde recedunt ad intus, qui de more vocantur: et deinde pertranseunt Nilum et vadunt ad lacum dictum Decantefine: et quaedam earum etiam perueniunt ad lacum dictum de Terrabesten, et quaedam perueniunt ad lacus alios, qui sunt in locis illis. — Inaequaliter autem recedunt; quoniam a nobis prius recedunt ciconiae, quam hirundines, et hirundines citius recedunt, quam coturnices. Cuculus autem recedit ante omnes istas aues. Ficcedula vero a quibusdam terris Germaniae nunquam recedit. In Sueuia enim semper reperitur; sed a Germania inferiore aquilonari, quae multum est aquosa, recedit in aestate, et redit in fine autumnii. (Scolopacem intelligit.) Similiter autem cornix varia, quae ex parte cinerea est, et in parte a Germania inferiori recedit in aestate et redit in autumnio et stat per hiemem; sed a superiori Germania versus meridiem nunquam recedit: et causa est, quod in inferiori parte Germaniae sunt loca aquosa, ex quorum vaporibus aër hieme temperatur. In superiori vero est aër purissimus et loca sunt alta valde, et ad illa veniunt in aestate. — Haec omnia memineris ALBERTVM Ratisbonae scripto mandasse.

## PAG. 25.

*Aristoteles*, quem hic Imperator improbat, ducem sequi grues annotat H. A. IX. 10.; quanquam vnum semper eundemque sequi non addit, licet tamen aliquo modo suspicari de vno duce ex loco H. A. I. c. 1., vbi grues apesque sub duce viuere aliquo dicuntur.

## PAG. 26. CAP. 23.

*Natalitium.* Legendum est *natatiliu*.

## PAG. 27.

*Nec est opinandum, quod propter operationes.* Voluit sine dubio reprehendere philosophiam ARISTOTELES, quam tamen, vt homines, in iudicandis na-



turae operibus et miraculis sequi cogimur. Alia et difficillima est quaestio de consilio summi opificis, de quo cum iudicare audet humana ratio, fere semper per varias argumentationum ambages eodem, unde progressa et orsa erat, redire cogitur humanaeque imbecillitatis meminisse.

*Lumbi, branchiae.* Vocabulum *branchiae* alieno sensu interpretabatur CANIGIVS sub voce *Branca*. Non viderat, ordinem membrorum sensumque hic postulare vocem *anchae*, de quibus infra,

PAG. 28.

*Galeranus.* Videtur noster duas numerare vulturum familias; ubique enim vulturum et galeranorum genera separatim nominat. Nomen ipsum alibi non reperi, nec, cui linguae peculiare sit, reperire potui. Galeranos autem caluo capite colloque videtur distinguere a vulturibus, qui caput lanulis tectum gerunt. Galeranorum species nominat quatuor. Prima h. l. dicitur nigra, campestris, rostro cruribusque nigris. Alteram appellat variam ex albo nigroque, Syriae Aegyptique indigenam. Deinde infra, ubi galerani campestres et aquatici raro alas mouere in volando dicuntur, tertiam aquaticam nominat. Quartam paulo postea non nominat, sed indicat: quidam, inquit, modus auium comedentium cadauera, quae sunt albae, habentes extremitatem alarum nigram, croceum colorem secundum rostrum, usque ad medium capitis, hae carent plumis et lanulis. Vulturum notas ibidem clarissimas posuit has: aliae vero carent plumis supra caput, verumtamen habent illic lanas, ut sunt genera vulturum, praecipue alborum. Similiter supra cap. 10. de vulturibus: caput et collum eorum est sine pluma, ut in pluribus. Ut a postrema quarta specie ordiar, clarum est, intelligi vulturem percnopterum, quem HASSELQVIST accuratissime descripsit in Itinerar. Palaestinae p. 286. seqq. Arabicum ille nomen edit *Râchaeme*. Contra RAVWOLFIVS noster ex AVICENNA seu ABENSINA posuit *Rachame* in Itinerar. p. 140. In loco ALCAMI ap. BOCHARTVM Hieroz. II. p. 305. *Anuk* aquilae genus, quae et *rachama* dicitur, avis est nigra, quae habet tanquam iubam. Sed de nostra aue magis valet, quod statim sequitur: alii, avis nigra, calui capitis, flauo rostri. Fateor tamen, in istis ineptiis Arabum notam certam non reperiri: nec ausim statuere, an species Imperatori varia dicta plane sit ab hac diuersa. *Galeranus* niger est vultur ater Veterum, quem illustris BUEFONVS cum grypho Africano vulture eundem putabat, sed recte distinxit variis notis CETTI in Histor. natur. Sardin. T. II. p. 9. seqq. vers. germ. Sed illud tamen miror, quod CETTI cutis, qua caput, orbita, tibiae pedesque teguntur, alba esse dicitur, cum crura nigra Imperator commemoret. Hunc *αἰγυπτιὸν* appellat AELIANVS II. 46. *Galeranum* aquaticum ignoro, qui dicatur. Vultures albi sunt, ut videtur, iidem, qui a CETTI l. c. p. 13. describuntur, a percnopteris LINNAEI plane diuersi. Albus



bus enim caput lanulis albis tectum habet, percnopterus vero planè caluum. Vulturem barbatum LINNAEI post Cl. ANDREAE descriptum a CETTI l. c. p. 17. seqq. OPPIANVS Ixeutic. l. c. 2. sub harpae nomine satis accurate descripsit, vt docui ad AELIANVM XII. c. 4. p. 375., ARISTOTELIS vero harpa plane diuersa ex mari viuit. Vulturem barbatum esse ARISTOTELIS γυπαίετον, posuit etiam CETTI; in quo tamen eum falli docet habitatio timiditasque ab ARISTOTELE commemorata. Vulturum turmas fretum Gaditanum quouis fere traiciientium pedibusque ad caudam contractis volantium commemorat CARTER Itinerar. Gaditan. l. p. 116. vers. germanicae. ARISTOTELES gypaieto suo caput album, alas breuissimas et vropygium, i. e. caudam longam, magnitudinem corporis omnium maximam tribuit; colorem vero alarum voce περιπόπτερος signat, a colore vuarum maturitatem contrahentium; sed ALBERTVS et vetus versio apud VINCENTIVM XVII. c. 141. alas malas pro colore eo ponunt, adeo vt κακόπτερος legisse videantur.

De forma cranii in corlinis, vanellis plueriisque rotunda aliisque scolopacini cranii notis copiose dixi in Promptuario Lipsiensi anni 1787., vbi simul picturam cranii scolopacis gallinaginis addidi, qua non solum forma capitis rotunda, sed situs foraminis occipitalis singularis sub medio cranio, vt in homine, auriumque non ordinarius, denique ossis maxillaris communis, quod quadratum audit HERISSANTO, a posteriore cranii parte ad anteriorem contra morem reiecti explicatur. Ceterum auium cranium iuniorum, cum coquitur futuraeque adhuc apparent, nouem ossibus contignari, recte quidem admonuit Cl. VICQ D'AZYR in Mémoires de l'Acad. 1773. p. 583, verum is in enumeratione apophysium epiphysiumque partes aliquot omisit, quas alibi curatius tradam. Huc pertinet os vnguis, quod magnum adesse video in meleagridis iunioris cranio cocto, vbi futuras seu potius harmonias omnes facillime distinguo.

PAG. 29. CAP. 23.

*Anates de Faraone.* Quod ex Aegypto afferebantur. Interpretabar olim anates moschatas; nunc vt dubitem de veritate coniecturae, facit caro rubea, tenuis, inter nares et frontem, eleuata ad modum cristae, non tamen incisa, cum tubercula carnosia rubra faciem totam anatis moschatae occupent. Inter anates et anseres plures tubercula carnea ante frontem sita habent.

*Masculi cuiusdam modi cinnorum.* Speciem hanc cycni non solum globulus carneus in fronte situs, quem glandulam conglomeratam esse reperi, sed sterni etiam cum tracheae structura aliaeque differentiae, imprimis magni et singularis structurae sinus frontales, ab altera secernunt, quam canoram, illam vero cum PENNANTO mutam appellare interim licebit. Descriptionem vtriusque anatomi-

cam



cam dedi nuper in Promptuario Lipsiensi historiae naturalis anni 1787. An globulus carneus frontis mari proprius sit, ignoro; sed credo Imperatori affirmanti. Praeterea illud etiam nescio, num similes globuli in anserum, anatum auiumque quarundam gallinacearum ex America generibus quibusdam ante frontem siti glandulis compositi sinubus frontalibus affideant, odoratum adiuuantes; quod fere suspicor. De cynis generatim ALBERTVS p. 233. b.: post coitum, sicut et ceterae aues aquaticae, immergunt se aquis, tam mas, quam femina, eo quod concupiscentiae vapor discurrit per carnes eorum et illum quaerunt abstergere; et huius signum est, quod aues omnes post coitum horripilationem habent et eleuatis pennis et diuaticatis se excutunt; et similiter faciunt alia animalia pilosa. Haec auis tertio anno ouat. Eadem fere ARISTOTELES H. A. VI. 2., qui de anseribus: οἱ χῆνες ὀχευθέντες κατακολυμβῶσι. PLINIVS X. sect. 79.: anseres in aqua coeunt. COLVMELLA: ineunt non insistentes humi, nam fere in flumine aut piscinis id faciunt. Ita denique VARRO III. 10. §. 3.: saliunt fere in aqua; tum se mergunt in flumine aut piscina. Ita enim legendum esse censeo.

*Modus quidam psittacorum.* Albus an cristatus LINNAEI intelligatur, dubius haereo; in hoc enim psittacorum genere paucae admodum species mihi notae sunt.

*Omnes modi ayronum.* Confirmatur ita opinio PENNANTI in Itinerario Scotico T. I. p. 20. vers. germ. asserentis, cristatas ardeas omnes esse mares, nec specie a reliquis differre.

*Modus bistardarum.* Haec species otidis Arabica an Africana sit, decernere non licet. Cum Arabica crista longa non plane conuenit. Vocabulum *trizae* positum pro gallico *treffes*, aut *treces*, ex latino *treca*, *trica*, *tricia*: de quo vide CANGIVM.

*Fagiani.* Sine dubio legendum *Fasiani*. Hos enim geminas ex pluma aures (alibi cornicula appellat XI. c. 37) summittere subrigereque, ait PLINIVS X. c. 38. Sed haec cornicula oestri demum venerei prorumpentis vi educuntur foras, nec ea hucusque in maribus, quos per mediam hiemem mortuos tractaui, videre potui.

*Genus quoddam mergorum.* Colymbum cristatum intelligi, clarum est. Minores vidi; non aequè mihi notus auritus. De eodem genere loquitur ARISTOTELES de Partibus IV. 12.: τὰ δὲ τεγανόποδα καὶ διηρημένους μὲν ἔχοντα τὰς πόδας, σεσιμωμένους δὲ, ὡς ἐν τῷ αὐτῷ γένει ὄντα τοῖς τεγανόποσι, τὸν μὲν αὐχένα μακρὸν ἔχουσιν, τὰ δὲ σκέλη πρὸς τὴν νεῦσιν βραχέα. Et paulo post: οἱ δὲ διηρημένην



μένην μὲν ἔχουσι τὴν καθέκαστα τῶν δακτύλων φύσιν, πρὸς ἐκάστῳ δ' αὐτῶν συμπέφυκεν ὅλον πλάσω (lēgo πλάτη) καθόλης συνεχῆς. De colymbo cristato intellexit SVLPITIVS in vita Martini, vbi mergorum speciem a re cornutam vocat, eo quod rubeas plumas in capite instar cornuum habeat, et contra genus omne anium pedes in cauda, ita vt, cum in terra stant, sicut homo gestu pectoris erigantur. Apud VINCENTIVM XVI. c. 105.

*Eleuatum ad modum cornu.* In cranio iunioris meleagridis, quod coram habeo, video ossa bregmatis in vertice attolli et cornu speciem istam praeberē.

*Gallinae de India.* Meleagrides intelligi, in propatulo est. De nominibus earum variis plura tradam in Auctario Emendationum ad AELIANVM in fine libri addito.

*Duo cornua.* Manifestum est, intelligi species duas Bucerotis; quarum alteram indicauit etiam AELIANVS XVII. 10. Cf. MARSDEN descriptio insulae Sumatra p. 135. vers. germ. Cranium rhinocerotis egregie pictum dedit HERISSANTVS in Mémoires de l'Acad. des Scienc. de Paris, 1748. Tab. IV. — *Simile speroni*, i. e. calcari, ex gallico éperon.

## IBID. CAP. 24.

*Dictum est in libro animalium.* Quis ille liber sit, ignoro. ARISTOTELEM enim laudare non poterat, qui de oculi humoribus tunicisque in animalium historia nuspiam distinctius tradidit. Septem tunicas numerat etiam CONSTANTINVS Africanus in Pantechno, vnde excerptam descriptionem posuit VINCENTIVS Spec. nat. 28. cap. 49., vbi septima numeratur aranea tela dicta, quam RVFVS Ephesius, Galeno antiquior paulo, a quibusdam lenticularem, ab aliis ab humore contento crystalloiden dictam esse refert, I. cap. 23. Eandem VEGE- TIVS Artis veterin. II. 16. membranulam, qua contineatur lumen, appellat, eamque ruptam platycoriasin efficere ait. Pupillae contractionem et dilatationem lucis quantitati attemperatam memorat Imperator infra p. 90. Eiusdem motus notitiam ex ALEXANDRO ACHILLINO, multo recentiore, refert MORGAGNI Aduers. Anatom. I. p. 34. ed. Lugd. — Motum palpebrarum in auibus distinxit etiam accuratissimus ARISTOTELES H. A. II. 12, vbi aues ad volatum grauiiores; gallinacei igitur generis, omnes palpebra inferiore sola conuiuere ait, contra vero noctuarum genus omne vtramque claudere palpebram. (οἱ δὲ γλαυκώδεις τῶν ὀρνίθων καὶ τῷ ἄνω βλέφαρῳ.) In libro de Partibus II. cap. 13. rationem huius moris edit et pro noctuis nominat genus columbaceum. — *Lacrymale* scriptoribus huius aeui, vt etiam ALBERTO de falconibus, appellatur angulus oculi seu canthus anterior. De vtroque ita ARISTOTELES H. A. I. 9.: οἱ ἅν



ἀν μὲν ὧσι μακροί, κακοηθείας σημεῖον· ἀν δ' οἷον οἱ κτένες κρεῶδες ἔχωσι τὸ πρὸς τῷ μυκτῆρι, πονηρίας. Vbi primum veriore lectionem pro vulgata κακοηθείας restitui ex Codicibus et GALENO, qui h. l. laudauit multo integriorem, T. V. p. 435. ed. Charterii. Ibi igitur comma aliud additur: οἷς δὲ βραχεῖς, ἥθες βελτίονος. ὧν δὲ οἱ κτένες οἷον κρεῶδες ἔχοντες πρὸς τῷ μυκτῆρι. Sed commatis illius vestigia nulla apparent in Codicibus, nec vetere versione apud VINCENTIVM. TROGVVS apud PLINIVM: oculi quibuscunque longi, maleficos esse moribus indicant: qui carnosos a naribus angulos habent, malitiae nota praeueniunt. In lectione postremi commatis Codices mire variant. Nuperus interpretes edidit, nescio quo auctore, ἔχωσιν αἱ πρὸς τῷ μυκτῆρι, et totum locum ita vertit: de petites chairs, comme des petoncles, dans les angles du côté du nez et cet. In notis profert lectionem libri Canisiani καὶ ἰκτῖνες, et veteris interpretis locum hunc ponit: si autem velut crepetem carnositatem habeant: cum glossa addita: dicuntur maiores carnositates, quae sunt circa principium volae manus et circa calcaneum pedis. Sed ex hac versione non intelligitur, quam lectionem sit secuta, nec vocabulum *crepetes* in Glossariis reperio. Contra lectionem Canisiani καὶ ἰκτῖνες expressit vetus versio apud VINCENTIVM XXI. cap. 12.: cum lacrymale et quod sequitur angulum oculi fuerit paruum et subtile, signat malitiam dispositionis et consuetudinis et figurae scilicet oculi. Quando vero locus ille fuerit multae carnis, sicut accidit oculis milui, significatur astutia et formidatio mala. Atque ita plane etiam habet versio ALBERTI p. 8. a., sed paulo integrior: cum ergo lacrymale siue cilium et hoc quod sequitur angulum oculi fuerit valde paruum subtile, significatur malitia dispositionis et malitia consuetudinis et figurae. Et quum idem locus fuerit multae carnis, sicut accidit oculis milui, significatur astutia siue calliditas mala. Atque ex hoc specimine cognosci potest, quam diuersa sit versio vetus, SCOTO quae adscribitur, quaque sola VINCENTIVS cum ALBERTO vsus est, ab altera ex graeco facta, quam CAMVS solam in hoc loco consuluit, omissa, nescio quam ob causam, versione SCOTI. Rationes vero, quare SCOTI versio ex Arabico facta sola fuerit adhibita ab ALBERTO et VINCENTIO, nondum exputavi. Sed ad rem. Qui in ARISTOTELE nunc κτένες dicuntur, SCALIGERO iam olim suspecti, sine dubio intelliguntur, quae GALENO aliisque ἐγκανθίδες, carunculae in angulo anteriori oculorum exstantes. Hippiatrica graeca in equo ἐπικανθίδας p. 119, alibi vero p. 121. παραγναθίδας appellant.

PAG. 30.

Color oculorum indicia certissima habet generositatis sic dictae in auium rapacium genere, vt recte admonet Imperator. Copiose hanc varietatem colorum explicuit auesque omnes rapaces ex ea in classes digessit Cl. HUBER *Essai sur le vol des oiseaux de proie*. Plura de hac re infra. Iridem glaucam in strigum specie



cie videmus, quam Graeci inde γλαῦκα appellarunt; miluorum iris flauet pupilla nigra, vt in ictericis, auctore anonymo apud SVIDAM in voce ἰκτερικός.

*Carent palpebrae pilis.* Errauit, si de vniuerso auium genere dixit augustus auctor. Vide, quae infra in Auctario moneo ad AELIANVM IV. c. 50. In Meleagride, quam coram habeo, cilia etiam in vtraque palpebra adsunt. Sed recte annotauit, in quibusdam auibus oculos palpebra superiore claudi, quod confirmat PETITVS in Mémoires de Paris, 1736. pag. 130.

*Pelliculam palpebralem.* Intelligit, quam aliqui palpebram interiorem, alii membranam nictitantem dicunt, animalibus quadrupedibus plerisque communem. De superciliis bene augustus auctor tradere videtur; ipse enim hanc partem nondum curatius inspexi. Verum oculi pars singularis et auibus propria, primum a PERRALTO descripta, est *bursa* ab eo dicta, varie plicata et colorata pellicula, hinc *peſſen* Cl. BLVMENBACHIO audit, in humore vitreo iuxta neruum opticum sita, de qua vide PERRALTI *Oeuvres de Physique*, Vol. II. p. 543., et Dissert. Cl. BLVMENBACHII de Oculis Leucaethiopum, inprimis tamen PETITVM in Mémoires de l'Acad. de Paris, 1735. p. 145.

## IBID. CAP. 25.

*Vhan.* Nomen est gallicum *Huant*, *Huette*, *Hulotte*, ex quo corruptum puto *Vhan* a CANGIO omisſum, qui ex libro II. c. 54. *Huanum* laudat, vt auem, quae in altum subuolat. Vide ibi notam. Liber de natura rerum ap. VINCENTIVM XVI. cap. 117.: othus est auis, quae vulgariter *huans* dicitur a sono vocis; nocte namque *huhu* horrice clamat, improprie vocem humanam similans — bubone minor, noctua maior — et eminentibus plumis habere videtur aures. Cf. CANGIVM sub voce *Cauanna*. — Auriculae miram in strigibus structuram conspiciendam exhibet satis accurata pictura in tab. X. proposita in KLEINII Stemmatibus Auium.

## PAG. 31.

*Porfirae* quae ſint, nescio; nec formam hanc narium vllibi annotatam reperi. Sed in vniuerſum odoratus instrumenta nariumque forma accuratam adhuc anatomi indagationem requirunt, vix in paucis obiter descripta. In illis quidem auibus, quas eo consilio ſecui, magnam structurae neruorumque varietatem reperi; praesertim in aquaticis. Sed haec disputatio ſine picturis recte tractari atque explicari non poteſt, praeterea ab hoc loco aliena.

*Perfractae* nares ſunt peruiae; aquaticis auibus plerisque communes; ſeptum narium in terreſtribus plerisque aſſeſſe videtur. Caruncula prominens in falco-



nibus, aliquo modo apparet etiam in cuculo. Lineares atque angustae sunt in Pelecanis; tubuli modo prominentes in Procellariis et Caprimulgis. Accipitrum nares nondum omnes inspexi, sed dignae hac opera, ut certius etiam hinc argumentum specierum diuersarum possit deduci. *Porfirae* fortasse sunt phoenicopteri a colore rubro dicti. Sed narium structuram nescio an viri docti iam propius in iis inspexerint. Nec varietatibus omnibus enarrandis suffecit diligentia Cl. MERREM.

*Locus inter nares et oculos mollis* est, qui parte postrema rostri superioris initio zygomatici et osse lacrymali concluditur, in latere ante et paulum subtus oculum situs. Cf. PETIT in Mémoires de l'Acad. de Paris, 1735. p. 133.

*Sic et in psittaco.* Legendum puto *sicut in psittaco*. Praeclare vero augustinus auctor contra ARISTOTELEM admonuit, plurimas aues rostrum superius etiam deorsum mouere; quem quidem motum in psittacis obuium, in reliquis obscuriorem, egregie descripsit et pinxit HERISSANTVS in Mémoires de l'Acad. de Paris, année 1748., ubi etiam rostri mollitiem sensibilitatemque ex neruorum copia simul in auibus aquaticis explicuit. Mobilitatem rostri superioris in psittaco explicauit PETITVS ibidem, 1736. p. 125., adiecta pictura.

\* Mobilitas maxillae superioris nititur iunctura ossium nasalium frontaliumque cum coronalibus media cartilagine, ut demonstraui PETITVS; qui recte etiam admonuit, eandem mobilitatem adiuuante synchondrosi reperiri in lacerta *Toc-kai* dicta et descripta a legatis Iesuitis. Sed miror, eosdem viros doctos nihil de reliqua cranii structura annotasse, nec articulationem maxillae inferioris docuisse, ex qua suspicari liceret, quem illa mobilitas usum habere possit. In auium genere mobilis apophysis ossea inter cranium inferioremque maxillam collocata, quam ossis quadrati nomine HERISSANTVS, communis maxillaris, quasi antea nisi COITERO non notam, indigitauit MERREM, superioris maxillae motum adiuuat. Sed in ipso etiam auium genere multas reperi, ubi nec leuissimum vestigium iuncturae mobilitatisque maxillae superioris aderat, quanquam eae quoque os quadratum mobile habebant. Sed haec fere omnes aues ossa palatina multo firmiter inuicem et cranio iuncta habent, nec tam mediis cartilaginibus mobilia, quam quae motum maxillae superioris habent. Igitur circumscribenda est suis finibus opinio doctissimi HERISSANTI, qui motum superioris maxillae omnibus auibus communem esse assererat. Qualis vero ossium structura in lacerta *Toc-kai* adsit, nunc prorsus ignoramus, ut et ipsam lacertam aliunde accuratius cognitam nondum habemus. Proxime illam toto corporis habitu accedere ad lacertam Gecko vidit etiam Cl. HERMANN in Comment. Tabul. Affinit. p. 252.

*Faecha.*



*Faecha.* Videtur etiam hic vt in pagina sequente *fakecha* legendum.

*Pellicanis.* Eandem auem ita describit ALBERTVS M. p. 4. b.: et quaedam auis est alba maior, quam cignus, cuius extensio alarum excedit quantitatem extensionis brachiorum hominis in vtraque parte. Et haec habet papam (ingluuiem) rubeam exterius prominentem permaximae quantitatis, sicut sit magnus faccus, et continuatur ad radicem linguae eius, et est auis aquatica longi valde rostri. Idem p. 79. a.: apud nos sunt anser et anas, mergus varius, et merguli nigri, et mergus magnus niger, qui a quibusdam carbo aquaticus vocatur, et cignus et auis magna, quam quidam *volmarum* vocant, quae habet faccum rubeum ante guttur et pectus. Denique p. 238. b.: *Ofina* auis est alba cigno maior vel aequalis, quam nostri quidam *volinarum* vocant. Rostrum autem habet valde longum et forte, et faccum magnum ex rostri inferiori parte ante pectus pendentem, in quo cibos piscium congerit, donec paulatim glutiendo digerat: in aquis amplis et piscosis habitat. Euacuat autem, si copiam piscium habeant. *Osinam* nominat etiam et copiosius pingit VINCENTIVS XVI. c. 116. Nomen *volmarum* aut *volinarum* CONR. GESNER de Auibus p. 606. ex Italico *Grotto molinaro* corruptum esse suspicatus est. Reliqua duo aequae ignoro. Nomen *Apul.* abbreviatum, quod supra Imperator post vocabulum *Cofanos* posuit, CANGIVS de APVLEIO interpretatus est; in quo eum falsum esse puto. Rostrum pellicani Imperator longum et latum, asperum de intus supra et infra, deinde vero non dentatum neque incisum in alterutram partem ait esse; vbi quas rostri asperitates inferiores dicat, non video, nisi costulas quinque quatuorque sulcos intellexerit, quibus rostrum superius per longitudinem exaratum est; inferioris etiam margo duplex est, vt annotauit PERRALTVS in anatomia Pellicani T. II. p. 346. Reliquas partes cranii egregie pictas dedit HERISSANTVS in Mémoires de l'Acad. de Paris, 1748. tab. VII. fig. 1. Americana species praeter rostrum dentatum colore etiam differt ab Africana. An vero Chilensis Alcatraz, quam Pelecanum *Thagum* MOLINA indigitauit, diuersa sit, definire non ausim; neque enim omnino Historiae eius Chilensi confido, quam sub nomine VIDAVRE editam antea, licet multo breuiorem, multis in locis plane contrariam reperi. Sed de hac re alibi diligentius disputauim. — Ad idem genus pertinet coruus marinus, quem supra Imperator nominauerat. De quo ALBERTVS M. p. 79. b.: vocamus nos carbonem aquaticum, quem vulgo *Scalvern* vocant. Idem p. 64. a.: est tamen in nostris climatibus auis aquatica nigra, quae est venans pisces in fluminibus et maribus, et facit magnum nocumentum in eis; sed est cinericia in pectore et ventre, et est tardi volatus et diu manet sub aqua, quando mergitur, et habet rostrum dentatum, sicut dentata est falx messorum, et ipso retinens pisces lubricos, sicut anguillam: et habet hoc, quod, quando in arbore sedet, rami, quos saepius inficit stercus eius, arescunt; et hoc facit etiam stercus ardeae et fere omnium



omnium auium aquaticarum. Et hanc quidam vocant coruum aquaticum, sed in germanica lingua *Schaluchorn* vocatur, et non pullificat in hieme, sed in vere cum aliis auibus. Nidum autem facit in arbore alta et magna iuxta aquam piscosam. *Κόραξ* dicitur etiam ARISTOTELI H. A. VIII. 3, qui magnitudine fere ciconiae nigrumque ait esse. Rostrum dentatum ALBERTVS sine dubio ab acutis marginibus dixit. In icone tamen cranii, quam dedit HERISSANTVS l. c., video lineam a naribus per rostrum medium excurrentem veluti ferratam. Eadem praeterea bene pingit appendicem osseam singularem cranii in postica parte supra foramen magnum additam, quam praeter SCHWENKFELDVM descripsit et pinxit LACHMVND de aue Diomedea, Amstelod. 1674. pag. 47. Memorauit eandem COLLINS Anatomy p. 969, Cl. CAMPER Opuscul. II. p. 11. et denique PERRALTVS in Anatomia Corui Tom. I. Linguam cum larynge pinxit etiam CASSERIUS de vocis auditusque organis, Tab. VIII. fig. 1. Nomen ab ALBERTO commemoratum, quod hodieque in Pomerania obtinet, est *Scalucher*, *Scholucher*, *Schalucher*, *Scholver*, *Schulver*, *Scalver*. Belgarum *Schollevaar* habet Cl. CAMPER. Ex altero *Scharb* latinum *Carbo* et *Scarba* factum est. Conferatur FRISCHII Dictionar. germanic. sub hac voce. Eandem auem ALBERTVS p. 238. alio nomine repetit. *Morfex*, inquit, auis est aquatica, quae *Scolucherem* vocatur. Nigra est et rostrum habet ferratile et forte — gregatim nidificat in arboribus iuxta aquas. — Haec auis saturata expandit alas ad solem insidens palis et arboribus, ut siccentur, et quando incipit volare, vix eleuatur, et caudam diu in aqua ducit: unde a quibusdam *humidus culus* vocatur. Nuperrime descriptionem cum anatomia dedit Cl. WALLBAYM in Scriptis Societatis Berolin. Natur. Curios. Vol. VII. p. 430. Mobilem rostri superioris seu maxillae cum fronte iuncturam bene annotauit etiam in duabus Pelecanorum speciebus CATESBY, T. 86. et 87. editionis germanicae.

## PAG. 32.

*Mergorum modi* hic intelliguntur Mergi Linnaeani, anatibus fere similes in plurimis.

*Ayrones — utrinque dentatum.* Recte; neque enim rostri margines solum acuti sunt ad incidendum, sed apparent etiam leues in iis denticuli velut in ferra. Sed hanc structuram bene iam GESNERVS alique annotarunt. Rostrum anserum anatumque ferratum utrinque recte etiam olim annotauit ARISTOTELES de Partibus Animal. III. 1., vbi aues *πλατυρύγχες* et *ῥιζοφάγες* nominat et praeterea aliquas *τῶν ὁμοιοβίων* habere ait *τὰ ἀνὰ τὴν ῥύγχιν κεκαραγμένα* ad decerpendas facilius herbas.

*Incisuum et dentatum, ut falcones.* Hanc in rostri structura varietatem in genere falconum Linnaeano ad species certius digerendas distinguendasque copiose perle-



persecutus est Cl. MERREM, HERMANN et copiosissime omnium Cl. HYBER in *Essai sur le vol des Oiseaux de proie*. Quibus dens ante extremam rostri et incuruam partem (ἐπιρυγχιδα apte dixit nescio quis apud SVIDAM) deest, ad accipitres reiecit Imperator.

*Cornelli*, i. e. Cornices, ex gallico *Corneilles*.

*Corlinorum*. Vides ex rostri forma Corlinos sub genere Tringarum et Scolopacum Linnaeano militare. Ita Corlinus, qui rostrum habet longum et curuum ad inferius, est Scolopax arcuata L. Contra, quae dicuntur aues in pagina sequente habere rostrum longum, gracile et recuruum, sunt, quae *Auofettae* hodie audiunt, Recuruirostrae LINNAEO.

PAG. 33.

. . . *picaciae*. In lacuna hac nomen gallicum scolopacis *Becasse* aut vpupae latere suspicor.

*Collum plures spondiles*. Varietatem numeri explicuit Cl. VICQ D'AZYR; sed formae differentiam in reliquis generibus raram aut plane nullam, in ardearum genere maximam cum triplice colli flexione et complicatione ab illustri BUFFONO obiter tantum annotatam copiosius explicui in Promptuario Lipsiensi 1786. p. 478.

PAG. 34.

*Spatulae*. — *Furcula*. Offa duo colligata sibi inuicem in eo loco, vbi furculae extremitas illis iungitur, sunt primum quidem, *clauicula* quod nominatur, alterum vero, quod ad dorsum protenditur et costis impositum quiescit, est *omoplata*. Haec tria concatenata ossa faciunt humerum, quem dicit Imperator, aut spatulas; atque in eorum media fere parte aliquo modo excavato vertitur caput ossis humeri, quod *armum* noster appellat. Differentiam in spatulis his annotare omisit. Ea vero in furcula satis magna est, quae cum osse sterni aut articulatur aut ligamento medio cohaeret. Varietates fere omnes clauicularum, omoplatarum et furculae, earum musculos et vsum furculae diligentissime tradidit Cl. VICQ D'AZYR in Mémoires de l'Acad. de Paris, 1772. Partie 2. p. 626 — 632. Sed omisit omoplatarum extremitatem aequalem cum reliqua latitudine deorsum flexam et vnciformem in picorum genere annotare.

PAG. 35.

Ordinem ossium alae, quae manus locum tenet in auibus, recte explicat Imperator, in postrema tamen parte aliquid obscuritatis latet. Armus difficultatem



tem non habet, nec duo *focilia*; quae paulo post *cubitus* dicit, ubi ait: reliqua vero tertia pars alae descendit ab illo loco, qui dicitur impulsorium alae et gallice dicitur *le bout*. Anterior scilicet et corpori proxima pars alae gallicis scriptoribus artis *Mahutte*, extrema *le bout de l'aile* appellatur. Vocabulum *focilia* ex Arabico ductum esse *Zendân* monuit Cl. BLUMENBACH in Historia Ossium corporis humani, p. 380. Ossâ propria manus ita porro enarrat Imperator, ut appareat, turbatum esse locum et ordinem a librariis. Primum locum obtinent duo carpi ossa; quae videntur esse illa ossa minora, collocata super vertebam illius ossis, quod coniungitur *focilibus*, repletiâ vacuitates illius iuncturae illic et iocantia. (Ex gallico *jouer*). Pergit: quorum vnum exit longe extra alam — in hac reliqua parte est vnum os paruum semotum ab aliis, et hoc videtur esse loco pollicis, habens in sui extremitate forinseca quoddam subtile durum et acutum in modum unguis. Scilicet os metacarpi duplex est, cuius pars exterior et maior in capite, ubi cum carpi duobus ossibus iungitur, tuber habet trigonum, longe eminens, cuius vni angulo inferiori insidet pollex. Contra BELONIUS os exterius carpi cum hoc tubere confundens (forte etiam in vno alteroue sceletô concretum viderat) pollicem ossi carpi insidere tradit. Eundem errorem Imperator admisit, nisi potest ita excusari, ut dicamus, varietatem eum aliquam ossis spectasse talem, qualem postea BELONIUS. Os gracile et debile, super quod pollicem appodiare se ait Imperator, est pars interior ossis metacarpi in medio diuisi; sed in ea parte non insidet pollex, sed in parte altera externa crassiore metacarpi. Nescio igitur, quid spectauerit Imperator. Sequuntur articuli duo digiti indicis; tot enim numerat, cum in cycno multisque aliis tres distingui facile possint. De primo articulo ait: *extremitati vero latioris, quod est super paruum, coniunctum est os ultimum alae*. Hic *paruum* quid sit, nescio, nisi intelligit auctor rudimentum digiti medii aut minimi, quod sub primo articulo indicis cum gracili parte metacarpi coniungitur. — Tuber metacarpi trigonum in gruum pullis separatum aequè atque ossa carpi vidi. In duabus falconum speciebus inter iuncturam metacarpi et articuli primi indicis supra insertum reperi os minutum quadratum, quod sesamoideum appellare licebit, a Cl. MERREM omissum. Denique quod multas aues Imperator ait tubere illo osseo trigono metacarpi percutere, in eo quidem non fallitur; sed praeterea in multis auium et vernacularum et exterarum generibus vltimus pollicis articulus ungue corneo acuto prominet. In parrarum aliisque generibus tuber ipsum trigonum eminet calcare longo, quo se aues istae defendunt, ut tradit Cl. CAMPER *Beantwortung einer Preisfrage*, p. 7. not. 11., qui mecum etiam 3 alarum seu manus auium digitos posuit. Reliquam calcarium unguumque horum varietatem persecutus est Cl. MERREM in Introductione ad Classes natur. Auium, p. 24.



## PAG. 37. CAP. 29.

*Ossa anchorum*, ex gallico *anches*, proprie dicuntur ossa iliaca. *Scia* pro *Ischia* dicitur hic pro acetabulo coxae recipiendae. Lumbi ipsi, i. e. vertebrae lumbares, cum osse sacro et innominatis tribus ossibus, id est iliatis, pubis et ischii, ita coalescunt in aibus, vt difficile sit vnum ab altero, nisi vsu et formae aliqua similitudine, distinguere, vt admonuit iam olim VOLCH. COITER de Sceletis Auium, cap. 10. Diligentius deinde haec omnia ossa scrutatus descripsit Cl. VICQ D'AZYR Mémoires de Paris, 1773., post eum Cl. MERREM in Dissertat. miscell. zoologic. Goettingae 1781. editis, p. 125. seqq., atque ipse ego in Dissert. miscell. ad zoolog. et historiam commerciorum pertinentibus, p. 162. seqq. Praeterea ossa anchorum sunt quidem illa in plurimis aibus lata; cavitatesque eorum interna recipit renes, vt ex iconibus adiectis patebit; verum in Colymbis ossa anchorum extra ordinem praelonga, admodum angusta et ad perpendicularum fere deorsum flexa reperi et pinxi. Facile tamen lector structuram hanc singularem peluis perspiciet in iconne Sceleti, quam dedit MEYER Tom. II. tab. 100, in qua etiam apparet longissime productum sternum. Ad eam vero formam longitudine saltem proxime accedit peluis Fulicarum, deinde Mergorum, quam alibi accuratius pictam describam. Interior anchorum seu peluis cavitates iuxta lumbarem regionem in varias minores cavitates septis osseis dispescitur, quibus renes in aibus incisuris variis insignes, depressi adhaerent. Cavitates has minores curiose pictas dedi in pelui vrogalli. In foraminibus i. e. acetabulis denique anchorum firmantur vertebra i. e. caput ossium coxarum; ita enim pro *costarum* legendum, natura ipsa et res suadet. Ipse etiam Imperator infra: *et in ista*, inquit, *scia* locatur vertebrum superioris coxae.

## PAG. 38. CAP. 31.

*Perunctum*. In Hieracosophio DEMETRII Parisiis edito 1612. p. 133.: *ἀλειπταρέα ἐστὶ τὸ ἐπάνω τῶν ὀπισθίων τὸ ἐξισάμενον, ὅπερ τινὲς καλεῖσι κρηθῆν*. Ex graeco *ἀλειπτῆριον*, quae pars balnei erat, in qua perungebantur. Sedes haec in aibus multorum morborum est, cum oleum nimis affluit ex cibis pinguibus, nec auis volatum exercet, inclusa cauea et in aëre coenaculorum torpescens. Vsum olei perunctorii ad pennas inungendas, ne aqua illis adhaereat, neue illae nimio calore siccentur in fragilitatem, alii etiam docuerunt, imprimis in aquaticis; quem vero Imperator loquitur vsum, nondum ab aliquo obseruatum legi, nec recte puto eum tradi. Forma in diuersis aibus miro modo variatur. Ex vrogallo omnem structuram formamque iconne expressam dedi, quam lector comparabit in fine libri additam; reliquam varietatem ex aibus a me dissectis annotavi in Dissert. variis ad zoolog. et commerciorum historiam pertinentibus, Berolini 1784. editis, p. 159. et 333. In anatum, anserum, gallopauonum struthionumque perunctis geminam glandulam, triplice ductu in mucrone vropygii



supra cutem eminentem, descripsit et cum similibus glandulis capreoli, moschiferi suisque americanae etc. comparauit EDW. TYSON in Philosophic. Transactions, No. 153. Plures ex aquaticis auibus varietates annotauit nuper in Promptuario Lipsiensi ad Oecon. et Histor. natural. anni 1787., quod curiosus lector adibit. Vnam semper glandulam reperisse se refert DERRHAM in Physicotheol. p. 865. vers. germ. anni 1732. Cum pennae senescentes excidunt, intumescere perunctum, non deducto liquore, annotauit ZORN Petinotheol. I. p. 183. Originem suspicionis de veneno succi illius reperias infra in ALBERTO cap. 22. ARISTOTELES hanc partem *πρυγίων* appellat H. A. IX. c. 35, vbi cepphum, quem procellariam esse docui in Promptuario Lipsiensi 1786, reliquam carnem boni saporis habere ait, excepto *πρυγίω*, quod litus redoleat. Sic anatis moschatae etiam odorem moschatum a glandulis peruncti deriuat BARRERE.

IBID. CAP. 32.

*Ramificatum autem est et distinctum in plures ramos.* Adde, quod paulo post p. 39. subiungit: et idcirco in pluribus auibus est pannosum pectus inter ramos, quos diximus, maxime super ventrem. Varietatem sterni satis copiose explicuit Cl. VICQ D'AZYR. In vrogalli sterni, quod pictum habes in tabula adiuncta, plures videbis partium sterni lateralium (*anses* appellat Gallus doctissimus) ramos, quam in reliquis auibus adesse solent. Eisdem in tetrice mare et meleagride reperi; fortasse generi gallinaceo sunt communes. In aquila contra nulli plane adsunt, vt recte annotauit Gallus, qui sternum exinde plenum dixit, sed totum sternum fere quadrangulum aequaliter in latere vtroque decurrit ad ouariam, nec apophyses clauiculares in summa eius parte vtrunque exsunt, vt in plurimis auibus solent.

PAG. 39. CAP. 32.

Pectore, hoc est sterni, differunt omnino aquaticae natantes aues, quod longius cum toto corpore habent. Prominentiam in generibus falconum rotundior et grossior videtur carinam sterni dicere. Sterni spongiosi cavitatem, quam in gruum genere annotauit Imperator, in cycno canoro etiam reperire licet. Virorum doctorum de hac sterni cavitae infertaeque illi tracheae flexibus observationes collectas posui in Promptuario Lipsiensi Histor. natur. anni 1786. et 1787., vbi simul posui, quae ad illustranda varia libri imperatorii loca de humeri, coxae reliquorumque ossium cum trunci tum capitis cavitatibus, earumque cum saccis pulmonalibus seu aëreis per totum trunci cauum dispertitis nexu tradiderunt viri doctissimi, PERRALTVS, CAMPERVS, HVNTERVS et MERREM. Sterni cum carina varietates multas tradidit Cl. VICQ D'AZYR Mémoires de Paris, 1772. P. II. p. 622, quibus multas alias addere possem, si hic locus longam orationem admitteret. De falconum is sterni nihil annotauit; nec ego plura falconum scelela inuicem comparare potui.



\* *Prominentia magis est rotundior et grossior.* Etsi nondum definire possum, sternum totum an carina sola intelligatur; plures enim falconum species comparare inuicem oporteret, quibus careo: ponam tamen, quae in sterno aquilae albicillae vidi et in reliqua ossium eius structura. Sternum igitur in aquila albicilla, falcone buteone et caeruleo multo conuexius est, quam in reliquis auibus, carina verò ipsa non tam alta exstat nec per omne sternum excurrit, vti in sterno vanelli. Eandem in sterno cygni muti structuram reperio cum aquila. Peluis eiusdem aquilae, buteonis, falconis caerulei et strigis aluconis admodum angusta; contra clauiculae valde diuaticatae et furcula tam ampla patet in aquila, buteone et falcone caeruleo, vt circulum dimidium efficiat. In strige alucone contra apertura furculae triangularis, angustior igitur, est. Phalanx prima digiti indicis in latere externo foveis duabus obliquis exaratur in aquila, falcone buteone et caeruleo, strige alucone, ciconia alba et nigra et pluribus forte auibus, quibus foveis inserti haerent et firmanur cannae cultellorum. Os denique superciliare, quod antea cum lacrimali permutaueram, auibus rapacibus peculiare esse, nunc cum Cl. MERREM agnosco.

## IBID. CAP. 33.

*Quod extremitate. Lege ab extremitate.* Deinde pro *pennosus pannosus*. Dicitur vero pannus a scriptoribus istius aevi pellis et corium.

## PAG. 40.

Os coxae in quibusdam auibus nullam habere medullam, nuperis CAMPERI HUNTERIQUE experimentis comprobatum est; sed vbi inane est, in iisdem etiam auibus foramen vnum alterumue sub capite seu trochantere ossis positum aërem per canalem membranaceum ex abdomine admittit. — Crus focilia duo quidem habet, sed fibula tam obsoleta est, quam in cruribus ruminantium, vbi VOLCHER COITER exemplo GALENI apographen fibulae dixit. Os vnicum, cui digiti iunguntur, recte Imperator ad pedem refert, eosque reprehendit, qui hanc pedis partem crus aut tibiam dicunt, quod hodieque a multis anatomiae imperitis fieri videmus. Cum osse calcaneo vulgo comparant, quod facit etiam Cl. MERREM; sed malo equidem sequi Cl. VICQ D'AZYR, qui metatarsum nominat. Cum metatarso (*l'os de canon*) ruminantium aliquo modo conuenit in eo, quod in pullis auium tribus partibus superior saltem pars componitur, membrana distinctis crassa et alba, et dum omnes induruerint ossei canaliculi, mirum in modum intumescit; quod cum in charadrio aliquo vidisset BELONIVS, suram appellauit tumorem auemque ipsam inde oedinemum. Verum is tumor, clarissime visus a me in pullis tringarum vanellorum, cum aetate crescente mox aboletur, ipsumque os in vnam continuam materiam induratur. Monui de hac re primum in Appendice ad Historiam natur. Testudinum, anno 1787.



separatim edita, p. 15., deinde in pluribus pullis auium ossis metatarsi tres partes distinctas quidem vidi, sed non item tumorem tam insignem.

*Plumas inter squamas, ut in falconibus.* Infra cap. 48. p. 52.: in habentibus autem coria pedum et squamosa et dura non innascuntur plumae, squamis non permittentibus eas nasci; visi sunt tamen modi falconum, accipitrum et niforum habere plumas in cruribus et pedibus, quae oriebantur inter squamas, et erant rarae, et hoc accidit raro. — In gallinaceo et columbaceo genere species quaedam plumas firmiores in margine crurum (metatarsi proprie) digitorumque positas habent, inter squamas erumpentes. Praeter bubonum genus ab Imperatore nominatum l. c. lagopus alba (quam auctor vetustus apud ANTONINUM LIBERALEM simpliciter λαγών s. leporem dicere videtur, etsi MARTIALIS Lagopodem auritam noctuam etiam appellauit) pedes fere toti plumulis occuluntur, ut in lepore.

\* Rationes mechanicas ex aequa corporis libratione pendentes flexi in anteriorem partem femoris, in posteriorem vero cruris et erecti metatarsi accuratius explicuit Cl. VICQ D'AZYR, cuius tertiam Dissertationem de anatomia Auium (Mémoires de Paris, 1774. p. 517.) hoc ipso tempore demum nactus sum.

PAG. 41.

Artus inferiores aquaticarum auium maturius perfici, quam superiores, contra vero in terrestribus, egregia est observatio, quam tamen nullis ipse exemplis confirmare possum, ideoque aliis explicandam confirmandamque commendo. Iterum de ea re infra cap. 46. in fine.

IBID. CAP. 34.

*Fulicis.* Aut fulicas proprie dictas LINNAEO aut Colymbos intelligit; utrumque enim genus digitos diuisos ambiente membrana decisa habet.

PAG. 42.

Digitorum articulos deorsum flecti tradit, quo melius ramos arborum *brancharent*; ex gallico *brancher*, ramo insidere, dependere. Alio sensu infra vocabulum idem posuit. Artificium in musculis pedum digitorum auium explicuit PERRALTVS.

Digitum posteriorem recte Imperator cum pollice comparat, eoque falcones praedam ferire admonet. Falconarii *talum* appellant. De numero articulorum in digitis supra ad p. 8. admonui. In Casuario etiam intimi digiti vnguem duplo maiorem reliquis vidit Cl. CAMPER Opuscul. Vol. I. p. 117. De falconibus



bus etiam PETRVS de Crescent. X. cap. 8.: clausis alis ad auem cum ungue posteriori lacerandam descendit. Copiosior est in hac obseruatione Cl. HUBER.

Digitum posteriorem in pelecatorum genere membrana eadem cum anterioribus iunctum esse, recte admonuit Imperator; posterior scilicet retractus antrorsum est, medii vero unguis in margine interiore pectinatus seu ferratus in pelecato Carbone, ubi extimum longissimum annotauit PERRALTVS, qui in anseris Scotico quatuor digitos membrana vna iunctos se vidisse refert. Etiam haec obseruatio sententiam Imperatoris confirmat, digitum posteriorem pro pollice esse. ALBERTVS etiam Libro II. p. 39. digitum posteriorem locum calcanei stantibus, pollicis vero apprehendentibus aliquid praestare refert. Deinde auium genera quaedam binos anteriores binosque posteriores digitos habere ait, et bubonem nominat cum picis. Bubo enim, inquit, vnum digitum girat posterius et duos habet post et duos ante et tunc quiescit residuum corporis ei, sicut quiescit serpens comprimendo se super ventrem et pectus suum. Pici autem omnia genera habent semper duos digitos pedis porrectos anterieus et duos posterius, eo quod haec dispositio digitorum apta est scansioni arborum; et habent digitos valde coniunctos, vt fortius se teneant ad lignum, quod scandunt. Scilicet extimus digitus in vtramque partem mobilis et versatilis vsibus variis se accommodat in genere Strigum Linnaeano; eandem digitorum positionem extimique mobilitatem in Cuculo obseruauit Cl. GVENAV DE MONTBEILLARD apud illustrem BVFFONVM; in picis extimum item digitum in vtramque partem versatilem reperiō. Quare non dubito, in psittacis eandem obseruationem locum habere. Saltem de Psittaco seuerō affirmat ill. BVFFONVS. Alcedo hispida similiratione extimum digitum retrorsum et antrorsum versat; interior vero cum medio dimidia ex parte coniunctus membrana. Positionem hanc pinxit KLEINVS in Stemmatibus T. V. Reliquam pedum structuram in eadem aue admodum singularem descripsit FRISCHVS in Miscell. Berolin. Continuat. I. Part. II. p. 41. In hirundine rupestri et alpina, quae saxi murisque adhaerent, digitos omnes quatuor, binorum quemque articulorum, antrorsum versos annotauit G. DE MONTBEILLARD. Denique digitus posterior, cum in reliquis auibus paulo altior adhaereat metatarso, quam reliqui anteriores, vbique tamen ad internum latus conuersus magis, in ardeis contra multo depressior in eodem plane loco cum digito intimo anteriore appositus est metatarso. Quam quidem ardearum notam video etiam illustri BVFFONO non fuisse ignotam. Quod vero ALBERTVS l. c. aquilam paruam piscatricem alterius pedis digitos membrana iunctos habere tradit, in eo quidem secutus esse videtur auctorem Gallicum libri de natura rerum apud VINCENTIVM XVI. cap. 89, qui *auriphrygium* appellat. LINNAEVS Haliaietum pedem sinistru subpalmatum habere tradiderat cum KLEINIO; eumque fideliter secutus est, nescio an sua fide, BRUNNICH in Ornitholog. boreali, p. 75.



Sed miror, illustrem BUFFONVM potuisse eam ob rem indignari LINNAEO, cum in suo potius eiue nimiam credulitatem vel fraudem improbare deberet. In genere rapacium extimus digitus cum medio aliquotenus membrana iunctus est, ut in vulture percnoptero annotavit HASSELQVIST, in falconibus aliquot pinxit KLEINIVS Tab. VII., in pluribus annotavit CETTI Sardiniae Hist. Nat. II. p. 8.

\* Quae de digiti postici reliquorumque officio, iuncturarum phalangumque numero tradit Imperator, eadem paulo accuratius explicuit Cl. VICQ D'AZYR, Mém. de Paris, 1774. De postico igitur ille digito ita tradit p. 514.: D'autres ont trois doigts en avant et un en arriere, qui paroît tenir lieu de pouce, et qui s'articule avec une éminence placée sur la partie inferieure et ordinairement interne de l'os du metatarse. Dans ceux-ci le doigt extérieur peut se tourner en arriere et il jouit d'un mouvement qui lui est particulier. C'est ce qu'on observe dans le Chat-huant et dans la Chouette. Numerum phalangum deinceps p. 516. ex aibus variis ita explicat: digiti struthocameli et casuarii omnes articulis quatuor flectuntur; in aquilis, psittacis, cornice et vlula numerat primi et secundi interioris digiti (posticum cum intimo intelligit) tres phalanges, tertii quatuor, quarti quinque; in cyeno vero et gallinula (*gallinèle*, quam aliunde non noui) primi interioris seu postici phalanges duas, secundi tres, tertii quatuor et quarti quinque numerat. In aquila albicilla digitus intimus duos modo articulos habet; in strige alucone, meleagride, fulica atra, colymbo cristato, anate, tringa vanello et pico martio numerum phalangum reperio eundem, quem edidit Cl. Gallus. Erravi igitur, cum supra auctore ARISTOTELE plures aquaticis digitorum phalanges largirer. Illud tamen apertum est, in terrestribus digitum extimum priores tres phalanges habere breuissimas et fere immobiles; in aquaticis contra reliquis aequales, longas apertaeque mobilitatis. Cl. MERREM in aquila sua albicipite digiti postici duas, reliquorum vero omnium tres phalanges numerat, et in altero etiam et maiore sceleto pingit; quod miror. Aliam denique rationem iniit Imperator; numeravit enim pauciores phalanges, quoniam vnguibus indutos articulos omisit. Forte etiam phalanges accommodare voluit numericae Pythagorae philosophiae. Digitus posticus, ut ad Gallum redeam, componitur ille quidem in aibus, quas nominaui, omnibus tribus ossiculis; verum primum horum vix annumerare licet phalangibus; applicatur enim metatarso totum per longitudinem tendinibusque illi alligatum firmando potius digito postico quam mouendo seruit. Conspicitur haec structura clarissime in metatarso aquilae albicillae, vbi primum ossiculum foveae inseritur et metatarsi margini per longitudinem applicatur. Capiti vero inferiori, quod paulo altius, quam tria reliqua metatarsi capita, collocatum est, duae digiti postici phalanges articulatae adhaerent. In pico martio digitus extimus versatilis longe alia ratione metatarso iungitur, quam in strige alucone. Pici enim metatarsus digito.



digitorum iuncturae non tria, vt in reliquis auibus, capita rotunda porrigit, sed quartum posticum multo maius additum praeterea habet; atque inter hoc posticum atque extimum caput metatarsi digitus extimus vertitur, cuius prima phalanx crista inferna exstante applicatur capiti postico, cum digitus retro vertitur. In strige alucone caput metatarsi extimum reliquis breuius seu altius collocatum, sed multo maius est, et verticale retrorsum seu deorsum erectum prominet. Sed in aquila albicilla caput metatarsi intimum multo maius et fere trigonum prominet et in margine superiore et exteriori foveam magnam habet insculptam, quo firmitus cum digito postico seu potius eius metatarso peculiari colligari possit. Itaque apparet, digitum posticum cum intimo in circulum coeuntem omnium maximam vim in rapiendo exercere; atque hanc structuram digitorum auibus rapacibus omnibus communem esse puto. Borellianam rationem, qua is digitorum et vnguium contractionem ad apprehendendos arborum ramos, quibus aues dormientes insident, explicare conatus est, recte quidem reiecit Cl. VICQ D'AZYR; sed suam ipse paulo breuius atque obscurius exponit. Chamaeleonis digitos cum digitis cuculi, pici vlulaeque recte comparauit PERRALTVS, Oeuvres de Physique, Vol. II. p. 376. Sed video, latius patere hanc in pedum structura affinitatem auium cum quadrupedibus, quam hucusque obseruatum est. Tenet enim digitus posticus cum metatarso suo peculiari locum calcaris in equo asinoque, vngularumque spuriarum in ruminantibus. In equo asinoque pone commissuram gambae cum pede duo ossa sesamoidea trigona adsunt, quibus calcar adhaeret exterius. In boue bisulco os sesamoideum quadruplex adest cum quatuor minoribus ossibus, quibus duplex calcar adhaeret. In ceruo quatuor ossa sesamoidea iunctas sibi habent vngulas spurias tribus phalangibus compositas singulas. Aper eodem in loco vngulas spurias cum metatarsis duobus distinctis additas habet; contra sus Taiassu metatarsi ossa triplicia cum triplice vngula seu digito habet. Igitur bisulcorum animalium quaedam digitos quatuor habent per paria, vnum pone alterum collocatos, quorum vestigia in ceruis, apro etc. magis expressa sunt, quam in boue, oue et capra. Recte hoc monuit Cl. DAVBENTON. Aues eodem modo quatuor digitos gerunt, quaedam per paria, plurimae tres in anteriore parte, quartum pone reliquos positos, ita tamen, vt posticus semper antrosum versus flectatur, cum in bisulcis omnes digiti vngularum spuriarum retrorsum versi flectantur. Sed vsus apprehendendi insistentique arborum ramis contrariam in auium postico digito postulabat positionem. In mare sagitta (PALLAS Hist. Glirium p. 313.) in pede posteriore digiti tantum 3 adsunt cum metatarso vnico, cuius caput inferius trilobum bisulcorum gambae auiumque respondet. In mare iaculo contra gamba quidem etiam adest inferiori capite trilobo; sed praeterea in vtroque latere eius pro pollice et minimo digito adest metatarsus duplex cum duplici digito, et infra articulum vtriusque officulo sesamoideo. PALLAS ibidem p. 300.: Nouo igitur argumento patet, os, cui in auibus digiti iuncti haerent,



rent, respondere bifulcorum trifulcorumque metatarso, quem gambam *VEGETIVS* aliique appellarunt, digitique adeo primum os nec phalangis nec sesamoidi nomine censendum ad metatarsum potius pertinere.

PAG. 43.

*Tribus illius. Legendum illis.*

IBID. CAP. 35.

*Inter omnes aues.* Post haec verba *ayrones* inferendos puto, quippe qui ferratilem seu pectinatum marginem interiorum medii digiti habent. Eadem in caprimulgo observatur structura. In reliquis auibus fere omnibus idem marginis in tenuem aciem producit et concavam, ut in multis observavit *WILLUGHBY*, in aliis illustris *BUFFONVS*. Cf., quae dixi in Dissertationibus miscell. ad zoolog. et histor. commerciorum pertinentibus, p. 144. et 332. De gruis vngue interni digiti ibidem admonui. Latos ungues non solum ciconia, sed etiam colymborum plurimi habent.

PAG. 44.

*Cozardi, calandrae.* Infra *coyardi* legitur. *CON. GESNER* de Auibus p. 80. affert ex scriptoribus barbaris nomina alaudarum *gosturdus*, *cuzardus*. Liber de natura rerum ap. *VINCENTIUM XVI.* 87.: *gosturdi* sunt aues admodum parvae, coloris terrei, cristam parvam ex plumis habentes in capite, nec aliarum avium more volantes, sed vndosos fluctus imitantes, qui vento cogente nunc alta nunc ima petunt. *Calandra.* Hoc vocabulum vetus Interpretes *ARISTOTELIS* substituit charadrio, *Hist. Anim.* VIII. 3. et IX. 11., ut vetus etiam Bibliorum Interpretes germanicus *Leutic. XI.* 19., ut monuit *FRISCHIVS*. Graecorum scriptorum, quos novimus, primus auctor *Ixeuticorum III.* 15. *Κάλανδραν* nominat, ubi tamen Codex *GESNERI* habebat *Χάλανδρα*. In *Vindingiano* exemplo legitur *Κάλανδρος*. *MATTHAEO SYLVATICO* galerita dicitur *Kalandria*. *CANGIVS* alicunde laudat: tanquam Calandrus dulcisonans in myrica. *FRISCHIVS* noster affert loca veterum germanicorum scriptorum et poetarum, ubi philomelae iungitur avis *Galander*, quam ipse alaudam arboream interpretatur.

IBID. CAP. 36.

*Crupponus.* Ex gallico *Croupion*. In equis commissuram renum et proprio vocabulo *cumulare* aut, ut plures Codices habent, *columellare* appellat *VEGETIVS Veterin. IV. c. 1. et 2.*

PAG. 45.

*Circa finem iterum gracilantur.* Quanquam magnam in vertebrae caudae varietatem reperire non licet, memorari tamen hoc loco meretur singularis in picorum



corum genere structura. Martii sceleton coram habeo, vbi primae 4 vertebrae caudae inter procurentes ossium anchorum fines interceptae sunt, mediae paulo angustiores, postremae sensim latiores fiunt, septima vero et vltima omnium latissima inferius additum habet planum osseum, fere rhomboidale, cui appensae fortissimae et rigidae caudae pennae firmantur, quibus arbores scandentes pici adiuuantur.

*Ingrossatur supra renes.* Non solum crassior fit eo in loco medulla spinalis, sed diuasicatur etiam in duos ramos medio ventriculo iunctos, vt primum in aquila, deinde in pluribus auibus annotauit PERRALTVS, Oeuvres de Physique, Vol. II. p. 409., vbi icone hanc medullae diuasicationem expressit. Vsum vt verum indagauerit, vereor. Similem enim structuram in medulla spinali testudinum annotauit CALDESI, eamque in tubera duo rhomboidea dilatata pinxit Tab. II. fig. 5. Cf., quae dixi in Historia naturali Testudinum, p. 286. et p. 292. Structuram hanc medullae in auium genere comparauit cum piscium medulla acutissimus NIC. STENONIS de canis carchariae capite dissecto, p. 108.

*Foramina spondilium fiunt ampliora.* Non solum foramina fiunt ampliora, sed et ipsi nerui, qui ex medulla spinali dilatata oriuntur statim in truncum magnum colligendi, deinde vero in varios femoris, cruris pedisque musculos dispergendi multo maiores, quam paria inter duas quasque costas atque alibi emergentia; eadem etiam est neruorum magnitudo, qui circa primam costam falsam vtrinque orti in alam disperguntur.

*Vnulam, neque epiglottum.* Lege *vuulam*. Alterum vero est pro *epiglottis*.

\* *Neque epiglottum.* In primo exemplo erat *epiglotum* pro *epiglottis*. In struthione tamen epiglottidem adesse, solus affirmat G. WARREN in anatomia maris struthionis inserta Philosoph. Transact. No. 394. In plurimis auium generibus rima laryngis angusta epiglottide non habet opus; vbi vero in anteriore sui parte diuasicatis cartilaginibus latior rima hiat, ibi in plerisque auibus musculos membranamque linguae molles replicatos ingressum latiore rima obducere et tegere vidi. Laryngem superiorem parum ad modulandam vocem conferre, iam alii annotarunt; maxime contra larynx inferior in bifurcatione tracheae additus vocem variat. In psittacis igitur, coruo corone, cornice, glandario, coracia garulo et oriolo, turdo iliaco SCOPOLI et sturno vulgari tria aut quatuor musculorum breuium paria ibidem addita vel ipse reperi, aut alii annotarunt, vt in psittacis, quae reliquis auium generibus desunt. Videntur igitur illae aues, quae vocem variare humanaeque imitationem assumere possunt, omnes hac inferioris laryngis structura inuicem conuenire; vt aues clamosae et altisonae trachea longa, va-



rie torta, plicata, dilatata aut folliculis additis aucta sibi similes esse solent. Sturni affinitatem cum genere picarum annotavit quidem LINNAEVS in Fauna Suecica p. 78, sed, quam is partem respexerit, ignoro. Equidem sturnum non solum laryngis inferioris, sed gambae etiam structura, hoc est, carina seu mucrone posteriore cum picarum, quas nominavi, speciebus convenire video; sed eadem omnia in turdum iliacum cadunt et forte etiam reliquos turdos, quos nunc recentes inspicere non possum.

*Recurvum, ad modum cochlearis.* Intelligitur platalea, seu ardea cochlearis. Sed in his, ut in ciconiis pelecanisque, lingua, etsi parva admodum, adest tamen, in imis faucibus sita et sacco gulari quasi appensa.

*Viridium psittacorum — alborum.* Virides videntur illi esse, qui Alexandri nomine gloriantur apud LINNAEVM, omnium primi Europaeis cogniti. Albos supra iam laudavit, ut videtur, eosdem. Nomen *papagabio* principalis seu nobilis gambio explicatur a Physiologo ap. VINCENTIVM XVI. cap. 135. Παπαγάβιος habet CANGII Glossarium graecum. Originem nominis indagare mihi nondum licuit. Arabibus *bahga* vel *babgia* dici, annotavit BOCHARTVS; forte igitur ex Arabico deflexa vocabula reliqua sunt. Sed praeterea psittacum galgulum veteres cognitum habuerunt. De eo enim PLINIVS X. c. 33.: galgulos quidem ipsos dependentes pedibus somnum capere confirmant, quia tutiores ita se sperent. Eadem DAMIR Arabs de aue *thenavvut* apud BOCHARTVM II. p. 341.; eam enim instante nocte ramum arboris apprehendere pedibus, capiteque deorsum inclinato usque ad auroram cantare refert; alii ibidem addunt, auem ita pedibus appensam et resupinam haerere, ne caelum in eam ruat. Ridicule. Eandem ex arbore filum suspendere, et nidum sibi texere, ut ampullam oleariam, appensum illi filo, referunt Arabes. Sed galgulum PLINIVS sine dubio duplicem nominavit.

*Lingua — quoddam durum.* Plerarumque avium lingua inferius dura et cartilaginea est, quemadmodum etiam in anteriore parte, modo integra, variaeque formae, modo fissa et lacera. In picis in osseam acum utrinque hamulatam induratur. Superior linguae pars inprimis versus glottidem seu rimam introitumque tracheae carnosior magis ductilisque est, ita ut retracta partem rimae in multis avibus claudat.

*Quarundam avium — os quoddam.* Os hyoides, quod intelligit, in omnium avium linguis subiacet, sed magnitudine et figura diuersum. Huius cornua producuntur usque ad occiput, ibique firmanantur, cum musculis appensis. In picis tamen cornua haec mirum in modum longa super cranium reflexa usque ad



ad narium regionem procurrunt. Sed in his linguae ipsius structura mira satis-  
que a viris doctis, PERRALTO, PETITO et WALLERO explicata. Cornua ossis  
hyoidis sunt *duo illi rami procedentes usque ad occiput*, quos memorat Imperator.

PAG. 46.

*Aliud vero foramen — in fine palati interius.* Supra p. 31.: inter nares et  
oculos quidam locus est in rostro mollis et cedens tactui, habens cutem desuper et  
duos panniculos subtus, vnum desuper alium, et sub illis est via patula, quae prae-  
tenditur a naribus usque versus cerebrum, et illinc transit superfluitas a cerebro ve-  
niens, et alia via tendens ad palatum. Clarum est, priorem ductum spectare  
ad puncta lacrimalia ductumque lacrimalem in nares ducentem, quem in vlula  
et gallopauone egregie descripsit pinxitque PETITVS in Mémoires de l'Acad. de  
Paris, 1735. et 1736; reliquam varietatem persecutus est BERTIN ibidem 1766.  
p. 290. Alterum vero ductum quem intelligi voluerit, nondum exputavi. Tu-  
bam enim Eustachianam, quae in ductum singularem membranaceum coit in  
medio palato infra narium in palatum aditum, significare non voluisse videtur;  
nimis enim illa subtilis et tecta latet. Vide de ea MOVLEN in Philosoph. Trans-  
actions, No. 199., et Cl. CAMPER Opuscul. minor. Vol. I. p. 115. — Sed tandem  
vidi, intelligi ductum excretorium, qui a sacco lacrimali per palatum in fauces  
ducit, quem in gallopauone descripsit et ex parte pinxit PETITVS in Mémoires  
de Paris, 1735. p. 132.

\* De naribus quod supra I. 26. posuerat: vtrumque illorum foraminum in-  
terius habet duas vias, vnam tendentem ad caput, alteram ad palatum; illae au-  
tem viae, quae tendunt ad palatum, in ipso palato vno longo foramine sunt  
contentae, quod foramen respicit versus cannam pulmonis: coniungi atque ex-  
plicari debet cum illis, quae ibidem paulo post sequuntur de molli illa et vacua,  
triangulari fere parte capitis inter nares et orbitam sita: inter nares et oculos qui-  
dam locus est in rostro mollis et cedens tactui — et sub illis (panniculis) est via  
patula, quae praetenditur a naribus usque versus cerebrum, et illinc transit superflui-  
tas a cerebro veniens, et alia via tendens ad palatum. Dum igitur in gallopauo-  
nis capite, quod cum anatomia PETITI coram habeo, structuram narium, pa-  
lati locique vacui inter nares atque orbitam considero, viam patulam a naribus  
ad cerebrum nullam aliam reperio, nisi neruos, qui a cerebro descendentes per  
orbitam transeunt et narium spongas ingrediuntur. Ductus vero lacrymalis  
vtrunque ante narium spongas magno orificio in media fere palati rima iuxta ma-  
ius aliud orificium aperitur, quod ex ipsis narium spongiis descendit. Viam igi-  
tur illam patulam interpretor vacuum ipsam et triangularem partem, in cuius an-  
gulo sacculus lacrymalis abditus est. Huius vero cavitatis usum ignoro cum PETITO,  
qui in Mémoires de Paris, 1735. p. 133, de ea sic tradit: *cette vacuité est cau-*



fée par la rondeur de l'oeil et par des muscles de la machoire inferieure, qui forment un plan à la partie inferieure de la vacuité. Ce qu'il y a de particulier à cette vacuité c'est que l'air extérieur n'y peut entrer par aucun endroit, elle ne communique point avec le nès et ne contient aucune liqueur. Nescio, an commode cum hac cauitate liceat comparare sinus lacrymales animalium ruminantium peruios ante orbitam in ceruô, dama, coecos in oue et capreolo. In postremis scilicet his generibus os lacrymale, in ruminantium ordine multo maius diuersaeque formae, ante orbitam depressum foueam perforatam habet, aut si fouea ipsa, vt in capreoli cranio video, coeca est, iunctura lacrymalis ossis cum nasalibus et maxillari parte spatium vacuum multum aut perforatum varie habet, vt in lepore. Huius autem formae ossium vsum hucusque non magis quum sinuum lacrymalium peruiorum indagare viris doctis licuit. Sinus sebaceos appellat eos Cl. PALLAS. — Naribus oppletis cauitatem hanc respiratione inflari membranamque, qua tegitur, subleuari, ideo in medicina ferro perforandam, monet CAROLVS D'ARCVSSIA p. 74. In anfore et anate nerui quinti pars ramus tertius per cauitatem illam transit; sed ductus lacrymalis in ipsas nares excernitur. Foramen igitur, quod in loco hic proposito Imperator post rimam palati longam interius collocat, nullum aliud esse potest, quam ductus communis membranaceus tubae Eustachianae, cuius orificium in eo ipso loco, vbi ossa palatina anteriora cum posterioribus introrsum deflexa coniunguntur, apertissime conspicatus in pluribus gallopauonum capitibus coctis inserto flexili stilo ad aurium vsque cauitatem facile pertento. Vsum Imperator foramini, quod satis patulum oculis facile occurrere curiosis, recte monuit Cl. BLVMENBACH in Osteologia, falsum assignauit. — Ceterum cornu, quod Indicae auis, rhinocerotis nobis dictae, cranio impositum ad nares vsque pertingit ibique reflectitur, vtpote spongiosum totum os et ad palatum, quemadmodum etiam ad nares, peruium, ad olfactus instrumenta pertinere, coniectura MONTII est in Comment. Bononiens. T. III. p. 300. proposita; quem tamen falsum esse, asseuerat Cl. BLVMENBACH Compend. Histor. naturalis, p. 152. ed. secund. Laudat is anatomicam rostri rhinocerotis descriptionem STOLP. V. D. WIEL Obseru. medic. anatom. Centur. I. tab. IX. fig. 1.

## IBID. CAP. 37.

Quae de aspera arteria tradit pauca Imperator, amplissimum admitterent commentarium. Verum omnes virorum doctorum de varia et mirifica tracheae laryngisque, inprimis inferioris, vbi bifurcatur trachea, structura animaduersiones collectas annotaui et meis auctas posui in Promptuario Lipsiensi histor. natural. anni 1786. p. 460. seqq.



PAG. 46. sq. CAP. 38. 39.

Pulmonum descriptione et diaphragmatis nimis breui defunctus est Imperator, cum his maxime partibus earumque admirabili structura genus auium a reliquis animalibus distinguatur. Quicunque igitur accuratius de his erudiri voluerit, adeat Cl. MERREM dissertationem de saccis pulmonalibus auium insertam Promptuario Lipsiensi historiae naturalis 1783. p. 201. seqq., et quae de historia inuentorum horum anatomicorum inonui ibidem 1786. p. 466. Recte vero posuit Imperator, pulmones auium collocatos inter costas iisdem adhaerere, per proprios scilicet lacertos.

PAG. 47. CAP. 40. 41.

Oesophagi et ventriculi structuram egregie illustrant experimenta de digestionē auium instituta a Cl. REAUMURI primū, deinde repetita a Cl. SPALLANZANI. Multas etiam egregias obseruationes posuit iam olim COLLINS in Anatomia, vbi vide explicationem Tab. 19, quae ventriculum anseris sistit pictum. — Initio capitis 41. pro *dirigitur* legendum est *digeritur*.

PAG. 48. CAP. 43.

De renibus ARISTOTELES H. A. II. 16.: ὅσα δὲ ὠτοκεῖ, τῶν μὲν ἄλλων ἔδεν ἔχει, οἷον ἔτ' ὄρνις ἔτ' ἰχθύς. Sed mutauit sententiam deinde in libro III. de Partibus cap. 9.: ἔδεν γὰρ νεφρὸς ἔτε τῶν πτερωτῶν καὶ λεπιδωτῶν ἔχει, ἔτε τῶν φολιδωτῶν — ἀλλ' ὥς τῆς εἰς τὰς νεφρὸς τεταμένης σαρκὸς ἐκ ἐχέσης χώραν, ἀλλὰ διεσπαρμένης εἰς πολλὰ πλατέα νεφροειδῆ ἐν ἐνίοις τῶν ὀρνίθων ἐστίν. Vides igitur, diuersitatem structurae in causa fuisse, cur auibis renum vsum negaret. Renum varietas magna quidem est, sed non tam diligenter annotata a viris doctis, vt ex obseruationibus anatomicis inuicem comparatis certam aliquam regulam deducere liceat. In ardeis vulgaribus vreteres reperi, quales in nulla auium, quas hucusque fecui magna fatis copia, immensae scilicet pro reliquo corpore et more auium crassitudinis, adeo vt pennam corui aequarent.

IBID. CAP. 44.

Nimis et hic laconicus est Imperator. Testiculos et penem marium, quemadmodum matricem feminarum, in auibis iunioribus vix videre licet, nec, vt recte iam admonuit ARISTOTELES, in adultis adeo, nisi tempore coitus, vbi testiculi cum pene intumescunt. Matricem tamen, id est oviductum, etiam in iunioribus agnoscet, qui accuratius intestina perspiciet; ouarii vero in his nullum saepe vestigium apparet. Ductus deferentes semen a testiculis nimis sunt subtiles et iuxta vreteres in renibus reconditi, quam vt facile ab ignaris conspici possint. Glandulae etiam renales seu renes succenturiati, paulo supra testiculos positi, saepe imprudentibus imponunt speciemque testiculorum praebent. Penis miro



modo intortus et circumuolutus extra coitus tempora raro se conspiciendum praebet, in quibusdam duplex, in multis prodigiosae pro reliquo corpore longitudinis, sed in vniuersum non adeo frequenter a viris doctis descriptus aut pictus.

## IBID. CAP. 45.

*Per medium gibbositatis.* Sequentia docent, etiam hic legendum esse *per medium pilositatis*. Pilositatem vero appellat fibras costulae vtrunque appositas, et firmiter inuicem nexus, quarum structuram et varietatem in multis auibus persecutus descripsit et pinxit PERRALTVS, post eum DERRHAM et HANOVIVS Dantiscanus. Nihil autem gibbi nec in ipsa costa nec in appositis fibris apparet; costula ipsa plerumque superne conuexa, inferius concava et sulco per longitudinem exarata est. In ciconia tamen nigra superiorem costae superficiem fere totam planam reperi. In vrogallo firmissimam omnium costam cum canali cartilagineo et durissimam offendi.

*Dumas.* CANGIVS legendum putabat *Duuas* ex Gallico *Duuet*. Sed CHARPENTIER ex FALCONETO monet, originem habere vocabulum ab antiquo *Dum*, quod Britannis hodieque *Down*. Nostri etiam hominibus in Marchia et alibi *Dunen*, Belgis *Donst*, *Donse*, quae ciuibus Saxoniae meae *Pflaumen*, ex voce latina corrupta *pluma*, *Plum*, (vnde Belgarum *Pluym*), *Flum*, *Flaum*, *Phlum*, *Pflaum*.

*Nec sunt ut pili, neque ut lanulae.* Praeclare! Sed in historia auium tractanda vellem a curiosis scriptoribus adhiberi vocabulum pilorum, non solum propter breuitatem, sed ut res ipsa melius et accuratius noscatur. Pilos hos etiam in adultis auibus saepe reperire licet inter plumas latentes; in strigum capitibus, ubi plumae sunt longissimae fere omnes, semper, ut puto, reperiuntur reliquis mixti et deplumato capite tenaciter cuti adhaerent. Hos in vlulae capite pinxit PETITVS in Mémoires de Paris, 1736., et in descriptione ita tradit: *il étoit resté sur cette tête plumée un duvet, qui n'est autre chose que de petits tuyaux surmontés de houpes formées par de petits filets très fins.* Graeci lanulas cum plumis *πτίλα*, pennas reliquas *πτερά*, remiges priores maximas *ᾠκύπτερα* appellant.

## PAG. 49.

*Hinc est quod in quibusdam auibus plumae habent sub se alias.* Recte et praecclare Imperator annotauit, in eo auium genere, quibus, amissis primaeuis lanulis, cum pennae et plumae perfectae fuerint, aliae minores interualla plumarum non tegunt, plumulas minores, quae lanularum vices agunt earumque fere structuram habent, cannulis plumarum maiorum additas haerere, tumque etiam  
infimam



infimam partem plumae maioris fibras non strictas arcteque inuicem nexas costulae vtrunque, sed laxiores et molliores floccorum instar gerere; aut, si plumulae minores, molles cannulis maiorum plumarum non fuerint additae inferne a natura, tum plumarum ipsarum fibras infimas vtrunque per longius spatium laxas mollesque lanularum vices obire. Vt a postremo ordiar, fibrarum laxarum et mollium ex utroque costulae plumarum margine prodeuntium partem aliquam angustiore modo latiore in omni fere auium genere reperire licet; ex meleagride plumam eiusmodi inferius magna ex parte vtrunque lanulatam, non strictam aut densam, descripsit et pinxit PERRALTVS in Anatomia Meleagridis, T. II. tab. 49. — Contra vero plumae lanulatae minores cannulis maiorum plumarum inferne additae reperiuntur in gallinaceo genere fere vniuerso, Tetraonibus, Phasianis et gallinis vulgaribus, vt in vrogallo iam olim annotauit BELONIVS; sed praeterea sparsas eiusmodi duplices plumas in permultis aliis auibus per varias et diuersas corporis partes reperit et annotauit etiam amicissimus HERMANNVS in IOH. BECMANNI, V. C., Bibliotheca Physico - Oeconomica, Vol. VI. p. 387. Tales in collo et abdomine aquilarum et psittacorum reperit PERRALTVS et pinxit II. p. 31.; in casuario idem omnes plumas duplices sed diuersae paululum structurae reperit; in ciconia lanulas colli multifidam costulam gerentes vidit. Ibid. p. 240. Dumae falconibus desunt, quae in aquilis densissimae, vt in aquaticis.

*Inter cannulas quarumque duarum plumarum — sibi superest tertia, i. e. superposita est.* Si nempe plumas omnes per totum corpus in quincunce positas cutique insertas cogitaueris, aut in pictura a me apposita cutis ex vrogallo decisa cum poris plumarum inspexeris, tum facile intelliges, non solum superne, sed etiam inferius inter duas quasque cannulas adstare tertiam mediam. De hoc plumarum ordine admonuit etiam LINNAEVS in Fauna Suecica p. 53., vbi, vidi corium, inquit, Colymbi praeparatum, quod pulchre insertiones pennarum exhibet perforatis poris, vbi pennae per quincuncem, vti arbores in campo, quominimum spatium repleant, et circum singulam pennam in quadrato ordine plumae 12. Quem equidem locum plane non intelligo, quamuis hoc ipso tempore corium eiusmodi Colymbi auriti bene praeparatum a pellione oculis etiam armatis perlustrauerim. Plumas hic vbique densissimas atque inferius lanulatas reperio, sed dumas his interspersas nullas plane. Oportet igitur aliquis error scribenti tum LINNAEO aut typothetae obrepserit.

## IBID. CAP. 46.

*Secundum aetatem, vt cinni.* ARISTOTELES H. A. III. cap. 12. auium nullam cum aetate mutare colorem ait praeter gruem: αὕτη δὲ ἔσα τεφρὰ γηράσκουσα μελάντερά τὰ πτερὰ ἴσχει. Ita enim cum Mediceo et B. RHENANI codice legen-



legendum esse, docet versio antiqua apud VINCENTIVM XVI. 5. PLINIVS X. sect. 42.: quod in grandiore alitum genere grues tantum. Hae enim senectute nigrescunt. Sed de mutatione colorum per anni tempus idem ARISTOTELES addit ibidem: καὶ κατὰ τὰς ὥρας οἱ πολλοὶ τῶν ὀρνίθων μεταβάλλουσι τὰς χροάς, ὥς τε λαθεῖν αὖ τὸν μὴ συνήθει. PLINIVS etiam l. c.: Alia admiratio circa oscines. Fere mutant colorem vocemque tempore anni ac repente fiunt aliae. — Merula ex nigra rufescit, canit aestate, hieme balbutit, circa solstitium muta. Rostrum quoque anniculis in ebur transfiguratur, duntaxat maribus. Turdis color aestate circa ceruicem varius, hieme concolor. — Alia ratio ficedulis; nam formem simul coloremque mutant. Hoc nomen non nisi autumnno habent: postea melancoryphi vocantur. Sic et erithacus hieme, idem phoenicurus aestate. Mutat et vpupa, vt tradit Aeschylus poëta. Hic locus totus est conuersus ex ARISTOTELE H. A. IX. cap. 49. Observatio colorum mutatorum in oscinum maxime genere locum habet, vbi mares colore viuido magis pinguntur sub coitus tempora: vnde facile ab ignaris aequae ac doctissimis saepe pro aliis habentur. Exemplum Sylviae phoenicuri et tithyos habet SCOPOLI p. 192. et ZORN Petinotheol. II. p. 387.; fringillae cannabinae SCOPOLI p. 181., ZORN II. p. 339.; emberizae citrinellae SCOPOLI p. 172.; ZORN II. p. 346. Denique, vt multa alia exempla omittam, motacilla ficedula LINNAEI eadem plane avis est cum muscicapa atricapilla LINNAEI, a qua nisi colore post nuptias mutato non differre asseuerat LOTTINGER apud HERMANNVM Commentar. Tabul. Affinit. p. 228. Hanc puto etiam ARISTOTELI συκαλίδα, ficedulam, et μελαγνόρυπον, atricapillam, dici. De ardearum colore mutato nullibi certi aliquid obseruatum legi, nisi quod auctores in coloribus describendis variare saepenumero reperi. Sic in ardea cinerea tergum caeruleum commemorat LINNAEVS, quod SCOPOLI nunquam se vidisse testatur, p. 98. Idem tamen SCOPOLI in grue verticem rubrum vidit, p. 102. Colorem *bisum* habet quidem CANGIVS, sed, is quomodo a pulueroso differat, ignoro. Apparet vero etiam hinc, studiosos ornithologiae curatius debere non solum tempus, quo aues inspexerunt, sed et sexum annotare. Aliter enim si fit, semper in tenebris micamus, specierum numerum accumulamus, nec ipsam tamen naturam auium explicamus, ordinemue generum specierumque certum statuimus.

\* *Ayrones bisi*. Forte verum huius loci sensum a falconariis acceperat germanicus interpres, qui habet: *die grauen Reiher, deren kleine Federn zur Heckzeit bunt und die grossen klein getröpfelt und grau werden; welches daraus zu sehn ist, weil sie die Tücher, die sie berühren, und von einer andern Farbe sind, mit ihrer Farbe färben.*



## PAG. 50.

*Statim quod natae sunt.* Ex more Imperatoris legendum puto *statim quando.* Auium quaedam genera multipara nec magna imperfectos et caecos pullos excludere, tradit ARISTOTELES de Generat. IV. c. 6., posito exemplo cornicis, picae glandariae, passerum et hirundinum; deinde etiam paucipara quaedam genera, quae pullorum nutrimento multo simul excludendo cum ouo non sufficiant, vt columbas. Ceterum in gallinaceo vniuerso genere, quo coturnices et perdices comprehenduntur, pullos statim exclusos matrem sequi, relicto nido, annotauit etiam ARISTOTELES H. A. IX. c. 8. et post eum alii. In pullis gallinarum vulgarium facile quiuis intelliget, quas Imperator dicit, lanulas seu dumas; sed etiam in hoc genere sunt quaedam species, quarum pulli quatuor demum menses nati plumis induuntur. De gallinis Patauinis asseuerat hoc ZINANNI de Ouis p. 31.; de alia DAMPIER apud ill. BVFFONVM IV. p. 171. vers. germ. Diuersitatem pullorum ex omni auium genere, qui aut caeci floccisque (ita enim pilos hos appellat commode) raris obsiti intra pauciores fere dies ex ouis nascuntur, aut oculis apertis lanulisque bene vbique tecti, explicauit ZORN Petinotheol. I. p. 393.

## PAG. 51. CAP. 48.

Nullibi tam accurate traditum de dumis, plumis et pennis, earum ordine, situ et multitudine memini, quam ab Imperatore factum est. Variat quidem in generibus quibusdam copia situsque dumarum, sed in vniuersum verissima sunt, quae docet angustissimus auctor. In ardearum genere inter furculam in pectore magna conspicitur cavitates, quam recipiendo collo varie replicato dicatam esse docui in Promptuario Lipsiensi 1786. p. 480.: haec vero tota tecta est densissimis et breuibus lanulis; nullae vero ibi adsunt plumae, sed longissimae plumae colli ab inferiore eius parte vtrinque dependent atque ita cavitatem omnem obtegunt. Similem in vulture grypho cavitatem lanulis tectam annotauit PERRALTVS, eamque pro lobo cibus farcto et protuberanti recipiendo assignauit.

## PAG. 52.

*Subcoxalibus.* Ita continuo scribendum est. Supra cap. 33. p. 40. monuit, duo focilia cruris a quibusdam male appellari coxam, et os supra crus positum supra coxam. Loquitur igitur hic ex more vulgari, *subcoxalia* ossa appellans cruris duo focilia, et crus, quod rectius metatarsum dixeris, vt supra monui.

*Per totum corpus, sed* — Intelligendum puto ad sensum verbum *adsunt.* Spectat inprimis differentiam in plumis, quae in cruribus palustrum, rapacium et aliarum magis minusue altae descendunt. Vbi quae tibialia seu bracciae a quibusdam dicuntur, haerent in latere exteriori coxae fixae, in linea versus

Frider. Rel. Tom. II. F ossa



ossa pubis excurrente posita, et super tibias dependent, quae brevioribus plerumque plumis vestitae sunt. Talia conspicio commodum in Meleagride, ubi humeri et cubiti interna facies tota nuda et deplumis apparet; superior etiam humeri pars inferius fere tota deplumis aut brevibus plumulis hinc inde tecta, superius dependentes longiores humeri pennas habet, quae in ardearum anatumque genere aliisque auibus mira longitudine, colorum structuraeque varietate luxuriant. In pico tamen Martio, quem nunc coram habeo, nullam alarum partem nudam video; sed plumae in hoc omnes a natura dumarum propius absunt. Rapacium auium alam internam nudam, contra vulturum leni vellere totam tectam voluerunt ALDROVANDVS et BUFFONVS; sed vellus illud seu fanulam in plurimarum rapacium auium interna ala vidit CETTI Sardin. II. p. 24.

*Bubonibus — noctuis.* Habes igitur notam, qua simillimas species auium distinxit Imperator. Similes noctuis Lagopodes, quibus pedes pentadactyli, quod mirum, etiam subtus plumulis laneis tecti sunt, auctore OTH. FABRICIO in Fauna Groenland. p. 115.; sed aestate pedes non plumati principia accrescentium hiemalium plumarum tantum ostendunt, ut idem auctor est. Noctuis ferum, vlulis vespertinum, bubonibus nocturnum cantum assignat APVLEIVS Floridorum libro 2.

PAG. 53. CAP. 50.

*Corales.* De nomine postea videbo. *Pennas scapulares* appellat Cl. MERREM, qui de numero et forma nihil plane tradit in Introductione p. 24. In terrestribus auibus plerisque in humero plumae plures densaeque adsunt, quas igitur numerare inter pennas non licet. Num igitur in falconibus pennae 4 distinctae a vannis plumisque dorsi adsint, ignoro, nec, dum haec seribo, inspicere mihi falconum speciem aliquam licet. Credo tamen facile Imperatori affirmanti, ideoque magis attendendum puto animum ad earum numerum et formam a curiosis scriptoribus, qui auium naturam accurate interpretari suscipiunt. Numerus igitur pennarum sine dubio etiam variat in diuersis generibus.

*Decisae — curtelli — cultellae.* Clarum est, pro postremis duobus vocabulis legendum esse *curtelli*. A cultro est cultellus, a cuius similitudine appellantur pennae, remiges primariae dictae LINNAEO, curtelli etiam infra cap. 24. libro 2. Verbum *decisae* significat hic idem, quod Gallorum *decoupées*, i. e. strictae, angustiores. Alam eiusmodi, ubi pennae priores quinque in media longitudine pilositatis subito angustiores fiunt et in acumen decrescunt, ita ut expansae non tegantur totae inuicem, sed versus extrema spatia vacua relinquant, *velarem* (*aile voiliere*) aut velificantem appellat miluoque inprimis et reliquis auibus, quas a forma alarum velificantes nominat (*Voiliers*), assignat Cl. HYBER, Essai sur le vol des oiseaux de



de proie. Alterum vero alae genus, quod in multis rapacium auium speciebus conspicitur, vbi pennae omnes leniter et aequaliter versus extrema decrescunt seque inuicem lateraliter tegunt, nullo relicto inter se vacuo spatio, alam *remalem* (*aile rameuse*) appellat falconibusque proprie dictis assignat aliisque auibus, quas nomine communi *Rameurs* nuncupat. Vtrumque genus etiam in tabulis duabus aeri incisis pictum exhibuit, vbi facile aliquis diuersitatem agnoscet. Pennas decifas Cl. MERREM angustatas voluit appellari, sed ex apposita germanica interpretatione intelligitur, eum scribi voluisse *angulatas*. Ceterum non satis approbo morem, quem ille tenuit in explicanda remigum alae pennarum forma; neque enim distinxit vannos a cultellis vbique, quanquam interdum remiges secundarias nominat.

*Forinfeco, quae dicuntur.* Apertum est, legi debere *quod dicitur*. De nomine et vsu empinionum infra dicetur.

\* De pennis paucae sunt memoratu dignae ALBERTI annotationes, VI. p. 87. b.: iuuenes, inquit, aues ultimo plumescunt in ventre et habent ibi pennas pauciores et molliores — sed et ipsae pennae, quum sunt incompletae, virus habent inferius in harundine, quod tamen totum in squamas puniceas conuertitur et adhaeret harundini pennae per partes exsiccatum et cadit aut per se exsiccatum aut disponitur rostro vel vngue auis. Vbi harundinem video esse, quae Imperatori cannula; sed quas ille squamas puniceas memorat, ignoro, colorem saltem miror. Tubum pennarum cartilagineum seu cannulam, earum, quae ossibus alarum manum referentibus adhaerent, cum vnguibus comparauit Cl. VICQ D'AZYR; verum etiamsi in alis comparisonem hanc admittas, in caudae tamen pinnis similitudinem cum humana structura atque vnguibus nullam plane reperire licet. Sed vnguis in ala vnica pollicis adest, in multis auium generibus satis longus, vt monuit etiam nuperrime Cl. MERREM; reliqui vero manus digiti vnguibus carent. Cum vero alarum motores musculos in aquila mea albicilla commode, dum haec commentabar, oblata accuratius inspicerem, vt discerem, empiniones, cultelli, vanni et corales quo motu quibusue aut communibus aut peculiaribus musculis firmentur, contrahantur et expandantur, vidi in quibusdam dissentientem Cl. MERREM ab accuratissimo Gallo. Huius igitur dissensus causam enarrare conabor, quod deinde etiam in caudae musculis, multo paucioribus et facilioribus ad indagandum, faciam. Huic vero de alarum motoribus musculis tractationi subiungam breuem aquilae albicillae anatomen earumque in primis partium enarrationem, quae aues rapaces maximo discrimine a reliquis se iungunt, adiectis in fine, quae in variis auium generibus de numero et natura pinnarum plumarumque hoc ipso tempore hiemali annotare potui.



Os carpi exterius seu superius in angulo inter cubitum, radiū et metacarpum situm accipit musculus cubitalem internum a condylo interno seu inferiore brachii ortum. Hic cum in homine pisiformi ossi adhaereat, Gallus hinc carpum hunc pisiformis ossis vice fungi arguit. Praeterea tendinem a gracili manus extensore accipere ait. Cl. MERREM tensorem interiorem seu posticum manus a capite ossis humeri interius ortum ad latus externum carpi exterioris perducit. In aquila mea cubitalis interni tendo per fossam inferiorem carpi superioris transiens ipsi metacarpi capiti in latere externo affigitur. Sed carpus inferior duos accipit tendines a duobus musculis, qui in condylo inferiore seu interno humeri ossis orti infra cubitum decurrunt; quorum ille, qui propius cubitum decurrit, tendinem vnum carpo inferiori, alterum vero primae digiti phalangi porrigit. Qui vero subter eum decurrit, soli carpo inferiori affigitur. Nunc videamus pollicem empinionesque, quibus illi musculis regantur flectanturque. Primum igitur Gallum audiamus. Pollicis flexorem is a condylo externo seu superiore humeri ortum ad radiū perducit, et tendine bifurco ad pollicem, altero vero fine ad caput primae phalangis digitalis alligat. Extensorem vero seu radialem longum rotundum crassumque supra condylum externum brachii ortum tendine ad pollicem, alio vero ad primam manus phalangem alligat. Praeterea minutum extensorem et flexorem alium pollicis memorat Gallus. Cl. MERREM primum expansorem seu eleuatorem pollicis empinionumque a capite clauicularum ortum extremitate bifurca tendinosa ad pollicem, altera vero inferiore ad musculus posticum, qui manum tendit, applicat. Alterum depressorem a capite inferiore ossis humeri ad caput pollicis deprimendi deducit. Praeterea duos breues etiam commemorat, quorum prior in osse carpi exteriori ortus pollicem empinionesque eleuat et regit; posterior in parte metacarpi inferiore ortus ad latus pollicis interius porrigitur, adstringitque eum cum empinionibus. Putabat etiam Cl. MERREM, doctissimum Gallum expansorem magnum seu eleuatorem pollicis in duos diuisum aliunde deriuasse. Gallus scilicet nominat magnum aliquem tensorem membranae alarum externae, planum, angustum totumque carnosum, ab apice furculae ortum, in parte superiore et externa magni pectoralis locatum eiusdemque fibris applicatum, et inter membranas alae expansum, quam tendit; hunc cum tertia deltoidis humani portione comparat. Alterum deinde minorem anterioris alarum membranae tensorem memorat, longiusculum, rotundum, a facie interna humeri ortum, qui, dum cum priore maiore coit, angulum efficit acutum, deinde inter membranas alae expanditur. Hunc bicipitis musculi portionem videri, ait Cl. Gallus. Flexorem pollicis in aquila albicilla plane ita situm reperio et desinentem, vti Gallus memorat; initium habet in condylo humeri externo seu superiore commune cum breui musculo, qui radiali interno breui oppositus superiorem faciem radii amplectitur et in eodem loco cum radiali breui interno terminatur. Flexor vero digiti externus in inferiore seu in-  
teriore



teriore humeri condylo ortus iuxta radialem breuem inter cubitum et radium ad  
 latus externum excurrit et basi vltimae digiti phalangis alligatur; plane vti me-  
 morat Gallus et MERREM; hic tamen apici digiti alligat, eoque digiti pinnas re-  
 miges regi putat. Verum tendo eius in superiore duarum phalangum digiti fa-  
 cie a pinnis fatis remotus excurrit, atque super ipsa metacarpi cum prima phalan-  
 ge digiti infra os sesamoideum, rotundatum, paruum alligatum habet, nec rege-  
 re villo modo posse pinnas videtur. Praeterea tendo hic, vbi iultra cubiti finem  
 in latere externo excurrit, musculum breuem secum coeuntem accipit, cuius vna  
 fibra carnosa ad mediam externam faciem capitis metacarpi, altera vero tendi-  
 nosa ad carpum superiorem seu anteriorem retro porrigitur. Porro pollex late-  
 ralem dextrum et sinistrum aut externum et internum accipit, non ab osse villo  
 carpi, sed a dextro et sinistro latere capitis metacarpi. Tertius superior pollicis  
 musculus manifeste duplex pone metacarpi protuberantiam pollicarem oritur a  
 tendine longi radialis a Gallo nominati. Hic vero in condylo superiore seu ex-  
 terno humeri ossis a latere interiore ortus protuberantiae pollicaris apici alligatur,  
 et musculo, vt dixi, duplici pollicis ipsius. Haecenus igitur bene omnia con-  
 ueniunt cum narratione Galli. Sed quem ille gracilem radialem dicit, in aquila  
 mea inter cubitum et radium in latere vtriusque ortus adeoque vtrique ossi infe-  
 rius communis, tendine suo eidem protuberantiae pollicaris apici alligatur. Cu-  
 bitalis externus in condylo superi ossis humeri ortus cubito adhaeret ab initio, de-  
 inde ad latus capitis superioris cubiti cartilagine aliqua fortissima religatus ad me-  
 tacarpum sub interstitii initium alligatur. Atque hic ipse est, quem Cl. MERREM  
 anteriorem manus adductorem vocat. Hoc vero ipsum officium Gallus longo  
 flexori metacarpi tribuit, qui inter duos humeri ossis condylos ortus in latere in-  
 teriore versus interiorem condylum, vti tradit Gallus, in aquila mea vsque ad  
 vltimam digiti phalangem, cui alligatur, in latere externo decurrit. Nunc tan-  
 dem perueni ad expansorem membranae alarum externae seu anterioris maio-  
 rem et minorem, quem duplicem Gallus commemorat, cum Cl. MERREM vni-  
 cum nominet eique longe aliam originem finemque assignet. In aquila mea du-  
 os, si non musculos ipsos, tendines saltim facillime distinguo, quorum superior  
 in margine supremo et externo membranae alarum, inter humerum et cubitum  
 expansae, planus, sed non adeo latus decurrit, et ossi conico, pisi fere magni-  
 tudine, adfigitur, quod iuncturae radii cum carpo superiore et protuberantia  
 metatarsi pollicari superimpositum et membrana laxa his et vicinis partibus alli-  
 gatum, ita tamen, vt fluctuet, os sesamoïdes flexoris brevis hallucis in homine  
 refert. Habemus igitur ossa duo sesamoidea, quorum alterum vix quartam par-  
 tem magnitudinis huius habet et iuncturae metatarsi primaeque digiti phalangis  
 superimpositum reperi. Cum nihil simile in aquilae suae hornotinae anatomia  
 commemorauerit Cl. MERREM aut Cl. VICQ D'AZYR, suspicor, ossa illa cum  
 aetate increfcere et in speciem maiorem efformari demum, antea debilia nec dura



fatis, vt appareant. In scelecto falconis buteonis et caerulei minus tantum digiti os sesamoides reperio; maiore sine dubio cum musculis ablato. Maius igitur pollicis os sesamoides tendinem in aquila mea porrigit protuberantiae pollicari metacarpi, alterum vero musculo inferit superiori pollicis, quem antea commemoravi. Gallus finem expansoris alarum membranae magni non explicuit; sed initium in apice furculae et in latere superiore et externo magni pectoralis collocat, ipsumque musculum planum, angustum fibrisque magni pectoralis applicatum esse ait. Ego vero in aquila mea initium eius in margine externo furculae reperio, quem totum cingit ambitu suo, ita vt portiones duas facillime separem, quarum vna multo angustior superiorem, altera vero multo maior et triangularis inferiorem marginem vsque ad apicem cingit, plane tamen cum fibris magni pectoralis confusa. Expansorem minorem membranae Gallus deducit a facie interna humeri, ita tamen, vt pars bicipitis esse videatur. Hic vero in aquila mea nihil plane cum bicipite habet commune, sed a summo apice marginis acuti, quem facies externa capitis humeri efficit, ortus, ita tamen, vt praeter hunc distinctissimum tendinem etiam cum magno pectorali coeat, subter maiorem decurrit per membranam paulum angustior et sub angulo acuto, dum ala extenditur cum membrana, extremitate bifurca tendinis adfigitur parti inferiori carosae longi radialis, qui ad protuberantiam metacarpi pollicarem tendit, altera vero parte interiore et paulum longiore cubiti capiti in latere externo affigitur, vti puto. Affirmare tamen hoc non ausum, quod finem hunc alterum imprudens ab osse solueram antea, quam animum eo aduertissem. Denique propius cubitum duo alii breuiiores tendines inter membranam alae decurrunt sensimque finibus suis in eam expanduntur, quos a bicipite oriri suspicor; nec enim mihi apparuerunt antea, quam membranae cellulosa dissoluissim et musculos omnes separassim.

Supereft, vt quaeramus, quibusnam vinculis pinnae alarum firmentur et quibus musculis regantur. Cultellos igitur ex narratione Galli regit musculus interosteus anterior et posterior, quorum ille in interstitio ossis metacarpi ortus parti eius anteriori et grandiori adhaeret, ad phalangem secundam digiti excurrit et cultellorum aliquot radicibus alligatur. Posterior vero parti minori ossis metacarpi adhaeret, radicibus pinnae applicatur omnemque alae membranam amplectitur. Praeterea a breui digiti flexore in inferiore metacarpi margine orti fibrae ad radices pinnae excurrunt. Cl. MERREM primum cultellorum rectorem inter partes duas metacarpi ortum manus pinnae regere ait; alterum vero in capite inferiore humeri ossis ortum per latus externum carpi exterioris digiti ad apicem digiti perducit, eoque pinnae digiti regit manumque extendit. Posteriorem hunc, de quo paulo antea iam monui, eundem esse puto, quem Gallus internum extensorem digiti appellat, et inter musculum flexorem cubiti et pronatorem



natorem rotundum ortum, brachiique duobus ossibus adhaerentem per latus anterius digiti perducit, cum musculo extensore gracili iungit, eiusque fibras quasdam ad pinnarum radices expandit.

Equidem cum internam faciem alarum seu potius impulsorii, cui additi haerent cultelli, curiose lūstro, omnes pinnarum vaginas video duplici tendine firmatas atque ad ossa metacarpi phalangumque alligatas esse, quorum alter internam superioremque vaginae faciem amplectitur, alter vero in latere transuersus ad externam faciem inter duas pinnae quisque excurrit ibique firmatur. Idem fieri video in empinionibus, quas tendo ad pollicem singulas alligat; tendines tamen transuersos ad externam faciem transeuntēs non vidi, sed musculus ab anteriore metacarpi facie ortus omnes empinionum vaginas amplectitur regitque. In externa facie reperi pinnae tegetes, quarum radices eminent supra radices cultellorum, superiori ossium metacarpi phalangumque margini continua et fortissima seu tendinosa membrana alligatas; interius vero, ut et ipsi cultelli, multis fibris tendinibusque, a musculis illis, quos nominauit Gallus, et qui difficillime extricantur, accedentibus, medio lateri atque inferiori exteriori margini ossium nominatorum alligantur atque inuicem fere totae immobiles condensantur. Digiti minimi rudimentum, quod in priore aliqua nota iam descripsi, non solum fortissimo et latissimo tendine inferiori capiti metacarpi alligatur, sed et tertio cultello longissimum tendinem praebet. Musculus vero ille, quem Gallus breuem flexorem digiti appellat, in margine inferiore minoris partis ossis metacarpi non digito ipsi, sed rudimento digiti indicis apertissime inseritur. Hic vero initio primae phalangis subiacet fere immobilis.

Vannorum rectorem vnum memorat Cl. MERREM a capite inferiore ossis humeri ortum, in osse carpi inferiore desinentem, cuius latus exterius totum tendinosum plures fibras ad regendos vannos emittit. Videtur is esse, quem Gallus gracilem digiti extensorem nominat et a condylo interno seu inferiore brachii tendine bifurco carpo interiori alligat, altero vero fine cum cubitali interno iungit. Equidem dum in aquila mea faciem internam vannorum rimor, primum ipsos vannos fortissimo quemque ligamento, quod in mediam vaginam excurrit, alligatum cubito video; deinde musculus grandis et exteriore in facie fere totus tendinosus, ortus in condylo inferiore seu interiore humeri ossis (ubi super iunctura cubiti et condyli humeralis adfixum inferius in ipsa statim origine habet os conicum, dimidia magnitudinis magni ossis sesamoidis), duplici tendine inseritur carpo inferiori. Sed inferior multo debilior singulis vannis distribuit ligamentum forte, quo pinnae istae regi proprie videntur. Supra hunc musculum in eodem humeri condylo infra et iuxta initium radialis interni alius minor musculus decurrit et vno tendine item carpo inferiori inseritur. In externa vannorum



rum facie video pinnam quamque infra radicem interiore latere nodulo osseo cubiti in aquila mea admodum paruo firmiter adfixam; deinde longum tendinosum ligamentum omnes vannorum vaginas in interno latere iuxta cubitum et in externo siue in fine inuicem coniungit.

Corales adhaerent in aquila mea musculo, quem in latere exteriori omoplatæ paulum infra articulationem claviculae ortum et capiti cubiti exterius adfixum cum anconaeo magno comparauit Cl. MERREM, alterique ex parte, qui ab altera dorsi spina ortus ad interius ossis humeri latus adfigitur, posticus humeri adductor Cl. MERREM; his igitur duobus musculis appositae haerent corales pennae. Quas qui extendit et versus pectus retrahit, ut ala reliqua expansa spatium inter vannos corpusque vacuum tegant, a quarta et quinta costa eo in loco, ubi epiphysis incipit ascendere costarum, ortus, cuti iunctus, pennis primis coralibus parte carnosâ adhaeret, reliquas vero corales earumque tegetes, uti etiam anterioris humeri plumas fortiores, tendinosa parte amplectitur. Hunc in scriptis duumuiorum saepe laudatorum frustra quaesiui. Alae nothae pinnae fere omnes musculo bicipiti inferius adhaerent cuti infixae et cellulosae musculi ipsius telae. Hae vero corales adiuuant et spatium vacuum inter vannos et pectus in anteriore facie claudunt. Nunc ad aquilae descriptionem transeo.

Aquila albicilla initio Martii huius anni fuit in equino cadauere occisa. Capitis plumae angustae acuminatae seu apice triangulares, versus dorsum inferiore parte latiores, reliquae apice rotundiores. Alae caudam extremam attingunt. Cultelli priores sex in margine interiore decissae; secunda et reliquae cum septima etiam in exteriori latere strictiore decissae sunt. Costa cultellorum, quousque eminet tectricibus, fere tota plana, ut in ciconiae nigrae cultellis antea videram. Empiniones pinnae 4, costam planam etiam superne habent, laterisque externi fibras deorsum curuatas adeoque fere canas. Cultelli 10, quorum quartus rudimento digiti minimi per longitudinem applicatur anterieus. Pennae tegetes superiores in latere exteriori adhaerent cultellis, vaginis eiusdem fere longitudinis inclusae, fortissimarum cannularum; inferiores plus quam duplo minores et tenuiores in interno latere adstant, breuibus vaginulis inclusae, quae in media sui parte frenulo membranaceo cum vaginis cultellorum copulatae sunt. Canna cultellorum vtrinque verticaliter compressa; tegetum vero superiorum canna magis horizontaliter depressa quam rotunda. Vanni 19, verticaliter et ipsi vtrinque compressi, quibus tegetes cruciatim fere impositae haerent, ita ut radix cannulae ad latus dextrum seu interius vanni apposita et ossi cubiti connexa sit, vaginae vero pars extrema vaginae vanni mediae seu summae cohaereat, adeo ut ala expansa tegetes vannis cruciatim fere incumbant. Tegetes inferiores debiles super vannis ipsis positae paulo infra vaginae vannorum marginem erumpunt.

Cora-



Corales adsunt 5, sed prima paulo debilior nullam supra tegetem fortio- rem adstantem habet, vt reliquae sequentes, quarum cannae satis crassae tegetes supra adstantes habent, multo breuiore vagina inclusas. Sunt hae ita musculo cutique adpositae, vt et lateraliter et super ipsas corales positae videri possint, prouti ala aut extenditur aut contrahitur. Sub inferiore humeri facie musculo infixae haerent sex pennae satis longae et variegatae, multo tamen breuiore et minore cannula, nec tam latae, quam corales infra eas satis magno spatio intercedente positae. Etiam hae suas superne tegetes adstantes habent. Has alam notham MOEHRINGIUS appellauit. Pennae omnes alae caudaeque ad apicem vsque cauae; vasis tamen lymphatici exsiccati vestigia vbique deprehendere licet. Cavitatem hanc annotauit etiam egregius CAMPERVS. Interstitia pennarum, plumarum et, quibus continentur, vaginarum dumis densissimis tecta sunt. Plumae omnes duplices, etiam quae alas tegunt; in collo tamen lanulae inferius additae longiores; versus anum et in abdomine lanulis fiunt maxima ex parte similes; cannulam habent aliquanto crassiore pro ratione costulae, quam pennae ipsae. Dumae densissimae veluti vellus molle corpus omne tegunt, vt et alae superiorem et inferiorem omnem faciem. In palumbe torquata plumarum costula basin habet tenuem et acutam, supra basin vero costula fere ad mediam longitudinem multo latior facta, subito in filum tenue definit.

Refert BELONIUS, aquilis, cum aucupio adhibentur, ne nimis alte in aërem euolent, dumas plurimas euelli, vt frigore superioris aëris facilius percepto inferiorem regionem aetheris teneant. Patet hinc vsus dumarum. Plumae pectoris ventrisque vsque ad rectrices omnes obscuriores, quam in dorso. Rectrices caudae rotundae, omnes 11 totae albae, sed plumae 4 longissimae, quae superne adstant, apice nigrescunt. Coopercula dextra sinistram contegebat. Reliquae, vt ab Imperatore sunt descriptae. In latere sinistro quatuor, in dextro quinque iuxta cooper- culas aderant. Tibiae cum metatarso ultra medium in antica et externa parte plumis dense inuicem incumbentibus tectae; latus interius et posticum potius dumis densis tectum erat; nec apparebant longiores ex crure dependentes in latere externo plumae. Metatarsus, vti iam dixi, ultra medium plumis densis tectus, reliqua pars, vt et digitorum superior pars, squamis trapezioides fere tecta; in lateribus vero et iunctura metatarsi cum digitis squamas rotundas minutas video. Inferior facies digitorum callo muricato aspera est; vnguis posticus omnium crassissimus et fortissimus, aliquanto etiam longior; medii vnguis margo interior in tenuem aciem sinuatur. Interior digitus forti vngue armatus in dimidium circulum et ultra coit cum postico, praedamque maxime tenet.

Rostrum flauescens cum cera, sine denticulo, sed ante vncum sinuatum extrorsum. Narium rima angusta oblique descendit, vt in vulture grypho, vbi



eundem in cera rostro addita situm habet, in reliquis rotunda. Caruncula narium non eminet. Pars caua inter nares et oculos alba cute tecta, depressa, pilisque in circulum diuaticatis obsita. Iris flaua, pupilla atrocoerulea. Puncta lacrimalia duo adsunt; orbiculus cartilagineus palpebrae inferioris retractae intus clarissime conspicitur, vti a PETITO in gallopauone aliisque auibus describitur et pingitur. Corneam cingebat circulus squamarum ossearum satis latus. Palpebra superior fere tota nuda, super os superciliare retracta; inferior lanulis hinc inde obsita; vtraque in margine pilis ciliata nigris.

Feminam arguebat ouarium granis luteis turgidum. Inter ouarium, renes et vasa emulgentia corpus longiusculum luteum conspicitur. Oviductus manifestus; sed saccus Fabricianus sub cloaca nullus. Oesophagi breuitatem, ante ventriculum constrictam, ita vt gularis saccus efficiatur, et in inferiore parte glandulis obsitam densioremque, ventriculi denique situm altissimum, et pancreas peruium transeunti ductui hepatico annotauit iam olim PERRALTVS in aquilis suis. Renes clauati, claua superiore duplo maiore; vtraque freto angusto, sed longo, iuncta. Inferior perforata transmittit arteriam. Vesica biliaria magna; bilis fere tota in grumos coacta et durata. Perunctum pro ratione corporis paruum, duplex, penicillo vno in fine ductus excretorii communis plumata. Costa spuria vnica, et quidem anterior aderat, absque epiphyssi obliqua. Furcula superne latissima, admodum diuaticata dimidium circulum efficit et cauitatem thoracis gularem amplissimam; vti iam annotatum est a Cl. VICQ D'AZYR; coniungitur vero non cum carina sterni, sed cum ipso sterni in suprema parte.

In strige alucone LINNAEI empiniones reperio 4, cultellos 10, vannos 16; sed corales plures quam 4 adsunt, aequalis omnes magnitudinis, etsi longitudine paulum diuersae. Ala notha nulla. Lanulis corpus alaeque obsitae, sed non adeo densis, vt in aquila, vt et plumae ipsae non adeo firmiter cuti inhaerent. Cultelli primi 3 in margine interiore decisi; omnes vero 10 conuexi et deorsum curuati, vt cauitas inferior alarum expansarum multo maior fiat. Peninae omnes multo molliores et, ex tactu si iudices, lanulis propiores, nec costulae fibris vtrunque adeo densis, vt in reliquis auibus. Plumae omnes simplices, sed maxima earum pars inferior lanulata. Plumae capitis, in aliis auibus breuiores, cuti incumbentes et retro flexae, hic longae et fere erectae, mollissimae et latae, praeter angustas et extremitate retro curuatas, quae aures cingunt, et quae setis propiores partem anteriorem capitis tegunt. Peruncti glandulae duae paruae cono longo, nudo, absque penicillo, eminent. Caudae pinnae 12, deorsum curuatae et in superiore facie conuexae. Marem arguebant testiculi satis magni. Caeca intestina duos cum dimidio pollices longa erant.



In passerum genere Linnaeano numerum forinsecarum seu cultellorum vannorumque minorem reperi. In emberiza citrinella, fringilla montifringilla, sturno vulgari, turdo Iliaco SCOPOLI cultellos 9, vannos item 9. In alauda cristata, passere vulgari, emberiza niuali, cardueli numeravi cultellos 9, vannos 11; sed corales ad plumarum naturam magis referendae sunt, nec ala notha in his adest; praeterea genera haec omnia perunctum cono longiusculo nudo absque penicillo eminens gerunt. In pico martio reperi cultellos 10, vannos 12, corales nullos, qui pennis annumerari possint. Numerus igitur forinsecarum in plerisque auium minorum generibus, vti videtur, vno minor, quam in maioribus et rapacibus; vannorum autem numerus maxime variatur, vti etiam ipse cubitus cum radio maximam longitudinis differentiam in alis auium habere solet.

Adiiciam nunc, quae in graeco DEMETRII Hieracosophio tradita reperi de notis boni falconis, quaeque ex dictis aliquo modo illustrari posse videntur. Ibi igitur p. 11. accipiter pulcher tredecim caudae pennas habere dicitur et in paruis digitis *χωμάτα*, i. e. incisuras seu squamas se decussantes in modum litterae graecae X. Ita enim legendum est cum Codice, ex quo C. GESNERVS haec eadem laudauit de Auibus p. 6., non *χρώματα*, vt est a RIGALTIO editum nullo sensu. Additur, eos maxime venatu esse nocentes (*βαρυθήρης*), quod, dubium est, ad accipitres, an potius ad digitos, vti puto, posticos referendum sit. Aliud Caput ibidem caudae vndecim aut tredecim pennas, in vnguibus velut incisuras (*χαράγματα*) siue squamas decussatas incisuris, vti sunt cyprini squamae, assignat. Quod sequitur: *καὶ ἔσωθεν ὡς ὁ ἄρσεν τῶν περδίκων ἔχη ἥλος ὀπισθεν κόρνον*: GESNERVS vertit: et intrinsecus clauos habeat post id, quod cornu vocatur; sed totum hoc comma non intelligo, nisi de callo digitorum explicari debet. Deinceps sequitur, pulchrum etiam esse accipitrem, qui longam caudam habeat. Sed rectius hic Codex GESNERI: *εἰὰν καὶ ἦγαν μακρὰν ἐκ ἐπιπολὺ λαγγίαν*. Vbi legendum est: *εἰὰν καὶ μακρὰν ἐκ ἐπιπολὺ ἦγαν λαγγίαν*, i. e. si non adeo longam caudam habeat. Tertium caput in vngue postico (digito puto) incisuram seu lineam fere vsque ad radicem vnguis commendat; postea sub ala versus latera siue humerum pennas acutas (*ὀξύ πτερόν*); alam notham credo intelligi; deinde approbatur, si pennas *βασιλισκάρια* dictas (vannos puto) habeat longas et aequales remigibus primis, quas *πρωτελάτας* appellat, vt reliquas simpliciter *ἐλάτας* aut *ἐλατῆρας*, i. e. remiges; denique si mediae caudae pennae reliquas cooperiant: *εἰὰν ἔχη σκέπον (τὸ addo) λοχοφόρον ἦγαν πτερόν τῆς ἑρᾶς αὐτῆς τὸ μέσον*. Vbi Codex GESNERI peiorem scripturam praeferebat. Est praeterea alius locus scriptoris graeci, quem cum DEMETRIO edidit RIGALTIVS, de pennis falconum mutandis. Saturato iam, inquit, perdicibus dabis fuillam, donec abunde corpulentus fiat, et pennas alarum, quas *καλυπτῆρας* vocant, sponte elicere incipiat. Tum deinceps reliquas quoque pennas detrahito, exceptis *ἐλάταις* (i. e. remigibus)



bus) et paucis, quae iuxta elatas sunt, calypteribus. Vbi difficile est in breui et barbara dictione iudicare, de quo genere pennarum scriptor loqui voluerit.

In ARISTOTELIS, quae exstant, scriptis pauca de pennis rapacium reperio aut nihil. Generatim ille de Generat. V. 3. auibus cum aetate incrementum pennas nasci duriores tradit, ut squamas squamatis. Verum apud VINCENTIUM Speculi natur. XVI. c. 6. quasi ex ARISTOTELE refertur, auibus rapacibus maxime fluere pennas et redire ad vigorem. Nec in libris hodie editis reperi, quod ibidem cap. 8. traditur, vulturem ea, quae venatur aut cum quibus pugnat, stupefacere alis percutiendo. Sed vereor, ut more seculi et interpretum ARISTOTELIS antiquorum vultures pro aquilarum genere appellauerit.

IBID. CAP. 51.

*Cannoli.* Legendum est *canali*, aut, quod malim, *cannulam*. Ita enim paulo post pag. 54.: *exsunt cannulae radicales*.

PAG. 54.

*Interior medietas forinfecae.* Intelligit marginem seu fibras in margine interiori costulae positas et connexas.

*Ad minus.* Si scriptura sana est, significare debet *ex parte*.

*Durius, densius et breuius.* Verum etiam hoc de vniuerso auium genere. Sed in strigum genere marginis extimi fibrae laxiores, molliores et incisae sunt ferratim, quo fit, ut volantes vix audiantur propinquae nec ullum alarum percussione facta sonitum excitent, ut faciunt reliquae aues. Hanc in strige alucone primum observauit structuram LINNAEVS, sed omni generi communem notam hanc recte tribuit Cl. HERMANN in V. C. IOH. BECMANNI Bibliotheca physico-oeconomica VI. p. 57. et Cl. FORSTER in *Beyträgen zur Länder- und Völkerkunde*, T. I. p. 96. Eandem alii notam in pennis caprimulgi europaei annotarunt, qui praeterea unguis medii marginem pectinatim incisum cum strige flammea LINNAEI communem habet, auctore HERMANNO l. c. Sed etiam reliqua pars pennarum in strigibus longe mollior est, quam in reliquis auibus.

PAG. 55.

*Iuuant sustentare.* Sequentia docent, legendum *sustentari*.

*Cannas et cannulas.* Verba priora *cannas* et superflua et delenda esse, docet ipse sensus et rei natura, quam nunc accuratius duce Imperatore explicabo.



Saxellus per longitudinem adhaeret secundo articulo digiti indicis, qui tribus articulis distinguitur in cycno saltem, cuius sceleton coram habebam, dum haec scribebam. In hoc scilicet ossa omnia alae cum maiora tum distinctiora apparent, quam in minorum auium alis. Tertius articulus parum maior, sed in extrema parte latior, quam alter pollicis articulus, quem aequae ac tertium indicis digiti a Cl. MERREM in sceleto falconis omissum video. Sequentes 3 pennae forinsecarum maiores adhaerent primo articulo indicis digiti, cuius basi subiacet rudimentum digiti medii aut minimi, cum capite minoris ossis metacarpi articulatum, quod contra Cl. VICQ D'AZYR male ad ipsum primum articulum indicis digiti trahi volebat. Sex reliquae pennae forinsecae adhaerent metacarpo duplicis ossis formam gerenti, cuius basi insidet pollex. Omnes hae decem pennae praeter primam cultelli ex gallico *couteaux* appellantur; prima vero *saxellus* a saxa, cultri genere, ab antiquo vocabulo nostro *Sachs*, quod cultrum significat. Cf. FRISCHII Dictionarium et CANGII sub voce *Saxa*. Contra HVBERO aliisque artis scriptoribus prima *Cerceau*, reliquae 9 *pennés* appellantur. *Corales* sunt intimae humero appensae; *corallum* enim veteribus Gallis dicebatur pars interior rei cuiuscunque. CANGIUS in h. v. Vanni 12 adhaerent maiori de focilibus, id est cubito; in cuius media superficie eminentes nodos osseos 10 fere reperi in ardea stellari maiore, quibus medio ligamento firmo adhaerebant latera baseos vannorum. Per ipsam vero basin intrant vasa sanguinea. Idem postea in ciconia nigra reperi. Omnes denique 26 pennas alae contineri ait Imperator seriatim in cute cooperiente alam extenta illuc, vnde exeunt cannulae radicales pennarum, et has cannulas peruenire usque ad os intus in corio, perforantes praeter saxellum, qui ipsi ossi adhaeret. Membranam scilicet duplicem cum duplici musculo docet Cl. VICQ D'AZYR alae hanc partem mouere, pennas veluti vagina singulas induere, tendere et mouere. Contra Cl. MERREM vnum tantum musculum interius carnosum, exterius vero tendinosum esse asseuerat in falcone, ex quo non solum vaginae vannorum, sed ligamenta etiam illa nascuntur, quibus latera baseos vannorum nodulis osseis cubiti alligantur. Vaginae hae membraneae, *vela* Cl. WALLBAVM dictae, ex vasis sanguineis, quae basin pennarum intrant, suos etiam recipiunt ramos et cum cartilagineo vasorum sanguineorum et lymphaticorum claustro (*le tuyau de la plume*, *Bosen*, *Kengel*, ex latino cannula aut canalis) satis firmiter cohaerent. Nunc ad illas minores pennas, quae supra infraque maiores illas 26, saltem canales illarum cartilagineos obtegunt. Harum igitur eae quidem, quae 10 forinsecis superne appositae sunt, inter duas quaeque in latere collocantur, atque usque ad os penetrant basi sua, fere propius, quam ipsae forinsecae. Illae vero, quae infra appositae conspiciuntur, lateraliter canalibus maiorum s. forinsecarum adhaerent, nec tam prope ad os protenduntur, quam canales forinsecarum; ceterum omnes paruae, debiles et magis exiles, quam illae, quae superne adstant forinsecis. Contra quae supra basibus seu canalibus



vannorum et coraliū adstant, non inter latera vannorum coraliūque collocatae sunt, sed suae quaeque maiori recta insidet, atque ad os pertingit cum illis; quae vero infra adstant, insident quidem et illae suae quaeque maiori, nec tamen cum illis ad os vsque cubiti pertingunt, sed protenduntur vsque ad lacertum seu musculum subteriore, ceterum debiles atque exiles, vt illae, quae 10 primis infra assident. In ardea stellari pennulas, quae vannis supra insident, suis quasque minoribus vaginulis inclusas vidi, sed cum nodis osseis colligatae non erant. Sequuntur igitur motum maiorum seu vannorum. Sed omnem hanc disputationem ab hoc loco remouendam et ad tractationem de pennarum ortu, incremento, nutritione, indole et varietate reiiciendam puto, vbi docebo, canalem cartilagineum pennarum primum quidem formari, inclusamque costulam cum barba veluti mucum nigrum aut fuscum gerere; quae postquam magis magisque explicatae percoctaeque fuerunt, sursum sensim propelluntur, donec barba tota firmata et explicata cartilaginea vagina cum inferiore costae parte coalescit, canalemque efficit, quo pennae in musculo firmantur, quique ad scribendi vsum adhibentur. Contra vaginam hanc demum per squamas decidere, male posuit POVPART Histoire de l'Acad. de Paris, 1699. p. 43., cuius opinionem nimis fideliter repetitam posuit MARTINI in germanica Buffonianae auium historiae versione, T. I. p. 73. — Postquam haec scripseram, inspexi alam meleagridis, ibique vidi, plumas super cultellos adstantes in latere eorum externo in vagina paululum breuiore adhaerere; quae vero inferne adstant ad latus internum additae, melius spatia vacua tegunt superioribus oppositae. Quae deinde vannis superne adstant, ipsis vannis impositae sunt, earumque vaginae ad mediam vaginam vannorum et corii intertexti pertingunt; sed praeterea adest series minorum plumarum in latere externo vannorum appositarum, quarum vaginae ad tertiam partem vaginarum priorum et quintam vaginarum, quibus ipsi vanni inclusi haerent, pertingunt. Radix vero ipsarum paulum supra maiorum vaginas plumarum eminet. Infernae vero plumae minutae debilesque vannorum vaginis in latere interno additae sunt. In Pico Martio eandem fere structuram, sed non adeo clare, conspicio; vt enim vannorum cultellorumque cannulae multo breuiiores, ita etiam corium seu velum, quod vaginis induit pennas cum plumis, multo angustius est breuiioresque efficit pennarum plumarumque vaginas. Plurimum auium alas inspicere per hoc hiemale tempus et in hac operarum typotheticarum festinatione ad nundinas nec vacat nec lubet. Alio enim tempore omnem pennarum tractationem copiosius explicabo.

*Sunt praeterea 4 pennae — empiniones.* Nomen habent ex Gallico *empenne*. Numerum pennarum in falconibus quaternarium, in reliquis plurimis auibus ternarium posuit Cl. MERREM in Introductione ad Specimen Classium naturalium Auium, p. 24. Varietas haec numeri pertinet ad ipsas auium historias peculia-



culiares. Vsum empinionum, quas alam notham, alulam alii hodie dicunt, Imperatori per multa sine dubio experimenta cognitum alibi memorari non memini. Nimis enim breuiter mentione huius partis defungitur diligentissimus alias ZORN Petinotheol. I. p. 160. Omisit plane, quod fere ab omnibus factum video, vt et alam notham MOEHRINGII dictam, sub ala seu in humeri inferiore parte collocatam in plurimis aquaticis, HANOVIVS, qui copiose et laboriose tractauit structuram alae pennarum ipsumque volatum, quem igitur collatum vbique volo a lectore, in Memorabilibus naturae explicatis germanico sermone, Dantisci, 1737. pag. 151 — 208.

## PAG. 56.

*Coopertoriae — cooperculae.* Voces hae videntur hic a librario male collocatae fuisse, vt nescias, de quibus pennis loquatur auctor. Ex cap. 24., vbi pennae maiores sunt relectae sub duabus, quae dicuntur coopertoria, et cap. 48., vbi est: pennas caudae tenet relectas sub duabus mediis superioribus, quae duae vocantur coopercula: colligere licet, duas superiores rectrices, plerumque longiores, dici coopertorias, reliquas 10 suppositas in queta aue coopercula.

*Bracalae.* Vocabulum hoc egregie mihi excogitatum videtur. Hodie superiores pennas, quae rectrices tegunt, vropygii, inferiores seu bracas crissi pennas dicunt; minus recte. Varietatem, quae in his satis magna est, enarrauit Cl. MERREM, Introductio ad Classes naturales p. 32. *Bracalas*, germanico sermone *Hosen*, appellauit Cl. WALLBAVM in auibus pennas, quae tibias tegunt, et longae saepe supra metatarsum in latere dependent eminentes. Has latine tibialia seu tibiales recte dixeris. De musculis caudae, quibus cooperculae et coopertae insertae haerent et reguntur, vide Cl. MERREM *Vermischte Abhandlungen aus der Thiergesch.* p. 161. — DEMETRIVS in Hieracosophio cap. 15., accipitres, inquit, caudam primo anno magnam habent, secundo minorem, reliquis deinde semper aequalem, ita vt neque crescat, neque decrescat.

\* Musculorum caudam mouentium quatuor paria numerat Cl. VICQ D'AZYR (Mémoires de l' Acad. de Paris, 1774. p. 496.), contra vero Cl. MERREM in Anatomia aquilae p. 162. paria sex distinguit. Quem virorum doctorum dissensum cum mirarer, ipse manum adhibui disseccandis aquilae albicillae, strigis aluconis et piei martii cadaueribus, vt causam indagarem, quam ab initio statim suspicabar in eo esse quaerendam, quod doctissimus Gallus diuersum auium genus inspexerat, cum musculorum historiam explicaret. Ordiam igitur a musculis inferioribus caudae, vbi primum par Gallus cruro-coccygeum nominat, longum, tenue, in femore iuxta bicipitem ortum, deinde sursum ad caudam progressum, quam



quam deprimit. Ex hac musculorum insertione depressionem caudae illam derivat, quam videmus in aubus quibusdam, cum solito celerius currere coguntur. Cl. MERREM idem par in superiore ossis ischiaci margine et in parte ossium pubis ortum ad pinnas caudae deducit eoque pinnas deprimit simul atque expandit. Alterum par seu quartum suum Gallus depressores caudae nominat, eosque latos et breves per longitudinem marginis inferioris ossis innominati decurrere ait caudamque magis directe, quam musculos priores, deprimere. Contra Cl. MERREM depressores caudae seu sextum suum par in facie inferiore ossium coccygis ortum ad ultimae caudalis vertebrae inferiorem faciem deducit, eoque caudam deprimit. In pico martio tria musculorum paria distinguo. Primum in facie posteriore femoris ortum, angustum extremitatem tendineam albam in latus orbiculi ultimae caudalis vertebrae inserit. Alterum par postico ossium pubis margini adhaeret alteraque extremitate lateri orbiculi ossei supra tendinem prioris pennisque extimis caudae inseritur. Tertium par in extremo osse sacro et margine ossis ischiaci ortum multis fibris singulis caudae vertebrae atque orbiculi ossei margini antico infigitur, omnium crassissimum et latum. Praeterea pinna quaeque caudae tendine forti margini orbiculi ossei alligatur, prima vero seu extrema longissimo omnium utrinque alligata apparet. In strige alucone tria item paria distinguo, quorum primum in femore ortum ultimae caudae vertebrae inseritur; tertium eandem originem habet et finem, ut in pico, latissimum omnium; alterum in margine postico ischiaci et pubis ossis ortum extremitate bifurca extimis mediisque pennis cum postrema caudae vertebra inseritur. In aquila musculus a femore ortum et ad caudam protensum nominat inter femorales etiam NICOLAVS STENONIS; sed eum in aquila sua omisit aut non reperit Cl. MERREM. Secundum par videtur in duo posse dividi, quorum prius in extremo et posteriore ossis pubis margine ortum extimis pennis, alterum vero in margine ischiaci ossis ortum mediis pennis iungitur. Tertium par, ut in strige et pico, latissimum et crassissimum est. Ex his igitur conficitur, ut apertissime videamus, doctissimum Gallum medium et lateralem, quod fere in eadem linea seu margine ossis innominati oriuntur, in unum par coniunxisse; Cl. MERREM contra unum par in femore ortum plane omisisse. Superiorum caudae musculorum primum par eleuatorum nomine Gallus appellat; a fossis mediis et posterioribus ossis innominati media linea alba separatos ad coccygis ossa pinnae caudae deducit. Hos vero in quatuor dispescit Cl. MERREM et duos priores a media cavitate seu fossa laminae osseae, qua sacrum os tegitur, (quam innominati ossis nomine comprehendit Gallus), ad ultimam caudae vertebrae deducit, eoque caudam eleuat; contra vero duos posteriores seu tertium suum par a margine postico eiusdem laminae osseae ad pinnas caudae extimas deducit, eoque pinnas expandit simul et eleuat. Denique superiorum alterum par suum Gallus laterales motores coccygis nominat, in latere priorum collocat et ossibus caudae lateraliter inserit, ita ut cauda aut in latus retrahatur, aut, utroque musculo



sculo contracto, tendatur. Contra Cl. MERREM secundum par suum a radicibus processuum spinosorum ossium coccygis ad ultimam caudae vertebrae deducit eoque caudam eleuat. Quartum vero ab ipsis coccygis ossibus et ultima caudae vertebra superne ad extimas pinnas deducit eoque ipsas pinnas expandit. In pico martio duo modo paria distinguere mihi licuit, quorum prius supra in media lamina ossea, qua sacrum os tegitur, ortum singulis caudae vertebrae tendinem praebet et simul mediarum caudae pinnarum duarum radicibus tendine albo alligatur. Alterum par in latere prioris ortum margini postico laminae osseae, singularum caudae vertebrarum processibus lateralibus et denique pinnis extimis adhaeret. In strige alucone duos item musculos magnos reperi: primum rectum in medio laminae osseae ortum omnes utrinque caudae vertebrae mediasque pinnas amplectitur; alterum par in margine postico superiore ischiaci ossis ortum bifurcatur, alteraque extremitate extimas pennas desuper et in latere includit, altera vero inferiorem faciem extimarum pinnarum attingit atque includit. Praeterea singulae vertebrae, ut in pico, inuicem minutis musculis colligantur, et pinnae omnes infra supraque tendinibus alligantur ad os terminale caudae. In aquila omni adhibita opera plura duobus paribus reperire non potui. Primum seu medium processus spinosos pinnasque medias inprimis, alterum vero seu laterale multo debilius latera processuum transuersorum et pinnas extimas amplectitur, in latere fere totum confluens cum musculo inferiore laterali, qui ibidem, sed paululum interius, in margine ossis ischiaci oritur. Cl. MERREM magnum caudae eleuatorem in lamina ossea ortum in osse caudae terminali contra eleuatorem minorem a radicibus processuum spinosorum ortum firmari ait; ita duo etiam paria expansorum, vnum in margine laminae osseae ortum, alterum ab ossibus coccygis et terminali osse ortum, ad pinnas extimas perducit. Nullus igitur dissensus inter eum et Gallum intercedit, nisi quod Cl. MERREM fibras, quae a medio et extimo pari ad processus spinosos et transuersos pertinent, separauit et numerum auxit, quod equidem facere non magis ausim, quam doctissimus Gallus. Ceterum in picorum genere caudales musculos non numero sed insertionem paululum differre a reliquarum auium structura, non mirabitur, qui picos in scandendis arboribus caudae maxime inniti meminerit. Huic vero mori auis egregie opitulatur ossium coccygis, inprimis postremi, forma et orbiculus postremo inferne additus. Similem in ossibus caudae auium earum, quae pennas erigunt aut expandunt, prouti aut gloriantur amore aut ferociunt ira percitae, suspicari licet structuram. De pauone cristato hanc breuem et nimis obscuram reperi annotationem in libello B. G. SCHREGERI Lipsiae 1787. edito de pelui animalium brutorum cum humana comparata p. 17.: coccyx admodum robustus, superius prope os terminale tabula laeuigata tectus, cui cauda expansa incumbit. Denique in gallina singularem ossium coccygis structuram reperi; omnes enim sex vertebrae, quibus cauda componitur, processus gerunt bicornes,



ita vt cornua antrorsum versa lunae dimidiatae speciem prae se ferant. Eandem in meleagride vulgari structuram processuum reperiō spinosorum septem; in vrogallo sex caudae vertebrae lunulam in apice spinosorum processuum additam pro ratione corporis minorem habent. In ardea cinerea priores quatuor caudae vertebrae orbiculum magis quam lunulam superne additam habent. In falcone coeruleo et buteone priores quatuor vertebrae caudae in latere spinosorum processuum vtrinque infra apicem cornua antrorsum versa habent, quae in falcone buteone omnium maxima apparent. Ex vrogallo primam et secundam caudae vertebrae separatim pinxi, postquam in pictura sceleti a latere visi structuram hanc agnoscere non posse animaduerti. Ceterum cum vrogallo sterni fureulaeque forma et numero costarum conuenit plane meleagris, cuius reliquum sceleton cum vrogallo comparare non potui propter aetatem auis iunioris, quae ossa omnia nondum perfecerat atque indurauerat. — Perunctum incumbit pinnarum tubulis cartilagineis et, quibus includuntur, vaginis membranaceis, ductu vero inter cooperacula, i. e. pinnae duas medias, ossi terminali in recta linea applicatas, eminet. In strige alucone glandulae duae paruae cono longo et nudo eminent; caudae vero pinnae omnes conuexae deorsum curuantur. Ductus nudus etiam absque penicillo, sed cono eminet in plurimis passerum generibus, emberiza citrinella, alauda cristata, passere vulgari, cardueli, emberiza niuali, fringilla montana atque aliis. In pico martio mediae caudae pinnae fortissimae omnium et ad extremum fere cauae, remiges contra solidiores sunt. Extima vtrinque pinna dimidiam mediae longitudinem et latitudinem habet, vt in ala prima forinsecarum dimidiam longissimae habet longitudinem. Ad peruncti aliquem morbum pertinere puto, quod legitur in DEMETRII Hieracosophio p. 132. Cum accipiter, inquit, pinnae rodit et pediculos exquirere videtur, expansas inspicere cannulas pennarum caudae (τὰς καυλίσκας τῆς ἑρᾶς καὶ τὰ πτίλα) et plumarum, et reperiēs minuta quaedam et nigra grana in radicibus pinnarum haerentia, quae acu compuncta vino vetere asperge, et contritis granatorum maiorum corticibus.

## PAG. 58.

*Modi ayronum, albani, huani.* Iterum Noster infra p. 60.: omnes modi ayronum et sibi similia, albani, huani et plures aliae. Vbi si verba *sibi similia* (i. e. ayronibus) ad albanos et huanos refertur, tenemus saltim genus auium. Alibi nomina haec non reperi, nisi quod CANGIVS ex IOANNE SARISBERIENSE Polierat. I. c. 13. *albanellus* laudat de aue quadam positum, quam ex ipso loco agnoscere non licet. Reperiō etiam auem aliquam rapacem Italica *albanella* dictam, sed mihi plane ignotam. *Huanus* a supra nominato *Vhan* plane diuersa auis videtur esse. Aues vero, quae raro inter volandum mouent alas, peculiari vocabulo



bulo Gallici falconarii *planer* dicunt. Nostri a simili verbo auem aliquam rapacem *Schweymer* appellarunt, de qua infra.

## PAG. 59.

*Patet itaque ex praedictis.* His verbis Imperator redit ad ordinem supra coeptum et parenthesi filii regis interruptum.

## PAG. 60.

*Modi picarum, Iayus, vpupa.* Ex Gallico *Gay, Geay, Iai, Iay*, quod ex latino *Gagio, Gaio* pro filua deriuat CANGIVS, qui ex Glossis *Gaia* et *Gaius* pro pica et pico affert. Quae igitur species picarum praeter vulgarem et glandariam dicantur et intelligantur ab Imperatore, difficile est dicere. Picam glandariam bene describit ALBERTVS p. 237. sub nomine garruli, cui iungit germanicum *Heher* alterumque *marcolfus*. Posterius nomen ex COELERO affert etiam FRISCHIVS noster, aliunde CONR. GESNER de Auibus p. 673. et VALENTINI in Amphitheatr. zootomic. II. p. 77. Sed eandem auem in ARISTOTELE, qui *κίσσαν* appellat, Hist. Anim. IX. 13., ALBERTVS in versione *Kyche* interpretatur; idem tamen alibi libro XXIII. p. 237. b. *Kytes* habet, VINCENTIVS vero XVI. 5 et 100. *Kyke* et *Kikes*. — Obiter annotabo, eundem ALBERTVM caprimulgum appellare Muscicapam libro XXIII. p. 238. a. cum auctore Gallico de natura rerum libri apud VINCENTIVM XVI. 109., quam pessime meropem interpretabatur GESNER de Auibus p. 575. — De vpupae pullorum in parentes pietate pleni sunt veterum libri. Cuius fabulae originem cum indagarem, causam in eo mihi reperisse videor, quod vpupae statim postea, quam pullos excluferunt, in eodem nido plumas mutare dicuntur. Quod quidem defluuium pennarum si subitum est, ut puto, si omnino veteres recte rem tradiderunt, quoniam non multum temporis nobiscum morantur, et in Italia quoque trimestres esse narrat PLINIVS, potuit corporis nuditas hominibus persuadere, parentes interim a pulis nutriri.

*Columborum de Syria.* Vertiginosam an percussorem intelligat, dubius haereo. Ipse enim multas peregrinas species nondum vidi. De columbis generatim ALBERTVS V. p. 65. b.: quatuor quidem modi sunt noti apud nos. Vnus enim modus vocatur graece *belez* (*πελειά*), qui sunt columbis domesticis griseis similes et sunt etiam eis minores: et vocantur apud nos columbae cauernarum et insident arboribus et volant cum grege nec domesticantur ad habitandum cum hominibus — nec nidificant in lapidibus et muris, sed potius in cauernis arborum aut in arboribus, et habet pedes asperos valde rubeos — Aliud autem genus est palumbes, quae maior est columba communi et magis ad albedinem declinans, cum tamen sit coloris grisei. Et genus minimum columbarum est ge-



nus turturis. Haec enim omnia columbis assimilantur, sicut delon siue *palumbi* et *fehita*, hoc est turtur, et *targula*. Et hoc genus apud nos non est notum. Quidam tamen dicunt, quod *targula* est sturnus — maior omnibus est delon, deinde *fehita*, et minor est *targula* inter ea, quae ultimo enumerauimus. — De coruo corace LINNAEI tradit OTHO FABRICIUS in Fauna Groenl. p. 63., volitantem non raro in gyrum se vertere et sub gyrando mire, quod prehenderat, a rostro in ungues et vice versa transferre.

## PAG. 61.

*Aues de paradiso.* ALBERTVS M. p. 228. a.: aues paradisi vocant Aegyptii quasdam aues magnitudinis anserum, quae paradisi dicuntur ob decorem, quod nullus eis decor videtur deesse. Et hae aues illaqueatae gemere non cessant, donec moriantur vel donatae fuerint libertate. Liberae autem adeo dulciter modulantur, quod in omni audiente delectationem inducunt. Harum habitatio est super nilum, qui de paradiso fluere perhibetur. Sunt ibidem et aliae aues fuscae (fusci coloris et subrutili, minores quam monedulae, habet Gallicus auctor libri de natura rerum apud VINCENTIUM XVI. cap. 39.) magnitudinis monedularum, quae paradisi ideo vocantur, quod nescitur, ubi nascantur et vnde nascantur vel vnde veniant. Et illae mutant loca de tempore in tempus. Hirundinem ripariam corpore minorem, quam auem paradisi, tradit Arabs DAMIR ap. BOCHARTVM Hieroz. II. p. 61. Passerem paradisi Idem interpretatur hirundinem, ibid. p. 147.

*Adiutorio venti.* Legendum cum *adiutorio venti*, sequentia docent.

## PAG. 62.

*Esto — esto.* Sensus docet, esse pro propterea quod. An scriptura sana sit, dubito.

*Exaureandum.* Ex gallico *s'airier* conuersum esse, monet CANGIUS.

*Aut circumuolando, ut ayrones.* Legendum puto plenius: *aut in gyrum circumuolando*, vt infra pag. 65.

## PAG. 64.

*Ossibus alarum.* Ossa alarum intelligit illa, quibus pollex insidet, et ipse armatus saepe ungue duro et acuto. Magis vero hoc intelligitur in generibus peregrinis aquaticarum auium, Tanagrarum, Palamedeae et reliquarum, quas natura aculeis alarum armavit, et quarum censionem fecit Cl. HERMANN Comment. Tab. Affinit. p. 158.

*Ayrones*



*Ayrones — resupinati.* Ardeae stellaris similem miramque defensionem narrat testis ocularis in Cl. PALLAS *Neuen Nordischen Beyträgen*, T. IV. p. 8.

PAG. 65.

*In gyrum circumuolando — ayrones.* De ardea stellari LINNAEVS annotauit: eam terrefactam spiraliter aethera scandere, eamque in venatu falconis magnatibus placere. De gracula pyrrhocorace idem asseuerat SCOPOLI *Auium Hist.* p. 41. vers. germ. Ardearum species ALBERTVS p. 227. a. tres commemorat: primam cineream, acuti rostri et longi colli; alteram albam totam, melius pennatam, ceterum priori per omnia similem; tertiam (in ALBERTO scilicet pro *tamen* legendum est *tertiam*) longo collo et rostro in anteriore parte rotundo, totam albam, cochleariam dictam. In tertia plataleam LINNAEI facile agnosces, quae rostro leuiter vtrinque anserum instar pectinato et trachea mirum in modum inflexa in icone Aldrouandina ambigua videtur inter genus anatis et ardeae Linnaeanum. Rostri optimam notitiam dedit FRISCHIVS noster in *Actis Natur. Curios.* Vol. V. p. 251. Idem ALBERTVS l. c., reiecta ARISTOTELIS opinione, qui ardearum speciem aliquam in coitu sanguineas lacrimas plorare refert, testis ocularis coitum ardeae narrat. Ardea, inquit, coit super dorsum feminae flexis cruribus, ita quod pedes maris sunt ad caput feminae, et genua versus anum super dorsum, et tunc tenens se motu alarum tangit locum conceptionis femine et semen infundit in eam. Similiter de auium coitu ARISTOTELES H. A. V. 2.: τὰ μὲν γὰρ συγκαθείσης τῆς θηλείας ἐπὶ τὴν γῆν ἐπιβαίνει τὸ ἄρρεν, ὥσπερ αἱ νεοττίδες καὶ οἱ ἀλεκτρούνες, τὰ δὲ ἔ συγκαθείσης τῆς θηλείας, οἷον καὶ οἱ γέρανοι. ἐν τέτοις γὰρ ὁ ἄρρεν ἐπιπηδῶν ὀχεύει τὴν θήλειαν καὶ συγγίνεται ὥσπερ τὰ στρουθία ὁξέως. Vbi Codex B. RHENANI cum Mediceo et Canisiano ὠτίδες habent pro νεοττίδες; sed GAZA cum SCOTO et ALBERTO gallinae vertit. Deinde pro ἐπιπηδῶν veteres editiones ἐπιποδῶν habent. ALBERTVS cum SCOTO: feminae non inclinantur, sed stant eleuatae, et mares tenent se super eas motu quodam alarum. Veram igitur puto lectionem ἐπὶ ποδῶν. — De anatum volatu PLINIVS X. c. 38., vbi varietatem volatus in reliquis auibz nimis breuiter et obscure enarrat, anates, inquit, solae, quaeque sunt eiusdem generis, in sublime protinus se tollunt atque e vestigio caelum petunt, et hoc etiam ex aqua. Vultur et fere grauiiores, nisi ex procursu aut altiore cumulo immissae, non euolant — Subrectae, pronae, obliquae, in latera, in ora, quaedam et resupinae feruntur. Postremam rationem ad ardeas ab accipitre infestatas refert DALECAMPIVS. De merope singularem volatum, nescio vnde, refert AELIANVS I. 49.: τὰ μὲν εἰς τὸ μπροσθεν ἵεται καὶ κατ' ὀφθαλμὸς, τὸ δὲ εἰς τὸ πίσω: quam narrationem nondum ab aliquo confirmatam reperi. Alaudam campestre cantare ascendendo per circulum, et, cum descendit, primum quidem paulatim descendere, tandem vero alis contractis in modum lapidis subito decidere, et in illo casu can-



tum omittere. Hanc conclusam in cauea cantare alas commouentem et ad liberum aërem exire gestientem; sed si diutius captiua teneatur, altero saepe oculo obcaecari; seque saepius expertum refert, alaudam nono anno altero obcaecari oculo. ALBERTVS Libro XXIII. p. 227. a. Coruum supinum vnguibus contra falconem pugnare, refert OTHO FABRICIVS in Fauna Groenl. p. 57. Idem anatem hiemalem flexuose volare ait p. 73., iam dorso, iam abdomine oblique verso. Tale quid etiam in merope obseruasse suspicor.

PAG. 66. CAP. 57.

De mutatione pennarum pauca admodum et obscure satis annotauit ARISTOTELES H. A. VIII. c. 18. et de Generat. V. c. 3. Generationem aues apud ARISTOPHANEM versu 106. ἀλλὰ τὸν χειμῶνα πάντα τῶν πτερορροῦν καὶ οὐδὲν ἕτερον φύομεν. PLINII locum VIII. c. 27.: palumbes, graculi, merulae, perdices lauri folio annum fastidium purgant: columbae, turtures et gallinacei herba, quae vocatur helxine: anates, anseres caeteraeque aquaticae herba fiderite: grues et similes iunco palustri: hunc igitur locum ad pennarum mutationem refert Cl. BECMANN de Histor. naturali Veterum p. 226. Verum alia etiam superstitio illi loco admista est, quam ad AELIANVM tetigi. De pica longicauda PLINIVS X. c. 29.: proprium his caluescere omnibus annis, cum feruntur rapa. Quod male ad picum transtulit auctor libri de natura rerum ap. VINCENTIVM, XVI. c. 132. Pennas reliqui corporis paulatim excidere et mutari, capitis vero simul omnes in hac et glandaria pica et in multis aliis auibus ad PLINII locum annotauit ill. BVFFON, T. VII. p. 185. vers. germ. De sturnis PLINIVS X. c. 24.: sed hi plumam non amittunt, nec occultantur. Quem locum reprehendit ill. BVFFON; sed PLINIVS de illis auibus loquitur, quae per hiemem occultatae plumas etiam amittunt. Cum igitur sturnum occultari neget, sequitur, vt etiam plumas eum amittere tum neget. Ceterum in prima pullorum mutatione pennulas rostri basin cingentes fere omnes simul excidere, obseruat illustris BVFFON, T. VIII. p. 15. De mutatione pennarum in gallinarum, phasianorum, perdicum et anatum genere paucas ex aliena auctoritate obseruationes generatim refert ill. BVFFON, Hist. au. T. I. p. 51. De colorum varietate in aquilarum genere hanc mutationem in pullis comitante Idem ibidem p. 86. Capones a castratione non amplius mutare pennas, Idem refert T. IV. p. 146. Memorabile est, quod annotatum reperi in libro Anglico: *An Account of a Voyage for the discovery of a N. W. passage by Hudsons Streights* etc., Londini 1748. edito, Vol. I., tetraonum genus in terris freto Hudsoniano adiacentibus per hiemem pennis albis duplicibus vestiri, quales scilicet in gallinaceo tetraonumque genere etiam his in terris reperimus; has vero postea excidere simplicesque iterum renasci. — Ex latino *mutare* pennas factum gallicum *muër*, *muë*, vnde Imperator *mutam* pro morbo seu mutatione pennarum, etiam de domuncula, vbi falcones mutant



mutant pennas, et *mutare* simpliciter pro pennas mutare dixit. *Mutatus* igitur dicitur, qui pennas mutauit falco. Graeci etiam latino vocabulo vñ sunt, *μετεύειν*, *μετάτος*. DEMETRIVS Constantinop. Hieracosophii I. 41. et II. 49. Contra, qui nondum mutauit, *saurus*, gallice *for*, quod vocabulum etiam colorem plumarum obscuriorem significat. *Mutare* etiam noster sermo seruauit inflexum in *Musen*, *Mausen*, *Mausig*, cancrorumque etiam vernationi adhibuit. De Americanarum auium natura in mutandis pennis quaedam praeclare tradidit BAION, Mémoires pour l'histoire — naturelle de Cayenne, quae inde excerpta posui in Promptuario Lipsiensi, 1787. p. 43. De nostris multas egregias obseruationes posuit ZORN Petinoth. l. p. 262 — 272, qui Laniorum pullos omnes fauros abire hinc monuit p. 465. Denique de mutatis pennarum plumarumque coloribus cum ipsis pennis multa posuit idem diligentissimus auctor exempla p. 569. seqq. ALBERTVS M. libro XXIII. p. 239. b.: aues dupliciter se mutant (*muënt*): quaedam enim simul in continuo vno tempore pennas exuunt, sicut accipitres; quaedam faciunt hoc successiue, sicut pica et coruus.

## PAG. 70.

*Maleclum iacti, longa.* *Iacti* ex gallico *Iets* laquei sunt de corio facti, qui pedibus falconum imponi solent, vt cum eis retineantur et iactentur ad praedandum, vt infra cap. 38. traditur. *Maleclum* ex hoc loco laudat etiam CANGIUS, nulla addita interpretatione; sed vox corrupta est et legendum *malleolum*, quod nostro infra cap. 44. est sacculus lineus, cui falco recens captus inditur, ex gallico *mallette*. Deinde *longa* ex gallico *longe* est corrigia, qua ligantur et retinentur falcones ad sedem suam, vt infra dicitur c. 27. et 39.

*Tiratorium — tina — cappellum.* De *tiratorio* noster infra cap. 55. ipse accuratius tradit. Gallice *Tiroir* dicitur. *Tina* vas grande, ligneum, lauationibus falconum, dum mutant pennas, aptum, gallice *Tine*. Sed vox ipsa romanae originis esse videtur. De vsu *cappelli* infra traditur. Gallicis falconariis *chaperon* dicitur, nostris *Haube*. Mitrae genus, quo falcones ciliantur, ne lux in oculos incidat.

*Fileria seu credentia.* Gallicum *Filiere*, lorum, quod pedibus falconum alligatur. CANGIUS omisit hanc vocem.

*Loyrum.* Ex Gallico *Leurre*, quod alii *Lorram* dixerunt, esca, qua visa falcones reuocantur.

*Alia, cum quibus reuocantur.* Hinc ALBERTO reuocatorium dicitur.

*Trahina.*



*Trahina.* Gallicum *Traine*, imago seu pellis cuiusuis animalis aut auis, quae loro alligata per campos trahitur, vt falconem alliciat capturaeque eiusmodi animalium assuefaciat.

*Tympanum pulsans, chirotheca.* Tympani vsus fuit, vt puto, in venatione anatum, quae subito exturbantur latebris suis pulsato tympano, vt illas falco inuolet. Cymbalum pro tympano adhibet DEMETRIUS in Hieracosophio. *Chirotheca* est manica coriacea, qua manus armatur, cui insidet falco, dum portatur.

## PAG. 71.

*Non appetunt, nisi forte — paucissimi.* ARISTOTELES H. A. VIII. c. 3.: οἱ δὲ γαμψώνυχες καὶ ἄποτοι πάνπαν, εἰ μὴ τι ὀλίγον γένος καὶ ὀλιγάκις. μάλιστα δὲ τοῖστον ἢ κεγχεῖς. καὶ ἰκτῖνος ὀλιγάκις μὲν, ὥπται δὲ πίνων. Hinc est, quod accipitribus et falconibus, dum mutant pennas caueis inclusi, tina balneatoria apponitur, vnde etiam bibant.

## PAG. 72.

*Quaedam species anserum.* Qualem auem intelligi voluerit Imperator, nescio; nam de Pelicano aquilo LINNAEI, anseribus magnitudine, statura et ferato rostro simili, cogitare vetat, quod additur, eum, vt vultures, cadaueribus victitare.

## IBID. CAP. 2.

Cui femina rapacium auium mare maior sit tertia fere parte, vnde mas *Tertiarius* in vniuerso genere dicitur, gallice *Tiercelet*, varias indagando conquisiuit rationes augustus auctor, de quarum tamen veritate, vt omnino difficile est de naturae consiliis in operum suorum fabrica singulari iudicium, ita etiam hic dubitare licet. Aliam longe viam ingressus illustris BUFFONVS, qui, postquam marem falconis merularii (*Emerillon*) contra morem generis sui solum parem magnitudine feminae fecisset, (quo id iure, nunc non disputo), eo tandem delabitur, vt magnitudinis differentiam a praesentia intestinorum coecorum repeteret, quae in feminis gemina, in maribus contra simplicia adesse aut plane deesse ex fide anatomicorum refert. In aquila mare nulla plane reperit FERRALTUS; nec in falcone cyaneo eo, quem illustris BUFFONVS *St. Martin* appellat, FRISCHIVS vero noster *Laniarium album* (cf. HERMANNI V. C. Commentar. ad Tabul. Affinit. p. 174.), et quidem mare, quem mense Maio anni 1783, dum turdum persequabatur, occisum secui, caecorum vestigia vlla reperi; verum in femina buteone, cuius oviductum cum ovario eodem anni mense clarissime videram, non magis caeca intestina vlla reperi. Igitur altius reconditam in intima corporis fabrica rationem differentiae quaerere oportet; quam si cui olim reperire contigerit,



tigerit, vehementer ei gratulandam puto eam felicitatem. Quid, quod eadem magnitudinis differentia in sexu reperitur etiam in aliis auium generibus? Musci-  
capas maiores ex illustri BVFFONO nominavit Cl. HERMANN, Comment. Tabul.  
Affinit. p. 173. et p. 229., cuculum item discolorem, p. 186., et denique aues  
Americanas ab illustri BVFFONO *Fourmiliers* appellatas, p. 189. Harum igitur  
auium natura etiam penitus rimanda erit, vt de opinione Buffoniana et naturae  
consilio decernere possimus.

## PAG. 74.

*Aquilae piscatrices.* Si falconem haliaetion LINNAEI (ill. BVFFONO *Balbu-  
zard*) intelligit, recte admonet, meliorem ei formam pennasque commodiores  
datas esse ad piscandum, quam reliquo generi. Pennas enim is tibiales vulgo  
dictas dependentes nullas habet, vnguem posticum breuiorem, callum digitorum  
asperrimum, et reliqua, quae praedationi piscium sunt accommodata. ARISTO-  
TELES H. A. IX. 32. aquilae marinae collum magnum crassumque cum alis cur-  
uis et vropygio, i. e. cauda lata, tribuit. Vbi tamen versio vetus apud VINCEN-  
TIVM pro vropygio pectus habet amplum. Contra vero illustris BVFFONVS ex  
hoc loco caput magnum crassumque referre videtur. Alas curuas miluo etiam  
tribuit scriptor gallicus de natura rerum apud VINCENTIVM.

*Sineciliones.* Vocabulum hoc in primo exemplo corruptum recte emenda-  
uit CANGIVS *Smeriliones* legendo, cui Gallicum *Emerillon* conuenit. Italis *Smer-  
lo*, *Smeriglio*. A merulis, quas in siluis consecratur, *merularium* ab initio dictum,  
vt a fringillis fringillarius accipiter, bene suspicatur FRISCH in Dictionario Ger-  
manico sub voce *Schmerlein*. Forte tamen magnitudo merulae causam nominis  
dedit. Comparatur a multis cum *aesalone* graecorum scriptorum; sed definire  
aliquid non licet in tanta orationis breuitate. — ALBERTVS cap. 14., decimum,  
inquit, et vltimum falconum genus est id, quod quantitate minimum est, quod  
et *mirle* vocatur et vulgariter *Smirlin* vocatur. — Est autem — guttatum in vul-  
tu — et longissimarum alarum respectu sui corporis et caudae mensuratae, et  
crurium et pedum planorum citrinorum etc. Liber de natura rerum apud VIN-  
CENTIVM XVI. cap. 71., *triciolus*, inquit, aucupantium volucrum minima, sed  
pro sexu et natura sua ad aucupandum promptissima, falconum generibus adiun-  
gitur. Arabica nomina cum notis quibusdam habet BOCHARTVS Hieroz. II. p.  
194. Sed locus ex libro de natura rerum postremus pertinet ad nisum. Sic  
enim ALEXANDER nescio quis apud VINCENTIVM XVI. cap. 112.: nisus ac tri-  
cellus siue terciolus — Deinde superior locus de *triciolo* repetitur verbote-  
nus, nisi quod hic *tertiolus* nominatur. — Apud ALBERTVM XXIII. p. 238.  
corrupte *meristiones* legitur, vt vidit etiam CON. GESNER p. 44. In Codice Ri-  
galtiano libri de natura rerum legitur: *terconnali minimae volucrum* — pro sexu



*in natura* etc. Versio Catalanica habet *Terzols*. Germanico ALBERTI Interpreti Smerilio dicitur etiam *Weissback*.

*Vbleti*. Horum nomen nullibi reperire aut vestigia originis indagare potui. CANGIUS omisit. An fortasse *Blueti* scriptum olim fuerit de cyaneo aliquo falconis minoris genere?

*Austuri*. Ex gallico *autour*, quod ipsum ex latino *astur* factum. Nomen asturis primum memoratur a IULIO FORMICO. Accipitrem palumbarium ARISTOTELIS H. A. VIII. 3. ALBERTVS interpretatur *asturem*. Sed alii, quibuscum illustris BUFFONVS facit et Gallicus ARISTOTELIS interpres, CAMVS, accipitrem *ἀσπερίαν* de hoc interpretantur, quem nominat semel Philosophus Hist. Anim. IX. cap. 36. Ibi vero ALBERTVS *τρίορχην* interpretatur *asturem*. Sed locum ipsum Philosophi ponam: τῶν δ' ἱεράκων κράτιστος μὲν ὁ τρίορχης. δεύτερος δ' ὁ αἰσάλων. τρίτος ὁ κίρκος. ὁ δ' ἀσπερίας καὶ ὁ Φασσοφόρος καὶ ὁ πέρις ἄλλοι. οἱ δὲ πλατύτεροι ἱέρακες ὑποτρίορχαι καλεῖνται. ἄλλοι δὲ πέρις καὶ σπιζία. οἱ δὲ λεῖοι καὶ οἱ φρυνολόχοι, ἔτοι ἐμβιώτατοι καὶ χαμαλοπτῆται. Vbi primum pro αἰσάλων Codices Ambrosianus, Vaticanus et Mediceus habent σάλων, ALBERTVS vero *celon*, sed vetus Interpretatio apud CAMVS habet *Esalon*. HESYCHIVS tamen αἰσάρων εἶδος ἱέρακος. Deinde ἀσπερίαν alium, aquilam nempe aliis auream dictam, laudat ex ARISTOTELE quidem AELIANVS II. 39., sed locus hodie non exstat. Vetus Interpres, quem manuscriptum comparauit CAMVS, dicitur pro asteria habere *asterias vel astur*; sed equidem hoc quomodo interpret, dubito. Semel enim ARISTOTELES asteriam nominat. Pro πέρις Codex Mediceus habet *περις* cum vetere Interprete; GAZAE versio posuit *pernix*. HESYCHIVS lectionem *περις* vt vetustissimam et genuinam recepit inter glossas suas. Sed ALBERTVS tria nomina haec de vno genere interpretatur, quasi legeretur: ὁ δ' ἀσπερίας, ὁ καὶ Φασσοφόρος καὶ πέρις. Ita enim ille p. 95.: tertium autem genus vocatur kyricos graece et a quibusdam aslanos et aliis fasceos, a nobis autem vocatur nifus aut speruerius, et est debilissimus in genere accipitrum, et est aliquantulum lati corporis. Est tamen genus falconum lati corporis in dorso: et hoc vocant quidam *occata* graece; et alia sunt duo genera istius auis, quorum vnum dicitur *linotrobelgo*, aliud autem est innominatum: apud nos autem primum horum generum vocatur gyrofalco, et secundum vocatur falco lapidum — et tertium vocatur pes blauus siue iacintinus et est peius inter tria. Sunt tamen et alia paruorum falconum genera, quae sunt velocissimi volatus et paruis auibus insidiantes. Genus autem accipitrum pulchrae vitae est in venando, et hoc commune habent, quod semper volant omnes accipitres iuxta terram. Vides, lector, quam multis et taediosis ambagibus ALBERTVS sensum loci plane non illustrarit, sed intricatum obscurauerit. Verum nimis saepe in istis quisquiliis



liis latet aurum absconditum, et ex latinitate scriptorum pendet secuta recentiorum aetas et disciplina, quam vt ignorare liceat viro docto lutulentas istas et obscuras scriptiones. Quid in versione gemina vetusta, quam CAMVS consuluit, sed nimis raro, interpretatio huius loci prae se ferat, operae quidem pretium esset discere, sed nihil de ea memorat h. l. CAMVS. Contra vero in Commentario ex etymologia etiam conficere conatur, *asturem* non solum ex nomine asteriae ortum, sed eundem plane natura sua esse cum eo. Genus accipitrum, quod ARISTOTELES nomine ὑποτειρόεχαῖ comprehendit, dicitur latius esse, πλατύτεροι; sed Codex Mediceus cum Canisiano habent πλατυτεροπτερακες, ex quo suspicor, eos voluisse πλατύπτεροι ἱέρακες, quasi illud alterum genus latiores habeat alas. — Qui denique λέιοι dicantur, non comminiscor, sed ἔλειοι, i. e. palustres, legendum suspicor. — Accipitrum genus, quod Imperator a falconibus vbique separat, differt non solum iridis colore, narium caruncula depressa, sed et ratione venationis, quod non ferit praedam, sed capit. Ferire autem quid sit in arte falconaria, nostris *schlagen*, infra docetur. Vides igitur, magnam habuisse falconariae artis vsum atque exercitationem ad genera auium accuratius dignoscenda vtilitatem, quam methodici scriptores negligere non debebant, sed inspicere diligentius falconariorum doctiorum libros.

## PAG. 75. CAP. 3.

*Area* dicitur ex Gallico *aire*, nostris peculiari vocabulo *Horst*. Cf. CHARPENTIER in Supplemento sub voce *Area*. ALBERTYS *haeram* falconis dixit.

## IBID. CAP. 4.

*Fixuris*. Legendum *fissuris*. — *Gallandiam* ignoro; et Groenlandiam interpretari vereor. Videant doctiores de hoc nomine. Etymologiae auium explicatione aut refutatione non egent apud doctos.

\* *Gallandiam* germanicus interpres per Groenlandiam reddit, vt nunc demum video.

## PAG. 76.

*Auantagium*. Gallicum est *avantage*.

## PAG. 77.

*Inferius habentia duos corios*. Sensum vocabuli, igitur rem ipsam, ignoro. Videtur Imperator de cordibus succenturiatis loqui.

\* Interpres germanicus interpretatur duo coria.



## IBID. CAP. 6.

Vultures refert ARISTOTELES H. A. VI. cap. 5. oua duo parere, auesque omnes rapaces semel per annum nidulari. Cap. 6. aquilam tria ponere oua, quorum duo excludi; visos tamen etiam tres aquilarum pullos esse. Incubare oua circa triginta dies, eundemque finem in auium reliquarum maiorum ouis excludendis a natura statutum esse, vt anseri et otidi (ALBERTVS anserem et cycnum nominat); mediis magnitudine, vt miluo et accipitri, fere viginti dies sufficere excludendis. Miluum vt plurimum duo oua excludere, interdum etiam tria; aitolum etiam quatuor oua excludere interdum. Vbi ALBERTVS: quae graece *agulneos*, latine autem *egonus* vel *egetinus* vocatur. SCOTI versio a Gallo CAMVS comparata *alguneus* habet. Recentiorum obseruationes positas reperiens apud illustrem BVFFONVM; sed asseuerare de multis speciebus difficile est; indagare enim veritatem nimis saepe periculosum; hinc multa nos in auium ouatione, incubatione pullorumque educatione latent adhuc diuque latebunt.

## PAG. 78. CAP. 9.

*In sia, quae dicitur gorgia.* Prius verbum corruptum puto. Forte fuit *sacco*. Alterum ex gallico *gorge* est deriuatum.

## PAG. 79. CAP. II.

*Tota contrata.* Gallis *Contrée*, Italis *contrada*.

## PAG. 80. CAP. 13.

*Mane exeunt ad praedandum.* De eadem re supra p. 62.: consueuerunt rapaces circa medium diem sublimē volare, praecipue in aestate et in diebus calidis ad refrigerandum se in sublimi et exaureandum. Iam olim ARISTOTELES H. A. IX. cap. 32.: ὥρα δὲ τῆ ἐργάζεσθαι αἰετῶ καὶ πέτεσθαι ἀπ' ἀρίστου μέχρι δέλης. τὸ γὰρ ἔωθεν καὶ θηται μέχρι ἀγορᾶς πληθέσεως. Ex quo loco PLINIVS X. cap. 3.: a meridiano autem tempore operantur et volant; prioribus horis diei, donec impleantur hominum conuentu fora, ignauae sedent. Contra GAZAE versio habet: tempus aquilae operandi volandique a prandio ad meridianum. Mane enim quiescit, vsque dum forum frequens et prandendum iam sit. Nuperus vero interpretes Gallicus: depuis l'heure où les hommes prennent leur premier repas jusqu' au soir. ALBERTVS VIII. p. 94. b.: venatur autem vultur frequentius a meridie vsque ad noctem, et ab ortu solis vsque ad tempus illud quiescit. Atque ita etiam verbotenus vetus versio apud VINCENTIVM XVI. cap. 150. Illustris BVFFONVS haliaeetos meridianis tantum horis venari, vulgarem vero aquilam frequentius praedatum exire tradidit. Obiter mihi liceat hic interferere iudicium de loco ARISTOTELIS laudato, vbi aquila vera describitur. De magnitudine ita tradit: ἔστι δὲ ἔτος (ὁ γνήσιος) μέγιστος τῶν αἰετῶν ἀπάντων, μείζων τε τῆς



τῆς Φήνης· τῶν δ' αἰετῶν καὶ ἡμιόλιος, χροῖμα ξανθός. Ex quo loco PLINIVS X. cap. 3. genus gnesion media magnitudine, colore subrutilo, rarum conspectu reddidit; male. Magnitudinem enim sesquialteram reliquarum aquilarum illi tribuit Philosophus. Atque ita etiam ALBERTVS l. c., iste, inquit, vultur verus est magnus valde, omnibus maior aliis vulturibus fere in sesquialtera proportione, et habet fortem vocem, et eius color est citrinus, rubescens aliquantulum. Atque ita fere vetus versio apud VINCENTIVM XVI. cap. 151.: et iste vultur est valde magnus, sesquarto (lege sesquialtero) maior omnibus vulturibus, habet fortem vocem et citrinum colorem. Vides versionem veterem lectionem diuersam expressisse in ARISTOTELE a vulgata, quae mihi inepta videtur eam maxime ob causam, quod triplex ea seruata instituitur comparatio magnitudinis, cum duae sufficerent. Fuit igitur in Codicibus scriptum aliquibus: ἔστι δὲ ὅτος μέγιστος τῶν αἰετῶν ἀπάντων, μείζονος τε Φωνῆς, τῶν δ' αἰετῶν καὶ ἡμιόλιος. Vocem huius aquilae magnam cum rugitu leonis comparat ill. BUFFONVS. De varietate lectionis nihil suspicatus CONR. GESNER de vitio tantum Plinianae interpretationis admonuit, quam ille emendabat legens: caeteras media magnitudine excedens. — De tempore venationis auibus rapacibus solemnī Imperator etiam infra p. 149. monet.

## PAG. 82. CAP. 18.

*Quaternos.* Quaterni, quaterniones, quaternunculi chartae in quatuor paginas complicatae, Gallorum *Cahier*. Cf. CANGII Glossarium sub li. v.

## IBID. CAP. 19.

*Iacens*, i. e. depressa.

## PAG. 83. CAP. 20.

*Cannauacii.* Infra *cannabacii* scribitur, vtrumque pro cannabino. Ipse enim cannabis his scriptoribus *canneua* et *cannaua* est. Ex adiectiuo griseus factum est substantiuum *grisitas*. Forte tamen scriptum fuit *griseitas*.

## PAG. 84. CAP. 23.

*A se non mutatis.* Videntur haec verba vitiosa esse.

## PAG. 85.

*Pars meri.* Vocem posteriorem aliunde hoc sensu ignoro. Significat ingluuiem auis. In aquila oesophagum ante ventriculum constrictum speciem prolobi glandulis intus obsiti praebere, annotauit BORRICHIVS et PERRALTVS. Eandem in vulture grypho stomachi structuram annotauit PERRALTVS, huicque ingluuiei cavitatem magnam in initio pectoris respondere putat. ARISTOTELES



H. A. II. 17. in exemplo earum auium, quae ventriculum ipsum similem prolobo habent, ponit tinnunculum ( $\kappa\epsilon\gamma\chi\epsilon\iota\varsigma$ ); sed ibi Codex Mediceus et scoti versio habent: partem ventriculi aliquam similem prolobo: praeterea pro  $\kappa\epsilon\gamma\chi\epsilon\iota\varsigma$  Codex Medic., Canis. et B. RHENANI habent  $\kappa\epsilon\gamma\chi\epsilon\eta\iota\varsigma$ ; ut adeo dubitari possit, an tinnunculus intelligatur.

*Tertia iunctura alarum.* Supra p. 82. cap. 19.: iuncturae alarum mediae tendentes versus caput, quae a quibusdam dicuntur pulsiones alarum. Infra p. 111.: iuncturam autem illam alarum, a qua incipiunt decem pennae maiores forinsecae, quam iuncturam quidam vocant humerum, et alii buctum alae dicunt, teneat eleuatam ad caput. Ex gallico scilicet *bout de l'aile* fecit *buctum*. Pro voce *pulsiones* (alarum) videtur legendum esse *impulsorium* alarum; ita enim hanc alae partem dici, supra monuit ipse Imperator I. c. 27.

*Super renes.* In Girofalcone renes non commemorat, sed pinnas caudae in modum crucis inuicem interfecare ait. Renes hoc loco significant commissurum renum, cumulare VEGETII, Gallorum *Croupion*.

*Pennae maiores sunt recollectae.* Post vocem *pennae* altera *caudae* excidit; de hac certe omnia sunt intelligenda.

*Faluedinem.* Ex gallico *fauve* effecit hoc et *falius*. PAPIAS *saluum* colorem interpretatur *fuluum* et *eluum*.

PAG. 86.

*Quasi coronam quandam.* Sunt, qui alio nomine *Sahins* appellantur, quosque a vulgaribus Galliae falconibus patria, non specie, differre contendit CAROLVS D'ARCVSSIA, Conference des Fauconniers, p. 38, vbi ita tradit: Les Faucons que les Turcs nomment Sahins, ne sont autres que les Faucons de haute maille (maculae genus significat in plumis) qui ont la tête plate au dessus et le pennage bordé de blanc et encores égalé de roux; dont il semble que la nature leur ait mis sur la tête une guirlande ou couronne pour marque de leur excellence. Bref ce sont les Faucons qu'anciennement l'on nommoit Pelerins ou Faucons Tartares, bien que ce fut improprement parlé, comme j'ai dit en son lieu.

*Cera.* Vocabulum hoc recepit etiam LINNAEVS eidemque rostri parti accommodavit. Praeter auium rostro vnguibusque vncinatis armatarum genus, quae raptu viuunt latrocinantes, eadem cera reperitur etiam in genere psittacorum, cracum, meleagridum, in Laro Catarracte dicto a Cl. BRUNNICHIO, anatunque aliquot speciebus, ut tradit Cl. HERMANN in Commentar. Tabul. Affinit.



p. 146. et p. 158. In cracum aliquot speciebus maxillae etiam inferioris basin cingere dicitur, cum in reliquis superiorem modo tegat. Recte vero Noster partem corii appellat eam, quae sit inter duritiem rostri et primas plumas capitis, coloremque eius pedum colori respondere annotat. Est enim omnino cera illa pars communis corii seu cutis, qua totum caput tegitur. Quae ubi supra rostri initium protensa caluescit, paulatim etiam densior crassiorque fit, narium foramina includit et partim vestit, et denique anterieus aliquantum duplicata atque ita super rostri corium discoloris exstans, iungitur ipsi rostro, seu potius in corium illud modo cartilagineum molle, modo corneae duritiei propius densatur, quo ossa maxillarum induta conspiciuntur. Vix igitur a reliqua cranii cute et rostri corio nisi colore et duritiei medio gradu differt, ut apertum est in cera meleagridis, quam hoc ipso tempore accuratius inspexi recentem et coctam. In psittaco ceram ita descripsit PETITVS (Mémoires de Paris, 1736. p. 124.): une matiere qui n'est ni os ni corne, mais qui approche plus de la corne que de l'os. A colore cerae apium partem hanc appellatam fuisse primum, clarum est; sed is non ubique idem est, et in vniuersum cum pedum seu corii pedum colore mutatur per aetatem, quemadmodum ipsius rostri colorem in iis etiam auibus, quae cera carent, mutari cum pedibus nouimus. Comparare aliquatenus licebit rostrum auium iuniorum, quod versus caput deficit in quasdam prominentias labiorum croceas, ut ait ALBERTVS libro VII. p. 38. a. In graeco DEMETRII libro p. 10. dicitur de cera: τὸ δὲ κίτρινον χεῶμα τῆς ῥινὸς αὐτῶν μὴ ἔσω λίαν λαμπρὸν. ὀλιγοχρόνιον γὰρ δηλοῖ τὸ τοῦ ἱέρακα, i. e., citrinus color narium ne sit nimis splendidus, forte candidus; nam ostendit, accipitrem non longaeuum fore. Vocabulum citrinum alio sensu, ut hoc obiter dicam, posuit ALBERTVS libro VI. p. 68. b.: citrinum, inquit, in ouis auium aquaticarum, sicut in ouis anatum et anserum et huiusmodi, fere duplum est ad citrinum, quod est in ouis terrestrium. Expressit is locum ARISTOTELIS H. A. VI. cap. 2. de ouis aquaticarum auium: πολλαπλάσιον γὰρ ἔχει τὰ τῶν ἐνύδρων κατὰ λόγον τὸ ὠχρὸν πρὸς τὸ λευκόν. Quae eadem repetit de Generat. III. c. 1. Contra tamen plus albuminis habere, affirmat MARSILIUS in Danubio, T. V. p. 124. Recentiorum de hac diuersitate obseruationes ignoro. — Sed ad rem redeo. In Hieracosophio DEMETRII p. 11. reperio hanc boni falconis notam: γλῶσσαν μέλαιναν, τὰς ἐν τῇ ῥινὶ ἐλαίας μελαίνας. Deinde caput sequens habet: εἰν ἐστὶν ἐλοφάγος, ἢ γὰρ ἔχη ὡς πεγγεῖς κόκκους μελαίνας. Vbi CONR. GESNERVS de Auibus p. 6. legendum putabat ἐλαιοφόρος, i. e., qui maculas in naso veluti granam illi nigra habet. Sed is falco, qui ibidem p. 10. ἐλαιοφόρος vocatur, brevis vitae esse dicitur. Dubium igitur est, quam notam narium intelligi voluerit auctor; nec in recentiorum scriptis nunc reperio, quod lucem afferat rei obscurae.



## PAG. 88.

*Et caudae fiunt curtiores.* Eandem de caudae pinnarum longitudine cum ipsis pinnis mutata observationem aliunde excerptam posui supra ad Libri I. caput de mutatione plumagii. Asturis fauri et mutati colores ita pingit ALBERTVS libro XXIII. p. 226. b.: est accipiter totus varius: sed in primo anno fuluas et nigras habet maculas; deinceps autem maculis albis et nigris variatur, et sunt illae albiores et nigriores, quo pluribus vicibus mutatus fuerit: et sunt pedes eius crocei et ungues magni — et in dorso quidem paucas habet maculas albas et plures nigras et alas secundum proportionem suam habet acutiores, quam aquilarum genera, et minus acutas, quam genera falconum. Denique addit de pinnis alarum: patitur, inquit, aliquando etiam maciem nimiam: et tunc humido naturali destitutus pennae eius contrahunt maculas, quas famis signa appellant, et tunc etiam pennae franguntur de facili et volatum continuare non potest. Haec famis signa intelligere videtur epistola SYMMACHI apud ALBERTVM cap. 23. posita, ubi est: quotiens esurierit, tot signa fracturarum vel fracturas habebit in pennis.

*Mutatae eueniunt per transuersum.* Haec de peregrinis, deinde etiam de asturibus et sperueriis Imperator. Eandem figurae inacularum mutationem, quasi rem inauditam antea, in asture, seu falcone palumbario LINNAEI et speruerio annotauit illustris BUFFONVS, et post eum GRANDIDIER, qui praeterea coruum coracem marem tertia parte saltim minorem quam feminam esse asseruit. (*Hessische Beyträge*, Vol. II. Pars I. p. 108.)

## PAG. 89. CAP. 28.

*Nidafios et ramagios.* Priores THVANVS nidularios, PETRVS CRESCENT. nidarios, Itali nidafi, Galli *niais* appellant. Posteriores THVANVS ramales, PETRVS CRESCENT. X. 3. ramarios vocat, qui de nido egressi de ramo in ramum matrem sequuntur, Galli *Branchus*. Ceterum inter hoc et sequens caput tractationem de asturibus intercidisse, quaedam etiam in verbis postremis huius capitis mendosa esse, lectores ipsi facile animaduertent.

## IBID. CAP. 29.

*Sparuarii.* Variatur nomen *Speruarii*, *Sperueri*, *Esperuarii*, Gallis *Epervier*. Sed germanam vocem agnouit etiam FRISCHIVS noster, et ex vocabulo *Spar*, *Sparw*, *Sperb*, vnde Anglosaxonum *Sparrow*, quod passerem, fringillam significat, alteroque *Aar*, quo genus omne auium rapacium, accipitrum aquilarumque notatur, compositam esse docuit sub voce *Sperber* et *Spar*. Latine Nifus dicitur; et monente ALBERTO cap. 24. nifus est femina, *muscet* autem masculus. Parem in venatu dedignari eumque omissa praeda oppugnare, monet



monet cum ALBERTO Auctor libri de natura rerum apud VINCENTIVM, XVI. cap. 112. Pro *musceto* legitur etiam *Muschetus* et *Muscardus* apud CHARPENTIER sub h. v. Gallicis Falconariis *Mouchet* dicitur mas, et *Emouchet*. A maculis (*mouches*) vocabuli ortum deriuat FRISCHIVS noster. Vbi in epistola AQUILAE apud VINCENTIVM XVI. c. 71. legitur: sextum genus superanicum dicitur, quod fere habet similitudinem aquilae, excepto eo, quod in pedibus et alis et oculis gutteo assimilatur falconi: codex RIGALTII habet: sextum genus *speruicum* dicitur — *guttea* assimilatur falconi. Versio vero Catalanica ab eodem RIGALTIO edita habet: La VI. manera es sobre tots, la qual ha semblança dangilla blanca etc. Interpretatur igitur superanicum *supra omnes*, aquilam albam affuit et vocem *gutteo* omittit. Lectionem *speruicum* corruptam esse, non dubito; nec de speruerio cogitare licet. Altera *superanicus* posset videri ex gallico *suranné*, super annum, facta esse, et ad gibbosum falconem pertinere; sed nihil definire ausim. De musceto alius est locus corruptus Auctoris libri de natura rerum ap. VINCENTIVM, XVI. cap. 20, vbi de quarto accipitrum genere: quartum, inquit, genus est frogellus, quem mansuetum dicimus, multo quidem minor, sed colore similis (niso), sicut niso accipitri consimilis est in dispositione habitus et colore. Vbi Codex RIGALTII habet: *fragellum* dicitur, quod vulgariter *muscetum* dicitur. Recte. Versio vero Catalanica tria tantum numerat in ista AQUILAE epistola accipitrum genera, et quartum frogellum omittit; capitis tamen inscriptio hoc nomen habet: *Dels espervers dit forgells so es merle*. ALBERTVS VI. p. 71. a.: Sed quod mihi dixerunt aucupes et quod sum expertus, est, quod accipitres, quos vocamus astures, et speruerii pullos suos volantes cibant fere per vnum mensem et postea retrahunt se ab eis, et docent eas capere aues sic, quod parentes deferunt eis aues viuas et dimittunt coram eis et incitant filios ad capiendum, et postquam perfecti sunt volatus ad capiendum, tum abstinent ab eis. Aquilae autem terrae nostrae non cibant filios suos, nisi in nido suo, et postea educunt ad praedam, et cum praedam possunt arripere, ducunt eos longe valde a loco nidi sui, ita quod in loco nidi vix vnquam comparent: et parentes eorum retinent habitationem. Ita narrauit mihi falconarius, qui multos cepit falcones: quod etiam in eadem regione pater filium secum esse non permetteret, postquam perfectus fuerit ad praedandum. Idem XVI. p. 179. nisi seu speruerii domestici oua subuentanea vidisse apud se plura testatur.

PAG. 90.

*Pupillae* maiorem latitudinem in falconibus nondum alibi annotatam legi. Saepius ab asturibus et sperueriis pupillam contrahi et expandi, quam a falconibus, etiam mihi nouum accidit.



## IBID. CAP. 30.

*Viridis coloris* — *affamatae*. Prius vocabulum idem hic, quod *viuidus*, significat, alterum ex Gallico *affamé*, quae famis signum aliquod aut nimis breues aut angustae monstrant.

*Grinosi*. CANGIVS comparat Gallicum *grigoner*. Voluit sine dubio *grignoter*, quod a vetusto *grigner* descendit. Illud circumrodere frustum panis et similia significat. Sed vetustissima notio latius patuisse videtur.

## PAG. 92. CAP. 33.

*Quamuis* — *teneri*, *nutriantur* — *et consuetudinem*. Hic verba quaedam transposita puto atque ita ordinanda sensu postulante: *teneri et nutriantur* — *auolauerint*, *consuetudinem* etc.

*Austerni venti*. Sunt austri, vel austrini venti.

## PAG. 93.

*Esto*, quod *nutriantur*. Videtur esse gallicum *Soit que*.

*Recoctam*. Lac recoctum est coagulatum igne, Italis *ricotta*. Aliunde habet CHARPENTIER.

*Cacia vel capice*. Prius vocabulum CANGIVS ex Gallico *Chace* vel *Chasse*, arca, deriuat. *Capice* est a *Capix*, sed notior et antiqua vox *Capis*, *Capidis*, de calice.

## PAG. 95. CAP. 34.

*Granulosum*. Dicam de hac re infra ad pag. III.

*Fornace calcinaria*. Eadem, quae *calcaria* latinis scriptoribus est.

## PAG. 96. CAP. 36.

*Regiolam* — *sero*. Scriptoribus medii aevi porta primaria templorum *regia* dicitur; hinc *regiola* pro porta parua. Cf. CANGIVS. Deinceps *sero* dici puto pro *sera*. Paulo post legitur *triplici sero*; *illo vero sero* etc., ubi prior vox iterum pro *sera*, altera vero pro *vespere* ponitur. Verum dubitari potest de sensu *regiolae* huius; et triplex *sera* non videtur ad rem necessaria. Videant doctiores,



\* Dum lego in SFORZINI libro locum sequentem p. 82. de muta falconum: et ogni fenestra deve havere le sue portelle overo rebalte di fuori, accioche si possino ferrare quando si vuole: video, locum hunc FRIDERICI de tali etiam porta fera claudenda intelligi debere. In eadem tamen muta GEORGI p. 105. docet paulo aliter: la fenestrella della camera vuol havere una rebalzatta che si possa alzare et abbassare, secondo i bisogni. Interpres germanicus, vt nunc demum video, regiolum, quasi sit operculum, et fero crepusculum interpretatus est.

*Crederent esse praedam.* Hinc praeterea puniceum lori colorem cauendum monet DEMETRII Hieracosoph. p. 15, quod aquila procul viso loro puniceo veluti carni recens mactatae auis inhiat, falconemque alumnum perdit.

## PAG. 97. CAP. 37.

*Bloire.* Ex gallico *éblouir* deriuat CANGIVS sub h. v. Authentica vox *bloire*, vnde *blouir*, *éblouir*, descendit a vocabulo *bloius*, quod caeruleum colorem significat. Actum hunc auium oculos obcaecandi *bluitionem* et *bloiendi* appellat. Similem fere artem oculi damno extorquendi auibz cantus diuturnitatem excogitarunt homines in fringilla, cum cilia vtrunque filo metallico candente contacta exurunt atque ita inuicem iungunt.

*Pellicula pannosa.* Intelligit membranam nictitantem seu palpebram interiorem. Infra p. 111.: pellicula illa subpalpebralis pannosa, illa scilicet, quae exit a lacrymali (cantho) oculi.

## PAG. 98.

*Nam filum sit coopertum.* Ante vocem *sit* inferendum est *si*. Quod sequitur *statim quod*, videtur ex gallico *sitot*, *aussitot* que factum esse.

## PAG. 99.

*Maclae loricarum.* Hoc est, squamae, Gallis *Maille*.

## PAG. 101.

*Filaria.* Supra p. 70. scribitur rectius *fileria*. Saepius etiam adfuit *loyrum*, Gallorum *leurre*, ex quo formatur *loyrare*. Italis est *logoro*.

## PAG. 102.

*Ad pennas caudae.* In astute hoc facere suadet CAROLVS D'ARCVSSIA p. 308.: quand les autours se paissent couchés sur leur perdrix — faites leur porter une petite sonnette cousüe sur les deux couvertes de la queue (coopercula) et par là l'oiseau ne se pourra paitre sans qu' il soit desouvert. Cet advis est bon



en tems de neige ou lorsque la terre est molle: ce qui par fois remplit les sonnettes des oiseaux enforte que l'on ne les peut ouir.

IBID. CAP. 42.

*Abacistae.* Sunt, qui in abaco puluere consperfo numeros docent aut discunt. Signare numeros manu digitorumque varia complicatione homines scripturae ignaros primum docuit dura necessitas; haec deinde signa intra monachorum claustra otiosa hominum pietas, quam silentio etiam praestare cogebantur, in artis aliquam formam redegit, cuius specimina habes in Glossario CANGII sub voce signum.

PAG. 105. CAP. 44.

*Campaniam.* Est Gallicum *campagne*. Quod sequitur *malleolum*, etiam factum esse ex gallico *mallette*, iam supra monui. *Vsi sunt venari* est pro solent. De victu girofalconum et peregrinorum ex aquaticis auibus videbimus ad ALBERTVM.

PAG. 109.

*Tiratoria — carneria.* De tiratorio copiose ipse Imperator tradit infra cap. 55. Carnerium siue bursam de bono serico aliunde laudat CHARPENTIER, et comparat Gallorum *Charniere* vel *Carnassiere*.

PAG. 111.

*Laffas.* Videtur voluisse *laxas*. Contra legimus bis scriptum in his libris *fixura* pro *fissura*.

*Quae videntur quasi pili.* Intelligit setas in molli, caua et fere triangulari parte capitis inter ceram oculosque sita surrectas aut in circulum fere inclinatas, quas in aquila sua albicipite descripsit et pinxit Cl. MERREM. Has in speciebus accuratius distinguendis esse annotandas, monuit etiam amicissimus HERMANN Comment. Tabul. Affinit. p. 171.

*Granulosa et dura.* Morbo languentis excrementa non continua, sed dispersa et dura memorat DEMETRII Hieracosophium, p. 119. 121. Ibidem p. 123.: καὶ ἐὰν ἀφοδεύσας πόρρω ῥίψῃ τὴν κόπρον, καὶ οἶον κέγχρεια σκορπίση.

*Plumatam.* Omnes pennae plumaque ab aue rapace cum carnibus simul ingestae intelliguntur. Varietatem etiam in his plumis per vomitum reddendis aliquam bene obseruauit Imperator, quam alibi traditam non reperi.

Submit-



*Submittit totum caput aquae.* Cum illustris BVFFONVS aquilam suam St. Martini nomine appellatam magna cum circumspeditione aquae appositae rostrum totum vsque ad oculos immerfisse vidisset, vt biberet inde, voluit nobis persuadere, eum morem bibendi auibus rapacibus omnibus esse solennem, raro tamen ab hominibus conspici, quod aues hae nimiam adhiberent in bibendo cautionem. Sed opinionem hanc satis refutant tot artis falconariae doctorum testimonia atque experimenta.

## PAG. 113.

*Datus intendere sonis.* Mendum facile animaduertet lector. Sensus loci apertus est, sed, verba quae exciderint, coniecere difficile est.

*Abbecationes.* Ex vocabulo vetusto gallico *becco*, quod, referente SVETONIO in Vitellio cap. 18., galli rostrum significauit, descendit hodiernum Gallorum *bec*, *abbeccer*, *abecher le faucon*.

## PAG. 114.

*Pauitaret mordicat.* Legendum esse, *pascitur et mordicat*, docet locus plane geminus infra p. 124. linea 6.

*Tertiolis.* De niso mare intelligendum, docebitur ad ALBERTVM.

## PAG. 117.

*Remote a ianuis.* Legendum est *remoto*.

*Cauilia.* Vlitatius *cauilla* significat et clauum et malleolum pedum, vt Gallorum *cheville*. Confer CANGII Glossarium.

## PAG. 118.

*Quod commode fieri.* Videtur sensus postulare: *quomodo commode ferri*.

## PAG. 122.

*Dicuntur pollices.* Videntur digiti posteriores intelligi, quos pollicum locum tenere supra monuit.

## PAG. 123.

*Raspat eas.* Aut vox *palpebrarum* omissa est, aut legendum est *eam*.

## PAG. 124.

*Hoc vero irrationabiliter.* Sensus postulare videtur *Hic*.



*Non esse placabilia.* Abundat et sensum turbat insertum *non*.

PAG. 126.

*Ad videndum caliginosa.* Sensus exigit *luminosa*. In fine paginae legendum est *redeundum*. Sed aliud praeterea vitium aut lacuna latere videtur.

PAG. 133.

*Manum lassam.* Adfuit iam saepius posterior vox pro *laxa*, ex gallico, ut videtur, *lache* facta.

PAG. 136.

*Falco attendit.* Legendum esse *non attendit*, monet etiam GOTTFR. HENR. SCHAEFER, Medicinae Candidatus, qui paginas has corrigendas suscepit a prelo madidas.

PAG. 137.

*Situandi plumas.* In situm suum reponendi. Ex gallico *situer* ductum verbum.

PAG. 139.

*Retrahet ipsum.* Ordo postulat *retrahat*.

PAG. 140.

*Sic sufficienter.* Sensus notionem *paulatim* in hoc vocabulo requirit, eamque reperio in alio loco a CHARPENTIER laudato sub hac voce no. 2.

PAG. 141.

*Tergiuerfus.* Ex hoc optimum vocabulum *tergiuerfari* factum, et, quo ANASTASIUS utitur, *tergiuerfutus*.

PAG. 142.

*Muritegos.* Feles seu catos. Vide CANGII Glossarium.

PAG. 144. CAP. 61.

*Quod cognoscatur in eo.* Ordo postulat, ut *cognoscetur* legamus.

PAG. 145. CAP. 63.

*Longando a porta.* Legendum puto *elongando*, ut alibi, ex quo Gallicum *éloigner*.

PAG.



PAG. 147. CAP. 68.

*Quaque dieta.* Cuiusque diei cursu, seu quaque die.

PAG. 148. CAP. 69.

*De causis, quae — valet.* Legendum esse *valet*, suspicatur idem doctus iuuenis, quem supra nominaui.

PAG. 149.

*Milionibus.* Miluos intelligi, quos Galli hodie *Milans* appellant, annotavit CANGIVS in Glossario. Aquilae fulvae etiam idem nomen, sed errore, quem indicauit illustris BVFFON, tribuit falconariae artis scriptor WILH. TARDIF.

PAG. 150.

*Super dumos et caudam.* Quam ob rem dumos hic nominet, ignoro. Testiculis duobus glandulae peruncti geminae non inepte comparantur. *Virga* dicitur pars dura eminens, ductum excretorium includens, quae, ubi penicillus ductui appositus plumaceus abest, longior esse solet, quam in auibus illis, quae penicillum peruncti gerunt.

PAG. 151.

*Tot dies, quod.* Dicitur pro quoad.

PAG. 152. CAP. 71.

*Staffa.* Stapede, in quo eques pede posito in equum attollitur. Vide CANGIVM.

PAG. 161.

*Quae fuerant desiccatae.* Videtur verbum alienum, aliudque requiri, quod pennas suo loco motas significat. Ausimne *desituatae* coniicere, ut supra *situare* habuimus?

PAG. 163. CAP. 77.

Apparet etiam ex hoc loco, a Soldano Babyloniae transmissos habuisse se cum FRIDERICVM falconariae artis peritos Arabes, quorum opera in venatione et perscribenda eius disciplina vsus est. Idem praeter falcones alias etiam peregrinas aues Imperatori dono attulisse videntur, quas passim in hoc libro commemorat, veluti psittacum album l. cap. 23, quem a Soldano habuisse se transmissum testatur, ad quem locum laudat SCHMVTZERVVS Annales Ecclesiasticos BZOVII ad annum 1245. p. 514. et 1246. p. 526. Camelopardalin sub nomine Orasii a Babyloniorum Soldano transmissam FRIDERICO ex Gallico libri de natura rerum



rerum auctore memorat VINCENTIVS XIX. cap. 97., ex quo loco simul aetas auctoris illius gallici manifeste agnoscitur. Locum istum sub nomine *Oraflus* transcripsit ALBERTVS XXII. p. 223. a., vbi in fine addit: hoc animal temporibus nostris visum est et Serater arabice vocatur. Nomen arabicum *Seraph* esse scribendum, coniecit CONR. GESNER Quadrup. p. 213, atque ita plane scriptum habet ALBERTVS p. 213. a., vbi, *anabula*, inquit, vt scribit Plinius, bestia est Aethiopiae, quam Arabum quidam et Italicorum *Seraph* appellant. Sequitur tum descriptio a priore diuersa haec: est autem capite cameli, collo equi, cruribus et pedibus bouis praetendens similitudinem: per totum corpus nitentem habens rubedinem albis maculis immixtam: et est miri decoris, longo collo, et altis anterioribus pedibus et posterioribus cūrtioribus: et pellis eius propter pili decorem caro venditur pretio. Vnam harum secum temporibus nostris habuit Fredericus imperator in partibus nostris. Idem nomen *anabulla* cum eadem notitia nescio vnde habet VINCENTIVS XIX. cap. 3., sed arabici nominis atque Imperatoris mentio non additur. Vocabulum *Anabula* varietas lectionis est, pro qua in PLINIO VIII. cap. 18. vulgo *Nabin*, codices vero quidam *Nabuna* scriptum habent. Ex arabico *Zurapha* corruptum fluxit *Oraflus*, *Oraflus*, *Seraph* et vulgare nunc nomen *Giraffe*. Feminam habuisse secum videtur FRIDERICVS, quoniam cornuum nullibi fit mentio. Postquam ex altero in Palaestinam itinere militari redierat 1229, in conuentu publico imperii Rauennae habito anno 1231 populo spectanda et admiranda exhibuit plura animalium peregrinorum genera, quae secum adduxerat: elephantes, leones, leopardos, camelos et plures aues peregrinas nominant SIGONIVS et MVRATORIVS, auctoribus historicis istius aevi. Insecuto deinde altero anno, a Soldano Aegypti legatos cum donis variis et mirabilibus accepit, quae ex GOTHOFREDI Chronico commemorat MVRATORIVS. Multa suspicor ad historiam imperii FRIDERICI II. illustrandam facere in libris variis MICHAELIS SCOTI, quo familiariter vsus est; sed paucissimi sunt editi; ineditos quosdam, praeter eos, quos in praefatione laudo, CANGIVS commemorat in Glossario sub voce *ceruellerium*, qui locus omnino dignus est, qui a lectore curioso perlegatur. In Mensa Philosophica Francofurti edita 1602 bis tantum nominat FRIDERICVM; librum de Physionomia nondum vidi. Vulgo tradunt, librum de animalibus scriptum fuisse a M. SCOTO; quem liceret suspicari a VINCENTIO XVII. cap. 115. intelligi, vbi MICHAELEM de equo nilo laudat. Sed potuit etiam MICHAELEM Ephesium, ARISTOTELIS interpretem, intelligere. Inter libros manuscriptos CAROLI DE MONTCHAL LABBEVS Biblioth. nouae Manuscript. p. 203. libros XIX. ARISTOTELIS de historia animalium ex Arabico in latinum translato a MICHAELE SCOTO memorat, quem ob hanc ipsam operam in libris Philosophi positam laudat ROGERIVS BACO, egregium istius aevi ingenium, in libro de Linguarum vtilitate. Ita FABRICIVS in Bibl. latin. mediae et infimae aetatis, V. p. 234. Quae si vera sunt, tenemus auctorem versionis illius,



illius, qua etiam ALBERTVS vsus est. Nec alium de animalibus librum a scoto scriptum fuisse puto. Ex eiusdem ROGERII BACONIS libris de Perspectiua refert FREIND, Histoire de la Medicine p. 225., inter versiones ARISTOTELIS plures latinas vnā etiam recenter factam commemorari, ex graeco factam. Inuitus ipse ROGERII opere careo; possem enim ex comparatione versionis eius, qua ille vsus est, forte certius aliquid de hac re statuere. Veteres philosophi librorum versiones aliquot seculum 13 antecessisse, ex eo etiam intelligitur, quod HERMANNVS, cognomine Contractus, qui obiit 1054, a TRITHEMIO dicitur transtulisse nonnulla Graecorum Philosophorum et Arabum Astrologorum volumina in latinum sermonem, e quibus nominat Rhetoricam et Poësin ARISTOTELIS ex Arabico versam IOANNES METZLERVS. Seculo XIII. opus de naturis rerum libris 20 compositum, quindecennali labore confectum, a THOMA Cantimpratenfi, qui 1263 mortuus est, memorat TRITHEMIVS; quod suspicor esse idem illud, quod sine auctoris nomine excerptit VINCENTIVS, quodque in Bibliotheca Regis Galliarum manuscriptum latere infra docebo. Denique multos ARISTOTELIS libros naturales interpretatus est. Tractatum de naturis animalium scripsit etiam ENGELBERTVS, Abbas Admontensis in Stiria, qui post medium seculum XIII. vixit, vt ex PEZIO annotauit FABRICIVS, Bibl. latin. mediae et infimae aetatis Libro V. p. 295.

Quod si quis animo complectitur ea omnia, quae FRIDERICI II. ingenium et fauor litterarum diuinarum humanarumque studiis adstruxit, et scripta ea omnia considerauerit, quae vel ab ipso Imperatore vel ab aliis eius iussu scripta commemorauerunt historici, et quorum partem ipse in praefatione recensui, vix aequum videbitur iudicium, quod de eruditione et statu litterarum seculi tertii et decimi tulit LEIBNITIVS noster in praefatione Tom. I. scriptor. Brunsvicens. rerum. Hic enim de GERVASIO Tilberienfi, vixit, inquit, eo seculo, quod ego cum proximo omnium seculorum post Christum natum ineptissimum esse comperi; decimo tertio, inquam; quo subito omnes propemodum scriptores boni eranuere, cuncta in se trahentibus Monachis mendicantibus; qui tunc insurrexerant, et mox ignorantiam atque errorem etiam viuicomburio sancientibus: vt iam vix alia quam vtriusque iuris et scholasticarum argutiarum studia superessent. In ipso adeo GERVASII libro a LEIBNITIO edito insunt obseruationes multae praeclarae de rebus physicis sanique iudicii argumenta, etsi hac cum laude pugnare videntur fabulae superstitionesque aniles affatim per totum librum traditae. Scilicet GERVASIVS, miles et iuris potius quam physices peritus, ex aliena relatione aut auctoritate videtur tradere, quaecunque in Otia Imperialia collata OTTONI IV., Imperatori, obtulit velut otii imperialis oblectamenta. Hinc permixta, vt de Aegypti plantis tradit HOMERVS, in eo libro praeclara pessimis et praua rectis leguntur. Ad historiam naturalem, animalium auiumque indolem



quae in eo spectant, excerpta inde huc referam, quod et loca quaedam libri FRI-  
DERICI II. illustrari inde posse videntur; praeterea etiam titulus scripti Gervasiani  
haud multos historiae naturalis studiosos lectores alliciet; igitur verendum erat,  
ne porro notitiae in eo reconditae physiophilos laterent. Sequar vero ordinem  
capitulum, prouti a LEIBNITIO sunt edita.

Cap. 8. p. 890. E vino bibrones, ex aqua papiliones nasci tradit. Vbi *bi-  
biones* legendum esse, constabit ex Historia Scholastica PETRI COMESTORIS I. 8,  
vbi eadem exstant verba. Papiliones ex aqua natos quos dicit, referendi potius  
videntur ad Ephemera et Hemerobios LINNAEI.

Cap. 9. p. 891. Pisces in Hibernia adueniente solennitate sancti Brandarii  
sub altari a fluminibus et mari ascendere dici, factaque chorea, velut ordinata  
processione redire post exhibitam sancto reuerentiam. Narratio orta est ex an-  
nua piscium marinorum migratione in flumina, vt oua ibi deponant.

Cap. 11. p. 893. In monte Olympo prae nimia aëris raritate aues viuere  
nequeunt. Nonnunquam philosophi illuc adscendentes diu ibi manere non pot-  
erant, nisi spongas aqua plenas in manibus tenerent, quas naribus apponentes  
crassio rem inde aërem attrahebant. Idem narrat P. COMESTOR et ex eo VINCEN-  
TIVS.

Cap. 12. p. 893. Rorem a vapore terrae surgere docet experimento panni  
herbis superstrati, qui infra reperitur humidus, supra vero ficcus. Deinde etiam  
ex testa oui rore madiali repleta, foramine modico praeccluso leui quacunque  
materia, per hastam in sterquilinio aut in arena calida fixam ad cacumen vsque  
secreta virtute adscendere humorem.

Cap. 13. p. 894. Fabulis duabus allatis ineptissimis, nisi ad aestum maris  
referantur, docere conatur mare super habitationem hominum in aëre vel super  
aërem positum esse.

Sectio tertia a pagina 960. continet regionum terrarumque mirabilia, et  
tota fere ad historiam naturae pertinet. Plurima tamen de Arelatenfi prouincia,  
cuius fuit Marefcalcus GERVASIVS, et de Britannia, cuius ciuis olim fuerat, cer-  
ta satis fide narrantur. Hoc vero mirum mihi accidit, GERVASII hunc librum  
in Speculo VINCENTII naturali nullibi laudari, contra vero in morale narratio-  
nes quasdam esse translatas.



Cap. 18. Lacus Iohannis in vicinia Neapolis vrbis aqua teterrima infuso oleo efficitur limpidissima ac lucida, ita vt velut accensa lucerna sub aqua res quas-  
cunque in fundo latentes videre liceat.

Cap. 22. In regni Arelatensis prouincia Ebredunensi, in castro, quod Noth dicitur, est rupes magna, quam si minimo digito impuleris, totam ad fa-  
cilem motum duxisti, si vero totum corpus aut infinita plaustra boum admoue-  
ris, immobilis perseuerat. Similes et veteres et recentiores narrationes con-  
gessit diligentia Cl. BECKMANNI ad ARISTOTELI tributas Mirab. Auscult. p. 205.

Cap. 34. p. 972. Narratio de vento chirothecae Archiepiscopi Arelatensis  
incluso et valli ventis imperuiae ideoque infoecundae illato lectoribus in memo-  
riam reuocabit vtres ab Aeolo datos Vlyssi et vento repletos.

Cap. 44. p. 975. In deciduo (declini) Alpium Apenninarum iuxta castrum  
Secusiam (hodie Susa) in Taurinensi episcopatu est fluuius, in cuius ripa vidit  
GERVASIVS castorem, quem *Bever* appellat et breuiter describit laudatis versibus  
BERNARDI SYLVESTRIS, vbi Beber, Martur et Cifinus nominatur. Cifinus,  
quem alii Sifmusum appellant, videtur esse Citillus mus, Zifelmaus. BERNARDI  
huius Microcosmum elegiaco carmine scriptum laudat VINCENTIVS XXXI.  
cap. 49.

Cap. 48. p. 976. In regno Arelatensi et castro de Pulica aqua limpidissima  
in coquendo nunquam bullit.

Cap. 55. De cultura vermiculi tinctorii et ilicis aquifoliae in regno Are-  
latensi et ora maritima locum egregium iam olim edidit CANGIVS in Glos-  
fario.

Cap. 56. De cultura ferici mirabile illud habet, quod oua phalaenarum  
panniculo inclusa et in sinu dominarum ac virginum detenta excludi memoran-  
tur. Idem tradit Physiologus apud VINCENTIVM XX. cap. 119.

Cap. 63. p. 981. De ciconiis mirandum iudicat, quod in hieme flumini-  
bus se immergunt, in quorum fundo nonnunquam a piscatoribus dormientes ex-  
trahuntur. Se taliter e gurgite tractas ad ignem calefieri, velut a graui somno  
expergefactas, et vitae reddi, cum antea more lapidum insensibilium viserentur,  
testatur. In fine addit, sic et hirundines quercibus infixas concauis dormiendo  
hiemem transigere. De ciconiis fluuiis per hiemem immerfis aliud testimonium  
scriptoris idonei ignoro.



Cap. 65. De asperioli, (quem alii *Speriolum* dicunt, ut ALBERTVS III. p. 49. b., Galli *Ecureil*), fluuios transeuntis sagacitate narratio eadem est fere, quam sub nomine *Scuruli* habet VINCENTIVS XIX. cap. 105.

Coturnices cum migrant, continuum volandi laborem miro temperantiae consilio adiuuare dicuntur, dum vnā ad instar veli alā erigunt et vicissim permutatis alis sibi subueniunt. Nihil tale vllibi legi; PLINIVS austro non volare, humido scilicet et grauiore vento, annotat, aura tamen vehi velli propter pondus corporum viresque paruas; aquilone ergo maxime volare: ex ARISTOTELIS H. A. VIII. cap. 15. Coturnicem vulgo *quistulam* dici, annotat Gallicus libri de natura rerum auctor ap. VINCENTIVM XVI. 64. Gallicum *Qualia* ex Caille ortum habet CANGIVS; aliunde *Quaquiliam* et *Quisquillam* laudat CHARPENTIER; contra ARNOLDVS Villanouanus et ALBERTVS MAGNVS de coturnice *quisculam* ponunt. Quod denique COMESTOR in eodem VINCENTII loco tradit, coturnicem vulgo *curelium* dici a currendo, in eo quidem fallitur. Quam enim Galli curforem, *Corlieu*, *Curlieu*, *Corlis*, dicunt, ad aliud genus pertinet. FRIDERICVS II. eandem Corlinum appellat. Ceterum COMESTOR ille est PETRVS, Comestor cognominatus, Historiae Schol. auctor, seculo duodecimo qui vixit. Saepiuscule cognomen eius posuit VINCENTIVS. Sed in eius loco, qui exstat in Interpretatione Exodi cap. 34, reperiō *curlegium* scriptum. Simili errore idem COMESTOR cap. 16. Exodi; ranae genus a calamite diuersum rubetam appellat, vulgo *crassantium* audire addens. Vbi Gallicum *graisset*, aliis *croisset*, facile agnosces; sed Gallicum vocabulum ranunculo viridi arboreo proprium est. Glossaria etiam hac voce carent. Locum vero COMESTORIS sub nomine STRABI posuit VINCENTIVS XX. c. 60, vbi Gallicus libri de natura rerum auctor ranam arboream *coriens* cognominari ait; sed videtur vocabulum esse corruptum ex eo, quod MATTHAEVS Syluaticus adfert, *Cuconiones*, seu *Cucuriones*.

In subalpina Gallia inter altissimas rupes Condrusii hircos siluestres *Camusios* appellat, eorumque venationem docet. Vigil in apice montis custodiam agens gregis exsufflando sternutare et focios de periculo admonere dicitur. Vox est Gallica *Chamois*, quam tamen CANGIVS et CHARPENTIER omiserunt; contra aliunde CANGIVS habet *Camoccia* de rupicapra; et pannum *Camocia* et *Camuzum* dictum a pilis aut colore Camusii pellis arguit CHARPENTIER. Hodieque Hispanis *Camuza* audit rupicaprae pellis. Ex gallico vocabulo ortum nostrum *Gemse*, recte docet FRISCHIVS, qui ex vetere Bibliorum versione pro ibice laudat synonyma *Gemaisen und Krenken*. In ALBERTO MAGNO II. p. 36. a. reperiō *Genezon* scriptum; sed p. 137. b. rectius *Gemeze*.



Onagrorum (p. 982.) frequens venatio dicitur esse apud Poloniam; ipsi onagri dicuntur esse asini siluestres, cornua ad modum damarum gerentes. Cum ergo, inquit, venatorum cornua intonantia praesentunt, ad fontes properant atque immenso haustu se satiant, vt siccitatem ex calore currentis adauctam sumti potus humiditate temperent. Enimuero cauibz vrgentibus paulatim gradum sistunt et superuenientes tanta inundatione per nates inuoluunt, quod excoecatos diutius a sequendo retardent, et inter oculos obductos ad fugam citatam se accingunt. Similem narrationem de onagris habet Gallicus de natura rerum scriptor apud VINCENTIVM XIX. cap. 94.; sed ille regionem nullam nominat, nec cornuum meminit, aliam etiam stercoreis egesti rationem addit. Videtur ex historia bonasi Aristotelica fabula inepta profluxisse. Eandem sine dubio feram intelligi voluit BARTHOLOMAEVS Anglicus XV. cap. 30, dum de Bohemia scribit: et inter has feras est quaedam habens magnitudinem bouis; haec bestia ferox est, saeva et magna habet cornua et ampla, cum quibus se defendit. Sed habens sub mento amplum folliculum, in ipso aquas recolligit et currendo aquam miro modo in illo folliculo calefacit, quam super venatores seu canes sibi nimis appropinquantes proiicit, et, quicquid tetigerit, depilat horribiliter et exurit, et hoc animal lingua Bohemica *Loni* nuncupatur. In quibus quaedam indicia, vt folliculus sub mento et cornua, videntur alcem arguere. Nominis vestigia agnoscere mihi non licet, nisi latet *Lofs* et *Lozzi*.

Cap. 66. p. 982. Ad montis excelsi Cataloniae, in episcopatu Gerundensi, quem accolae Cauagum appellant, radices ex aureis arenis aurum elicitur, quod vulgus *palleol* nominat. In eodem etiam monte argentum foditur. Vocabulum *palleol* videtur quidem gallicum esse *paillole*, de auri bractea vsitatum, mihi tamen fere persuadeo, in eo latere vestigia vocis vetustae hispanicae *pala* aut *palacra*, de qua HARDVINVS ad PLINIVM, Tom. II. p. 618.

Cap. 68. p. 983. narrat astutiam vulpis, quae sensum a cauda ad labia vsque immerso aquae corpore pulicibus infestantibus se liberat.

Cap. 90. p. 990. Coemeterium memoratur in latere orientali vrbis Arelati positum, religione sacratum et fabulis. Apud omnes, inquit, maioris autoritatis Galliarum Principes ac clericos inoleuit, quod maxima potentum pars, quae in Galliis aut circa Pyrenaeos montes aut Alpes Penninas in pugnis paganorum moriebantur, illuc sepulturam habent, et quidam in plaustris, alii in curribus, nonnulli in equis, plurimi per dependulum fluentis Rhodani ad coemeterium campi Elisii deferrebantur. Mortuos igitur in thecis positos fluminis nulla vi infra Rochettam deferri, sed intra consistere, ad ripamque aut eiectos aut attractos coemeterio inferri narrat. Solere addit in doliis bituminatis ac euthecis corpora



ra mortuorum a longinquis regionibus fluminis Rhodani dimitti, cum pecunia figillata, quae coemeterio tam sacro eleemosynae conferatur. Latrocinio denique hunc morem dedisse occasionem narrat. Quis hic fabularum de Charonte et Acheronte non recordabitur?

Cap. 96. p. 993. de iudicio et poena adulterii in genere cynorum, et de ouo coruino ciconiae supposito et excluso quasi testis ocularis mira narrat, qualia de ciconiis etiam refert Gallicus de natura rerum scriptor apud VINCENTIVM XVI. cap. 48.

Cap. 102. p. 994. Brumestas vulgo appellari ait botros, grossiores acinos habentes, quae mihi videntur eadem esse cum vuis humastis COLVMELLAE et PLINII. In Glossariis vocabulum deest.

Cap. 104. p. 1000. Quae de vermiculo narrantur, quo Struthio vitrum fregit, ut pullum inclusum eximeret, et quo deinde Salomo usus est, ut marmora sanguine eius conspersa facile dissicentur, eadem exstant in scriptore de rerum natura Gallico apud VINCENTIVM XX. cap. 170; sed quem ille *Thamur*, GERVASIVS *Tanir* a Iudaeis appellari ait.

Cap. 122. p. 1004. In prouincia Ebredunensi vallis, in qua per Alpium summa cacumina facili cursu in aestate et breui, sed plurimum periculoso, transitu descenditur in Italiam, nominatur de Lentuscla, in cuius apice si quis tussierit aut clamauerit, statim ex altis rupibus nix coagulata descendit et exaggerationem ad se trahens infinito cumulo transeuntes obruit et ad infimam abyssum deiectos prosternit.

Cap. 133. De auibus ex arboribus pendentibus in Archiepiscopatu Cantuariensi Comitatus Cantiae ad confinium Albaciae de Faverethsam: aues istae ad quantitatem modicorum anserum crescere, pennis variis et anciniis (aucinis?) intermixtae, et quadragesimali tempore assatae comedi dicuntur. Auem vulgus *Barne-tam* nominat. Hic locus antiquissimam fabulae de berneclis auctoritatem habere mihi videbatur. Sed eiusdem clara vestigia reperi deinde in PETRI DAMIANI, seculi vndecimi scriptoris, Epistola VI. Libri II. p. 238, quae praeterea multa mirabilia refert, quae GERVASIVS excerptisse inde videtur; ipse contra PETRVS plurima verbotenus ex EVSTATHII Commentario in Hexaëmeron transtulit. Ibi igitur sic tradit: unde et terra illa occiduis partibus hanc consecuta est dignitatem, ut ex arborum ramis volucres prodeant, et ad pomorum similitudinem animati atque pennati fructus erumpant? Sicut enim referunt, qui se vidisse testantur, paulatim incidit pendulum quid ex ramo suspendi, deinde in imaginem volucris speciem.



speciemque formari; postremo quantulumcunque plumescens hiatu rostri sese ab arbore diuidit, sicque nouus aëris habitator ante paene discit volare, quam viuere. Initium orationis mendosum esse videtur. Locutus enim antea fuerat de insula Indiae, quam Thilon vocat. De illa igitur intelligere non licet, quod sequitur: *et terra illa*. Has aues VINCENTIVS saepe vidisse se testatur; anseribus minores esse, colore cinereo et nigro, pedibus anatum, sed nigris. Notat denique, non in ramis summis, sed in corticibus et stipitibus arborum pendere super ripas maris, laudatque auctorem narrationis IACOBVM, Achonensem Episcopum, in Orientali historia. (Intelligit IACOBVM A VITRIACO, Acconensem Episcopum.) Philosophus nescio quis ibidem addit, easdem aues in quibusdam etiam Flandriae partibus reperiri, herbis et graminibus, vt anseres, viuere. Esurum earum in quadragesimali ieiunio INNOCENTIVM tertium, Papam, in Lateranenſi Concilio vetuisse, libro XVI. cap. 40. — Obiter locos duos ex PETRO ponam, qui mihi omnium maxime memorabiles videntur. I. Ep. 15. p. 61. in hominis a cane rabido morſi vesica catulos generari, hoc probare vult argumento: quia, inquit, si is, qui canino morſu correptus est, cantalenas, quod muscarum genus est, in aqua tritos, ebiberit, mox cum vrina simul non sine doloris magni gemitu catulos fundit. Vbi cantalenas, quod vocabulum Glossaria omittunt, ex adiecta muscarum notione, et inprimis ex effectu, quem habent sumtae in vrinam, suspicor intelligi cantharidum speciem aliquam, aut proscarabaeos, hodieque repetito vsu adhibitos in eadem cura. Alter locus est II. Epist. 18. p. 270, vbi vxoris Comitis Guilelmi in Liguria turpe connubium cum mare simia, quae vulgo Maimo dicitur, commemorat, et natum ex tali adulterio ferali puerum eodem nomine appellatum. Vocabulum hoc omisit CANGIVS, qui contra locum scriptoris ex seculo decimo quarto habet, vbi baburnos coctos, mammones et psittacos simul commemorat. Recte iam CANGIVS ipse monuit, *baburnos* ibi esse pro *babuinis*; et auctoritatem ex seculo tertio et decimo affert, vbi beatae virginis imago memoratur cum pede quadrato stante super quatuor paruos *babewynos*. Iuxta simias *babwynos* aut *babwynos* commemorat scriptor apud MVRATORIUM Italic. Script. T. XII. p. 1011. 1017. et Tom. XV. p. 348. Ipse vero Maimo videtur idem esse, quem VINCENTIVS XIX. cap. 90. *Mammonetum* appellat, simia minorem, in dorso fuscum, in ventre candidum, caudam habentem villosam et collum ita crassum, vt caput. Vnde captus non ligatur per collum, sed per ventrem. Habet proprie admodum faciem humanae similem, nigram duntaxat, et sine pilis, a collo desuper frontem; nec est nasus ori continuus, sicut in simia, sed certum spatium inter vtrumque, sicut in homine. Vbi simiam aethiopem dicere mihi videtur. Idem VINCENTIVS cap. 102. seu potius coaeuus libri de natura rerum auctor, vt ex libro XXXI. cap. 126. apparet, memorat monstrum sua aetate Ludouico, regi Franciae, oblatum, magnitudine canis, libidinosum, cuius caput a canino non multum distabat, caetera corporis membra, vt homo, prorsus



fus habebat. Crura quidem nuda, vt homo, manusque, brachia, collum album et nudum, dorsum pilosum, habebat. Carnibus coctis vefcebatur, erectum, vt homo, stabat, et eodem modo sedebat. Alia simiarum genera aliis nominibus commemorat ALBERTVS XXII. p. 224. a.

PAG. 171.

*Vel saltem peiores legendum est.*

Denique quod supra ad pag. 75. dubitavi *Gallandiam* interpretari Groenlandiam, non erat iusta dubitandi causa, vt edoctus doctissimi viri I. R. FORSTERI litteris nunc intelligo. Is enim me admonuit, Groenlandiam nominari iam ab ADAMO Bremensi in Descriptione Daniae et Insularum Septentrionalium, seculi vndecimi scriptore. Nomen Gallandiae tamen ipse vir doctissimus alibi reperisse nondum videtur. Equidem in BARTHOLOMAEI Anglici libro XV. cap. 105. lego de Noruegia haec: ab oriente habet Galaciam, a septentrione Selandiam: sed dubito, num is Groenlandiam voluerit intelligi. Alibi enim, cap. 172, Winlandiam et cap. 174. separatim Iselandiam nominat.



# ANIMADVERSIONES

A D

## ALBERTI CAPITA

D E

FALCONIBVS, ASTVRIBVS ET ACCIPITRIBVS.

PAG. 176.

**S***ecundum calor.* Rectius VINCENTIVS ex h. l. color, XVI. c. 71.

*Grossius habere caput.* Recte VINCENTIVS: crassius habere caput et rotundum.

*Zuetae.* Noctuae interpretatur GESNER de Avibus p. 229. Italicum est *ziveta*. Alii scribunt *ziguetta*, *civeta*. Apud PETRVM Crescentiensem eodem sensu legitur *gimus* et *gimetta*. Hinc *ciuetator* apud CANGIUM. Aliunde etiam *zuetam* laudat CHARPENTIER.

PAG. 177. CAP. 2.

*Vtrinque ex utraque.* VINCENTIVS inserit et, *utrinque et ex utraque*. Idem deinde rectius *cranio*.

*In aliis esse plenum varietate — descendente.* Recte VINCENTIVS: in alis — descendentibus.

PAG. 178. CAP. 5.

*Quasi aerinum — aeriphylum.* Sic Venet. edit. GESNERVS laudat ex h. l. *aereum*. VINCENTIVS vero *aeriphylum*. In ipsa SYMMACHI epistola apud VINCENTIVM XVI. c. 71. *aeriphilos*, et praeterea in Codice RIGALTII *aërius* appellatur, vocabulum vero *sacer* ibi non apparet, nec in versione Catalanica epistolae.



*Oculos — flammeos.* SYMMACHVS apud VINCENTIVM habet: crura nodosa, pedes crassos, ungues crudeles — caput et pedes crassa, iuga id est — magna. Sed codex RIGALTII habet cum versione Catalanica: aspectum flammeum, oculos terribiles — caput et pectus grossum. Praeterea versio Catalanica omittis quibusdam habet: *los peus ha grosses et lons*, i. e., pedes crassos et longos habet; quos in exemplo latino non reperio.

*Super exhibitas.* Corruptam posteriorem vocem censet GESNERVS. Videtur supereminentes significare.

*Sub ipso nec aliqua volat.* Venet. ed. habet *aquila*. Recte. In eius conspectu interpretatur GESNERVS.

*Duo simul.* Hic Germanis Kuppefalken dici, suspicatur GESNERVS.

PAG. 179.

*Vox eius certifica.* Corruptum vocabulum vidit GESNERVS.

*Reclamatorium.* Esca pennacea, plumatile lorum THVANI, infra reuocatorium, quo falco reuocatur monstrato. Omisit CANGIVS. Ceterum de aerio-philone liber Gallicus de natura rerum ap. VINCENTIVM XVI. cap. 23. eadem fere omnia refert, sed verbis diuersa, quae ALBERTVS docet. Praeterea tamen ille tradit, hanc auem aquila *paulo maiorem* — pennas subrufas caudamque longam, ungues ac rostrum et crura maxima habere; contra consuetudinem aliarum avium nobilium absque ligamentis in perticis et in domibus manere; capreolos et hianulos capere, unguium laniatione oculis in bestia primum excussis, sicque terebrato cerebro usque ad vitae extinctionem. Sed etiam hunc locum scriptoris Gallici verbotenus fere, ut solet, repetiit ALBERTVS p. 228, ubi est: rufas habet pennas, caudam longam, ungues et crura maxima, et est parum maior quam aquila — et cerebrum capite perforato excutit — sine ligatura stat in partibus et domibus: quae partim ex VINCENTIO emendari possunt. Vocabulum *Sacer* a Ruthenico *Sokol* descendere, putabat FRISCHIVS noster; sed cum BOCHARTO Hieroz. II. p. 267. ab Arabico *Saker*, i. e. avis perspicax, deriuare malo.

IBID. CAP. 6.

*Gyrofalcones.* VINCENTIVS ex h. l. *Girfalcones* laudat; in epistola vero SYMMACHI ibidem est: Octauum genus est, quod Herodius aut vulgariter gyrfalco appellatur — hoc genus praecedenti communius est et carius habere propter temperantiam cibi ac vitae. Codex vero RIGALTII ibi habet: vel vulgariter Giffardus dicitur. Istud genus commune est cum genere aelyonis, et carius habetur propter moderamina cibi et vitae. Nomen Giffardi hinc CANGIVS male in suum Glossarium



rium transtulit. In versione Catalanica nihil, quod his verbis responderet, reperi, nisi haec, quae non intelligo, verba: *Nics francs et alegres. aquest es d' si matex d' adalye.* VINCENTIVS deinde cap. 95. Herodium seu gyrfalconem accuratius ita describit: est avis inter omnes nobilissima, colore coeruleo, in maxima tamen parte corporis ad albedinem declinans, praeterquam in pectore et alis, ubi caelestem colorem euentius imitatur, adeo fortis est, vt aquilam capiat, adeo quoque animosus, vt, cum post quinque grues vel alias quasque aues in aëre volantes fuerit dimissus, ab earum persecutione non desistat, donec omnes ad terram successive deiiciat — Herodius cum videt praedam, excutens se animat et discernit, an ad capiendum apta sit — Carnes crudas et seruatas non comedit, sed recentes. Est genus gyrfalconum, quod cognominatur Sacrum, et hoc validius est, et habet colorem fuscum. Herodius parui corporis est respectu alarum suarum. Vnde vides, nomen Sacri cum hoc etiam genere a quibusdam fuisse communicatum, et vocabula ipsa Gyrfalco, Sacer, vulgari consuetudine interdum confusa. Etymologiam indagare studuit FRISCHIVS noster; Gallis etiam et latinis barbaris scriptoribus *Grifalco* et *Gerfault* dicitur, Italis etiam *Grifagno*. — ALBERTVS VI. p. 71. a.: Aquila autem magna, quae apud nos est et Herodius vocatur, raro apud nos inuenitur habere nisi vnicum pullum, licet duo faciat oua. Et hoc iam comperimus per sex annos continuos visitando nidum aquilae cuiusdam; sed in talibus difficile est experiri propter altitudines montium, in quibus nidificant, nec potuimus experiri nisi desuper quodam submisso in fune maximae longitudinis de rupe. Idem libro XVII. p. 180. b.: Aliquae istarum, sicut herodius, ouant vnum ouum, tamen etsi ouant duo, multotiens inuenitur vnum corruptum, et hoc experti sunt aucupes terrae nostrae, quae est superior Germania, per continuos sine intermissione octo annos et nunquam in nido herodii inueniunt nisi vnum pullum. Dico autem herodium aquilam magnam, quae ideo herodius vocatur, quod heros est auium. Denique idem ALBERTVS initio libri XXIII. p. 226.: omnis enim aquila viget acumine visus, maxime vero illa, quae nobilis aquila vocatur, et haec herodius latine, quasi heros auium, vocatur. Est autem aquila grandis valde, tota nigra, licet in senectute ad cineritatem in dorso et super alas conuertatur, et est pedum valde croceorum et longorum et fortium vnguium, et est magni rostri cinerei ad nigredinem declinantis: magnarum et planarum alarum rectae pennae, quae in fine alae aliquantulum diuaticatae et ad superius sunt recuruatae, et est haec alte volans acutissimi visus — haec aquila oculos habet supra modum ardentes croceos, ita quod albugo oculi quasi similitudinem protendit topazion et pupilla in oculo quasi similitudinem saphyri nigri perlucidi conculcatae nigredinis: et loca ciliorum suorum sunt os eminens aliquantulum super oculos, ita quod membra sua visum adunare videntur: et ideo quando domesticatur, praedam videt leporum inter fruteta latentem, antequam considerari possit ab homine vel a canibus —



apud nos hoc genus aquilae semper in praeruptis silicibus sedens et nidum faciens inuenitur, sed semper substratum habet cespitem vel puluerem vel linum vel aliquas pelles animalium, quae praedatur: propter quod etiam peritiores falconariorum non diu dimittunt suas aues rapaces stare super nudum lignum durum et aridum, sed supponunt pannum vel corium vnguibus auium suarum. Habet autem herodius commune cum aliis rapacibus auibus, quod nisi contempletur escam vel praedam vel se tenentem quasi semper pedes respicit, quando sibi dimittitur, et frequenter ungues pedum per rostrum ducit, ut bene acuat ad praedam tenendam. (Ex hoc falconum more inductam esse credo opinionem, ungues eorum per rostrum ductos vnguento vropygii seu peruncti venenato oblini atque hinc vulnera infici etiam veneno et mortalia fieri.) — propter quod etiam falcones et herodii eiectione a parentibus retibus aucupum capti in terris, in quibus nunquam nidi eorum inueniuntur, peregrini vocantur. Herodius etiam domesticus super manum sedens duci non potest, sed potius brachio toto ab humero ultra manum corio ceruino cooperto et manu potenti sustentata brachio falconarii insidet: et cum prouocatur ad volatum, oportet quod dimittatur: quia aliter brachium falconarii nimis laederet, et ideo aut coopertis fertur oculis, aut, cum volare cupit, dimittitur et, cum reuocatur, redit ad brachium aucupis et tunc melius quiescit, aut capta praeda aut frustrata aquila. Haec omnia de Herodio ALBERTVS, quae quidem arguunt, eum de aquila germana ARISTOTELIS seu chrysaëto loqui, quam eandem etiam *ἀστέγαν* seu stellarem appellari, velut ex ARISTOTELE tradit AELIANVS II. 39. Recte hoc vidit etiam CONR. GESNERVS, Herodiumque ALBERTI a gyrofalcone distinguendum esse docuit. Idem etiam verosimillima, ut mihi quidem videtur, coniectura *Gerfalconem* appellatum primum fuisse suspicatur ab Italico *agirone* pro ardea, unde Gallicum *ayron*, *airon* et *heron* descendunt, quasi accipitrem, qui ardeas venatur et capit. Qui vero aquilam fuluam seu germanam Herodium interpretati sunt, incidisse mihi videntur in aliquos graecos aut latinos Codices, ubi alterum aquilae germanae nomen *ἀστέγας*, quod plerumque ardeam stellarem significat, notiore ardae seu herodii (ex graeco *ἑρωδιός*, i. e. ardea) nomine reddi viderant. Igitur origo erroris nominumque confusionis repetenda est a compilatoribus aut barbaris librorum antiquorum interpretibus. Quod vero ALBERTVS Herodio loca ciliorum (seu superciliorum, ut recte emendat CONR. GESNER p. 164.) esse ait os eminens aliquantum super (supra GESNERVS emendat) oculos, ita ut membra (palpebras intelligit GESNERVS) eius visum colligere videantur, recte hoc GESNERVS interpretatur, oculos eius esse cauos et profundos, et videndi aciem in eis ita melius colligi. Eiusmodi oculos quasi sub suggrundis superciliorum prominentibus latentes in aquila fulua memorat etiam illustris BVFFONVS. Eandem superciliorum eminentiam in lanario suo medio (illustri BVFFONO harpaye) annotauit FRISCHIVS noster ad Tabulam 78. Eandem de oculis aquilae germanae apud



PERRALTVM reperio obseruationem. Nunc igitur demum intelligo verba Imperatoris I. cap. 24. p. 30.: Cilia autem, quae sunt multum prominentia super oculos ad defendendum ipsos, in auibus rapacibus sunt detecta et plumis carentia, dura et sic tenuia, vt fere incidant: in aliis vero auibus sunt minus prominentia et sunt plumosa. Cilia enim hoc loco appellantur, quae nobis supercilia sunt. Recte adeo Cl. MERREM supercilia prominentia tanquam peculiarem notam aquilarum falconumque generi assignauit in Dissertatt. miscell. zoologic. p. 72. et 82. Haec in aquila albicilla LINNAEI, quam commodum ante oculos habeo mortuam, non solum mobilia sed deplumia etiam video, longe prominentia, cum in vlula seu glauce veterum, quam etiam viuam coram habeo, ne leuissimum quidem ossis superciliaris vestigium tactu percipi possit, sed oculus ipse protuberans palpebris vndique plumosissimis opertus sit. Proprie tamen os ipsum superciliare ita dici potest deplume, vt intelligatur palpebra superior super os illud retracta et immobilis, quae plumis plane caret. Obiter hic monebo, quam illustris BVFFONVS ossifragam appellauit, recte quidem ab eo comparari cum *Φήνη* ARISTOTELIS, quam philosophus aquila maiorem, colore cinereo, et *ἐπάεγγεμον*, i. e. oculis nubecula teclis, tradit, VIII. 3. et IX. 34. H. A.; nubeculam enim CORTESIUS apud ALDROVANDVM in membrana alba cartilaginea, dura et obscura agnouit, qua foramen vuae pupillare operitur. Verum miror, eundem BVFFONVM in aquila haliaëto (*Balbusard*), quam a PERRALTO dissectam fuisse nouerat, non annotasse, eandem nubeculam adesse, iride ipsa flaua et pellucida. Praeterea cornea eminens margine osseo protuberante tunicae scleroticae cincta est, quem ex CORTESIO in ossifraga non memorauit illustris BVFFONVS. Vides igitur, si iudicium de ossifraga seu *Φήνη* ARISTOTELIS nubecula oculorum sola nititur, illud inter species duas plane diuersas, vt PERRALTO et ipsi adeo BVFFONO videntur, admodum fluctuare.

*Actu, et voce.* Actum GESNERVS interpretatur mores.

PAG. 180. CAP. 7.

*Montanarium.* VINCENTIVS ex h. l. laudat montanum siue montanarium. In Epistola SYMMACHI ad Ptolemaeum, quam h. l. laudat ALBERTVS, legitur ibidem: Tertium genus montanum dicitur, breue et spissum valde in corpore, et praecipue est breuis caudae et spissae, pectoris valde rotundi, et magni, et fortium crurium et breuium respectu quantitatis corporis sui, nodosorum pedum et fortium vnguium, et hoc in consuetudine habet, quod frequenter respicit pedes; et est in dorso et exterius in alis cinerei coloris. Hoc genus ferum est, malorum morum et iracundum, inconstantis irae. Reliqua, quae ALBERTVS ex epistola illa laudat, ibi non exstant.



## IBID. CAP. 3.

*Peregrini.* Partem horum, inprimis de nidificatione in montibus praeruptis, quae ALBERTVS quasi ex relatione falconarii sibi facta docet, reperies verbotenus in epistola SYMMACHI apud VINCENTIVM XVI. cap. 71. Peregrinos etiam Tartaros a patria dictos *Sahins* appellat Gallicus scriptor apud BOCHARTVM Hieroz. II. p. 289, ubi est: qui ont la tête plate au dessus & le pennage borde de blanc & encores égalé de roux, dont il semble que la nature leur ait mis sur la tête une couronne. Auem Sahin describit etiam DAMIR Arabs, aitque, ex sacrorum genere, ipsum nomen peregrinum esse. Codex, ex quo locum scriptoris Gallici de natura rerum posuit RIGALTIVS, eundem nempe, quem paulo antea ex VINCENTIO laudaui, in compendium redegit omnia, et fere nihil de peregrino tradit; eumque Codicem sequitur versio Catalanica.

## PAG. 181.

*Sweimer.* De nomine hoc infra in Ianario videbimus.

## IBID. CAP. 9.

*Gybbosum* (sic Ven. Ed.) 'genus falconum primum, quod sciam', ab ALBERTO commemoratum vulgo creditur idem esse, quod Galli *Hagard* vocant.

*Longas et valde exortas.* GESNERVS emendabat exertas, i. e. eminentes.

## PAG. 182.

*Matriculis digitorum.* Vocis notionem, quae h. l. conueniat, nullibi reperio annotatam.

## IBID. CAP. 10.

*Falcones nigros* primus FREDERICVS II. Imperator videtur vt peculiarem speciem commemorasse. Ceterum PETRVS Crescent. X. c. 9.: et ex magnis falconibus quidam sunt nigri, quidam respectiue albi, et quidam rubei, ex coitu praedictorum inuicem generant.

*Butorius.* Buteonem intelligendum esse, monuit GESNERVS.

*Alium visum esse.* GESNERVS aliquando laudat ex h. l.

*Salamine Asiae.* Sic Ven. Ed. Nomen mihi ignotum. Ceterum de vniuerso falconum genere haec eadem fere PETRVS Crescent. X. cap. 8. Falcones, inquit, primo dicuntur venisse de monte Gelboe, qui est in partibus Babyloniae; et inde venerunt



venerunt in Sclauoniam ad palum nudum, deinde sparsi sunt per quosdam alios montes arduos, in quibus inueniuntur.

## PAG. 183. CAP. 11.

*Estoniae.* VINCENTIVS laudat ex h. l. Ostomaniae.

## IBID. CAP. 12.

*Rubeae, et nigrae.* VINCENTIVS breuius rubeae et nigrae coniuncta repetit, sequentia omittit. CONR. GESNERVS legendum censebat: sicut in aliis non sunt.

## PAG. 184. CAP. 13.

Eundem ALBERTVS alibi *Pes blauus* appellat et circum ARISTOTELIS interpretatur. Germanum est *Blaufuss*. De eodem epistola SYMMACHI apud VINCENTIVM XVI. cap. 71.: quartum genus pedibus et cruribus caeruleum, vnde et nomen accepit; hoc primo et secundo anno nobile, quinto anno vilissimum est. Versio Catalanica a RIGALTIO edita: *la quarta manera es gris, la qual es appellada gentil vulgarment & noble de noble de nom & d'persona*. Pergit ea: *La 5 manera es dita Gathena, la qual es prescios d'persona aspre & subtile*. Sed Codex RIGALTII latinus, vbi lacuna est, haec postrema verba alio trahit. Ita enim ille: Tertium genus montanum dicitur, et hoc asperius et subtilius est.

## IBID. CAP. 14.

*Mirle.* Ex h. l. *Smirlum* laudat VINCENTIVS.

## PAG. 185. CAP. 15.

*Butherii.* Pro *butorii* dictum et de buteonibus intelligendum, monuit GESNERVS. Gallis *Buse* audit. Germanicum vocabulum supra adfuit *Sweimer*, de quo FRISCHIVS noster.

*Lanarii.* Epistola ab ALBERTO laudata SYMMACHI apud VINCENTIVM XVI. cap. 71.: Primum falconum genus est, quod lanarium dicitur et in duo genera subdiuiditur; quorum vnum habet caput et rostrum crassa, pedes, vt aquila, quod cum graui labore habilitatur ad aucupandum, habilitatum tamen in secundo et tertio anno egregium est in volatu. Alterum vero staturae minoris est, et vile putatur. Vbi Codex RIGALTII nullam memorabilem lectionis varietatem offert; et cum eo concinit versio Catalanica. Gallis dicuntur *Laniers*, FRIDERICO II. *laynerii*.

IBID.



IBID. CAP. 16.

Quum aues rapaces tantus venereae libidinis stimulus non agat, quantus genera multa gallinacearum auium, et semel fere omnes per annum pariant, causam permistarum diuersarum specierum hybridarumque prolium ab iisdem rebus repetere non licet, quae quadrupedum, v. g. canum, et reliquarum auium adulteriis fauent. Igitur aut solitudo, in qua triste habitat coniugium vnumquodque auium rapacium, aut consuetudo longa, qua cum hominibus copulantur et in diuersarum specierum familiaritatem perueniunt, potuit hoc auium genus inducere, vt permixto genere adulterinam prolem procrearet. Poteramus certa et indubitata adulteriorum huiusmodi documenta a longa et diligenti falconariorum consuetudine et obseruatione exspectare; sed quae ALBERTVS h. l. docet, coniectura probabili satis nixa, virorum doctorum curiositati vix satisficient. His tamen iisdem fundamentis nititur disciplina illustris BVFFONI, qui nimis, vt facile credo, per multa indiuidua diffusam a scriptoribus methodicis classem falconum et accipitrum ad iustam specierum angustiam reducere conatus est, ne nomina scilicet pro corporibus vani amplecteremur.

PAG. 187.

*Guel.* Clarum est, intelligi pilulam, quae vulgo hodieque *Gewölle* aut *Gewelle* appellatur; itaque legendum censeo.

*Horis et quantitate qua siluestris.* Bene VINCENTIVS: hora — quo, qua et quando siluestris.

*Thamandi.* Voluit, puto, thamarindi. *Gambari* sunt, qui alias gammari dicuntur. — ALBERTVS VII. p. 78. b.: apud omne genus aquilae et falconum melius et ferocius est, quod venit ab aquilone a regione Suetiae et Liuoniae, cuius latitudo est plus quam 50 graduum ab aequinoctiali, et sunt aues feroces, et libentius comedunt pisces, quam carnes; ita quod quidam astures ex illa terra ad nos deducti aues quidem omnes capiunt, sed libentius comedunt cancos, quam aliquem alium cibum, et reputantur a falconariis nostrae terrae isti astures omnibus aliis meliores et nobiliores: et sunt valde magni; et dixit mihi quidam multum expertus, quod etiam in terra illa aquilae pro maiori parte cibantur piscibus, ita quod in nidis earum et iuxta nidos inueniuntur anguillae et pisces. — Quoniam locus hic inuitare me videtur ad explicandum copiosius auium rapacium victum, quam in singulis locis adhuc a me fieri potuit, non inuiti, vt puto, lectores obseruationes sequentes locum hunc obtinere patientur.

Vniuersum auium rapacium genus latrociniis et raptu viuit. Alarum ea est structura, volatus celeritas, animi morumque ferocitas, quam, qui earum opem

in



in venando abutendoque plerumque otio suo et obsequio parentium adhibent, nobilitatem appellarunt ex suo ingenio alienum spectantes, vt reliquas aues facile consequantur, vnguium rostrique vncinati acumine dilacerent, carnes deuorent calore vitali adhuc spirantes, et sanguinem caua lingua pro potu exhauriant. Etsi vero plerumque auium raptarum plumas diligenter rostroque euellunt, antequam carnes cum sanguine ingurgitent, saepe tamen accidit, vt plumas pennasque nimis auidae famelicaeque cum ossibus ipsis deglutiant. Miram hic videmus ventriculi succique gastrici vim et naturam, quae plumas pilosque animalium quadrupedum cum carnibus simul ingestos in massam rotundam collectos comprimit et per fauces violento motu reiecit, carnes vero cum ipsis ossibus breui temporis spatio conficit, in succum et sanguinem vertit, partem denique inutilem per sordes eliminat. Eandem plane animalium quadrupedum amphibiorumque, quae raptu viuunt, crocodili, serpentumque naturam admiramur. Potu igitur hoc vniuersum genus aut plane non indiget, aut raro, et fere, cum infirmitate aliqua interiora nimis calent languentque. In auibus rapacibus reliquiae animalium deuoratorum a ventriculo reiectae vt inutiles proprio sermonis nostri vocabulo *Gewölle* appellantur. Quam earum consuetudinem facilitatemque inutilia quaeque et noxia per vomitum reiciendi cum artis falconariae studiosi obseruassent, ingenio suo excogitarunt rationem, qua accipitres falconesque disciplinae assuetos et morbo aliquo ventriculi laborantes malo liberarent. Plumas enim aut lanam bombycinam compactam et in pilae formam redactam ingerunt auibus, atque has deinde accipitres cum noxa et cruditae adhaerente per vomitum reiciunt. Hunc ipsum denique accipitrum morem cum non ignoraret vir omnis rerum naturae sagacissimus doctissimusque, REAUMVRIVS, ingenio suo tandem accommodauit ad explorandam ipsius ventriculi succique gastrici vim et naturam, atque ita factis multis experimentis concoctionis rationem, quae fit in auium rapacium ventriculo tenui membranaceoque, egregie illustrauit. Vidit etiam is, cum carnes celerrime, ossa ipsa paulo lentius ventriculi vi consumerentur digererenturque, grana, fruges et reliquos fructus nullam fere a succi gastrici natura pati vim aut in similitudinem chyli alienari. Igitur hoc vniuersum auium genus nec violentissima quidem fame adduci ponit, vt apposita grana, fruges aut fructus deuorent. Clarum est, hanc ventriculi digestionisque naturam in auibus rapacibus totam pendere a succi gastrici natura; quam cum accuratius indagare atque explicare omiserit Cl. REAUMVRIVS, nuper tandem exstitit vir doctus, BRUGNATELLI, qui succum gastricum cum reliquorum animalium tum auium carniuarum experimentis chemicis exploraret. Is igitur succum gastricum animalium ruminantium multa aqua, sale alkalino volatili, materia tenaci terrea et sale satis multo culinari temperatum et ad putredinem facile transeuntem reperit. Contra succum gastricum ex bubonibus, falconibus, ardeis carniuorisque omnino aut pisciuoris auibus et piscibus desumptum aut in ipsis eorum anima-



lium ventriculis exploratum acidae inuenit naturae tam efficacis, ut ferrum, aes stannumque corroderet aut dissolueret. Succus vero hic multo minore aquae salisque culinaris parte, materiaque resinacea temperatus sanguinem a putredine defendit et lac celeriter coagulat. Praeterea ipse chylus et excrementorum fluidorum in auibus omnibus carniuoris pars albida acidam naturam eandem apertissime experimentis factis monstrarunt. In graniuoris auibus, quae tamen ventriculo musculofo differunt a carniuoris, eandem succi gastrici naturam acidam reperit vir doctus, quae causa est, cur eadem aues etiam carnes facile digerant. Ipsa denique animalia quadrupeda omniuora, dum carnibus aluntur, multo minus et admodum raro aquam bibere, tumque succum eorum gastricum minore aquae parte temperatum esse vidit.

Haec pauca de natura ventriculi succique gastrici facta a viris doctis experimenta etsi vniuerso auium rapacium victui morborumque rationi explicandae nondum sufficere videntur, ponam tamen nunc in vnum locum collectas, quascunque veterum aut recentiorum scriptorum obseruationes de victu auium rapacium morborumque inde natorum origine reperi, quo facilius viri me doctiores eas cum ipsa auium natura comparare, conciliare atque interpretari possint.

Aues igitur rapaces, quae sanguinem praedae hauriunt simul cum carnibus, praeter singulares aliquot species, tinnunculum et miluum, raro aut nunquam bibere, antiquissima est ARISTOTELIS obseruatio, H. A. VIII. 4. et 18. Fruges, etiamsi in os indideris, deuorare non posse, idem tradit, H. A. VIII. 3. Contra vero nuper Cl. SPALLANZANI hanc de vniuerso rapacium auium genere obseruationem veram esse negauit, aquilamque aliquam fame coactam panem deuorasse narrat. Verum facile is falconariorum consensu redarguitur; nec animaduertit, quicquid ab auibus inclusis ciboque alieno nutritis fieri videmus, ad earum naturam moresque referri non posse. Salis deinde vsum, ut ouibus animalibusque ruminantibus fere omnibus sanitatis pinguedinisque, ita falconibus mortis causam afferre, vetus est virorum doctorum obseruatio. (Cf. Cl. PALLAS Spicileg. zoologic. XII. p. 24.) Hinc igitur graecus Hieracosophii auctor a RIGALTIO editus carnem quamque veterem putentemque, uti etiam pinguem, inprimis tamen falsam a cibatu falconum prohibendam esse censet (p. 40.). Sales etiam per se datos intestina accipitrum corrumpere; oleum etiam, quoniam falem admixtum habere soleat, cauendum esse. Alterum caput (p. 43.) falconi dari iubet carnes porcorum iuniorum cum ipsis fetis, leporinas absque ossibus et medulla, quae vermes in ventriculo facere dicuntur, mures integros cum pilis, columbas cum pedibus et alis minute concisis; de coruo cor, iecur, cerebrum cum parte pectoris praescribit, sanguinem ut falsum defendit; cornicis esu plane interdicit; ex ardeola (stellarem puto intelligi) cor, iecur cum cerebro permittit, reliquas

carnes



carnes vt perniciosas defendit. Tertium caput (p. 48.) pessime a PETRO GILLIO versum carnes auium, gruum, anserum, columbarum, perdicum, turdorum sturnorumque cum ipsis plumis, vt in quadrupedum carnibus cum pilis, deuorandas vult, accipitremque prius moueri vetat, quam ossa, pilos plumasque vomitu reiecerit. Haec vero reiectanea esse in cibo vtilissima accipitrum generi, quoniam huic sicciore asperaeque materiae phlegma ventriculi facile adhaerescat forasque cum ipsa eiiciatur. Ossa scriptor hic reiciere etiam vult. Sunt enim species quaedam, quae partem istam praedae non adeo facile, vt aquilarum genus, digerunt, sed vomitu reiciunt. Alibi scriptor is (p. 118.) cauendam monet ardeae carnem, quoniam ventriculi intestinorumque duritiem, petram et lapidem falconariis appellatam, pariat. Contra scriptor barbarus a RIGALTIO editus de cura accipitrum p. 244. carnes ciconiae, ardearum (quas *γυτάρως* appellat, vt Galli *butors*), cyni mergique accipitri perniciosas et plane cauendas asserit; idemque praeceptum repetit p. 254. Aquae usum falconarius DEMETRIUS in Hieracosophio cum aliis adhibet, cum accipiter cauea includitur, vt pennas plumasque mutet. Apponunt enim tum vas aqua plenum, in quo lauet accipiter languescens, aut vnde bibat. Quo celerius vero mutet pennas, apponunt vas aqua marina, aut falsa, aut lixiuio cinerum vitis mista plenum, cuius potu et lauacro accipitrem adiuuari et recreari, dum mutat, asserit DEMETRIUS p. 36.

De victu accipitrum singularis est obseruatio ARISTOTELIS H.A.IX.cap. 11.; crudiore has aues omnium, quas ceperint, auium cor respuere, hocque obseruatum esse in coturnice, turdo et aliis; rationem etiam venandi mutare, nec eadem per hiemem, qua aestate, vti. Idem etiam tradit AELIANVS II. c. 42. eiusque rationem mysticam comminiscitur; sed contra ARISTOTELIS sententiam idem II. cap. 43. tinnunculum (*κρυχελς*) bibere vnquam negat. Deinde tamen VII. c. 9. accipitrum pullos a parentibus in tenera aetate cerebris auium captarum, adultiores cordibus, perfectos denique reliqua musculosa carne ali tradit. Quare excusationem dum ARISTOTELIS loco circumspeciebam, incidi tandem in versionem ALBERTI, qui locum plane interpretatus est, quasi legeretur scriptum *μάλισα κατεσθλει*, non, vt editur, *ε κατεσθλει*. Eandemque rationem sequitur vetus translatio a VINCENTIO XVI. cap. 19. posita, quae in plurimis locis cum ea, quam ALBERTVS ante oculos habuit, consentit. Igitur PLINIUS in corruptum ARISTOTELIS codicem inciderat; error tamen per eius scripta propagatus eo valuit, vt multi recentiorum scriptorum philosopho nihil tale merenti iniuriam facerent. Denique ALBERTVS libro XXIII. p. 227. de asturibus: scias autem, quod huius auis natura praecipue confortatur in aquilonaribus partibus, et ibi hae aues fortiores sunt et maiores, et, quando bene nobiles sunt, praedam non propter escam, sed ex gloria accipiunt et in tyrannide delectantur; et, si aliquid



de praeda concupiscunt, cor accipiunt: ideo auem, quam capiunt, ad latus perforant et cor extractum deuorant: aliquando autem etiam cerebrum concupiscunt et de capite extractum deuorant et totum aliud reiiciunt. Nobiles autem aquilonares caneros libentissime comedunt, quos tamen non venantur. Et ideo domesticati isti melius omnibus asturibus dominis suis aues magnas capiunt et canerorum cibum a dominis accipiunt in remuneratione.

PAG. 188. CAP. 18.

*Soda.* Dolor vel laesio capitis MATTHAEO SYLVATICO; sed distinctius MICH. SCOTVS in Physionom. c. 2.: dolor capitis, qui dicitur soda siue emigranea. i. e. hemicrania. Debeo locum CANGIO.

*Alices.* MATTHAEO SYLVATICO sunt extensiones omnium membrorum, quae voluntariae fiunt, post somnum maxime, vt quibusdam placet ex graui fumositatē etc. Est ergo pandiculatio. CANGIVS cum socio omisit.

*A quibusdam mortalis.* Corrigit renalis C. GESNER.

*Silera aut nullis vocatur.* Emendat idem C. GESNER *fylera* a nonnullis; quod quidem mihi probatur. Sed vocabulum *silera* ex hoc solo loco laudat CANGIVS.

PAG. 189.

*Testudo, quam limacem.* Solenne prius vocabulum de limace scriptoribus istius seculi, vt ex VINCENTIO liquet; omisit tamen hanc notionem CANGIVS cum socio.

*Petra.* Alii eundem morbum *lapidem* vocant.

*Pipio.* Pullus columbaceus. Vide CANGIVM.

*Infusionem.* De morbo habet etiam CANGIVS sub h. v.

*Carne bombacina.* CONR. GESNER emendabat lana bombacina.

PAG. 190.

*Lacrimali.* Sic Ven. Ed. Interiore angulo interpretatur GESNER.

*Coquenda — coctura.* De vssione seu cauterio eandem vocem habet CHARPENTIER; et CANGIVS sub voce *Cocteria*.

IBID.



## IBID. CAP. 19.

*Bulsum.* Id est *vulsum*. Hinc intelligitur, quae sint pecora vulsa VEGE-  
TIO I. 53. 4. Idem III. 65. 3.: ex nimio quoque aestu vel intolerabili frigore  
interiora vitiantur, et faciunt tussicos, unde vulsi appellantur. De vulsis totum  
caput 66. tractat, et meminit cap. 68. §. 1. Idem denique III. 42. 1.: iumen-  
ta nimio saltu vel cursu aut ruina cum aliquid intrinsecus ruperint, vulsant. Cf.  
GESNER de Quadrup. p. 513.

## PAG. 191.

*Passeris indici siue solitarii.* An eundem gemino nomine intelligi voluerit,  
nescio. De solitario ALBERTVS p. 239. a., auis, inquit, est nigra, merula minor  
et musica, quae cum nullo congenere vnquam congregatur, nisi tempore coitus.  
Habitat in parietibus et cum aliis passeribus se iungit et cum iis volat ad pastum,  
cum reliquis de suo genere aues omnino despiciat.

*Tinca* — *Sligen*. Editio Veneta *tincha* habet, quod propius gallico vo-  
cabulum est. Hodieque nobis *Schleihe* audit.

*Acutio.* Substantiam ferri in cote haerentem interpretatur GESNERVS.  
Forte legendum *acutia* pro cuspide. Vide CANGIVM.

*Calchiam.* Emendabat GESNER cadmiam.

## PAG. 192. CAP. 20.

*Substitiosus* — *grimal*. In posteriore voce (licet et priorem non explica-  
uerit, nec habet CANGIVS) haesit CONR. GESNERVS. Recte germanicus inter-  
pres vidit, hunc *grimal* esse vocem germanicam *Hungermäl*, i. e. famis  
notae.

*Pisani et mel.* Emendabat GESNER ptisanam et mel.

*Quae radix vocatur.* De raphano recte explicat CONR. GESNER. Vide IO. M.  
GESNERI Lexicon rusticum sub voce radix.

## PAG. 193.

*Hute.* Sic Ven. Ed. GESNERVS ex h. l. *huf* laudat atque emendat *unc*, nulla  
addita explicatione. Fortasse eundem intelligebat, quem sub voce *vnke* pro angue  
ex vetustis scriptoribus germanicis laudat FRISCHIVS. Medicamentum ipsum habet  
VINCENTIVS XVI. cap. 5.: aues generosae, vt notum est, in casis ex virgis fa-  
ctis mutantur. Quaedam vero vix operosa diligentia veteres plumas deponunt.



Quibus sic subuenitur. Serpens in frumento (ex Gallico *froment* pro tritico) diu coquatur, quo videlicet frumento gallina nutrita, auis illa reficiatur, sicque decenter mutatur.

*Bacone falso.* Gallis antiquioribus *Bacon* porcus saginatus, vstulatus et fatus, ipsa etiam perna vel petaso appellatur, vt docet CANGII Glossarium sub voce *Baco*.

PAG. 194.

*Gerulam cicadam.* Quid sit, nescio; nec querulam supponere ausim. Forte viridem scripserat.

*Glanum siue crudam carnem.* CANGIVS cum socio omisit, et nescio, an alibi reperiat.

*Aurea alexandrina* est confectio Nicolai, vt tradit MATTHAEVS Syluaticus. Ultra inquirere non vacat.

*Palmam benedictam.* Aquifoliam interpretatur GESNERVS. *Fungum mirti*, nisi de agarico dicitur, ignoro.

*Celsa siue ficus fatua.* MATTHAEVS Syluaticus, ficus fatua, inquit, ficus Pharaonis, sycomorus, Arabice Iumain. Eidem et SIMONI Ianuensi celsa sunt cynosbati fructus seu mora. Agrestis celsa est apud CAEL. AVRELIANVM Acut. II. c. 18.: agrestis celsae comam, quam rubum vocant.

*Brancha lupi* — *radicem caudae porci.* Cauda porci aliis peucedanum aut milium solis audit. Branca, i. e. pes, vngula, lupi quo alio nomine dicatur, nunc non reperio.

PAG. 195.

*Centinodiam* — *centineruiam* — *quinquineruiam.* Primam herbam plurimis aliis nominibus appositis interpretatur MATTHAEVS Syluaticus; centumneruiam explicat arnoglossum; eadem est quinqueneruia.

*Ramunculos virides de iubis.* Quid sit, nescio; igitur dubito etiam, an ramunculos sit legendum. *Poledrus* est pullus equi. *Politariam* iterum ignoro.

IBID. CAP. 22.

*Rapariam.* Vix puto, locum rapis confitum intelligi. Voluitne *ripariam*, agrum iuxta ripam situm?



PAG. 196.

*Albeo trito.* Aloë trita emendabat GESNERVS.

PAG. 196. sq. CAP. 23.

Exscripsit etiam VINCENTIVS XVI. c. 71., sed is praeter ALBERTVM laudat etiam scriptorem Gallicum libri de natura rerum, ex quo varietatem lectionis attulisse videri debet. Multa is in compendium redegit, pauca integriora exhibuit. Praeterea RIGALTIVS in Volumine Scriptorum rei accipitrariae graecorum, quod eruditis hominibus, quasi elephanto stipem, donauit, posuit etiam p. 201. seq. excerpta ex libro incerti auctoris de natura rerum de generibus et morbis falconum et accipitrum; quae plane eadem verbis iisdem tradunt, quae VINCENTIVS cum ALBERTO ex Gallico auctore libri de natura rerum commemorant. Poterat igitur opera edendi supersedere RIGALTIVS; bene tamen cecidit error iste, ut cognosceremus, in bibliotheca, puto, regia Parisiensi librum istum integrum fortasse latere, de cuius pretio aestimare poterunt lectores ex iis locis, quae ex VINCENTIO posui. Agnoscimus etiam in fragmento Rigaltiano multo distinctius ordinem, quo disciplinam rerum naturalium digesserat per litterarum seriem, quam etiam VINCENTII Speculum sequitur. Lectio Fragmenti fere ubique corruptior raro monstrat emendationum fontes aliquos; eam nomine RIGALTII signavi. Denique idem RIGALTIVS p. 183. epistolam Aquilae, Symmachi et Theodotionis ad Ptolemaeum regem Aegypti de re accipitraria Catalanica lingua scriptam edidit; de qua in praefatione libri haec paucula verba posuit: *edimus cum alia eiusdem argumenti ab Catalanico Romanensi quodam ambitiosis Aquilae, Symmachi et Theodotionis ad Ptolemaeum titulis non minus falso quam arroganter inscripta; digna tamen haec visa est, quae adderetur; quum haud pauca contineat rei accipitrariae praecepta utilia, quae Albertus Magnus operi de avium natura passim adtexuit et vetustissimorum auctorum esse adfirmavit, deceptus inscriptionis mendacio.* Videtur igitur RIGALTIVS sibi persuasisse, hanc epistolam primum dialecto Catalanica scriptam et praepositis hominum aliquot illustrium nominibus publicatam fuisse; eandemque deinde ALBERTVM excerpisse et ut genuinum antiquitatis monumentum laudasse. Verum, etsi adulteratam inscriptionem epistolae non infitior, illud tamen mihi persuaderi non patiar, eam dialecto primum Catalanica scriptam fuisse et lectam ab ALBERTO. Contra equidem ex latino versam existimo primumque a Gallico auctore libri de natura rerum positam, ex quo transtulit deinde ALBERTVS, qui illum scriptorem saepenumero laudat, interdum etiam taxat. Deinde plura epistola Catalanica habet medicamenta, quam ALBERTVS cum Gallico scriptore inde laudant, eaque omnia ordine peruerso collocata. Lectionem, quam interpret Catalanicus secutus fuerit, etsi non ubique perspicere potui; careo enim ANTONII BASTERI libro: *La Crusca Provenzale*, unde



vnde interpretationem vocum rariorem petere possim, quas dialectus Catalanica seu Prouincialis habet diuersas a reliquis idiomatibus: verumtamen illud satis aperte mihi animaduertisse videor, nihil hanc versionem ad emendandam orationem latinam afferre vtilitatis, sed potius clara monstrare vestigia corruptae lectionis, quam Interpres in libris ALBERTI aut Gallici potius scriptoris repererat. Singula nunc videamus.

*Lacte mulieris*, calido addit, VINCENTIVS et Codex RIGALTII.

*Aureo instrumento*. Simplicius VINC. et RIG.: accipe habile ferrum. Et deinde: vbi vertex coniungitur oculo ad nares. RIGALT. coque et pone.

*Saxifragiae*. VINC. et RIG.: staphisagriae — et fricabis postea solo puluere staphisagriae palatum eius. Sic etiam habuit Interpres Catalanicus. Deinde RIG. per vnam fistulam.

*Pipiam*. Breuius VINC. pabulam. RIG. pupillam.

*Densitate caulis*. Vitium vidit GESNERVS, sed mederi ei non potuit. Recte VINC. desiccati; RIG. desiccatae.

*Surices*. Sic Ven. Ed. Recte VINC. forices. RIG. furices. Paulo antea VINC.: qui nimium clamat, oneratus saepe est interius; sed rectius RIG. ouatus habet. Vespertilionem Catalanicus Interpres reddit *Moriac*.

*Eboli* — *cimini*. Sic Ven. Ed. Recte VINC. RIG. oboli — cimini. Pro *albuginem* — *in ea* — *dictum* VINC. habet albumen in eo — dictum. Denique pro *sanabitur* habet saluabitur. RIGALTII Codex a verbo fanabitur vsque eo: si febres habuerit, lacunam habet.

*Fracturas* — *in pennis*. VINC. addit: et in secreto naturae notatur.

*Dextrum crus* — *subtiliter*. VINC. RIG.: tibiam dextram — diligentissime. Pro posterius RIG. profundius.

*Et si vomit*. Emendabat GESNERVS *horret*. Sed recte VINC.: et si tremit et quasi frigus ostendit in plumis aut cibum cum fastidio sumit, aut etc. RIG.: tremit tanquam frigus ostendat plumis. at cibum. Pro tremit Catalanica versio *gita*.

*Sed male* — *inducit*. VINC.: et male tamen inducit. RIG.: et male tum induerit.

*Liuisfici*



*Liustici et carnem — feniculo.* VINC. RIG. *leuistici et cannae — foeniculi.* RIG. aneto.

*Rosaceo frigido.* VINC. rosarum frigidam, sed RIG. frigido, et litam pro linitam.

*Adipem anseris.* RIGALT. pinguedinem.

*Vel melius sume.* VINC. pro his: fel porci accipe et inde ei alas perunge. vel succo verbenae cibum eius intinge. RIG. item melius. accipe oleum laurinum et laua ei alas. sub alis ascellas eius vnge. ad idem etc.

*Gruile — muris.* VINC. galy pro γαλῆ, i. e. mussela, post muris addit *ratti.* RIG. parui alicuius gruile — muris ractis. Versio Catalanica: *gruil — rata* que es dit *guarris.*

*Super manum, miriam.* VINC. et RIG. in manu gestantis myrrham.

*Corpus eius, et intinge.* RIG. cor eius — inunge. Pro *rampa* VINC. *rana.* RIG. *rapina.* Posterius vocabulum in Glossarium transtulit CANGIVS. Catalanica versio *rampa* habet. Puto, Gallorum *Crampe* intelligi, quae *Crampa* et *Ranfus* tum audiebat.

*Nimium laxatur.* RIG. nimis laxatur. Sed VINC. nimium laxat. Pro verbis: *vel testudines albās* (i. e. limaces) *decoctas* VINC. habet: et intinge eodem cibum eius.

*Pinguedinem auxugiae.* VINC. et RIG. vnguentum. Deinde iidem *aloen.* RIG. *apyae — pennarum auium.*

*Et si est accipiter.* Haec verba omittit RIGALT.

*Nec multum coniungantur.* Rectius, ut puto, RIGALT.: ne multum contingas alas eius, ne alae pendeant e diuerso. Sed vulgatam lectionem ALBERTI sequitur Catalanica versio p. 187.: *no molt menegan les ales si per aventura no pengen:* i. e. ne multum tractes manibus alas, nisi forte pendeant. Atque ita tandem video h. l. laudari a VINCENTIO cap. 18., ubi pro *lucerna* modica est *lumine* modico, ut in RIGALT., et pro *gyros* habet *gyzos*; male. Gyri diuersi sunt a iactis, quos *laqueolos* appellat GREGORIUS et BEDA apud BARTHOLOMAEVM ANGLICVM. Iidem *mutas* nominant *mutatoria.* Porro ibidem accipitrum oculi dicuntur *ciliari*, claudi siue tegi, ipsi accipitres in pectore et cauda manibus *replanari*; reuocatorium ibidem audit *reclinatorium.*



---

# CATALOGVS AVCTORVM,

QVI

## DE RE ACCIPITRARIA SCRIPSERVNT, CVM LOCIS INDE EXCERPTIS.

**H**ieracosophion. Rei accipitrariae scriptores nunc primum editi. Accessit Cynosophion, Liber de cura canum. Ex bibliotheca Medicea. Lutetiae, ex officina Niuelliana. 1612. in 4. Edidit NICOLAUS RIGALTIVS cum versione PETRI GILLII. Primo loco legitur DEMETRII Constantinopolitani liber ad Imperatorem Constantinopolitanum scriptus, sermone non satis puro, igitur obscuro. Reliqui anonymi libelli additi nullo ordine, sermone vulgari graeco atque obscure scripti sunt. Igitur inde nihil fere discere licet.

AQVILAE, SYMMACHI et THEODOTIONIS quae dicitur epistola ad Ptolemaeum regem, et ab ALBERTO et VINCENTIO laudatur, dubiae auctoritatis est. De ea plura vide in notis ad ALBERTVM M. a me dicta.

GVILELMI, falconarii Rogerii, Siciliae regis, librum aliquem laudauit et excerptit ALBERTVS M., qui an alicubi manuscriptus aut editus latitet, ignoro. Ex capite 10. ALBERTI apparet, FREDERICVM secutum esse et laudasse dicta GVILELMO; sed dubitari potest, num ipse ALBERTVS librum viderit. De GVILELMO isto tacet nuperus Siculae historiae litterariae auctor, SIGNORELLI.

Praeterea N. RIGALTIVS in Praefatione ad Hieracosophium nominat hos artis falconariae scriptores: Phoebum Gasto Foxiae Comitem, Belisarium Aquinuum Neritiorum Ducem, P. Lopesium Ajala, Artelucium Alagona Marauequium, Moamum Arabem, Fridericum Georgium, Franciscum Sforzinum Caracatum, et Ioannem Francherium.

GVILELMI TARDI falconarii ad Carolum VIII. Galliae regem librum gallicum adhibuit cum Belisario et Petro Crescentienfi et excerptit CONR. GESNERVS; eundem etiam saepissime laudat ill. BVFFONVS.

EBER.



EBERHARDI TAPPII, Lunensis, germanicum de arte falconaria libellum sua memoria editum excerptit idem CONR. GESNERVS.

JEAN DE FRANCHIERES. Huius librum cum aliis eiusdem argumenti auctoribus D'ARTELOVCHÉ, DV FOVILLOVX et Anonymi sub litteris G. B. latentis, impressum Parisiis, 1614., ut egregium saepe numero laudat ill. BVFFON, cuius etiam auctoritate conficere conatur, ut illi credamus, falconem gentilem, nisi nomine, a vernaculo et Galliarum indigena diuersum non esse. Reliquos falconariae artis scriptores Gallicos contempsisse videtur illustris BVFFON. Quod quidem eius iudicium quam aequum fuerit, lectores ipsi facile iudicabunt ex locis illis, quae infra ex reliquis auctoribus excerpta ponam.

FREDERICI ZVNNIGA librum Salmanticae 1565. excusum de arte falconaria, quam Hispani Cetreria appellant, excerptit Introductio in Oryctographiam et Zoologiam Aragoniae, 1784. p. 70. Proximam ab Hibernis et Noruegis falconibus laudem tribuit auctor iis, qui in regno Nauarrae prope oppidum Oyardo colebantur; circa urbem Plasentiam generosam sobolem ex Hibernis falconibus propagatam commemorat cap. 15. Nomina arabicae originis habet haec: Alfaneque, Borni, Bahari, Sacre, Azor, Nebli, quorum quintum *Azor* falconem palumbarium, ergo asturem, significare, docet Excerptor ex descriptione ap. ALFONSVM ESPINAR III. c. 10. Falconem *Nebli* dictum ipse descripsit p. 68. et Pygargi speciem existimat, in quo eum falli puto. Buteo Aragoniae incolis *Alferraz*, Tinnunculus *Cernicalo*, Nisus *Esparvel*, reliquis Hispanis *Alcotan*, vniuersum vero falconum genus communi nomine *Gavilan* appellatur.

Ipse beneficio summi viri, HEYNI, hos scriptores consului, quorum primum titulos ponam:

1) Libro di M. Federigo Giorgi del modo di conoscere i buoni Falconi, Astori et Sparavieri, di essercitarli et farli perfetti, di governarli et di medicarli. Con una favola delle cose più notabili et con una giunta in fine della medesima materia. In Vinegia, presso Altobello Salicato, MDLXXIII. Foliis octonariis septem constat, inscriptus S. Carolo Gonzaga Marchioni, mense Octobri anni 1566. In alloquio ad lectorem extremo libro addito nomina graeca, latina et arabica medicamentorum, et ponderum mensuraeque defectum excusat auctoritate scriptorum, quos secutus erat.

2) Tre libri de gli ucelli da rapina di M. Francesco Sforzino da Carcano nobile Vicentino. Ne quali si contiene la vera cognitione dell' arte de Stroccieri, et il modo di conoscere, ammaestrare, reggere et medicare tutti gli augelli rapaci.



rapaci. Con un Trattato de Cani del medesimo. Con Privilegio. In Vinegia, appresso Gabriel Giolito de' Ferrari. 1568. Foliis quaternis sexdecim constat, formam tamen octonariam habet. Allocutio ad Ottavio Tiene Conte di Scandiano iactat experientiam quadraginta annorum et scriptorum Gallicorum et Italicorum de arte falconaria omnium lectionem. Primus liber falcones, alter astures, nisos etc., tertius morbos et medicinam eorum complectitur.

3) La Fauconnerie de Charles d'Arcussia de Capre, Seigneur d'Esparron, de Pallieres et du Revest en Provence, divisée en cinq Parties. La premiere est de la connoissance des oiseaux, avec leurs portraits, de leur nature et de la façon de les dresser. En la seconde est traité de leurs maladies et des remedes à icelles. En la troisieme sont donnés les moiens de se servir des oiseaux. La quatrieme fait voir l'anatomie des dits oiseaux, représentée tant par discours que par figures; ensemble un Traité qui montre comment les Faucons parient, pondent leurs oeufs, les éclosent et comment ils élèvent leurs petits. La cinquieme est de l'Autourserie, avec un Traité des Esperviers. Au Roy. A Paris, 1615. 4to. Sequitur:

Discours de Chasse où sont représentés les vols faits en une assemblée de Fauconniers. Plus il est parlé des oiseaux qui passent et repassent la mer annuellement, de ceux qui resident en leur pays: de leur naturel et nourriture, et quels ils sont chacun nommé par ordre. Par le même. A Paris, 1619. Deinceps:

La Fauconnerie du Roy avec la conference des Fauconniers. Par le même. A Paris, 1617. Plura de libro plane egregio et post Fridericum optimo eorum, quos equidem vidi et legi, infra dicentur. LINNAEVS laudavit editionem Francofurtensem anni 1617., sed errore forsan calami.

4) Les Ruses innocentes, dans lesquelles se voit comment on prend les oiseaux passagers et les non passagers: et de plusieurs sortes de bêtes à quatre pieds. Avec les plus beaux secrets de la pesche dans les rivières et dans les estangs. Et la maniere de faire tous les rets et filets qu'on peut s'imaginer. Le tout divisé en 5 livres avec les figures demonstratives. Ouvrage très curieux, utile & recreatif pour toutes personnes qui font leur séjour à la campagne. Dedié à Msgr. l'Archevesque de Tours par F. F. F. R. D. G. dit le Solitaire Inventif. A Paris, 1660. 4to. Liber hic praeter multarum avium mores tradit etiam libro 3. cap. 33. usque ad 36. varios modos aves rapaces capiendi retibus aut ope bubonum, adiectis vbique artificiorum picturis.



Falconum genus infinitis fere modis colorum staturaeque variari, docet CAROLVS D'ARCVSSIA, nominum tamen diuersitatem speciei nullam facere differentiam. In eodem saepe nido pullos falconum reperiri flauos, rufos, brunneos et colore turturum. Girofalcons, sacros et lanarios male fuisse in falconum numerum relatos, et cum asture ad diuersam accipitrum classem pertinere. Primo aetatis anno quinque diuersis appellatur falco nominibus. De nido detractus nidafius (Niais), Iunio, Iulio et Augusto mense captus gentilis, Octobri, Nouembri et Decembri captus peregrinus (Pellerin et Passager) dicitur; Ianuarius, Februarius cum Martio nomen illi antannalis (Antenere ou Antannaire, Italis Antenido, aliis Antevere), prima vero pennarum mutatio nomen Hagard dat, quod peregrinum interpretatur auctor, apud veteres rei falconariae artis scriptores gallicos eundem Mué des champs, aut madré, aut ardoisé, apud Aegyptios vero Hinayr audire monens. Cap. 6. curam nidafiorum docet, et cauere in cibo carnes prurientium animalium et auium ouis incubantium iubet. Oua falcones plurimum tria, saepe quatuor, interdum quinque excludere; postremum numerum generositatem auis arguere censet. Falconem nidafium a gentili et peregrino, nisi aetate, non differre, repetit cap. 17. Colorem nidafiorum brunneum magis quam reliquorum esse, contra ab aëre libero diuo gentilem et peregrinum colorem flauum trahere; quod tamen idem accidisse narrat nidafiiis, quos in alta turre aliqua nutriuerat. Gentilem a quinto et decimo die mensis Iunii ad eundem diem Septembris captum propter indolem bonam accepisse nomen putat. Peregrinus serius, quam gentilis, antannarius vero peregrino serius, hoc est autumno demum, mutat pennas. Falco mutatus (mué ou hagard ou madré) a fauro dignoscitur colore violaceo, quo humeri superius efflorescunt, colore capitis nigro, pectoris brunneo colore rufo permisto aut albo, maculis transuersis, cum antea longae essent, cera rostri aurea et iride oculorum (la bordure des yeux) pedibus concolore. Mutatos etiam venationi aptos esse contra vulgarem opinionem contendit. Quo pluries mutauerint pennas, eo pennae fiunt breuiores et angustiores. Rationem repetit auctor in siluestribus saepius mutatis, quod cura pullorum de pastu eorum multum detraxit simul et de generositate. Senectutem arguit pedum laeuitas, narium siccitas et cerae cum pedibus color aurantius ad rubrum inclinans. Mutatus proprie falco, qui semel, madrinus vero (madré), qui pluries pennas mutauit, appellatur. De voce madrinus vide, si lubet, CANGIVM sub voce *Mazer*. Barbaricum falconem, Alphanet appellatum, omnium optimum et pulcherrimum censet cap. 24. Mutatus is flauus fit et fere albidus. Cognoscitur facile plumagii mollitie. In venatione socio gaudet comite. Statura est infra Lanarium. Saepius cum Sacro iungitur adulterio. Sacrum nidafium dicere non licet, quoniam nidus eorum non inuenitur. Lanario nidafio multo maior, pedes breuiores et magis caeruleos habet, adeoque facile ab eo distinguitur his notis. Girofalco auium rapacium, quibus ars vtitur, omnium ma-



xima, frigoris impatiens. Nidassii ex terra Cremana afferuntur. Mutatus fit similis Lanario Barbarico. Acerrimus volatu vno conatu praedam capit, spiritumque gemina venatione consumit. Falco Tagarot corpus nimis paruum pro ratione alarum habet, ideo ventos timet. Volatum exercet longum vno spiritu, capite est grandi, pedibus magnis, viridibus aut caeruleis. Species hybridae nascuntur ex adulteriis Sacri et Lanarii, Falconis maris et feminae Lanarii, Barbarici cum Sacri femina (Sacret), Falconis feminae cum mare Lanarii (Laneret); et male quidam adulterinam sobolem Sacri et Lanarii Barbarici vt diuersam speciem Lanarii Russici aut Aegyptii nomine distinxerunt. Falconum omnium primum cognitum et in vsum venandi adhibitum monet falconem vulgarem, deinde ex Sicilia Lanarium allatum, postea ex Noruegia Girofalconem receptum, tum Aegypto Sacrum accersitum, denique Tagarotum inuentum esse. A paucis annis sua memoria ex America allatos falcones Aletas (Alethes ou Aletes) maxima nouitatis laude commendari, ait cap. 27. Corpore sunt mari falconi aequales, colore etiam dorsi similes. Pectus colore pallido aurantio nitet, lunula brunnea in abdomine versus femora conspicitur. Volatu terrestri celeri in venatione perdicum excellunt solitarii. Nomen huius auis nullibi reperio annotatum, sed suspicor, esse eandem, quam ex India orientali allatam et falconis rubri nomine appellatam descripsit ALDROVANDVS, cuius verba repetiit ill. BUFFON. Iconem posuit CAROLVS D'ARCVSSIA, sed reliquis peiorem, vt mihi quidem videtur. Praeterea tabula prima Falconem Corficum saurum; altera falconem in transitu captum, bis mutatum; tertia eundem cum eadem inscriptione; quarta Lanarium; quinta Alphanetum mutatum, caudae alis aequalibus, metatarso vltra medium plumoso; tabula sexta eundem a tergo visum; septima Sacrum mutatum; octaua Girofalconem mutatum, rostro breui et crasso; decima Smerilionem pingit.

Ex libro secundo de medicina falconum pauca huc referam; plurima enim pars a consilio meo aliena physiologia tum temporis satis puerili adhuc nititur. Morbum petram et lapidem aliis dictum appellat la croie et gravelle, illique gerofalconem maxime obnoxium esse. Facile tamen eum cauere, si diligens falconarius serdes auis inspexerit quotidie, quae albore lacteo, liquidae et late sparsae macula nigra immixta sanitatem integram arguunt. Lumbricos renales (filandres), nisi macris falconibus, non nocere, pinguibus vtilis, omnibusque adeo communes, cap. 23. Quadruplicem mutae rationem docet cap. 34. atque generatim falcones ex frigidis regionibus in calidiores delatos aut in montibus captos citius mutare pennas illis, qui ex Orientis calido caelo delati aut in ora maritima capti venationi adhibentur. Gerofalcones igitur citius meliusque Sacris mutare. Carnes salitae in cibo falconi certam mortem afferunt, cap. 41., ipsi tamen liberi terra falsa aut fale petrae assumpto humores ventriculi viscosos purgant, cap. 47.



Liber tertius artem mansuefaciendorum falconum disciplinamque omnem venationis docet. Mares omnium specierum feminas animo excellunt. Tria pediculorum genera falcones infestant: primum maius, alatum, a Graecis falconariis nitras (nitres) appellari ait; alterum minus, longiusculum, tertium paruum albumque est, cap. 11. Quos auctor falconarios graecos intelligat, ignoro. Dum falcones mutant, quam primum faxelli exciderunt, de cibo eorum imminuere oportet, ne deinde pennas novas iterum amittant, quem morbum a graecis scriptoribus Cleragram appellari ait, cap. 22., cum  $\kappa\lambda\eta\eta\epsilon\omicron\varsigma$  graecis faxellus audiatur. Aquilarum species septem numerat; duas, nigram seu regalem, et rufam minorem, Ellion, nominat; deinde de periculo falconum monet, quos aquilae saepe impetuant et secum abripiunt, cap. 27. De colore pedum tractat caput 29. Falcones, qui in insulis nidificant, auibis marinis variis victitare coguntur; quorum pulli si diutius in vicinia nidi commorati eundem victum frequentant, forte hinc colorem pedum caeruleum trahunt. Qui contra alio migrant, medium inter caeruleum et flauum colorem, viridem scilicet, induunt. Quod si deinde terrestrium auium carnibus, columbarum turdorumque inprimis, pasti fuerint, quo diutius extra maris oram commorati fuerint, eo pedes habent magis flauos. Hanc esse putat causam, quod Lanarii et Sacri, qui viciniam maris amant, sauri pedes caeruleos gerunt, qui color post primam mutationem cum aetate paulatim in flauum transit. Generatim vero aues omnes rapaces in migratione capti cum libertate pedum rostrique colorem mutant. Egregiam hanc viri peritissimi observationem in colore pedum ardearum charadriorumque cum aetate mutato saepe confirmatam animaduerti; nec erat, quod illustris BUFFONVS Sacrum et Lanarium propter pedum colorem caeruleum a falconum classe separandos censeret, etsi aliae rationes eandem opinionem probabilem satis reddere videntur.— Plumagii quatuor partes facit, dumam (le duvet), plumas (plume menue), vanos et pinnas decem. Prima pinna cerceau, altera la longue penne, tertia l'avant-longue appellatur; in asture contra quarta pinna longissima omnium est atque appellatur, cap. 32. Sublime petunt falcones, sole incalescente, coelo sereno, post niuem aut pluuias, aut cum eas praesentiunt. Sacri et Lanarii et inprimis Barbarici mense Martio id facere solent horis meridianis. Inter alia remedia bracalas (le brayer) cum dumis ouariae ad viuum refecare iubet, et perunctum oleo omni expresso aceto inungere, cap. 40. Caput 47. otidis cum falcone pugnam narrat. Quam primum ex grege otidum vna auolare conabatur, falco inflans in terram eam deiciebat vnguibusque prehensae iugulum elidebat. Hanc depredationem falco idem per plures dies hora matutina fere decima repetebat.

Quartus liber de partibus interioribus et ossibus falconum adiunctas habet tabulas duas, in aere expressas, quarum prior sceleton auis rapacis ab anteriore facie



facie conspiciendum et paucis litteris notatum, altera vero a dorso visam osseam compagem sistit, vbi costarum forma cum vertebris dorsi atque inuicem varie colligatarum praeclare exprimitur pictura. Iure igitur mihi in optimarum, quas de auium sceletis habemus, iconum numero collocandae videntur hae duae tabulae; quemadmodum ipsa etiam ossium enarratio adiuncta illis plurima habet annotatione atque admiratione digna, quae frustra alibi quaesiuersis. Iudicium tamen lectoribus omne permitto; cuius causa praecipua loca inde excerpta ponam. Omne auis corpus in tres regiones distinguit, et regionis cuiusque partes singulas ordine enarrat. Oesophagi fibras musculares triplices diuerse positas distinguit, le sachet prolobum, la manche, ventriculum membranaceum la mulette appellans. Felleae vesicae ductum ipsi ventriculo inferi, felque ipsum quouis mane post factam ciborum digestionem ventriculo infusum stimulum amaritudine sua addere ad reiiciendas ciborum partes duras (la-cure), praeterea etiam canalem intestinum ciborum lubricum reddere, fordibus tenacibus purgare, sanguinem attenuare, lumbricos eiicere. Ex carnibus praeter ossa plumasque vomitu reiectas praeterea ventriculo tamen adhaeret materia tenax viscosa, quae tandem in membranam coit, quae digestionis auis ipsique eius adeo sanitati multum officit. Gallis haec pellicula le double de la mulette dicitur. Oculum fere immobilem in latera utrinque retrahi non posse, ut in homine, sed in obtutu collum vertebris 12 compositum varie flecti; pupillam tamen ipsam angustam latioreque fieri variis auis affectibus, quem motum clariorem esse in iis, quae iridem griseum aut flauum habent. Oculos rapacium auium magnos pro ratione corporis acie videndi reliquis praestare, in antica parte angustatos et tectos ab osse aliquo, quod a latere rostri procedens supercilium sustinet, igitur portefourcil dicitur. Nervos opticos solos esse cauos. Sternum appellat le grand os carcassier, humeri ossa les mahutes & furculam le fausil ou portefachet. Ratio nominis posterioris haec editur, quod cauitas inter furculam recipit saccum gularem cibis repletum; comparatur igitur cum canali goulette dicto. Bene quidem; sed praeterea firmat furcula reliquam osseam compagem, quae alas sustinet. Imperator cauitatem inter furculam locum gorgiae appellat II. 19. et alibi. Omoplata, épaulette, costas iuxta spinam (os épinette) tegit praeter tres postremas, quarum vltima infra finem sterni non descendit. Omoplatam cum humero iunctam falci messoriae comparat. Processus costarum transversos quasi utroque fine cum costis connexos describit et pingit, ut cauitate thoracis inspirato aëre inflata aequaliter distendantur costae. Spinam cum ossis sacri tegumento osseo lato, le croupion dicto, committi ex aduerso diaphragmatis. Costarum priores quinque spinae, reliquas duas tegumento ossis sacri alligari. Pulmones a colore rubro falconariis dici inepte rougets. Sternum in anteriore parte descendens ventriculi dimidiam partem obtegit in asturibus, minorem vero partem in falconibus. Igitur vbi sternum desinit, contacto ventriculo licet iudicare, an falco cibi reiectanea iusto tempore euomuerit.

Ouari.



Ouarium feminarum, quas Falconarii les Formés, ut mares Tiercelets, appellant, pondriere audit. Ossa pubis (porte-brayers) non solum abdominis pondus sustinere, sed etiam conceptioni, ouorum sordiumque exclusioni seruire. Caudam (le Couderon) vertebris sex compositam gubernaculi vices gerere, duodecim pennis singulis vertebris utrinque senis impositis. Rarum esse numerum pennarum 13 caudae. Perunctum nomine gallico Couderon inprimis comprehenditur, quod humores corporis collectos eliminare putat auctor, cum ridiculo errore renes vteretresque aubus negasset. Cum vero aues perunctum fodiciant rostro plumasque et pennas pertractant, fieri hoc putat propter peruncti humoribus malis oppleti mordicationem et scabiem, non quod humorem oleosum inde rostro colligant, quo pennas inungant. Oleum enim plumagio non utile esse. Haec auctoris opinio, etsi argumentis idoneis destituta, reperit tamen patronum doctissimum virum, REAUMVRIVM, qui pennas plumasque oleo suo abundantes peruncti copiis non indigere censuit in arte excludendorum ouorum ope ignis, p. 146. vers. germanicae.

Alarum primum os humeri est, Mahute, alterum, cubitus cum radio anterieus posito, recipit vannos, tertium, quod metacarpi loco esse dixi, maiorem sui partem anterieus tenuiorem posterius, contra secundi ossis naturam, positam habet, et sex posteriores pennas remiges recipit affixas. Propter formam os hoc appellat Os archet. Quartum quintumque os indici digito vindicat, iisque pinas priores 4 affigit, quarum primam Gallis Cerceau dictam Graecis scriptoribus κληρον appellari falso tradit. Alam pollicarem aileron appellat, quatuor ei pennas assignat, easque, ut reliquas, mutari ait. Falcones, Sacri, Lanarii, Girofalcones primas alarum partes non habent tam longas, quam astures, contra vero reliquas alarum partes aptiores volatui et longiores usque ad faxellum gerunt. Intelligere videtur, maiorem cubiti humerique ossis longitudinem esse in falconum, quam in asturum, genere. Praeterea astures faxellos tres, falcones vero memoratos ante vnum modo habere; quod de longitudine primorum trium cultellorum minori in asturum genere interpretor. Ita etiam illustris BVFFON admonuit, falconum nobiliorum genus, ut Gerofalcones, Britannicos aut Sacros, Lanarios, Dendrofalcones, Smeriliones et Tinnunculum, alas fere ad apicem caudae pertingentes, faxellum aequalem fere sequentibus longitudine et acutum, contra vero astures, sparuerios, miluos, falcones aeruginosos et similes alas cauda multo breuiore, faxellum multo breuiorem, quartum cultellum omnium longissimum, falcones contra secundum cultellum longissimum habere.

Artuum inferiorum prima pars femur (hanche) proprio nomine caret, ut etiam altera, tibia (cuisse), tertia, quae metatarsi locum obtinet, gallicis falconariis aptissimo nomine porte-sonnette appellatur, quod illi campanula alligari so-



let. Iuncturas digitorum, interioris quidem duas, medii tres, extimi etiam tres, postici vnam modo numerat absque vnguibus indutis phalangibus. Vnguibus aues non solum praedam tenent et lacerant, sed et sanguinem ex venis stagnantem eliciunt, corpus scabunt, atque in iisdem rostri mucronem acuunt. Caput 8. de carnibus auium rapacium carnes putredini minus obnoxias esse, ossiumque pedum alarumque fracturas multo faciliorem habere medelam tradit. Aues siluestres vulnera accepta aqua lauata facillime curare. Cap. 9. de coitu refert. Falco mas extremo mense Februario primus in nidum (aire) ascendit, quem sequitur femina; vbi si plures, vt saepe accidit, mares conuenerint, pugna decernitur de honore mariti. Post coitum mox exclusa oua viginti diebus excudunt. Qui in ora maritima Prouinciae Galliae habitant falcones, quindecim fere diebus partum montanorum antecedunt. Feminam ouis incubantem mas defendit et iutrit. Custodiam pullorum in nido nudo, saxo rupium imposito, alterna cura vterque parens suscipit, dum alteruter praedatum exit cibumque pullis accersit. Quodsi tum forte aquila nido appropinquauerit, custos socium clamore aduocat, atque inde vterque aquilam aggressus regione expellit. Nutriuntur primum pulli carnibus minutim decisis; deinde aues mortuas et deplumatas obiciunt illis parentes; cum vero nigrescere incipiunt, viuam praedam, sed debilitatam, tironibus lacerandam oggerunt. Coturnices et turtures ex itinere verno redeunt primas in cibo tradunt pullis, et praeterea, si quae in vicinia rupium maritima columbae auesue marinae habitant et pullos suos excludunt. Cum primum volatum experiri debent, parentes sobolem clamoribus in vicina saxa paulatim eliciunt, ibique cibo oblato saginant. Tirocinium post mensem Iunium cum nomine nidafiorum definit, et tum vocantur gentiles; neque vltra parentes sobolis suae curam vllam gerunt. Aues rapaces sanguinem venarum stagnantem et corruptum vnguium mucrone elicere exemplis allatis docet cap. 13. Defluuium pennarum cum fastidio annuo humores corporis malos purgare putat; cum vero pennae mutari debent, rostrum prius saxo allidunt atque ita mucrone eliso cornu vetus nouo permutant. Plumas auium deuoratarum materiam humoremque ventriculi tenacem purgare, ideo loco pilularum vomitoriarum plumas imprimis falconibus, etiam dum pennas mutant, indendas censet. Eodem consilio ipsos falcones ventriculos turdorum iuniperi, baccis pastorum columbarumque, quae salem degustarunt, saepenumero deglutire. Falcones illi, quos liberos in silua vicina terrae suae nutriebat auctor, quouis mane ante ortum solis silua egressi in vicinis rupibus surgenti solis splendori et calori corpus siccandum opponebant. Hinc variis alarum motibus volatuque mirum in modum variato adscendebant, descendebant, aut in aëre suspensi librabantur. Postea fame inuitante praedam aliquam quaerebant, et post pastum si forte incaluerant, in vicino fluuio lauabant aut aquam ipsam haustibus pluribus degustabant, capite inter quemuis haustum ad caelum resupinato. (Cap. 16. p. 262. 263.) Medicinae loco assumunt in cibo falcones ranas, serpen-



serpentes, lacertas, gryllos, muscas, cantharides, oniscos, lumbricos terrestres adeoque herbas; vidit eosdem auctor mannâ et mora rubra in vicinis arboribus quaerere et decerpere. (Cap. 18.) De lapidis aëtitis natura etsi decernere non audet (cap. 20.), narrat tamen, se in aquila aliqua occisa iuxta commissuram renum (Croupion) lapidem ouatum eiusdem formae reperisse, quae aëtitis vulgo datur, qui siccatus deinde et manu ventilatus eundem etiam corporis inclusi motique sonum edebat. Certum praeterea esse, in multis etiam falconibus tales reperiri eodem in loco lapides, quos ex eadem materia aut reliquiis fucci, quo ova ipsa finguntur, in feminis senescentibus aut vano coniugii desiderio languescentibus oriri putat. Caput 18. enumerat tres perdicum species Prouinciae Gallicae indigenas. Prima vulgatissima, rubra, (LINNAEI tetrao rufus, BVFFONI Barta-velle aut perdix graeca), deuexa montium loca, lapidosa et fruticibus oblecta, aut thymo serpylloque plena habitat, gratissima in cibo; quae si aliquando loca natalia relinquit, eodem tamen mox redit. Altera media magnitudine et carnis sapore vncias 28. et 30., etiam vltra, pondere suo aequat; montes constanter habitat, vbi per hiemem musco arborum victitat. Pectus huius generis colore coeruleo caeli siue floris lini tinctum, alibi rufo alboque apparet; ceterum griseis similes sunt. Est igitur species Europaea rubra dicta ab illustri BVFFONO, LINNAEO omissa. Tertia species grisea omnium minima saepius alio migrat ex loco natali, fame aut venatorum insidiis coacta. Omne perdicum genus quo vetustius, eo maiora excludit ova; ex maioribus ouis pulli etiam exeunt maiores, quemadmodum et illi, qui mense Maio et Iunio excluduntur, maiores esse solent, quam qui Augusto. Perdices Chio allatas sibiue visas graecae vulgari similes per cetera, voce tamen diuersas, specie etiam differre censet auctor (p. 283.). Est igitur, quam illustris BVFFONVS Francolinum seu perdicem Indicam aut Cypriam dictam forma corporis, pennarum colore, pedum calcaribus, voce et caudae pennarum gestatione a reliquo genere distinguit. Sed is primus diuersitatem non animaduertit, vt nunc CAROLI D'ARCVSSIA testimonio constat, quod latuisse videtur ill. BVFFONVM. Hanc postremam speciem attagenem veterum esse censeo. Rubra species cum euolat, magnum crepitantibus alis sonitum edit, quo facile a grisea specie multo leuiore et celeriore distinguitur, vt tradit auctor Conference des Fauconn. p. 36.; eandem rem de media specie tradit ill. BVFFON. Reliqua libri quarti ad falconum medicinam pertinent, vbi instrumenta etiam quaedam describuntur et pinguntur.

Liber quintus de Asturibus vnam eandemque speciem multis colorum in pinnis oculisque modis variari a coeli aërisque temperamento diuersoque cibo, quo aues pascuntur, statuit. Exhibet primum tab. 300. paginae apposita asturem nidasium saurum maculis in pectore oblongis et transuersis caudae lineis quinque, altera vero p. 304. apposita eundem mutatum maculis transuersis lunu-



latis colli, pectoris ventrisque, iisdem in cauda manentibus. Cap. 5. asturem docet carnibus minute incisus et aquae tepidae saccharo aut manna permixtae inditis pascere, quo melius morborum periculis occurratur faciliusque pennarum mutationem toleret. Cap. 16. aues rapaces breuium alarum monet vno conatu praedam capere (d'une haleine, quod falconarii à la toise, à la source dicunt) celeriusque reliquis auibus de pugno euolare; quamobrem asturem solum vno conatu anatem capere. Eundem calore agitatam nimio adscendere volatu, omninoque aues, quo densius plumis dumisque vestitae sint, eandem habere consuetudinem adscendendi subito auolandique. Astures tamen nunquam tam alte, quam falcones, adscendere, et deinde sub vento in arbores vicinas descendere. Accidit saepe, vt astur in praeda deiecta incumbens auem totam prius deplumatam tacitus deuoret, vt tradit Auctor in Discours, p. 36. De sparuerio pauca tantum tradit cap. 25, vbi monet, falso quosdam tradidisse, sparuerios aliquos tredecim aut quatuordecim caudae pennas habere, cum ipse duodecim semper ibi repererit. Post librum quintum inferitur Sommaire de la Fauconnerie du Roi et des Vols que sa Maesté a inventés, paginarum 9, quae iterum numerum 297 vsque ad 313 inscriptum habent. Pauca hinc excerpta ponam, quae defensionem auium ingeniumque earum monstrant. Ardea, quam tres simul falcones aggressi erant, rostrum proximo cuique opponebat, tandem vero fatigata alis apertis, pedibus antrosum versis, collo tamen reflexo cum rostro ad terram subito descendit et a falconibus comprehenditur. Alia vt falconum assultus effugeret, in cortem descendens gallinarum gregi se immiscebat. Alia contra solem adscendendo splendore lucis defendere se conabatur, p. 313. Coruorum carnem in cibo falconum vt noxiam defendit p. 308. Columbam ciliatam falcones abscissis unguium mucronibus venari traduntur p. 310. Columba ciliata recta via ad coelum tendit emissa.

In libro inscripto: Discours de Chasse: primum annotatur, canum scabiei optime mederi sanguifugas corpori adhaerentes, dum canis in lacum aliquem perducitur (p. 16.). Bubonem (Chahuan) difficillime per vnum vel optimum falconem capi, quoniam insequitur praeda vltro praedatorem eiusque dorso semper instat (p. 17.). Otis tetrrix (Cannepetiere), postquam euolauerat, statim sibilum edebat ventremque sordibus purgabat; ex quo more natam puto narrationem ab Imperatore FRIDERICO etiam relatam, otidem his sordibus eiectis falcones arcere. Auem hanc celerrime ascendere et mense tantum Maio Prouinciam transire, affirmat Auctor p. 29. Picus viridis (Beche-bois) timens falconem ex arbore in arborem desultans facile hostis ungues eludebat (p. 40.). Aquilam regiam ipsam, quemadmodum palustrem, a falconibus animosis tandem deiici, contendit p. 41, aquilas vero aëre ventoso celerius volando ascendere multoque maioribus viribus resistere falconibus, quam coelo tranquillo et sereno. Sequitur a p. 44. ad finem catalogus auium indigenarum Prouinciae earumque, quae vere aut autumnno inde emigrant



grant aut aliunde immigrant cum designatione cibi cuiusque auium generis. Farri index hic multum ad emendandam versionem germanicam Itinerarii Prouincialis auctore PAPON, editam Lipsiae 1783, vbi pleraque auium nomina pessime fuerunt explicata vernaculis. Praeter alias nominat l'aronde de mer ou les barbeirols de trois sortes, le blavet, le sabat ou couvace, l'orfraye ou chapon sauvage, le milan noir, le muscat dit vautour, le rale de terre et le rale d'eau, le buri-chon ou roitelet, la longue langue dit coltors (torquilla lync), le grimpe mur ou pince aragne (certhia muraria), le coccu gris et le coccu roux retirant de pennage à la crefflerelle, (similiter Imperator retrahere de colore dixit ex Gallico retirer), la sirene (quam puto FRIDERICI sirenem esse), l'aigle grise dite chasse serpent, quae vere omnes in Prouinciam immigrant, noctu fere, mense Martio et Aprili, vento contrario volatum adiuuante, sed leni. Deinde vbi victum auium per classes enarrat, primum septem aquilarum genera distinguit, atque inter eas nominat les faures qu'on dit elions, les autours, les esparviers, les faux perdrieux. Inter aues, quae insectis, fructibus et baccis victitant, nominat inter cornicum 5 species la corneille du bec rouge, la grosse corneille dite graillau, le rale de terre, le coccu de deux sortes, la syrene. Quartae classis aues animalibus insectisque palustribus et vermibus inhiant, la cannepetiere (otis tetrax), le coac, la pale (platalea), le merle bleu ou marin. Cadaueribus innutritur ex quinta classe le milan noir de deux especes, le muscat, le chapon sauvage dit orfraye, l'aigle grise, nisi ea serpentes lacertasue in cibo assumere repertas potest. Sequitur distinctio ventriculorum per genera auium, vbi rapacium aliarumque auium ventriculum membrana-ceum et tenuem, Gallis la mulette dictum, ab omni canum genere in cibo abhorreret, nec ipsas muscas facile in iis oua deponere annotat (p. 51.). Formicas lingua longa exserta captare picos, torquillas (coltors ou foruvier) et auem pupu (vpupam puto) dictam, tradit p. 53.

Postremus liber: La Fauconnerie du Roy: primo loco venationem milui exponit. Is in iustam altitudinem aëris elicitur aut retrahitur emissio bubone aliquo (Duc) caudam vulpis trahente; deinde immixtis pluribus falconibus miluus supra falconum viam ascendere conatur, sed exceptis variis praedonum ictibus ala hac illaue flexa vertit se in varias partes, tandem supinus vnguibus pugnat, victus clamat et denique colligatus hostium vnguibus deiicitur. Milui carnes ne falconibus in cibo permittantur, cauendum monet. Alio loco (p. 20.) falcones, etiam dum pennas mutant, ad venationem aptos esse docet, multosque suorum idem plumagium per tres annos continuos retinuisse, paucissimis mutatis, narrat. Ad venationem auium alti volatus (à la haute volerie), vt ardeae, honorem primum Girofalconi, alterum Sahino (les Faucons de haute maille), Sacro maiori et minori (Sacret) tertium, vulgari vero, quem versus Hungariam Balarin appellari ait, postremum locum assignat. Contra Lanarios, Alphanetos et Aletas



ad perdicum venationem aptissimos esse; Aletam tamen, vt asturem, capta praeda se abscondere auemque deglutire monet (p. 12. 13.). Aquilam vnguibus tenentem serpentem grandem collo alisque praedonis implicatum subito delapsam ex aëre se vidisse narrat p. 19. Iudicium carnum falconum generi cuique vtilium petendum esse monet a natura sordium, quae quo albiores, tanto firmiorem auis sanitatem arguunt (p. 23.). Rationem, quae facit, vt multae aues nimis tarde aut nunquam plumas reiciant auium deuoratarum, (quod Galli curer appellant, vt pilulas, quae vomitum reiectaneorum adiuuant, cures), a macie auis fellisque defectu repetit; quare auem pilulis amaris purgare per vomitum docet (p. 24.). Exemplum duorum coruorum marinorum memoratur p. 27., qui a Belga aliquo mansuefacti et docti erant de pugno in pisces inuolare, quos ex fundo vsque ad 4 librarum magnitudinem extractos atque in saccum gularem coniectos domino vocati referebant, gula ipsa corda constricta, ne interim pisces captos deuorarent. Falconem Sacrum (Sacret) Henrici II., Gallorum regis, Parisiis mense Martio post horam matutinam decimam aufugisse alteroque die hora quarta pomeridiana in insula Melita, 500 leucarum spatio intercedente, receptum fuisse, narrat p. 33. Probabilem vero hanc volatus celeritatem lectoribus putat fore, si recordati fuerint, mense Martio coitus desiderium libertatisque et patriae in hoc genere reuiuiscere. Praeterea monet, aues non minori celeritate descendere lapsu deuexo aut obliquo, quam ad perpendicularum, cum in illo itinere motus alarum descensum acceleret, in hoc vero corporis pondus solum deprimat auem. Simile est, quod auctor libro V. cap. 22. de asturum cura narrauerat, falconem in loco leuca vna Parisiis distante aufugisse eodemque die Coloniae fuisse receptum. — Falcones Balarins dicti, parui, nomen ab Arabibus propter volatus leuitatem accepisse, et capite nigro esse in Prouincia, Sardinia et Corsica, verum in insulis Balearibus et in Hispania flauis et maculis dorfi (egalures) rufis, ceterum eiusdem plane speciei cum vulgari esse dicuntur, vti etiam Sahinus traditur (p. 38. 39.). Falcones etiam prioribus ouis ex nido sublati iterum ouare pullosque educare, asseritur exemplo (p. 40.). Falconem minutum (Falquet) hieme captum in Gallia memorat (p. 41.) senem, qui pluries iam pennas mutauerat, pedibus rostroque colore rubro ad aurantium accedente, vnguibus albis, pinnis vno eodemque colore griseo violaceo pictis, statura cuculi mutati. Hoc genus auium ad venationem ineptum Smeriliones sequi dicitur, vt reliquias praedae ab iis omissas deuoret. Ratio Smerilionum per hiemale tempus seruandorum docetur p. 43. Dendrofalco (Hobereau) ad venationem tuto adhiberi, nisi post mensem Octobrem, non potest; antea enim sequuntur hirundines, cum quibus etiam redeunt vere, vt cibo sibi gratissimo commode frui possint. Hanc vero praedam dendrofalconis non nominauit ill. BVFFONVS. Optime in venatione docentur comitari falcones et Smeriliones (p. 43.). Reliqua libri a consilio meo aliena omitto.



No. 2. SFORZINI liber primus enumerat quinque avium rapacium species, Aquilas, Miluos (*Milioni*), Girofalcones, Falcones, Smeriliones, Astures, *Astorelli*, Sparuerios et Lanios (*Regeftole falconiere*) omnium minimi honoris et pretii; quas in duas classes dispertit. Vna praedam ex sublimi inuolans ferit ungibusque tenet et rostro infixo vertebrae colli diffringit; ad eam pertinet Aquila, Miluus, Girofalco, Falco, Smerilio, forte etiam Lanius et quem appellat Astorella. Alterius classis aves recta hostem via aggressae insequuntur nec sublimine euolant, pedibus plus, quam rostro, valent, praedamque occisam statim mordicando deuorant, cum genus alterum aves nisi immobiles non degustet; pertinent huc Astures et Sparuerii. Peregrinum falconem nidarium in Italia capi negat, variasque nominis causas excogitat. Statura sunt magna, media et parua, alii longo, alii magis minusue rotundo corpore, plumagio flauo, aeruginoso (*rosso*), brunneo, aut turturum. Omnis varietas alas longas, cultellos latos et caudam longiorem montanario habet. Volans alas raro motitat, subitoque ascendit; quo saepius mutauit pennas, eo gula albidior et plumagium fit cyaneum. Falcones *Traversi* genus hybridum ex montanario et peregrino falcone natum, traditur cap. 3. Germanici peregrinis simillimi corona alba caput iuxta collum habent cinctum, cap. 4. Montanarii caput rotundum, superne eminens, rostrum breue et crassum habent; quo saepius mutauerint plumas, eo fit gula albidior, et maculae minores, cap. 7. Sacri caput superne planum et simile miluo cauda furcata habent; fauri a mutatis parum colore differunt, cap. 8. Lanarios fauros in vannis et coralibus postremis (vannazzi et mantelli) oculorum alborum speciem gerentes vulgo in Italia contemni ait, quod libertatis nimis cupidi sublimine petunt. (fanno la colonnata in aëre.) Caput 17. docet signa aetatis et numeri mutationum cognoscendi. Generatim igitur narium foramina perfecta (seu ampla, ut puto), maculae pectoris minutae, gula albida pedumque et tibiæ cutis laevis senectutem arguunt. Girofalcones et miliones per gradus ascendere et praedam insequi dicuntur contra, ac reliqui falcones, cap. 44. Milionem Girofalcone paulo maiorem, caput simile Peregrino, rostrum crassum, oculos nigros habentem memorat cap. 12.; altero vero loco, cap. 44., milio insequi dicitur milionem cauda furcata insignem, qui alio nomine forceluta appelletur. Hic vero an idem sit cum *Nibio* cap. 8. dicto, et Milano dalla coda forcilluta, ignoro; hoc vero ex postremo loco apparet, auem *Nibio* dictam miluum esse; cortes enim depraedari eam additur. Sparuerios Orientales habuisse ipse testatur, qui tredecim et quatuordecim caudae pennas gerebant, venando egregii, cap. 25. libri II. Germanicos fere omnes plumulas in tibiis et pedibus (inter squamas, credo, enatas) habere atque ita nosci, tradit cap. 27. Libri tertii cap. 2. iudicium sanitatis ex pilularum plumacearum, bombacinarum, canabinarum et linearum visu, cum vomitu reiiciuntur, cap. 3. excrementorum ex colore et natura docet; vermium genus *Filandre* dictum omnibus Falconibus inesse, sed, nisi macris, nimium non nocere, satis probabiliter docet cap. 15. Habitare dicitur

iuxta



iuxta renes membranula aliqua peculiari inclusum; quare medicamentis omnibus facile resistere, sed veluti inebriari allio mundato et oleo delibuto, quod falco deuorauerit. Coitus desiderium in sparueriorum genere cognosci aliquo veluti farinae flore cinereo et pallido adperso plumis medii colli usque ad postremam dorso spinam, cap. 25. Artem inferendarum pennarum ruptarum scissarumque docet cap. 28. De inferendis caudae pennis cap. 29. Perunctum dicitur *Codirone* (alias *Codione*, *Codrione*) et mediae caudae pennae *Coperchi*.

No. 1. Caput primum Georgiani libri pingit Falconem peregrinum; de corona capitis auctor haec ponit, quae non satis intelligo, dialecto Veneta scripta: prima habbia uno scriminale che si parta dalla becchera et vada fino a mezo il capo et sia bianco a similitudine di uno scaione, et habbia una ghirlanda da bianca che gli pigli tutta la rotondita della testa, et tre scaioni che si partino da questa ghirlanda et vadino verso il collo, et siano bianchi non troppo lunghi. Ptolemaeus regem de bonitate carnis ardearum ita laudat p. 31.: ma Tholomeo Re d' Egitto allega il contrario dicendo, che naturalmente tutti gli uccelli che vivono di pesce, rane, bische et altre generationi di vermi venenosi, sono di malissima digestionem, et che 'l suo sangue è opilativo et generativo di mali humori, ancor che paia che piacoiano tali pasti alli Falconi per la sua dolcezza. Ex quo loco suspicor, in libro aliquo vetustiore de arte falconaria exstare epistolam AQUIAE, SYMMACHI et THEODOTIONIS ad Ptolemaeus regem multo integriorem ea, quae in ALBERTI et VINCENTII libris excerpta legitur. Sanguinem corui calui, anseris (oca Farone), corui marini appellati cornizaro, coruassri, qui coruus Melitenensis dicitur, cornicum (cornacchie, taccole, gaze) et corui eremita, utpote falsum, cauendum monet p. 31., et de multarum auium carnibus iudicat. Auium rapacium, quas enumerat, nibii reali e neri (milui regalis et nigri), baurde, poiane da posta, aquilastre, albanelli, allocchi detti oleba (alucones) et barbagianni (bubonis quasi barbati) carnes male sanas cum sanguine censet, cerebrum vero imprimis strigum in cibo sumtum vermiculos creare (p. 32.). Iudicium sanitatis ex stercore (finaltidure) p. 33., ex pilulis (borgature appellat, quas SFORZINO purghe) p. 35. docet. Morbum petram seu lapidem FRIDERICO ALBERTOQUE dictum *calcinazzo* appellat; alium *soda* appellat p. 40., cum prae dolore avis caput huc illuc motitat, oculis clausis. Sileram ALBERTO dictam *silarano*, guttam mortalem eiusdem *gotta mortale* appellat. Verba ALBERTI: grana rubea, quae crescunt in spina alba, quae germanice hagedorn vocatur: ita interpretatur GEORGI p. 63.: certi grani rossi da Greci chiamati agedron. IORDANVM aliquem, veluti optimum falconariae artis magistrum et scriptorem laudat p. 64., quem aliunde non noui. Fueritne fortasse idem IORDANVS RVFVS, cuius de cura equorum liber manuscriptus adhuc exstat? GVILELMVM Neapolitanum p. 92. et saepius, Magistrum ANTONIVM et LVCHINVM (Luchino) p. 96.



p. 96. ut falconariae artis scriptores laudat; GUIDO vero p. 99. nominatus est fortasse medicus et chirurgus nobilis satis. Caput ultimum de pennarum mutatione (p. 104.) triplicem rationem explicat. Avis enim aut soluta sub diuo, aut domunculo inclusa (alla grada, quod SFORZINO alla pietra dicit, quoniam avis saxo alicui insidens in domunculo mutat), aut pugno insidens mutat; tertiam hanc rationem ignorat SFORZINO. Vnguibus primum et rostri mucrone ad viuum abscissis forcipe iubet decidere primam, secundam et tertiam pennarum, quas partitori appellat, cum supra adstantibus tegetibus (soprapartitori), relicta quarta et quinta cum faxello (spadetto). Fieri hoc monet, ne falco mutandus nimium alis se diuerberet; videntur ergo pennae partitori dici cultelli, primusque eorum spadetto. Tubum pennarum appellat canone. Desinit in enarranda ratione mutandorum falconum, quam ingenio suo repererat SIMONINVS.

Praeterea a CAROLO D'ARCVSSIA l. cap. 17. nominatos reperio artis falconariae magistros IOHANNEM DE FRANCHIERES, MOAMVM, GVILLIMVM, et GINCENAS, quos aliunde non noui. Alii nominant CHANTELOVCHÉ DE LA GONA, MALOPINVM, MARTINVM, CASSIANVM, MICHELINVM et MERCVRIVM aliquem.

Ex libro quarto loco nominato pauculas observationes, quas ad rem pertinere existimo, excerptas ponam. Mas perdicis griseae cutem inter oculos et aurem, cristam appellant, colore igneo, et sub stomachi regione maculam calcei equini forma colore Minimorum expressam gerit; eadem macula in femina iuniore dimidio minor adest, et crista colorem habet carneum. Femina saepius mutata pro macula ista pauculas notas colore foliorum siccorum gerit. Sed quaedam tamen feminae maculam maribus maiorem habent. Mas perdicis rubrae a femina, nisi magnitudine, non differt, praeterea calcare breui, quod tamen in vno alteroue feminarum pede etiam reperire licet. (Libri II. praefatio.) Cum perdice illice mares tantum eos capi asserit (p. 76.), qui coniuge carent feminasque adeo reliquas importuni in ouorum incubatione impediunt. Scolopax rusticola medio mense Octobri in Galliam aduenit, et Martio inde migrat. Vix nisi vulnerata eodem in loco ultra octo aut decem dies commoratur, humi inter densarum arborum tenebras latitans vermesque in terra quaeritans. Sub noctem ad aquas et prata vicina transit, ubi aqua sitim exstinguit et rostrum limo oppletum perluit; cum diluculo deinde ad silvas redit, quarum latus volatu humili legit, donec per partem aliquam apertam et liberam transire intus possit (p. 122.). In venatione coturnicum per illicem annotat, ante solis ortum et post eius obitum aut tempore pluuiis, cum agri et prata rore madent aut pluuiis, coturnices ad illicem non accurrere, sed volatu celeri appropinquare (p. 136.). Pluuiiales dictae aues societate magna gaudent et toto die volant. A festo inde S. Michaelis in Galliam



adueniunt, extremo mense Martio inde migrant. Magno in frigore loca mari vicina, postea loca edita frequentant. Agros vt plurimum confitos depascuntur, aquis deinde rostrum pedesque perluentes. Arboribus nunquam insident, sed in campi libero aliquo et tranquillo a ventis loco conquiescunt; nocte tota vagantur huc illuc et vermibus terrae instant, saepiuscule inter se appellantes; redeunte deinde die recollectae auolant. Cum volantes in aëre alias humi confidentes animaduertunt, appellant eas et saepe descendentes immiscentur illis. Amant praeterea societatem vannorum, charadrii Morinelli et tringae Hypoleuci (*guinaldo* et *guinettes*), sed facilius capiuntur, cum solae incedunt (p. 153.). Anseres, anates et querquedulae, aquis relictis vespera, cum diluculo illuc reuertuntur, per turbas diuisae, noctem in satis degunt vicinis (p. 175.).

BEDAM auctorem laudat, vbi de accipitrum cura, mutatoriis domunculis, reclinatorio, ciliatura et laqueolis pedum tractat BARTHOLOMAEVS Anglicus de Proprietate rerum, XII. cap. 2. Quae cum ex BEDAE libro de natura rerum ducta esse suspicarer, editionem operum BEDAE inspexi, sed similem locum nullibi reperi. Antiquissimus igitur scriptorum de arte falconaria merito habetur BEDA, Anglus, qui seculo octauo medio vita excessit. Isto vero aeuo ars falconaria in Germania nostra principum et clericorum vsu magis frequentata atque exulta fuisse videtur, quam alibi. Rex enim Cantiae, HEDILBERTVS, BONIFACIVM, Moguntiacum Archiepiscopum, vt falcones sibi duos mittat, quorum ars et artis audacia sit grues velle libenter captando arripere et arripiendo consternere solo, rogat in epistola laudata a CANGIO in Glossario latino sub voce Falco. Idem BONIFACIVS in epistola ad ATHEBALDVM, regem Merciorum, direximus, inquit, tibi accipitrem vnum et duos falcones. Denique Synodus Ticinensis anni 850. capite 4. cauet, ne clericus canibus aut accipitribus vel capis, quos vulgus falcones vocet, per se venationes exerceat. Vocabuli *capus* pro falcone vestigium exstat in SERVII, grammatici antiquissimi, commentariis ad librum decimum Aeneidos, vbi Tuscorum sermone falconem appellari ait *capys*. Seculi noni scriptor, THEODVLVS, carminum IV. 8. VI. 26. capos cum accipitribus nominans a capis anates, ab accipitribus anserem perimi memorat. Idem vocabulum ex Odone, Cluniacensi, Gallo, seculi decimi scriptore, affert CANGIVS, qui ex glossis PAPIAE Italicum nomen esse annotat. Denique ex locis veterum graecorum et latinorum scriptorum et reliquis, quae ex CANGIO laudaui, non improbabili coniectura colligit THOMAS PENNANTVS in Zoologia Arctica, aucupium hoc in regionibus septentrionalibus primum inuentum atque artificiiis variis excultum hinc ad alias nationes serius translatum fuisse.

Ordine temporum secundus a BEDA numerandus erit artis falconariae scriptor ALFREDVS Anglicus, quem cum GERARDO Cremonensi, MICHAELE Scoto et



et HERMANNO Alemanno (eodem sine dubio, qui vulgo Contractus a morbosa corporis natura appellatur,) inter linguarum politarum interpretes, qui infinita in latinum sermonem conuerterunt, numerat ROGERVS BACO in libro de vtilitate linguarum, vt tradit IO. LELANDVS cap. 183. Huius librum manuscriptum de motu cordis alterumque de educatione accipitrum commemorat LELANDVS; praeterea eundem ARISTOTELIS de plantis librum commentariis illustrasse ait, quem ipse vocat ALVREDVM. Hos commentarios excerpfit fere totos, vt conicere licet, BARTHOLOMAEVS Anglicus libro XVII. de Proprietatibus rerum, auctoremque ALFREDVM nominat. Eundem ARISTOTELIS librum ALBERTVS MAGNVS verterat et commentariis illustrauerat, vt annotat BARTHOLOMAEVS l. c. cap. 2. p. 782. ed. Francof. 1601. Nouam translationem eius libri nominat cap. 11., sed dubitari potest, ALBERTI ea an ALFREDI sit intelligenda.

Haec postquam scripseram, accepi a viro doctissimo, I. R. FORSTERO, transmissos libros aliquot falconariorum Italicorum, quorum mentionem omittere hic nefas puto. Praeter editionem FREDERICI GEORGII, Brescia 1607, quae adiunctas habet figuras auium rapacium aliquot ligno incisas, sed ad rem nullo modo pertinentes, eodem volumine continentur: Dell' arte del Strucciero con il modo di conoscere e medicare Falconi, Astori e Sparavieri e tutti gli uccelli di rapina. Adornato con le sue figure. Del Sign. Francesco Carcano, nobile di Vicenza. In Brescia, 1607, in 12ma forma.

Prima statim pagina formam instrumentorum exhibet ligno incisam cum breui interpretatione; reliquae figurae, nimis minutae et a disciplina ipsa alienae, auium rapacium naturam nullo modo illustrant. Totus liber morbos auium rapacium pertractat per singula eundo membra, methodo ea, qualem ab homine physiologiae imperito expectes; medicinas non adeo multas adhibet, et de multis experimenta sua interponit. Morbum aliquem falconum cap. 8. *capo storno* appellat, cum auis caput huc illuc motitat prae dolore, atque interdum de pertica cadit. Vermes *filandre* dictos omnibus falconibus a natura attributos esse asserit, nimis tamen copiosos et auibus macilentis nocere, cap. 15. Artis falconariae magistrum FREDERICVM ZORZI laudat cap. 23., alterum HIERONYMV M CORNARIVM cap. 30., denique MANOLI, graecum falconarium Domini BARTHOLOMAEI ALVIANI famosissimum, nominat ibidem. De mutatione pennarum agit cap. 25. Primumque incommodum, quod mutationem impedit, ponitur desiderium coitus, et feminarum grauiditas, quam ex clamore agnoscunt periti. Sparueriorum desiderium et amor manifestatur flore quasi aliquo farinaceo coloris pallidi cinerei medii colli superne vsque ad mediam dorsi spinam plumis adperso. Accidere hoc malum ait et inprimis cauendum esse a medio mense Aprili vsque ad finem Maii. Ad maturandam pennarum mutationem in cibo



laudat glandulas seu nucas sub gula arietis castrati pendentes; falconem pennis alarum denudatum nec volare valentem *grotto* appellat, cultellos et vannos *cor-telli* et *vanacci*. Reliqua excerpere, non operae pretium est. Sed de flore farinoso plumarum colli et dorsi in sparueriis amoris desiderio euocato quae tradit, egregie illustrant locum Imperatoris FRIDERICI I. cap. 46., vbi ardearum bifarum plumas et pennas tempore coitus flore quodam pulueroso et biso insigniri ait. Videtur autem genus peculiare ardearum aliquod bifas dicere; et video nunc in libro Italico, quem statim nominabo, ardeam regiam alio nomine *airo-ne biso* appellari (p. 107.).

Delle Caccie di Eugenio Raimondi Bresciano libri quattro. Aggiuntovi in questa nuova inpressione il quinto libro della villa. Hic libri titulus additam anni lociue habet nullam notam; sed dedicatio nominat annum 1626. A capite inde sexto libri I. p. 41. vsque ad finem septimi pag. 137. natura auium rapacium, earumque educatio, et disciplina omnis venatoria et medica explicatur; sed haec omnia cum toto libro ex pluribus aliis transcripta nullam proprii vsus commendationem habent. PTOLEMAEVM regem de carnibus auium falconibus salutaribus aut nociuis laudat p. 108.; FRIDERICVM GEORGIVM p. 110. Locum CARCANI de flore plumarum (ipse pennas male nominat) farinoso in sparueriis amore languentibus iisdem verbis repetit p. 112.; praeterea omnes medicinas ab eo allatas in librum suum transtulit, tam inepte, vt iisdem verbis propria experimentu etiam iactare videatur.

EX IO. PETRI OLINA egregio libro: Uccelliera, Romae 1684., laniorum, quos quidam curiosi olim ad venationem educatos adhibuere, nomina haec annotabo. Romano igitur in agro audit lanus *Castrica*, in Toscano *Verla*, in Lombardia *Stragazzina* vel *Ragazzola*, alibi *Falconcello* et *Gaza sparviera*. De toto hoc genere asserit, mensibus Iulio et Augusto in arboribus voces auicularum imitantes cantillare eoque dolo aues iuniores allicere et occidere, postea vero voce vniiformi strepere. Eadem de lanio minore affirmat FRISCHIVS noster in explicatione tabulae 61.; itaque nulla dubitatio esse potest, quam auem nomine venatricis (*αῖγρεὺς*) intelligi voluerit AELIANVS VIII. 24. De tempore ab OLINA statuto dubito; ipse enim minorem lanium mense Maio extremo suauiter cantillantem audiui. — Porro OLINA p. 52. sparuerios et miluos retibus capere docet, pictura apposita. Miluus quomodo emissio bubone, cauda vulpina pedibus appensa, a falcone capiatur, docet p. 56. Perdicem rubram in Italia *Coturno* et *Coturnice*, alteram vero minorem magisque vulgarem (pedibus non rubris) *Starna* audire, refert p. 57.



Poterunt facile catalogo huic attexere multos alios, inprimis gallice scriptos, de arte falconaria libros, quibus usus publicarum copiisque abundantium literariis bibliothecarum catalogorumque conceditur, quo mihi carendum est. Verum ex eiusmodi notitiis ad rem ipsam disciplinaeque incrementum parum proficitur, nisi simul argumenti summa lectori proponatur excerpta. Non despero tamen, fore, qui, perspecta rei utilitate, ex hoc initio a me facto, operam hanc in commune historiae naturalis bonum iterum susceptam continuent etiam cum felicio-  
re euentu.

---



# INDEX VOCABVLORVM,

Q V A E

A FALCONARIIS GERMANICIS ACCEPTA

POSVIT FRIDERICI INTERPRES GERMANICVS.

**N**on ingratum fore spero hunc indiculum non tam artis falconariae studiosis, quibus equidem scribere nolui, quam historiae naturalis et patriae linguae studiosis. Multa enim hic reperient vocabula, quibus augeri lexica nostra quamuis optima possunt. Quorum qui originem sagacius indagauerit, quam mihi facere vacauit, antiquitatum huius artis partem non exiguam simul is illustrabit. Sunt praeterea viri docti quidam, qui oblectandi animi causa aut, ut auium rapacium ingenium propius inspiciant, libros de arte falconaria scriptos legere non dedignantur. His igitur etiam prodesse cupio. Si qui praeterea libros de venationis hoc genere aut auium rapacium volatu et ingenio scriptos interpretari Germaniae nostrae voluerit, haud raro ad intelligenda artis vocabula hoc indice adiuuabitur. Denique falconariorum ingenium excogitauit multa verba, quibus corporis partes singulas earumque formam in auibus rapacibus signaret. Haec vero equidem, utpote communi magistrorum artis consensu approbata, magnopere etiam in methodicam scriptorum nostrorum Ornithologiam recepta vellem, ut factum cum vocabulo *cera* videmus a LINNAEO. Ita scilicet non opus erit, ingenio ut quisque suo nouus compendii auctor abutatur ad congerenda vndecunque aut fingenda vocabula noua, quae lectoribus saepenumero aut nauseam creant, aut ignorantiam sermonis latini et germanici arguunt.

Affamatae pennae Interpreti sunt *gestüpte*. Gallis *affamées*, Italis *af-famate*.

Annuli ferrei aut aenei, seu maculae loricarum II. c. 38., *die Mallea*, a macula aut gallico *maille*.

Area ex Gallico *Aire*, nidus, *Horst*, ex quo nidificare *horsten*.

Assicura.



Assicurare se falco dicitur, cum ex terrore animum recipit et ad quietem redit, ex gallico *s'assûrer*.

Aucupium seu venatio cum falconibus *Federspiel*.

Bibere aquam *schöpfen*.

Bracalae, Gallis *Brayer*, nostro *die Federn am Bruck*, II. 19.

Campanella pedibus alligata *Bell* aut *Rolle*.

Capellum, Chaperon, nostris *Haube*, vnde capello induere *aufhauben*, etiam *aufkappen*. Duplex eius genus *Rausch* et *Steckhaube* dicitur.

Cannula pennarum, tubus cartilagineus seu corneus nostris *Kiel*.

Capere praedam *vergießen*. An ex gallico *fondre sur l'oiseau*, cum falco auem cum impetu aggreditur delapsus?

Caudam II. 19. versus caudam *bis an den Stofs*. Alias caudam *Staat* interpretatur.

Cera Gallis *couronne*, nostris *Ring*, i. e. annulus.

Ciliare, *ciler*, *bloire* Gallis, vnde *éblouire*, nostro interpreti *aufbräwen*, et cum cilium dimidium attrahitur, *mit halben Aug*, aut *mit einem Schein*. *Braue*, *Braue* vetus vocabulum palpebras et cilia significat. Cf. FRISCHII Lexicon. Deciliare nostro *lofsbräwen*. Palpebras ipsas appellat *Schellen*.

Circumire in pertica aut sedili, de falcone inquieto, *betteln auf der Reck*.

Clamorosi nidarii II. 30. nostro dicuntur *sie lahn*.

Concoquere cibum *verdruken*.

Corales pennae *Flaggen*.

Corporis truncus *der Stelzel*.

Corrosae pennae II. 30. *gebinzt*.



Costa pennarum, LINNAEO rachis, *Schaft*.

Digitus interioris unguis, quo cibus laceratur et inciditur, *Atzklaue*. Cibus enim *Atz*, unde *atzen*, cibare, *atzhitzig*, famelicus.

Diuerberare se, Gallis *se debattre*, nostro *springen*. Cum falco territus caudam et alas aperit, II. 58., dicitur *Engel machen*, i. e. angelum simulare.

Dorsum et spatium inter utramque spatulam seu humerum *das Dach*, II. 24. et alibi.

Dumae seu lanulae *der Dunst*.

Empiniones, Gallis *l'aileron*, *die Mesquen* nostro. Forte a gallico vocabulo *mesquin*, i. e. minutus, parvus.

Femur *die Diehn*.

Ferire dicitur falco talo *schlagen*. Gallis *frapper*. Contra cum falco praedam unguibus comprehendit, Galli *lier*, nostri *binden* dicunt.

Fileria, credenzia, Gallis *filiere*, nostris *Lockschnur*.

Filo ligare alas, ne falco se diuerberet, dicitur interpreti *aufbreelen*.

Flagellare alis II. 52. *balliren*.

Gentilis falco *Schlechtfalck*.

Griseus color Interpreti dicitur *eluh*; nescio, unde.

Guttae plumarum dorfi *Troepeln* pro *Troepfeln*; Gallis, ut puto, *égatures*.

Gyrare volando, in gyrum volare, *ringhohlen*.

Humeri os *die Spale*. Ex Italico *spalla* deriuat FRISCH.

Iacti *die Schuhe*, i. e. calcei.

Iuncturae alarum mediae, seu impulsorium, c. 19. libro II., *die Hacken*.

Laxari



Laxari ventre, *spretzen*.

Longa, Gallis *la longe*, nostris *Langfeffel*.

Loyrum, Gallis *Leurre*, nostris *Lujer*, alias *Luder*, pro esca. Caro, quae escam praebet, *Lockfleisch*, *Lockblanck*.

Lumbi, *die Lahnen*. Cum falco retro se diuerberat, *durch die Lahnen gehn*. FRISCHIVS habet *Lanke*.

Malleolum, *Falckensack*.

Manfuefacere falconem ad standum super pugno, II. 49., *den Falcken lock-machen*.

Margo plumarum discolor, II. 24., *Plumage*, pennarum vero alae *Blume*, i. e. flos, dicitur.

Mutare pennas iusto citius I. 57. *schlingern*.

Mutatus semel falco *Hagard*, bis et saepius *forscher Hagard*. Qui mutationem primam nondum perfecit, *Lapart*, nescio, unde.

Nascentiae in pede ap. ALBERT. cap. 19. *die Binn*.

Passagio (de) capti falcones, *Dreckfalcken a drehen*, i. e. trahere aut migrare.

Peregrini falcones, *fremde Falcken*.

Pertica, *die Reek*. Cf. FRISCHIVM sub voce *Rick* et *Riechvogel* de bubone.

Perunctum Gallis *Couderon*, Italis *Coderone*. Interpres primo loco *Oel-drüsen*, sed II. 48. et 69. *die Staud* appellat. Perungere pennas, *die Federn durch den Stuart hohlen*.

Petra, aliis lapis, morbus, cum sordes nimio calore in speciem lapidis induratae intestinis haerent. A calcis et cretae similitudine Gallis *la croie*, Italis *calcinazzo*, nostro interpreti *die Frons*, nescio, unde.

*Pillard* Gallis dicitur falco, qui socium venandi detrectat eumque impetit, aut praedam ei rapit. Male interpres ubique scribit *Billard*.

Frider. Rel. Tom. II.

R

Pili,



Pili, aut qui inter pilos et lanulas mediae sunt plumae pullorum, II. 8., *Feufelshaar*.

Pilositas pennarum et plumarum vtrunque costae *das Glänzel*. Costam cum pilositate vulgo *die Fahne* dicimus.

Pluma tactum falconem mansuefacere et reuocare ex terrore, *spinnen*, *abspinnen*.

Plumata II. 48. *das Schleimfel*, eam cum euomit, dicitur *schleimen*.

Plumagium, nostro *Gefürt*, alias *Gefieder*.

Podagra ap. ALB. 18. *die Binn*, alibi *Binnemann*.

Ramagii falcones *Decklinge*, vt nidarii *Nestlinge*.

Saurus falco, *rother Falck*.

Saxellus, prima penna alarum, *Seule*, pro *Säule*, puto.

Sedile, cui falco alligatur, *die Fule*.

Stercus falconis, *der Schmelz*, emittere st., *schmelzen*. Gallis *l'esmeut*, *esmut*, *esmutir*, *émeutir*, etiam *croller*, Italis *smaltitura*.

Sternum, *Borstbein*, pro *Brustbein*.

Sternutatio cum fluxu narium ALB. c. 18. *die nasse Frons*.

Subaxillaria ossa I. 33. *die Uchse*.

Substitiosus falco in morbo appellatur a FRIDERICO apud ALBERT. c. 20., vbi editio mea vocem germanicam *grimal* habet; sed Interpres, nescio, vnde, sed recte, posuit *das Hungermal haben*.

Talus falconis, *die Fangklaue*.

Tinea balneatoria, *die Badbrennte*. Cf. FRISCHIVM sub voce *Braente*, *Brente*.

Tira-



Tiratorium carnosum, *Zieget*, nervosum, *kalter Flügel*.

Tornettum, *die Drahle*, a *drehen*, *drahen*, i. e. girare, tornare.

Trahina, Gallis *Trainee*. Cum ostenditur falconi, dicit Interpres *trainen*, cum cibatur eo, *Vorlofs geben*.

Venter seu ouaria, *die Bruck*; vnde Bracalae *die Federn am Bruck*. Cf. FRISCHIVM sub voce *Bruch*.

Viridis pedum color, *bitur - Fuss* audit Interpreti. An a similitudine pedum, quos ardea stellaris, Gallis *butor*, aliis *bittor*, habet?

Vox falconum ad coitum prurientium dicitur *falzen*; alias *balzen*.

Volatus falconum vti habet varios modos, ita et suo quisque modus vocabulo designatur. Primum igitur, quod ALBERTVS c. 3. dicit celeri volatu ascendere, Interpreti est *kliemen*, vulgo *klimmen*; Gallis *monter*. Deinde: ex obliquo descendere: Interpreti: *einen Bund machen*; sed Index interpretatur hanc phrasin de arcu, quem avis facit in descendendo, quando praedam ferit aut capit. Porro ALBERTVS vbi descendere dicit, Interpres *streichen*; Index vero hoc verbum interpretatur de plano falconis volatu. Cum falco descendit infra avem, nec eam ferit, Interpres ponit: *den Durchgang geben*; sed idem c. 3. eadem phrasi reddit latinum: ictum dare; quod longe aliud est. Cum falco super avem insequitur volando, donec videat eam in proportionato situ percussionis, Interpres ait: *bis er ihm einen Stecken gesteckt hat*. Alis suspensis pendere in aëre interpreti est *hängeln*; in gyrum volare *ringhohlen*.





D E

# VOLATV AVIVM RAPACIVM

## OBSERVATIONES.

**P**rodiit, sed in paucorum manus peruenit, vt video, egregius liber et exquisitis ad naturam auium rapacium earumque volatum venationemque illustrandam obseruationibus refertus, hoc titulo: *Observations sur le vol des Oiseaux de Proie. Par M. Huber, de Genève. Accompagnées de figures dessinées par l'Auteur. A Genève, chez Paul Barde, Imprimeur Libraire, 1784.* Constat foliis quaternis sex et dimidio cum tribus et dimidio foliis tabularum in aere excusarum; vnde excerptas ponam et in compendium commodumque in ordinem redactas obseruationes eas, quae tabularum et figurarum in eis pictarum ope adeo non indigent, vt plane intelligi non possint. Postquam vero volatus instrumenta satis explicauimus in commentariis ad librum FRIDERICI, et quicquid sectionum anatomicarum ope et sagacitate indigebat in structura corporis atque imprimis alarum machina et volandi artificiis, diligenter collectum ex virorum doctorum libris posuimus, non alienum esse puto a consilio nostro, nec ingratum fore lectoribus spero, si additis his egregiis HUBERI obseruationibus omnem auium rapacium disciplinam, quousque quidem ad historiae naturalis studiosos pertinet, perfecrim et quasi consummauerim. Sed audiamus nunc ipsum magistrum artis loquentem.

Natura ipsa omne auium rapacium genus in duas classes gemina et plane diuersa alarum fabrica separauit. Harum formam prima pingit tabula, sumtis ex miluo et falcone exemplis. Nec ab ea, nisi extra auium rapacium ordinem, variis gradibus paulatim discessit magnus rerum opifex. Igitur aues omnes rapaces aërem aut remis aut velis alarum permeant, quarum ex forma alteram classem auium remigum (*Rameurs*), alteram velificantium (*Voiliers*) nomine, vt et ipsas alas (*aile rameuse* aut *Rame*, et *aile voiliere*) distinguit auctor. Alae remigum pennae vtrinque decisis et in acumen desinentibus componuntur (*decoupée*), quibus aërem findant et crebris ac fortibus ictibus percutiant. Contra velificantium alae pennarum formam habent latiore et obtusam, quae expan-



expansae non tam aërem crebris et fortibus ictibus percutiunt, sed velorum vsum aui praebent. Prior forma vim aëris repellentem facile vincit, et cum ventum contrarium ictu pennarum findit, ipso aëris repulso subleuatur, dum in itinere pergit. Non solum vero viribus atque ictibus alarum, quibus aër finditur, sed et ipso corporis pondere auis subleuatur. Quodsi vero auis remex ventum post se habet, aërem quidem ipsum tum non habet renitentem, verum eam ipsam ob causam fursum impellitur multo minus, quam coelo omnino tranquillo. Auis igitur meatu horizontali seu plano ferri cogitur, ventique ope vti aliter non potest, nisi ad alas variis modis huc illuc dextre regendas et flectendas. Inter auium remos nauiumque nullum aliud discrimen intercedit, nisi quod in volando remus deorsum ducitur atque ictum dat, contra vero nauium remi retro ducuntur. Vt vero intelligatur, auem ictibus alarum datis deorsum impelli simul antrorsum, cogitare debemus, alarum formam et faciem inferiorem seu interiorem esse concavam seu fornicatam, fornice ad initium cultellorum maxime deuexo. Formam hanc etsi in alis compositis ad quietem conspiciere non adeo manifesto licet, multo tamen clarissime monstrat eam actus ipse atque ictus in aëre expansarum. Mago tum anterior cultellorum multo firmior, densior atque acutior, inprimis faxelli et sequentium duorum aut trium ictibus magnis findit aërem, reliqua vero alarum pars mollior vi ictus minus magisque incuruata cedit, ita vt alarum pars deuexa aërem verberatum atque inclusum magis in posticam alarum partem concavam, quam deorsum, impellat, atque ita simul auem antrorsum ferat. Quod fieri ita facile haud posset, si alarum forma vbique plana et facies superior aequali vbique esset pennarum firmitate et densitate. Haec enim causa est, quae facit, vt papilionum insectorumque genus, quod alis planis in aëre fertur, tam inaequali meatu saltare magis, quam volare, videatur. Partes alarum singulae ad auem antrorsum impellendam conferunt; cultelli enim vi elastica multa polent, et posteaquam aëris verberati viribus ecesserunt, statim in situm suum reuertuntur, atque ita corpus, cui appositae haerent pennae, antrorsum impellunt. Vis praeterea aëris repellentis alam motum corporis duplo auget; quemadmodum enim ipse alarum ictibus verberatus cedit, ita maiore deinde atque aucta cum vi repulsionis rediens per ictuum intervalla alis incumbit et corpus auis promouet.

Aues contra in aëre velificantes, etsi alam interiorem etiam concavam vel fornicatam habent, multo tamen tardius impelluntur, quod non solum cultellorum forma est mollior, sed et ipsas alas rarioribus nec tam fortibus ictibus quatiunt. Atque omnino forma ea alarum aues remiges in aëre meatu tantum plano cum vento ferre potest. Vniuerso auium generi alae gubernaculi loco datae sunt; prouti enim dextram sinistramue fortius quatiunt, ad latus sinistrum aut dextrum se flectunt. Quo breuiore flexu a recto tramite deuertuntur, eo minus alteram alam quatiunt; cum ipsae circa se in gyrum flectuntur, fere immota manet al-



tera. Multis vero gradibus a motu circulari ad rectam volatus lineam ascendi, facile apparet. Quo igitur motus alarum magis est aequalis, eo fit rectior auium in aëre cursus. Cum avis in aëre alis suspensa apparet, (*planer* Galli dicunt), tum sine magno alarum motu sese inflectit, dum latus in eam partem, quo pergere cupit, paulum inclinat, altero subleuato, ex quo aut in gyrum aut meatu spirali, sed plano, fertur.

Ipsa vero volatus instrumenta diuersam habent ab alis remigantium auium fabricam. Vti enim harum cultelli latitudinem sui mediam habent modicam atque inde leni deuectate in acumen decurrunt, ita velificantium alarum cultelli medii latissimi, hinc vero multum decisi in margine interiore subito fiunt angustiores atque in acumen excurrunt primi quinque. Hanc formam ala in tabula altera explicata et picta conspiciendam oculis sistit.

Auium remigantium alae aërem compressum fortiter findunt. Cultellorum fines acuti parua modo aëri transeunda relinquunt intervalla; eo igitur usque aër compressus includitur. Contra in velificantium auium alis pars cultellorum primorum quinque decisa multo maiora et longiora aëri transeunti praebet intervalla pennarum. Praeterea ipsi cultelli eiusmodi alarum multo sunt molliores laxioresque; quamuis diuersos densitatis gradus in utroque genere conspiciere liceat. Densitatis huius et firmitatis pennarum argumentum praebent, in auium rapacium saltem genere, colores varii, floridi et velut incisuris inuicem separati, quibus cultelli ab initio ad finem usque pinguntur. Contra mollitiem laxam color vniformis veluti dilutus nigrescens cultellorum a margine deciso usque ad apicem, albidus vero partis decisaë retro usque ad initium fere vniformis arguit.

Porro aues rapaces, quae alis remigant in aëre, nigra oculorum iride rostroque in latere denticulato distinguuntur. Contra velificantium oculi lucidiores sunt, rostrumque dente laterali versus apicem caret. Vnguium discrimen non adeo manifestum et constans est; caudae etiam diuersitas in utroque genere magna atque incerta forma, si iudicium generis illi permittere velis. Gubernaculi vires gerere caudam eiusque flexibus auem in volatu regi, vetus est opinio, sed falsa. Vfus eius est in adscensu descensuque auis, quem adiuuat, ita tamen, ut aues multae visae fuerint, quae absque eo adminiculo aequae bene adscendere, descendere, regere et flectere corpus poterant. Sequitur hic auium rapacium diuisio in classes, adiectis singularum specierum caracteribus; quam capitis partem hic omitto. Poterunt eam lectores curiosi ex ipso libro cognoscere; quamuis equidem iudicium de opera cl. auctoris differendum putem in illud tempus, quo liber copiosior, quem auctor doctissimus de re accipitraria aut de volatu auium rapacium promittit, in usum doctorum virorum perfectus venerit. Vniuerse tamen monendum puto, aues

rapaces



rapaces remigantes appellari ab artis falconariae magistris Gallicis aues sublimi venationi (*oiseaux de haute volerie*), velificantes contra humili venationi aptas (*de basse volerie*).

Caput II. Grauitas non solum propria corporis, sed ea etiam, quae ex ratione corporis cum alarum mensura comparata nascitur, auem contra ventum debet impellere. Remigum grauitas in aëre maior, quam velificantium auium, propter vtramque causam. Solae ideo contrario vento subuolare et ferri valent. Grauitas enim corporis ipsa fulcrum praebet iis, aut locum faburae velut in nauigiis tenet, quo fortius crebriusque remos impellere possint. Eidem etiam grauitati velocitatem debent, quibusdam tamen cum conditionibus, quae commodorum eorum, quibus remiges velificantes aues vincere solent, magnitudinem et multitudinem imminuunt. Leuitas corporis velificantium aut propria aut pro ratione corporis minor adscensum earum facilem efficit; nihil enim aliud, nisi alas veluti vela, vento dant, et ad summam altitudinem euehuntur, dum interdum pro tempore quasi pedem faciunt, seu alas velorum instar huc aut illuc flectunt et regunt. Sed nec contra ventum recta eniti in sublime, nec aërem tanta cum celeritate diuerberatum perlabi possunt, ut auium remigantium genus. Cum igitur remex curriculum suum ingreditur, ut praedam assequatur petitam, haec fere requiruntur. Si meta, ad quam auis eniti in aëre conatur, ad perpendiculum super ea posita est, tum remex cursum contra ventum dirigit atque eo usque continuat, dum ad aequalem cum meta altitudinem fuerit enisa; tum vero reuertitur et recto meatu ad metam fertur. Potest quidem remex breue aliquod stadium vento secundo percurrere ascendendo, verum cito in tali nisu et labore vires eam deficient. Quo igitur longius curriculum percurrere debent, ut praedam attingant, eo etiam minus a regula posita recedunt; et si qua ab initio auis facilitatis specie decepta contra morem et regulam eam fecerit, statim tamen illuc reuertitur, ubi nisu longinquo opus esse videt.

Quodsi praeda pro meta extra lineam perpendicularem in montis alicuius cacumine fuerit posita, remex recto ad illam cursu enititur. Hunc auis volatum pingit Fig. 2. Tabulae secundae. Galli conatum quemcunque auis rapacis, quo praedam volando aggreditur, appellant *entreprise*, et curriculum ipsum, quo ascendit vento contrario, *carriere*.

Quodsi metam mobilem, hoc est, auem velificantem aliquam, attingere cupit, haec quidem vento secundo iter suum accelerat; quae antequam supra verticem remigis volando peruenerit, remex curriculum contrario vento eo usque facit, dum non solum ad aequalem altitudinem cum praeda, sed paulum etiam superius, fuerit euecta. Natura videlicet docta, descensum vento secundo factum satis compensare



penfare moram, quam contrarius adscensus fecerat, dum praeda secundo vento et diuerso itinere pergebat. Hoc curriculum sistit Fig. 3. Tabulae 2. Si licet oculis iudicare in hac re, velocitas volatus plani seu horizontalis, quem vento secundo facit remex, triplo maior est ea, quam in adscensu auis contra ventum, aequali tamen distantia, conspiciamus. Quodsi volatus secundo vento paululum modo inclinatus fuerit, duplicem fere eius velocitatem cum plano comparati ponere licet. Atque ita facile esset plures velocitatis gradus assignare volatui a plana seu horizontali linea vsque ad verticalem. Descensus verticalis centesima fere parte temporis eius, quod ascendendo contra ventum impenditur, videtur perfici.

Etsi curriculum minus magisue praeceptis esse reperimus, vix tamen vnquam ultra 45 gradus inclinatur, nisi si breue aliquod stadium percurrere vult auis. In curriculo longinquo plerumque intra trigesimum adscendit gradum; nec tamen curriculum eiusmodi facile sine magno laterum robore, vento satis vehementi magnoque spiritu perficere potest. Praeterea venti etiam aequalis atque vniformis tractus requiri videtur. Vulgare igitur curriculum intra decimum quintum et vigesimum consistit gradum. Tractus venti varios aërem turbantes etsi oculis saepe percipere non licet, auium tamen remigantium iter varias in regiones directum satis manifesto arguit.

Quodsi remex absoluere curriculum vno conatu non potest, atque interrupto eo quiescit, vt denuo adscendat, gradum facere dicitur Gallicis artis falconariae magistris. Dum hoc facit, breue aliquod tempus secundo auis vento labitur meatu plano, et quasi reuertitur, deinde vero, si res postulat, de nouo adscendit, atque ita per gradus plures eam consequitur altitudinem, quam oculi humani vel artificiosis vitris adiuti nec distinguere nec iudicare valent. Eiusmodi adscensum per gradus pingit Fig. 4. Tab. 2. Peritissimae quaeque et fortissimae remiges vno curriculo praedam attingunt.

Nunc volatum auium velificantium videamus cap. III. explicatum. Hae si metam aliquam vento contrario assequi cupiunt, non recto meatu, vt remiges, adscendere illuc per aërem ictibus alarum diuerberatum valent, sed per plures ambages tandem illuc attingunt. Grauitas enim corporis et propria et alarum mensurae proportionata impedit, quo minus ventum vincant contrarium. Quoties alarum vela pandit auis, ventus eam retropulsam simul subleuat; ne tamen a meta magis vsque aberret, conclusis alis in ventum contrarium quasi immergendo auis pondere corporis se praecipitat. Dum igitur alternis vicibus alarum vela pandit contrahitque, tandem metam assequitur, sed multo lentius, quam remex breuissimo curriculo facere solet. Hunc per ambages meatu fere serpentium auis ad-

scen-



scensum vocabulo nautico *par bordées* appellat auctor et Tab. 3. Fig. 1. pingit. Alia praeterea via metam assequitur, dum vento dat vela alarum atque ita primum quidem a meta aberrat, sed tantam in altitudinem euehitur, vnde immergendo se in ventum contrarium recta via descendere et metam assequi possit. Descensum eiusmodi *plongée* appellat et Tab. 3. Fig. 2. pingit.

Cap. IV. Dum avis velificans vento secundo facile subleuatur, magno contra cum conatu remex contrario vento curriculum facit recto meatu. Eiusmodi curriculo remex multo magis subleuatur, quam via obliqua; nec facile, nisi coacta necessitate aliqua, vento laterali, quem nautici dimidium quartum et sic porro appellant, in adscendendo vtitur. Dum igitur remex contrario vento subleuata a meta longius vsque aberrare videtur, praeda velificans contraria via et vento secundo properat; sed remex facile spatium intermedium celeritate contractum percurrit, quam primum vento secundo permittere se et descendere incipit. Fit tamen interdum, vt praeda velificans, cum hostem infra se ascendentem videt, altius semper ascendat, atque ita vires simul et spiritus remigem in ipso conatu deficient. Eiusmodi certamen pingit Fig. 3. Tab. 3. Remex in eo certamine vento secundo atque altitudine vincere debet. Primum facile assequitur, cum remex auem aliquam velificantem aggreditur; haec enim, dum vento secundo aufugit, praedatori occasionem offert, vt deinde venti secundi impulsu facile eam consequatur. Sed altitudo magnam habet difficultatem. Commode enim velificans praeda adscendit semper, remex contra magnis viribus multoque spiritu ad eam rem opus habet. Cum igitur remex pluribus curriculis ascendit, vt praedam assequatur, haec velificans, cum praedatorem infra se conspiciatur, ad maiorem vsque altitudinem effertur, atque ita spiritum et vires hostis exhaurit. Vfus tamen atque experientia docere solet remigem, non repetitis adscendere curriculis infra praedam velificantem, sed vno aliquo ad eam altitudinem euehitur, vnde casum quemcunque prouidere atque ita velut imperare fortunae possit. Interim praeda secura in itinere pergit, nec altius vsque adscendit; hostem enim contraria via abire putat immensoque interuallo satis sibi tuta videtur. Verum remex nihilo minus descensu ex alto facile spatii intermedii longitudinem contractam incredibili cum celeritate percurrit atque ita praedam assequitur. Huiusmodi certamen pingit Fig. 4. Tab. 3.

Cap. V. Huiusmodi adscensu aduerso vento et descensu vento secundo aggreffus ipse et certamen plerumque absoluitur, si praeda secura pergit. Tum remex auem velificantem comprehensam ad terram deducit ibique deuorat. Sed plerumque avis petita flexo ad latus volatu praedatorem euitat atque eludit praecipitantem in se; facile tum corporis pondere atque ipsa velocitate remex terrae illideretur delata; sed illa subito, cum praeda aberrauit, descensum inhibet et



reflexo volatu iterum ascendit, vt denuo descendere et praecipitare se in praedam possit. Nimirum alas, quas descendendo compresserat, subito iterum apertas pandit atque ita facile non solum descensum inhibet, sed adscendendo etiam denuo ex contraria parte subit altitudinem exortus sui seu stationis. Hanc auis reuersionem artis magistri resurrectionem (*ressource*) appellant, et descensum cum adscensu per eam coniunctum transitum licebit mihi ad imitationem gallici vocabuli (*passade*) appellare. Oculis hic speciem circuli fere dimidii exhibet Fig. 1. Tab. 4. Pluries atque interdum centies eum repetere auis cogitur, donec praedam assequitur. Cui quidem labori auis eam ob causam sufficere videtur, quod alternis vicibus spiritum recolligit semper; adeoque transitum iterat per horae spatium maiore cum facilitate, nec ita lassatur, quam modico curriculo. Sed interim praeda ad maiorem eniti altitudinem conatur, vbi remex resurgens assequi eam non valeat; facile etiam voto potitur suo, nisi remex pluries repetito transitu eam impedierit. Tum igitur nouum remex curriculum facere cogitur, in quo saepe animum despondet praedamque omittit. Incredibilem mirari licet velocitatem, qua velificans auis transitum euitare praedatoris studet, cum alias volatus eius cum remige comparatus lentus pigerque esse videatur. Alio praeda velificans dolo vtitur, dum certamen eo vsque continuat, donec ad locum aliquem appropinquauerit, quo effugere possit et se tutari. Subito tum bene animaduerso et capto tempore praecipitat se in latebram, atque ita insidias plane eludit.

Cap. VI. Longe diuersum oritur certamen inter aues duas aequae bene remigantes, velut inter columbam et falconem; in quo si columba vento paulum superiore vtitur, facile effugere hostem potest. Sequitur nimirum aduerso vento eundem semper tramitem, nec opus habet adscendere altius; falco contra, dum ad primam columbae stationem eniti vult, longo spatio antecepisse iter columbam videt et spe frustratur sua. Fig. 2. Tab. 4. Genus omne columbarum egregie alis remigat in aëre, quibusdam etiam reliquas remiges vincit rationibus, nisi tam facile animum desponderet. Igitur timor eas prodit hosti. Nec ignorant falcones columbarum naturam; quam ob rem vbi videt praedator columbam ad latebram aliquam trepidare, exspectat, dum illa se coniicere ex aëre in arboris tutelam velit. Vsa illa vento superiore, quo hostem antecellit, plano itinere pergit; falco contra nec altitudine ascensus quidem aequari cupit columbae, sed eam tantum stationem tenet, vnde obliquo itinere et gemina cum celeritate columbam recto et plano meatu pergentem eo ipso temporis momento, cum se in arborem praecipitat, intercipere possit. Fig. 3. Tab. 4. Fit tamen interdum, vt columba versuta tum demum in latebram se deiiciat, cum falconem iam ultra latebram obliquo descensu euectum videt. Tum vero falco alio vtitur dolo, simulatque consilium aliam praedam ultra latebram petendi. Columba interim secura



cura versus arborem descendit, at falco transitum (*passade*) facit, atque ex ea altitudine, ad quam resurgens ascenderat, ictum dat, atque ita columbam intercipit a contraria parte inuolans.

Quodsi praedo stationem tam altam forte tenet, ut tenfarum (*toises*) sexaginta aut centum spatio columbam inferius transuolantem superet, potest ille quidem ictum dare feliciter, sed, si aberrauerit, raro iterare ictum potest. Aliter tamen accidit, si praedo anates infra tenfarum 50 aut 60 intervallo volantes impetit. Has enim quamvis egregie remigantes in aëre ipsa velocitas impedit, quominus volatum ad latus flectant; quodsi igitur ictu eas falco leuiter modo perstrinxerit, statim a recto meatu anates deiicit; praeterea ipse deflectendi conatus hosti conturbatas eas prodit.

Cap. VII. Genus aliquod accipitrum velificantium saltatorum (*saillans*) nomine distinguit auctor. Hae reliquas aues suae classis superant fabrica corporis et facilitate ea, qua breue stadium incredibili cum celeritate saltando absolvere solent. Talis est astur cum sparuerio; qui ad humile aucupium (*basse volerie*) adhiberi solent. Formam alarum habent illi quidem communem cum reliquis auibus velificantibus; verum et musculorum robur et cultellorum firmitas maiorem illis fortitudinem addit; color etiam cultellorum contra morem varius apparet. Statura ipsa et facies auium dexteritatem praedicat. Gracili enim sunt corpore, sed artuum robore magno. Caput paruum, collum longum et angustum, humeri lumbique lati, alae breues, cauda mediocris, crura longa et carnosa, metatarsi alti et nervosi, digiti patentes, fortes, etsi graciles, sunt. Corporis pondere et robore ut reliquas congeneres vincunt, ita a remigibus tamen ipsi vincuntur. Motus edunt alacres, celeres et fortes; et dextre insident pugno aut perticae reuersi ex volatu; contra vero reliquum auium velificantium genus in pertica potius pendet et mactarum auium instar alis flagellat aut diuerberat se. Saltu emicant fulminis instar, dum subito fortiterque alas contrahunt et quodam velut elatere plantae sursum se immittunt. Vis omnis pendere videtur ex corporis positione aliqua et flatu. Saltum vero faciunt deorsum, sursum et ad directionem horizontis. Saltus sursum datus plurimum virium requirit, nec ultra 6 aut 7 tenfarum spatium tendit; neque ulterius fert auem aut minoribus viribus antrorsum perficitur saltus horizontalis. Omnium vero facillimus saltus, qui fit veluti mergendo deorsum; auis enim pondere delata corporis facile ab aëre repulsa resurgit. Saltus a transitu (*passade*) cum consilio, tum effectu distinguitur. Transeundo enim auis subire conatur in altitudinem exortus seu descensus sui, postquam praeda aberrauit; contra saltus transeundo auem ad praedam effert, quam ab inferiore loco surripit. Galli actum hunc *trouffer* appellant. Saltum dat auis sursum aut antrorsum, cum praedam superuolantem aut praeteruolantem attingere cupit. Saltus, qui



fit quasi mergendo, quatenus a maiore exoritur altitudine, longius etiam auem ferre potest. Lineae fere eandem efficit curuitatem, sed longitudinem diuersam. Itaque minor lineae longitudo in volatu fit, cum auis ex pugno, quam si ex arboris cacumine desultat. A montis alti cacumine saltus datus facile miliarii germanici dimidiam longitudinem conficit. Quicumque vero saltum secutus fuerit euentus, alae postea ad priorem velorum formam compositae velocitatem nullam praestare valent, sed auem fere immobilem suspendunt.

Interdum feras quasdam debiles aggrediuntur recto volatu aut deuexo, omnium celerrimo, dum alas crebris ictibus quatunt et vires omnes continent (*à tire-d'ailes*). Volatum tamen recta in linea semper auis continuat. Quodsi praeda in ascendendo paululum a recta linea deflexerit, a conatu statim desistit praedator. Hac gemina ratione venationis exclusa auis rapax more generis sui iterum ascendit, ut praedam effugientem ex alto speculetur. Secuta deinde appropinquare conatur eo usque, ut iterum assultare praedam possit. Plerumque stationem in vicina aliqua arbore aut fruticetorum apicibus aut denique in colle aliquo humili capit; verum hic postremus casus exigit, ut auis tam vicina sit praedatori, ut, antequam alas pandere possit, breui ex saltu corripatur.

Cap. VIII. Aues velificantes eosdem quodammodo motus edere possunt illae quidem, quos in remigibus miramur; ut videmus in lusibus pullorum, quibus se in aëre exercent. Vincere enim inuicem vento superiore atque altitudinis mensura student; descensum etiam subitum alter in alterum faciunt, ascensuque eodem, ut remiges, reuertuntur in aërem. Verum in suo tantum genere his artificis pollent; sed facile a remigibus iis, quas proprie dicimus, vincuntur. Natura etiam atque usu docti vix ultra iuuenilium lusu experimenta progrediuntur. Atque ita volatum, quem diximus, remigibus proprium vindicare licet.

Cap. IX. Aues rapaces remigantes ex alto semper aues volantes infecutae attingunt, et correptas deliciunt. Sorte tamen rara etiam accidit, ut quadrupedes et aues in terra depraedentur. Contra saltatores, quas diximus, aues praedam, quaecunque humili et recto volatu fertur, aut in frutices fugit, quaedam etiam ex quadrupedum ordine animalia consecantur. Fortuna tamen interdum fauente auibz eiusmodi potiuntur per insidias, quarum capturae nec vires nec aptum habent ingenium.

Auium velificantium vulgariū classis, quas artis magistri ignobiliorum nomine comprehensas appellant, eiusmodi fere animalcula rapere solet, quae nunquam a terra aquisue attolluntur. Pertinent eo species aliquae quadrupedum, repti-



reptilium animalium et piscium. Quaedam cadaueribus iacentibus solum inhiant. Fit tamen interdum, vt aues volantes praedentur; sed hae aut sunt tirones, aut pastu immoderato oneratae, aut vulnere aliquo accepto, pluuiio humore, aut longa seruitute debiles, aut denique cibo nimis intentae delabuntur in insidias. Praeterea etsi in eandem altitudinem enituntur, quam remiges, praedam tamen longe diuersa capiunt ratione.

Cap. X. Altitudinis, ad quam auis resurgens reuertitur, mensura pendet a descensu et vi, quacum auis in ipso motu impellitur. Tab. 5. Fig. 2. Male gallicos artis magistros quosdam resurrectionem auis punctum (*pointe*) appellasse censet auctor, rectius contra eo nomine appellari impetum eum, quo auis in fine curriculi, aut post volatum horizontalem seu planum et simplicem sursum impellitur. Curriculum ipsum, etsi raro, desinit in punctum, cum breue est et auis omnes in eo vires adhibet. Cum nimirum motus volanti aui datus subito inhibetur, punctum existit, eoque altius, quo maiore cum vi auis impulsam ferebatur. Verum in curriculo longo auis vires et spiritum ita dispensat, vt impetu tam ingenti in punctum proferri non possit. Hoc autem volandi modo, quem Galli *par élans* aut *saccades* appellant, vtitur remex, dum auem plano itinere labentem breui interuallo occupare, nec supra verticem adscendere aut velificantium modo eniti cupit. Vide Tab. 5. Fig. 3.

Cap. XI. Instrumenta vero, quibus aues rapaces praedam comprehensam deiiciunt, tenent et dilacerant, etsi in vniuerso genere eadem fere esse videmus, diuersa tamen a multis ratione adhibentur. Aues remiges praedam leuem magis, quam celerem, vnguibus colligant (*lient*); contra celeriores ferunt, debilitant et demum occidunt. Vngues huius generis graciles et tenues tenent quidem aues quamuis magnas, verum compressas suffocare atque occidere non valent. Igitur dentibus rostri incurui infixis vertebrae praedae, quam diutius retinere non valet, facile et cito elidit, auemque vita priuat. Nucham auium seu occipitis depressam partem apprehendit; animalium vero quadrupedum regionem eam, quae est inter scapulas et costas, letalibus rostri dentibus occupat. Omnium celerissime minutae remiges praedam occidunt; causam putat esse auctor hanc, quod diu retinere eam non valent. Vix enim Smerilio nucham perstrinxit, cum auis moritur. Idem forte etiam reliquae aues rapaces libertate sua fruantes faciunt. Remex igitur praedam et nimis celerem et fortem ferit atque ita occidit. Dum hoc facit, vngues ita positos gerit, vt ipsa corporis directione et pondere ictum exsequantur, vti curuum bellicorum falces. Digiti autem postici vnguis, quem talum appellant magistri, in locum letalem directus falcis vicem gerit, et, quamcunque corporis partem attigerit, dilacerat, diffringit atque elidit. Quodsi forte praedo leporis pelli vngue postico implicatus haeserit in descensu, abrupto transitu (*passade*) resupinus cadit, vulnus-



que graue accipit aut de vita ipsa periclitatur. Casu eiusmodi cognouerunt primum homines instrumentum, quo ferire solent aues rapaces; eique periculo ita solent occurrere, vt ungues posticos auium, quae leporibus immitti debent, decisos ob-  
tundant. Cognito semel instrumento eo, quo ferit auis, facile etiam animadu-  
uertere licet in descensu quamuis rapido, vt auis digitis vnguibusque apertis pe-  
ctorique carnosio oppositis in praedam tam dextre se praecipitat, vt, quam planissi-  
mo fieri potest et proximo, terram transitu praeterlabatur. Quodsi vero transitus  
lineam efficit nimis rotundam, aut si nimium se demergit auis, cum vitae periculo  
terrae illiditur saepe, cum praeda aberrat.

Cap. XII. Aues velificantes, quas saltatores appellauimus, memorabili  
gaudent dexteritate praedae comprehendendae, quam raro feriunt. Plerumque  
comprehensam corporis pondere elidunt et suffocant. Leporis capti statim oc-  
cupant collum vnguibus ad suffocationem vsque. Rostro enim non possunt, vt  
alterum genus, vertebrae atque ossa effringere atque elidere; caret illud dentibus;  
igitur cutem modo carnesque dilaniant. Per fruticeta densissima dexteritate  
cum admirabili consequuntur praedam; eamque ob causam natura illis crura me-  
tatarumque tam longum tribuisse videtur. De oculorum colore visusque acie in  
vniuersum definire aliquid non licet.

Remigum nomine, quae ad sublime aucupium adhibentur, auctor compre-  
hendit species septem: 1. Gerofalconem Islandicum et Noruegicum. 2. Sacrum.  
Huc refert etiam praeter Sacrum proprie dictum Lanarium falconem et Alphane-  
tum seu Tunetanum Lanarium. 3. Falconem nobilem cum multis varietatibus. 4.  
Alethen Africa septentrionali oriundum. 5. Dendrofalconem, Gallorum *Hobe-  
reau*. 6. Smerilionem, cuius duae varietates noscuntur. 7. Tinnunculum (*Cres-  
serelle*), qui auium ignobiliorum ex classe solus ad remiges pertinet.

Iudicium meum interponere non audeo; potius auctoris patientiam et saga-  
citem admiror. Vtinam disciplinam omnem falconariam eodem ordine eadem-  
qua cum diligentia explicare, vt promittere videtur, mox pergat. Magna enim,  
vt mihi quidem persuasi, inde utilitas ad historiam naturalem auium redundabit;  
nec facile ab alio talem operam exspectare licet, nisi qui diu artem falconariam  
exercuit, ad eiusque exercitationem ingenium sagax vsuque aliquo doctrinae  
physicae eruditum attulerit et simul auium opiumque copia abundauerit. Coro-  
nidis loco ponam PLINII locum, quem ex variis scriptorum locis de volatu au-  
um confarcinatum lectores nunc demum facile intelligent. Insunt tamen quae-  
dam, quae mihi dubitationis aliquid habere adhuc videntur; cuius causam aut in  
lectionis aliquo vitio, aut in scriptoris errore et festinatione, aut denique in  
mea ipsius ignorantia sitam esse puto. Quare opto, vt peritiores locum omnem  
diligen-



diligenter considerent, ad eumque explicandum pro virili quisque, quod usu, experientia ingeniiue sagacitate exquisierit, liberaliter conferat. Equidem ad primum statim de columbarum plausu comma adhaesi; sed videant alii. Locus est ex libri X. cap. 28.: *Verum columbis inest quidam et gloriae intellectus. Nosse credas suos colores varietatemque dispositam; quin* (quae VINCENTIVS XVI. 55. ex h. l. habet) *etiam ex volatu quaeritur* (creduntur VINC. rectius) *plaudere in caelo varieque sulcare. Qua in ostentatione ut vincetae praebeantur accipitri, implicitis strepitu pennis, qui non nisi ipsis alarum humeris eliditur; alioquin soluto* (VINC. solito) *volatu in multum* (VINC. multum simpliciter) *velociores. Speculatur occultus fronde latro, et gaudentem in ipsa gloria rapit. — Aves solae vario meatu feruntur et in terra et in aëre. — expandunt alas, pendentesque raro intervallo quatiunt, aliae crebrius, sed et primas* (i. e. summas) *duntaxat pennas, aliae et tota latera pandunt: quaedam vero maiore ex parte compressis volant; percussoque semel, aliquae et gemino ictu aëre feruntur, velut inclusum eum prementes, eiaculantur sese in sublime, in rectum, in prouum. Impingi putes aliquas, aut rursus ab alto cadere has, illas salire. Anates solae, quaeque sunt eiusdem generis, in sublime protinus sese tollunt atque e vestigio coelum petunt, et hoc etiam ex aqua. Itaque in foueas, quibus feras venamur, delapsae solae euadunt. Vultur et fere grauiore nisi ex procursu aut altiore cumulo* (tumulo VINC. XVI. c. 12.) *immissae non euolant: (aliae inferit VINC.) cauda reguntur. Aliae circumspiciunt, aliae flectunt colla. Nonnullae vescuntur ea, quae rapuere pedibus. Sine voce non volant multae: aut e contrario semper in volatu silent* (aliae in volatu silent VINC.). *Subrectae, pronae, obliquae, in latera, in ora, quaedam et resupinae feruntur; ut, si pariter cernantur plura genera, non in eadem natura meare videantur.*

---



D E

## DIFFERENTIIS AVIVM.

**N**on alienum a consilio operis huius puto, collectas ex ARISTOTELE ponere notas omnes ac singulas, quibus vniuersum auium genus a quadrupedibus atque inuicem differunt. Multa ex doctrina hac delibauit iam Imperatoris FRIDERICI diligentia, verum is, cum rapacium auium genus praecipue spectaret suisque curis inprimis enarrare vellet, in plurimis partibus explicandis nimiam breuitatem, alibi contra obscuram philosophiam adhibuit. Cum igitur magnam obseruationum praeclararum copiam in libris graeci philosophi de Partibus et aliis, qui in nostrorum hominum notitiam non tam frequenti vsu venire solent, quam de Animalium historia volumen nunc gallicum etiam in sermonem conuersum, latere viderem, operae pretium facturus esse mihi videor, si collectas inde notas omnes ante oculos lectoribus vno in loco posuero. Quod quidem eo lubentius facio, quod nuperrime vidi laudes eas, quae soli ARISTOTELIS ingenio debentur, a Cl. MERREM transferri in VOLCHERVM COITERVM, cuius in libro GABR. FALLOPII lectionibus addito caput 2. de differentiis auium totum ex ARISTOTELE transcriptum est, si a paucis auium nominibus in exemplo positis discedas. Verum is vsus est sola GAZAE versione saepenumero obscura atque inepta, nec omnes philosophi annotationes excerpfit, quae ad hanc doctrinam pertinent. Quare vniuersas ex variis locis collectas sermone clariore hic proponam, contractis, si quae nimia prolixitate abundant.

Totum huc pertinet libri de Partibus animalium IV. cap. 12. Aues, inquit, discrimine inter se discrepant eo, quod in proportionem, excessu defectuque partium versatur. Sunt enim earum aliquae longis cruribus, aliae breuibus. Linguam aliae latam, aliae angustam habent. Eadem etiam reliquarum est partium differentia. Atque inter se quidem aues paulum ratione membrorum, a quadrupedibus vero forma ipsa membrorum differunt. Pennis igitur omnes teguntur, eaque nota ab omnibus reliquis animalibus separantur. Cum enim alia pilo, aut squama, aut cortice tegantur, aut annulis diuisa sint, aues solae pennis operiuntur. Pennae vero auium natura fissilis est, caulemque habet seu cannam, cum, quae insectorum dicuntur pennae, non sint fissiles et caule careant. Praeterea

in



in capite rostri naturam singularem habent; elephantus enim naribus pro manibus utitur; insectis vero quibusdam lingua vicem oris praestat; auibus rostrum osseae naturae pro dentibus et manibus est. (Videtur *χειλῶν* pro *χειρῶν* legendum et labiis vertendum.) Collum habent porrectum, ut alia animalia, sed quaedam longum, aliae breue. Colli ratio ut plurimum pedes sequitur. Pedibus enim longis instructae longum, breuibus breue habent, exceptis tamen aquaticis et palmipedibus; his enim pedes longi cum collo longo ad victum in aquis quaerendum, ut terrestribus collum longum cum pedibus longis ad victum in terra quaerendum, inutiles forent. Carniuoris etiam volucris longitudo colli incommoda est; imbecille enim, quod prolixum est collum. Hae autem viribus victum comparant. Igitur vncungui seu rapaci aui nulli longum est collum. Palmipedes aues eae, quae diuisos quidem digitos, sed lobis auctos habent, utpote in eodem cum palmipedibus genere militantes, collo longo in victu aquatico utuntur, et pedibus ad natandum breuibus. Rostris etiam victus ratio differentiam affert; aliis enim rectum, aliis vncinatum est rostrum. Rectum iis, quae cibum in terra quaerunt, vncinatum iis, quae carne cruda animalium raptorum victitant. Contra mites in victu et herbiuorae latum habent rostrum; eoque facile cibum effodiunt aut attingunt (graece *ὀρεξις* et *ὀρυξις* legitur dubia lectione) herbasque attrahunt et carpunt. Aliquae ex similibus rostrum longum et collum habent, quoniam ex alto cibum petere solent. Atque in vniuersum et hae et palmipedes aut simpliciter aut parte eadem bestiolas quasdam in aqua degentes capiunt, et collo quidem quasi arundine piscatoria, rostro autem veluti linea et hamo utuntur. Pars corporis prona et supina cum pectore in vnum quasi coaluerunt (*ὁλοφύης ὁ τόπος*); atque hinc dependent loco brachiorum et pedum anteriorum alae, auibus propriae; quapropter pro scapula pars extrema alarum dorso adhaeret. Crura, ut in homine, duo introrsum flectuntur, ut in quadrupedibus, nec extra, ut in homine; alae vero, quae vicem pedum anteriorum gerunt, in orbem flectuntur. Pectus omnibus acutum carnosumque est; acutum enim ad volatum requiritur. Corpora enim lata multum aëris impellunt; ideo difficilius mouentur. Carnositas vero partis acutae debilitatem defendit. Sub pectore venter usque ad anum et crurum flexuram excurrit, ut in homine et quadrupedibus. Umbilicum recens natae omnes habent, verum is aetate oblitteratur. Volatu quae excellunt, alas magnas et fortes habent, ut rapaces et carniuorae; iis enim volatus ad victum necessarius est; ideo pennas multas et magnas alarum habent. (*πληθὺς πτερύγων*. Sunt igitur *πτέρυγες* ARISTOTELI alarum pennae etiam). Verum aliae etiam volatu excellunt, quaecunque in celeritate volandi salutem quaerunt, aut regiones mutant. Contra quae humilem agunt vitam fructibusque victitant, aut in aquis natant, aut denique circa aquas morantur, graues volatu sunt. Corpora rapacium pennis alisque nuda sunt parua; omne enim nutrimentum in pennas atque arma eorum conuertitur. Contra iis, quae volatu



non valent, corpora sunt ponderosiora; eamque ipsam ob causam difficulter volant. Harum aliquae pro pennarum auxilio calcaria pedum nactae sunt, quae nulli auium rapacium contigerunt; quoniam in praeliis terrestribus grauiter volantibus vsu praestant calcaria. Igitur rapaces iis non habent vsus, vt contra humiles aues vngues recurui in gressu impedirent. Quae causa est, quod rapaces et vncungues aues omnes difficulter incedunt, nec petris insident; vtrique enim rei inepti sunt vngues recurui. Palustres aues longis pedibus insistant, pedesque earum longos digitos, et saepe plures digitorum articulos habent, quoniam in molli et subsidente luto gradiuntur. Cum volatu non excellant, nutrimentum, quod alias in vropygium, quo carent, consumitur, his in pedum longitudinem conuertitur. Pedibus igitur protensis loco vropygii vtuntur volantes. Quae contra pedes breues habent, retractis iis et apposis ad ventrem volant, atque ita rapacibus in raptu vtilis sunt. Collum quae habent longum et latius seu crassius, extenso volant eo, contracto contra et inflexo, quae longum et gracile; ita enim non tam facile frangitur. Clunis omnibus auibus est, sed paulum obscurus; videntur enim potius femora bina habere propter clunis longitudinem. Causa est, quod genus hoc animalium bipes, sed non erectum, est. Nam si modo hominum et quadrupedum clunem breuem a sede procedentem et crus continue subditum et directum haberent, stare omnino non possent. Homo enim a natura erectus est; quadrupedum vero pondus pedes priores subleuant. Aues contra, cum ad nanorum naturam accedant, erectae non stant; et loco pedum priorum alas nactae sunt; igitur natura clunem seu coxendicem productum et longum mediae corporis compagi imposuit, atque hinc crura subdidit, vt aequato corporis libramento hinc atque illinc stare aues atque incedere possent. Quatuor pedum digitos et fissipedes et palmipedes habent, excepto dubiae naturae struthione. Horum terni anteriores sunt, quartus pro calce est, et in longipedibus, veluti crece, minor reliquis. Torquilla binos antrorsum binosque retrorsum versos habet digitos; causa est, quod eius corpus minus, quam caeterarum, propendet antrorsum.

Alter locus est de P. A. III. 1. Auibus pro ore rostrum est, quod dentium labrorumque vicem praestat. Hoc pro vsu et auxilio differt. Rapaces enim aues, quia carne, non fructibus, vescuntur, reduncum omnes habent rostrum; eo enim praedam vi capere et retinere possunt. Omnis enim earum virtus in rostro et vnguibus recuruis sita est. Reliquarum auium rostrum ad victum accommodatur. Ita robora quae pertundunt, forte et valde durum habent, vti etiam corui iisque similes. Auiculis gracile (*γλαφῦρον*), quo et fructus colligant et vermiculos accipiant. Quae herbis vescuntur et quae iuxta paludes degunt, vt palmipedes et natatiles, partim alio quodam modo rostrum habent victu accommodatum, partim lato sunt rostro. Tali enim facile terram et lutum fodicare valent,



lent, vt in quadrupedum genere fues. Quin etiam aues, quae lato sunt rostro et radicibus veltuntur, et aliae, quae similem illis victum habent, extremum rostrum ferratum (*νεχαγαγμένον*) habent. Ita enim facilius herbas decerpunt. Hoc in loco vox graeca, quam apposui, corrupta videtur; neque enim, si denticulos rostri anatini et anserini dicere voluit, extrema tantum pars illis armatur, sed latera duo vtrinque; quare COITERI interpretationem nescio vnde ductam praefero, qui ex hoc loco, latum, inquit, rostrum iis, quibus victus ratio placida et ex herbis comparanda. Tale enim rostrum ad effodiendum pabulum et ad tondendum commodius est. Harum auium plurimarum rostrorum extremo corneus quasi angulus (vnguem voluit dicere) adhaeret, quo cibos apprehendunt. Dentium loco circa rostrum striae asperiusculae inueniuntur, praecipue in anatibus, his enim ferratum rostri extremum est: ita enim herbarum carptus, quo viuunt, facilius agitur. — Forte exciderit vnguis mentio et verbum graecum incisuras rostri laterales solas significat.

Tertius est locus de Incessu cap. 10. Aues etiam quaternis mouentur instrumentis motuum; nec enim volare possent, detractis cruribus, nec incedere, alis ablatis, vti etiam homo inter incedendum humeros mouet. Vropygium in alatis regit volatum, vt nauem gubernaculum; sed vtraque pars, ala et vropygium, vt, qua corpori adhaerent, flecti possint necesse est. Ideo insecta, alis continuis, et aues, alis quidem discretis instructae, sed quibus vropygium inutile est ad motum, veluti pauones, galinacei, et omni volatu graues quaecunque, rectum tenere volatum non possunt. Insecta enim vropygio plane carent; hinc, vt naues gubernaculo destitutae, temere feruntur. Quae volatu non valent aues, et vropygium inutile habent, veluti porphyrio, ardea atque omnes natatiles, protensis retro pedibus volatum pro vropygio regunt. Pauoni vropygium aliquando propter magnitudinem nulli est vsui, interdum vero, quoniam excidit, nihil potest iuuare. Contrario autem se habent modo aues in alarum natura ad insecta, quae alis non diuisis volant, maxime aues praepetes, veluti rapaces. His enim pernecitas ad victum confert. Aptae igitur ad eam rem et reliqua corporis membra natae sunt, caput paruum, collum angustum et gracile, pectus validum, et acutum quidem, vt veluti lembi prora aërem melius incidat, validum vero carnis tegumento, quo aërem incurstantem facilius et sine molestia possit propellere. Partes contra posteriores corporis leues et in angustum iterum coeuntes habent, quo facilius anteriores sequantur, nec aërem latitudine morentur.

Quartus locus ibidem cap. 15. exstat. Aues quadrupedum more crura inflectunt sua; illarum namque natura fere similis est. Auibus enim alae priorum vicem gerunt pedum; quamob rem eodem inflexae sunt modo, vt illis priora sunt crura; namque iis motus principium in incessu auibus proprio, qui volatus dicitur, ab alis procedit. Quare, his ablatis, aues nec stare nec progredi possunt. Praeterea



cum bipes auium sit genus, neque erectum, et anteriores corporis partes leuiiores habeat, aut necessarium, aut melius certe est, vt stare possint, subiectum sic habere femur, eo scilicet modo, vt retrorsum vertatur. (*εις τὸ ὀπισθεν πεφυκότα*. GAZA: retrouersus connatum.) At enim si hoc oportebat modo se habere, crurum etiam inflexum ad concavam partem fieri necesse erat, sicuti fit in posterioribus quadrupedum cruribus. In vniuersum autem aues et insecta volantia et pisces pinnis natantes, melius est, vt facile animaduertere licet, instrumenta motus in latere ex obliquo apposita habere; ita enim et celerrime et fortissime aërem et aquam findunt et mouentur. Corpus enim ita sequi facile potest antrorsum et retrorsum contra mollem et cedentem aërem aquamque impulsam.

Quintus locus est de Generatione III. cap. 1. Oua subuentanea intus consistunt in auibus quibusdam, quae volatu non valent, nec rapacibus, sed quae multa pariunt. Rapacibus enim eadem pars nutrimenti in pennas plumasque excernitur; corporis vero naturam habent ipsam paruam, siccam et calidam. Hanc igitur ob causam rapaces nec salaces sunt, nec ova multa pariunt, vt graues volatu, et eae, quae volatu quidem excellunt, sed corpore sunt ponderosae, vt columbae et similes. Ex hoc vero genere grauib. volatu, vt gallinis, perdicibus et similibus, abundat nutrimenti pars ea. Quare mares earum salaces sunt, et feminae materia ouorum abundant. Ex hoc igitur et simili genere pars multa simul ova parit, pars saepe parit; multa quidem simul gallina, perdix et struthio; columbaceum autem genus non multa, sed saepe, parit. Est enim medium inter rapaces et graues volatu aues. Volatu quidem excellit, vt rapaces, pondere vero corporis grauib. accedit alitibus. Minutae etiam aues multiparae sunt; quare etiam Adriaticae gallinae omnium foecundissimae sunt, vt-pote paruae, et gallinae minus animosae generosis excellunt in foecunditate. Quin et tenuitas et debilitas crurum facit, vt earum natura sit salacior et foecundior, vt in hominum etiam genere fieri videmus. Aues rapaces planta pedis sunt forti et cruribus crassis propter victum; has igitur ob causas omnes minus sunt salaces et foecundae, excepta cenchride, quae sola plura et quidem quatuor parit ova et sola fere bibit. — Calidioribus auibus pars oui candida et lutea magis distincta est, et candida semper maior; contra minus calidis et humidioribus, vt palustribus auibus, pars lutea copiosior et aquosa magis est, apparetque colore pallidior, vt in piscium ouis, quia non tam accurate a candida secreta est. — Postremam sententiam etiam in Hist. anim. VI. 2. et ova auium, quae in aquis et circa paludes degunt, multo plus lutei habere ait, quam earum, quae in sicco viuunt. Quam quidem obseruationem equidem nullo recentiorum testimonio confirmatam adhuc reperi; contra adeo MARSILIUS in Danubii Vol. VI. p. 124. plus albuminis habere ova aquaticarum auium nutrimenti causa affirmat. BUFFONVS ex BELLONIO repetit, luteam oui partem in aquaticis auibus, vt anatis, magis rubram esse.

Postre-



Postremus nunc accedat locus ex Historia animalium II. 12. Pro pedibus et manibus aues usum alarum peculiarem sibi habent. Clunis seu ancha similis est femori longo et ad medium usque ventrem adhaeret adnatus, ita ut, nisi separetur (*ὥς* inserta negatione *μὴ διαίρεμενον* legendum censeo), femoris speciem praebeat; sed femur ipsum inter clunem et tibiam separatum est et diuersum. Aues rapaces omnium maxima femora habent et pectus fortissimum. Ungues plures habet vniuersum auium genus, et digitos separatos fere omnes quodam modo. Plurimarum enim digiti distincti sunt, aquaticarum autem membrana connexi; digitos tamen ipsos eae bene expressos atque separatos habent. Quae volatu se efferunt in altum, quatuor digitos habent, ternos antica in parte, quartum in postica pro calce positum; paucae quaedam binos ante et post positos habent, ut torquilla. Os aues omnes habent quidem, sed peculiaris formae; carent enim labiis et dentibus. Pro auribus et naribus meatus tantum habent, oculorum palpebras sine ciliis; et graues quidem volatu inferiori palpebra oculos claudunt; nictantur vero membrana ex angulo obducta oculis omnes. Contra noctuarum genus superiore etiam palpebra conniuet. Porro aues non squama aut cortice, sed plumis teguntur. Plumae autem caulem seu cannam habent omnes. Cauda quidem carent, sed iis vropygium pro cauda est, longipedibus et palmipedibus breue, reliquis longius. Atque hae quidem attractis ad ventrem pedibus, illae contra retro protensis volant. Linguam omnes habent, sed diuersam; aliis enim longa, aliis breuis est. Post hominem aues maxime, eaeque inprimis, quae latam habent linguam, litteras proferre discunt. Epiglottide omnes carent; meatum autem arteriae asperae diducunt et contrahunt, ne quid graue in pulmonem descendere possit. Quaedam aues in pedibus calcaria gerunt, sed his rapaces omnes carent. Hae enim volatu excellunt, illae contra graues. Denique aues quaedam cristam gerunt, plumis ipsis surrectis; gallinaceus solus peculiarem habet, utpote inter carnem cartilagineamque mediam natura.

De plumarum pennarumque natura breuiter Philosophus H. A. III, 12., pili, inquit, praecisi a radicibus augmentum capiunt, superne non possunt augeri; plumae contra a neutra parte recrescunt, sed radix excidit. Ex hoc loco PLINIVS XI. sect. 94.: Pennarum caules omnium caui (auium VINCENTIVS); praecisae non crescunt, euulsae renascuntur. Videtur igitur olim in ARISTOTELIS libris pro verbis *ἀλλ' ἐκπίπτει· ἐκ ἀναφύεταί δ' ἐκτιλθὲν ὅτε τῶν μελιττῶν τὸ πτερόν, ὅδ' ὅσα ἄλλα ἄσχιον ἔχει τὸ πτερόν* alia lectio fuisse, haec fere: *ἀλλ' ἐκπίπτει, καὶ ἐκτιλθέντα ἀναφύεταί· ἐκ ἀναφύεταί* etc.

Auium pulmonem in duas partes fissum et separatum vtrinque esse annotauit H. A. II. 17. Quae nec prolobum nec gulam ipsam latam, sed valde longam habent cum collo longo, fere omnes excrementa liquidiora reddunt, ut



porphyrio. Ita tradit H. A. II. 17. Color excrementorum in auibus ad albedinem vergit, ut in quadrupedibus et reliquis animalibus ouiparis, quae vesica urinaria carent. De Partibus IV. 1. Aves omnium animalium maxime pituitae morbo infestari legimus in Problem. Sect. X. probl. 53.

Partus differentiam etiam annotavit de Generatione IV. 6. Aves etiam, inquit, nonnullae imperfectos et caecos pariunt pullos, videlicet, quae, corpore quanquam parvae, multa tamen edunt ova, veluti cornix, pica (glandaria), passer, hirundines, et quae praeterea pauca quidem ova, sed alimento copioso non aucta edunt, ut palumbes, turtur, columba. Quam ob rem si quis hirundinum novellarum adhuc oculos nondum perfectos expungat, iterum incolumes redduntur. Exempla partus avium caeci plura iam in annotationibus ex ZORNIO nostro attuli. Nunc alia quaedam addere iuvat. Laniorum pulli ad quintum usque diem atque ultra nudi, et ad octavum usque caeci reperiuntur; deinde lanulis vestitur corpus griseis. Die decimo et quinto nidum quidem relinquunt, sed alis volatum exercere nondum possunt; igitur de ramo in ramum saliant, ventre vario, reliquo corpore colore griseo lucidiore induti. Mense demum exacto, postquam nidum reliquerant, alis confisi evolant, auctore Cl. TENGMALM in Actis Novis Stockholm. anni 1781. p. 101. seqq. Strix aluco mense Aprili ova quinque alba edit et mensis unius spatio incubat; pulli exclusi ultra diem nonum caeci, postea oculos aperiunt rubeis et tumentibus palpebris; altero a natiuitate die lanulis niveis toti teguntur, eamque vestem vix post tres septimanas plumis pennisque permutant, postremo demum Iulio perfecti volatum exercent, similes parentibus, sed grisei; ubi parentes colore brunneo nitent. Cauda tamen adhuc parva conspicitur, ut tradit idem TENGMALM ibidem anni 1782. p. 133. Contra avium aquaticarum morem vriae gryllae pulli ad postremum diem Augusti mensis nido innutrientur; quo deinde egressi et perfecti a parentibus seiuncti piscantur et viuunt in mari, auctore Cl. OEDMANN Actor. nov. Stockholm. anni 1781. p. 230.

Has omnes ARISTOTELIS observationes qui cum capite laudato COLTERI comparaverit, multa reperiet ab eo omissa esse, quae disciplinam hanc absoluunt, et simul egregium philosophi ingenium admirabitur, quocum pauca admodum nostrae aetatis licet comparare. Adnotationes his adiicere superfluum videtur mihi, quoniam rerum argumenta ipsa recte explicata video esse; de rationibus additis nimis longa esset disputatio.



DE

# MVTATIONE PLVMARVM ET PENNARVM AVIVM AQUATICARVM ET TERRESTRIVM.

AD FRIDERICI II. CAPITA 45. 46. 47. 57. LIBRI I.

**A**nseres domestici alarum pennas remiges fere omnes simul, saepe vna nocte, amittunt, nuditatem suam pudore et timiditate aliquo modo testati; verum post quadraginta dies succedunt novae pennae, quarum usum per plures dies volitando experiuntur, vt tradit BVFFONVS T. XVII. p. 63. Feros anseres foetificatione peracta pennas mutare vna cum sobole ipsa tumque inter arundines absconditos latere, tradit ZORN Petinotheol. II. p. 406. Subita etiam in anate boscade fit pennarum alae remigum mutatio; eandemque in tadorna, penelope, fusca (Cravant) obseruauit BAILLON apud BVFFONVM p. 227. Mares quidem post coitum, foeminae demum exclusis ouis pennas mutant, eiusque rei causam a viribus coitu et partu exhaustis repetit ill. BVFFON. Paucis ante mutationem diebus veluti scabie mordicante agitantur et varie vexantur, tristes tenebras sequuntur latebrarum per triginta fere dies, anseres vero et fusca anas per quadraginta dies pudibundi latitant; renascentes deinde pennas laetitia comitatur, statimque aqua saepe se lauare alasque experiri nouas gestiunt. Saepe tum accidere solet, vt fugam alis nouis confisae anates capiant noctu. Anas moschata Cayennae aestate omnes alarum amittit pennas tumque in aquis inter herbas abscondita latet, auctore DE LA BORDE ibid. p. 228. Anas penelops, acuta, strepera, platyrynchos, griseae nascuntur, quem colorem mense demum Martio mutant, ita vt inares a femina non possint distingui. Deinde plumarum color variatur sub coitus tempora, cum in regiones septentrionales per coniugia migrant; sed iterum sub finem Iulii ornatum amittunt mares fere omnem, quo discerni possint, plumaeque griseae pulcrioribus succedunt. Vocem etiam ipsam per sex anni menses amisisse subito videtur vterque sexus post coitum. Mense denique Nouembri migrant ex Gallia; et quae in itinere capiuntur anates, inprimis acutae, fere totae griseae a sobole iuniori secerni nulla nota possunt. Ita quidem tradit BAILLON apud BVFFONVM p. 251.



p. 251. Diutissime omnium anas platyrynchos plumarum colorem nuptialem retinet, eodem auctore ibid. p. 271. Soboles primum in ventre et dorso plumis vestitur, et postquam ultra dimidiam partem corporis incremento perfecit, sex fere septimanis a natiuitate alarum pennae ortae tribus demum mensibus ita perficiuntur, vt confusa auis alis suis volatum tentare possit. Eo usque apud Gallos *Hallebrans* audiunt (BUEFFON p. 202.). Anas clypeata, vt etiam platyrynchos, senes saepe colorem plumarum nuptialem griseo permixtum gerunt, feminae etiam admodum senes quaedam speculo alarum, vti mares, insignes conspiciuntur. Anatis tadornae soboles recens nata dorsum nigro alboque variegatum habet, ventrem candidum, mox autem griseo colore induitur, rostro pedibusque caeruleis; Septembri demum mense plumas pulciores monstrare incipiunt, quae anno denique secundo perficiuntur. Mares etiam altero demum anno perfici et ad coitum idonei fieri videntur; tunc enim tuberculum sanguineum ad radices rostri in fronte ortum post coitum iterum oblitteratur; reliquam plumarum pulcritudinem per totum annum anatum solae seruant. Ita tradit BAILLON apud BUEFFONVM p. 304. Tuberculum igitur simile fuerit carunculis in tringae pugnacis fronte nuptiarum tempore nascentibus, et cornibus phasianorum eodem tempore erumpentibus. Sed tringae carunculas vere et autumnno conspicuas vidi ipse saepiuscule. Anatis fuscae pullos mense Septembri iam sexum rostri colore flauo et tubere arguere, ceterum fere nigros, postquam ouis exclusi sunt, testatur diligentissimus OEDMANN Actor. Nouor. Stockholm. ann. 1785. p. 191. Anates circiae (Sarcelle d'été, Criquard) mares mense Martio plumarum pulcritudine superbiunt nuptiarum tempore, deinde vero plumarum colorem nouo eoque griseo cum ipsis plumis mutant, eoque colore conspiciuntur usque ad mensem Ianuarium; post mensem deinceps plumarum color iterum variatur et paulatim pristina redit iis pulcritudo, auctore BAILLON ibid. p. 392.

Mergorum genus, anatibus proximum, variis etiam a prima iuuentute coloribus variatur usque eo, dum in aetate matura proprius cuique sexui color consisterit. Hinc mira specierum sexuumque confusio naturalem eorum historiam perturbauerat; quam egregiis obseruationibus illustratam in ordinem redegit aetatumque colores varios distinxit coniunctissimus collega B. CHR. OTTO. in *Oeconom. Nachrichten der schlesischen patriotischen Gesellschaft*, anni 1779. No. 12. et 13. pag. 89. seqq., idem, cui illustris BUEFFONI historiam auium et quadrupedum vernaculo sermone redditam, sed multo veraciorem, debemus. Vriam Gryllen quinto demum anno nigrum viridi specie splendentem colorem pedumque cinnabarinum induere, auctor est Cl. OEDMANN Actor. nou. Stockholm. anni 1781. p. 229.



Genus larorum pro aetate et mutationum numero vario colore plumarum ludere, obseruauit post alios OLAFSEN in Itinerario Islandico; deinde eam varietatem in laro marino griseo (Grifard) aliaque specie, tertia illustris BVFFONI, accuratius persecutus est BAILLON apud BVFFONVM XVI. p. 203. et 225. Pulli prioris speciei colore sunt griseo obscuro; post primam mutationem color fit lucidior, collumque cum ventre primum albescere incipit; post tertiam mutationem plumagium omne griseo alboque colore variatur, a senectute totum fere corpus album colorem trahit. Secunda species lari primo aetatis anno alarum pennas habet nigrescentes, a secunda mutatione color nigrior albo variatur; cauda pullorum extrema grisea aut nigra; caput cum colli superiore parte maculatum est; verum paulatim maculae hae candido colore mutantur; color rostri pedumque coerulescens secundo demum anno prodit. Denique totius generis naturam mutationemque inprimis colorum cum plumis diligentissime nuper explicuit OEDMANN in Actis Nouis Societ. Stockholm. anni 1783. N. 1.

Scolopacem auocettam in prima aetate griseam esse, ex eo suspicatur BAILLON apud BVFFONVM XVI. p. 286., quod, dum mense Nouembri migrant, plures conspiciuntur plumis scapularibus vropygiiue griseis; has enim plumas cum illis, quae alas tegunt, diutissime iuuentutis primae colorem retinere asserit. Marium praeterea caput rotundius paulo esse ait, et tuberculum carneum sub cute iuxta oculos magis, veluti inflatum eminere. Verum quam rostri seu capitis partem hoc tuberculi nomine voluerit ille intelligi, equidem ignoro. Videtur tamen pars ea pertinere ad foueam membrana tectam inter oculos rostrique basin, de qua in annotationibus dixi. Latent in hac fouea glandulae lacrymales cum ductibus, saepe etiam cartilagineae spongiosae narium.

Vannorum pulli dumis nigrescentibus vestiuntur, e quibus pili longi albique eminent; mense Iulio mutant, coloremque pulcriorem induunt, vt annotauit etiam BVFFON XV. p. 85.

Charadrius pluuiialis prima aetate griseus, prima in mutatione mense Augusto et Septembri luteis maculis variari incipit, post annum demum alterum aureo splendore induitur. Femina griseum colorem diutissime retinet, et senex lutei aliquid coloris plumis immistum gerit, vt tradit BAILLON apud BVFFONVM XV. p. 130.

Scolopacis rusticulae LINN. pulli ouis exclusi statim deferunt nidum, per totum corpus pilis tecti, quos Galli *poil folet* appellant, adeoque volatum experiuntur nullis aliis, nisi alarum pennis, induti, vti tradit BVFFONVS XIV. p. 242.



Haec in auibus aquaticis et mediis seu palustribus, quae aquarum ripas et prata cibi causa frequentant, accidere solent. In terrestribus autem, imprimis iis, qui cantus causa seruitutem pati caueis inclusae coguntur, mutatio pennarum manifestior est, et multo plures certioresque de ea exsiant virorum doctorum et curiosorum observationes, quarum partem iam in annotationibus attuli. Duae in his mutationes plumarum pennarumque distinguere licet. Altera quidem mares plurimos pulcriore plumarum pennarumque colore nuptiarum tempore a feminis distinguit; altera vero peracta nidificatione pullisque exclusis sexum vtrumque similem magis sibi facit, adeo ut plurimis in generibus mares agnoscere usque ad nuptiarum tempora non possimus. Haec ita accidere in sturnis, fringilla linaria aliisque, annotauit diligentissimus ZORNIVS noster Petinotheolog. II. p. 323. et p. 340. In loxiis capensi, oryge et cassra eandem coloris mutationem observauit Cl. THVNBERG Actor. Nouor. Stockholm. Ann. 1784. p. 288.

Tringae pugnaces mares papillas faciei et collare longum variumque pennaecum, quibus sub nuptiarum tempus superbiunt et praelia inuicem faciunt, post exclusam educatamque sobolem cum reliquis plumis collare deponunt sub finem Iunii; papillae sensim oblitterantur, earumque in locum plumae succedunt. Ita quidem tradit illustris BUFFON T. XIV. p. 311. Ipse tamen mares papillis collarique egregie pictos non solum vere, sed autumnio etiam saepe vidi manibusque tractavi, adeo ut, si vera tradidit vir doctissimus, credere necesse sit, aues istas multo serius apud nos plumas mutare, quam in Gallia et alibi. Quod si haec omnia et quae praeterea de phasianorum cornibus alibi retuli, bene consideramus, non adeo a vero alienam existimabimus esse eam narrationem, quae tetraonum genus in terris septentrionalibus frigidissimis altera mutatione plumas duplices induere ait. Videmus enim, quadrupedes etiam bestias sub hiemem pilis et densioribus et longioribus indui et contra frigora defendi. Ardeis bisis maribus sub nuptiarum tempus florem puluerulentum plumarum aspergi, tradit Imperator FRIDERICVS; eamque observationem in ardearum genere nullibi repetitam reperi; sed de speruerio ex auium rapacium genere eadem tradit CARCANVS, artis falconariae magister Italus, ut in Notitia litteraria Scriptorum artis falconariae tradidi. Ordinem mutationis plumarum pennarumque de vniuerso auium genere nullibi accurate distincteque traditum reperi; atque in auibus cauea inclusis multa non solum ordine diuerso, sed serius etiam nec tam subito, quam in agrestibus liberisque, accidant oportet, quoniam victum saepe alienum et insalubrem capere, et aëre libero motuque corporis et volatu carere coguntur. Plurimae aues in tam violenta corporis commotione et calore crescente aquis refrigerare corpus solent, rapaces aequae atque cantatrices. In libro Italico: Ammaestra-  
menti per allevare, pascere e curare gli uccelli li quali s'ingabbiano ad uso di cantare. Opera novamente composta per Cesare Manzini, Romano. In Brescia, 1607.



1607. in 12mo., annotari video cardueles atque omnes similes auiculas post mensem a natiuitate plumas mutare, cauea vero inclusas mense Iunio, Iulio et Augusto, prouti aut viribus aut calore interno corporis valent. (cap. 12.) Idem repetit cap. 30., vbi aues eam mutationem subire incipientes, quod ex plumis per caueam sparsis agnoscere licet, vino irrorare suadet. Contra OLINA p. 72. accidere plumarum mutationem passerum ordini ait a medio Iulio per totum Septembrem, tumque inclusas cauea auiculas vino irrorare et soli opponere siccandas iubet. Lusciniae, Ficedulae et Atricapillae similibusque apponendum tum monet in cauea vas aqua repletum, in quo lauentur. Easdem vero auiculas liberas in aëre mense vno aut altero a natiuitate plumas mutare.

In vniuersum licet ex obseruatione Imperatoris primam hanc ponere distinctionem auium, vt rapaces primi anni plumas pennasque serius perfectas habeant semelque deponant, reliquae vero omnes easdem bis exuant. Reliquis deinde annis succedentibus semel vtrumque genus mutare plumas pennasque tradit Imperator; quod mihi quidem improbabile esse videtur. Neque enim video, vnde subito mira colorum varietas nuptiarum tempore possit existere, quae nidificatione peracta oblitteratur cum multis aliis marium argumentis, nisi plumae iterum post nuptias mutantur. Potest nempe hoc fieri, dum absunt a regionibus nostris; ideoque vnicam tantum mutationem obseruare licet in iis, quae per ver aestatemque nobiscum degunt. Suadere hoc etiam analogia quadrupedum videtur, etsi certi aliquid ea de re traditum nondum reperi. Sed ex allatis mutationum exemplis patet, quam serio diligentique studio sit opus ad auium habitum coloremque bene dignoscendum, ne varia aetatis tempora mutatusque plumarum color decipiant eos, qui genus vniuersum auium ex specie corporis externa iudicant; quod quidem ineptissimum mihi semper visum est et plane alienum a consilio auium genera recte et naturae conuenienter ordinandi atque explicandi. In peregrinis veniam facile reperiet factum; in vernaculis et domesticis, nisi ignorantia ignauiaque, non potest excusari. Denique ex collectis hic virorum doctorum Imperatorisque FRIDERICI II. obseruationibus manifestum fit, regulam a Cl. PENNANTO positam in Zoologia britannica: primum iridis oculorum, remigum rectricumque pennarum colorem in omnibus auibus eundem semper manere, in paucissimis, nedum in omnibus auium generibus locum habere, quod iam annotasse video Cl. OEDMANNVM in larorum historia supra laudata.



# I N D E X

## LECTIONVM VARIANTIVM.

**P**unctualem in praefatione diligentiam in reddenda primi exempli scriptura etsi spondendam, aliter tamen accidit consilio bono quidem et laudabili, sed a meo plane alieno iuuenis doctissimi, Medicinae Candidati, cui librarius plagellas a prelo madidas emendandas tradidit. Quod quamvis factum nollem, video tamen, omnes fere correctiones, quas ille huic editioni intulit, in vitiis exempli primi apertis esse factas; de paucis dubitari potest. Ne igitur, qui per nimium otium muscas sectantur, negligentiae me accusent, hunc breuem lectionum indiculum subiunxi, quas vitiosis primi exempli permutauit GOTTFR. HENR. SCHAEFER. His delectari puto posse homines, quibus minutiae placent in litteris.

- |   |  |
|---|--|
| P. 2. prooemialis. Primum exemplum habet proaemialis. | P. 20. fassiani. Primum exemplum habet fassiani. |
| P. 3. artis venandi — venandae.                       | P. 23. septentrionales — septrionales.           |
| P. 5. locorum ad calorem — colorem.                   | P. 25. scribitur — scibitur.                     |
| P. 7. aquas — aquias.<br>— tractandis — tractandus.   | P. 31. et in extremitate — ex in extremitate.    |
| P. 8. identitates — idenditates.                      | P. 32. obrotundum — obrutundum.                  |
| P. 9. contingeret — contigeret.                       | P. 33. venas, arterias — renas, arterias.        |
| P. 14. praeparandum — praeperandum.                   | P. 35. et caeteris ligamentis — et et caet.      |
| P. 17. subito insequuntur — in insequuntur.           | — descendit ab humeris — d. 2. humerius.         |



- P. 36. densius pectus. Primum exemplum habet densus p.
- P. 39. respectu sui — respectui f.
- P. 41. et coxae — ex coxae.
- quanto plus sunt coriales — quando p. f. c.
- P. 46. vuulae — vululae.
- inter costas — costam.
- P. 47. ab inuicem — ad inuicem.
- isophagus ab ore — ab ab ore.
- P. 49. indiuidua — in diuidio.
- P. 50. tum quoniam — tam quoniam.
- P. 53. contiguari — continguari.
- contiguatae — continguatae.
- P. 54. hos duodecim vanos — has d. v.
- et expositum — ex exp.
- P. 55. curtellos — curtellas. Italis cultelli etiam *cortelli* dicuntur.
- impeditur — impediditur.
- P. 57. mansio earum non est — m. eorum n. e.
- P. 59. tanto erunt illae aues — tonto e. i. a.
- P. 62. refrigerandum. Primum exemplum habet refrigerandum.
- P. 70. et plumas. Haec verba Corrector statim post *pennas* collocanda suspicatur; non male.
- P. 74. sunt istae — iste.
- P. 78. pascunt eos — p. eas.
- P. 83. distantes ab inuicem — ad inuicem.
- P. 91. de lanulis et plumis — d. l. ex pl.
- quanto enim diutius — quando e. d.
- laesione perpetua — l. perpetuae.
- P. 93. miscent cum ouo — m. c. oue.
- P. 96. ministrabatur — ministrabantur.
- P. 93. in nutriendo tam paruos — in n. t. paruas.
- P. 98. ceperit — caeperit.
- praedam focii — p. forii.
- cum vnguibus hebetatis — [c. v.] habetatis.
- P. 97. acum rotundam — a. rotundum.
- P. 106. ceperit — coeperit.
- P. 114.



P. 114. secundum proportionem — secundam p.

P. 115. potest dari maius — p. duri m.  
— ad quem deducendum — ad quam d.

P. 124. tangi ab aliquibus infuetis — t. ab aliequibus in.

P. 126. per aliquot dies — per aliquos dies.

P. 130. falconarius furgat — falconaris furgat.

P. 133. statuenda est ergo pertica vel

fed. In exemplo primo deest vocabulum *pertica*.

P. 133. portando ipsum — portano ipsum.

P. 136. propter motus manuum — p. m. manum.

P. 143. si cum becco ceperit — si c. b. caeperit.

P. 144. tanta erit auiditas — t. e. auditas.

P. 149. non autem erit balneandus — non nutem e. b.



---

# AVCTARIVM EMENDATIONVM

A T Q V E

## ANNOTATIONVM AD AELIANVM

### DE NATVRA ANIMALIVM.

**A**d libri I. caput 1. Diomedearum auium historiam rectius forte iudicare ipsasque aues facilius agnoscere liceret, si antiquiores fabulae auctores graeci hodie exstarent. Hodie ignotum libri de mirabilibus narrationibus auctorem, OVIDIVM serioresque eo scriptores sequi cogimur, qui pro vario consilio rerumque naturae cognitione vetustiores notitias amplificarunt, ornarunt variisque erroribus obscurarunt. Ex OVIDIO Metamorph. XIV. 271. nihil, nisi rostrorum corneum durum acumine terminari, digitos magnam pedis partem occupare et vocem lacrimosam discimus; formam reliquam cynis proximam esse canit. In comparatione cyni, ardeae et fulicae colorem aut victum aquaticum spectasse videntur auctores diuersi. Sed maiorem auctoritatem habere videtur locus ignoti quidem, sed antiquioris, vti videtur, auctoris libri de mirabilibus narrationibus, ARISTOTELI male vulgo adscripti, qui cap. 80. aues Diomedearum in insula maris Adriatici circum fanum Diomedis degere (sedere) narrat, magnas corpore, rostro magno et duro, quo hospites barbaros intrantes dicuntur impetere subuolantes et praecipites in eorum capita deferri (καταράσσειν). Secunda est auctoritas Iuba regis, Iulii Caesaris ex aeuo, quem PLINIVS X. cap. 44. exscripsit. Is igitur catarractas vocauit; ex voce graeca, qua in narratione de his auibus vtitur auctor libri graeci supra laudati. Est praeterea avis alia ab OPIANO seu auctore Ixeuticorum dicta eodem nomine, quam eandem cum Pelecano Bassano LINNAEI esse, egregie nuper docuit Cl. OEDMANN. Haec simili modo praeceps ex alto defertur, vt pisces e mari rapiat. Praeterea Iuba iis dentes esse igneosque oculos, reliquum corpus candidum ait. Duos semper esse eorum duces; alterum agmen ducere, alterum cogere, (i. e. postremum incedere, impellere reliquos); scrobes excauare rostro, inde crata consternere (i. e. furculis in versum superpositis, vt recte interpretatur SOLINVS cap. 2.) et operire terra, quae antea fuerit egesta: in his foetificare. Fores binas omnium scrobibus esse: orientem spectare eas, quibus exeant in pascua, occasum, quibus redeant. Aluum ex-  
onera-



oneraturas subuolare semper et contrario flatu. Quae deinceps sequuntur, a PLINIO interfecta fuisse videntur. Mutata enim verborum structura, vno, inquit, hae in loco totius orbis visuntur — fulicarum similes. — aduenas barbaros clangore infestant — aedem Diomedis quotidie pleno gutture madentibus pennis perluunt atque purificant; vnde origo fabulae. Ex Iubae narratione colligere licet, aues esse gregatiles et in scrobibus iuxta mare excavatis rostro nidificare, colore candido, igneis oculis. Dentes rostri ad quam partem referantur, dubitari potest; si sunt in margine appositi, vt in anate, mergo, anser et similibus, ad genus diuersum pertinent ab eo, quod marginem rostri durum et incisum seu dentatum habet, vt ardeae et aliae aues aquaticae. Quodsi dens in postremo rostro additus seu rostri acumen intelligitur, aut dens in extremi rostri latere vtrunque excisus, vt in falconum genere, de longe alia specie cogitandum est. Graecus scriptor supra laudatus rostrum magnum et durum (*σκληρόν*) nominat; quodsi voluisset dentibus asperum intelligi, sine dubio *τραχύ* scripsisset. Animus igitur mihi inclinatur in eam opinionem, vt putem, acumen rostri dentatum significari a Iuba. AVGVSTINVS de Ciuitate dei XVIII. cap. 16. ex antiquo aliquo scriptore tradit, Diomedas aues rostrum aqua implere eaque templum aspergere — si autem alienigenas viderint, subuolare ad capita tamque grauibus ictibus vulnerare, vt etiam perimant. Perhiberi enim duris et grandibus rostris ad haec praelia armatas esse. Qui locus plane cum graeco supra allato conuenit, atque adeo ex eo traductus esse videtur. ALBERTVS XXIII. p. 234. ex PLINIO sine dubio sua duxit, attamen interfert aliunde quaedam. Rostreis, inquit, acutis cauant molliora rupium, in quibus nidificent, et tecta desuper extegulis et puluere componunt ad modum magni cippi — sed quum querulas emittunt voces, significare dicunt augures aut ipsarum aut regis patriae aut vtrorumque excidium. In fine addit, impugnare barbararum nationum hospites, qui ad nidos suos accedant; quod veri speciem maiorem habet, quam reliquae narrationes. Pannum de augurio ex querula (lacrymosa ISIDORO) voce assuit ex ISIDORO, qui rostrum durum et grande memorat. Aues quotidie ex mari se recepisse in terram congregatae in vicinia templi Diomedis videntur, vbi cum plaudentes alas excuterent aquarumque aspergine templum madefacerent, purificare velle id visae sunt ineptis et superstitiosis fabularum fartoribus. Ex notis iis, quas posui explicuique, iam olim LACHMVND de Aue Diomedeae, Amstelod. 1675, genus procellariae intelligi collegerat; quam eandem opinionem secuti sunt Cl. BECMANN ad ARISTOTELEM de Mirabil. p. 158. et illustris BUFFON T. XVII. p. 465. Vterque procellariam puffinum interpretantur. Cui equidem opinioni assentiri non dubito; etsi magnitudo satis conuenire in eam non videtur. Hoc genus auium insulas desertas frequentat; vbi cuniculorum foueas occupant, primo habitatore eiecto, ne ipsae operam nido effodiendo dare cogantur; quod idem facere anatum sola amat tadorna. Hoc equidem argumento praecipue confido;



fido; rostrum magnum et durum est, et ad aquilinam formam accedit; coloris similitudinem habet cum ardeis et cyncis communem; sed ex eo arguere nihil possumus. Procellariae speciem diuersam, pelagicam puto, ARISTOTELES κέπ-Φον nominauit, vt alibi demonstrare conatus sum. Video tamen nunc demum, illustri BUFFONO eam arrisisse opinionem, quae larum canum interpretatur a sono vocis, quae in syllabam keph (*kutgekef*) desinere solet. Tom. XVI. p. 219. ed. octauae formae.

I. c. 18. ἀσήμῳ μὲν, ἣ δὲ δύναται σύνθημα recte emendauit Cl. WYTTENBACH ad PLUTARCHVM de Sera numinis Vindicta p. 102.

II. c. 11. p. 49. ad notam. Locutionem tamen eandem frequentat GALENVS. Sic enim ille initio Administ. Anatomic. I. p. 119. ed. Basil.: γράφειν δὲ αὐτοῖς ἄλλας εἰκοι τὰύτας, διὰ διττὴν αἰτίαν.

II. c. 17. ad notam de echeneide. Vbi male iudicaui de loco OPPIANI. Maxilla enim inferior acuta, multum prominens et paululum reflexa arguit, OPPIANVM de echeneide loqui, qualem hodie nouimus. In pinnis tamen pedum similitudinem nullam agnoscere potui, cum nuper ipsum piscem cultro anatomico indagarem structuramque scuti capitalis explicarem pingeremque.

II. c. 21. p. 56. Pro αἰγῶσι recte αἰγῶσι emendat WYTTENBACH l. c. p. 8.

III. c. 3. Ex eodem sine dubio CTESIA refert PALLADIVS de Bragm. p. 5.: ἔσι δὲ τὰ πρόβατα τετραχωμένα ἄνευ ἐρέας γαλακτοφόρα λίαν πλατείας ἔχοντα ἐρέας — χοῖρος ἀπὸ Θηβαίδος ἐκ ἔτι εὕρεσκειται ἐν τοῖς μέρεσιν Ἰνδίας ἢ Αἰθιοπίας δι' ὑπερβολὴν καυμάτων.

III. c. 6. De lupis eandem narrationem habet ARTEMIDORVS Oneirocrit. II. 12. et SVIDAS in voce Λυκάβας. Eandem etiam hoc loco AELIANI laudato refert EVSTATHIUS ad Odysseam p. 538. ed. Basil., vbi in verbis, sed alieni auctoris, melius legi videtur ἐνδακόντες τὰς ἐρέας.

III. c. 19. cum capite 17. iungendum esse, recte admonuit WYTTENBACH ad PLUTARCHVM l. c. p. 43.

III. c. 26. Lectionem ἀπηνέστατον GYLLIVS expressit auium inimicissimam interpretatus, vt admonuit GESNER de Auibus, p. 745.



III. c. 28. ad notam. Dentes magni et frequentes (*πυκνοί*) potius Sparum arguunt.

III. c. 32. ANTIGONVS Carystius c. 14. de Zazyntho: ὑπὸ γὰρ τὰς ἐτησίας χαίνοντες ἐσήκασιν οἱ τράγοι πρὸς τὸν βορέαν, καὶ τὸτο πράττοντες ἔπρουν ὕδατος ἔδὲ πίνουσιν. EX VALERIO MAXIMO Libro I. de gestis et dictis memorabilibus refert VINCENTIVS Bellouacensis Speculi naturalis libro 18. c. 2. et 71.: in Cephalenia insula cum omnia vbique pecora vsu aquae quotidie recreentur, in ea pecudes maiore ex parte anni ore aperto ex alto ventos recipientes sitim suam extinguunt. Idem infra de capris montis Mimantis refert ALEXANDER Myndius V. c. 27.

III. c. 35. Contra emendationem a GRONOVIO receptam pugnat locus PLINII XI. sect. 112.: mutae in Macedonia traduntur ranae, muti et apri. Ceterum capras Illyricas folipedes commemorat AELIANVS infra V. 27., si locus est sanus. Camelos folipedes AVICENNA apud ALBERTVM M. de Anim. II. p. 36. b.

III. c. 42. ad notam de quino digitorum Porphyriionis (fulicae) numero. Potuit tamen fieri, vt porphyriiones, postquam diu inter aues domesticas cum gallinis cortalibus vixerant, eodem signo distinguerentur, quo gallinae generosiores a Scriptoribus rei rusticae distinguuntur. COLVMELLA enim VIII. c. 2. gallinas imparibus vnguibus probat et generosissimas haberi ait, quae quinos habeant digitos. Ita et VARRO III. 9. impares digitos postulat, et GEOPONICA XIV. 4. περιπτοδακτύλης. PLINIVS X. sect. 77.: gallinarum generositas spectatur digitis imparibus aliquando et super quatuor digitos transuerso vno. Gallinarum speciem pentadactylam hodieque nouimus; hexadactylam commemorat adeo illustris BUFFON. Picas glandarias illas, quibus quini sunt digiti in pedibus, facilius sermonem humanum imitari, tradit PLINIVS X. sect. 59., quod ad pfitacum male transtulit cum SOLINO c. 52. APVLEIVS Libro 2. Floridorum. Ipse in gallò castrato reperi in altero pede digitum posticum duplicem, quorum vnus duos, alter vnicum articulum habebat; in eodem calcarium vestigia non dubia eminebant. Plura olim in Commentariis ad Scriptores rei rusticae, quos innumeris mendis purgatos dabo.

IV. c. 5. Differentiam *κίρκης* a *κίρκω* ex hoc loco repetiit EVSTATHIUS ad Odyseam p. 333.

IV. c. 34. ad notam. Loca OPPIANI, AELIANI cum PLINIO et ARISTOTELE in consensum reduxi de generibus leonum in Censura nuperae OPPIANI editio.



editionis inserta Commentariis Lipsiensibus de rebus in scientia naturali et medica gestis Volum. XXVIII. Part. III. p. 477.

IV. c. 40. δραμῶν et cet. Idem de cane Laconico tradit ARISTOTELES H. A. VI. 20., qui etiam III. 7. canis cranium μονόσεον carere futuris ossium male tradit.

IV. c. 42. Easdem Melagrides etiam Garamantidas dictas suspicor a PHILOSTORGIO Histor. eccles. III. c. 11.: καὶ τὰς ποικίλας δὲ καὶ κατασιγῆς ὄρνεις, ὅς Γαραμάντας ἐπικαλῶσιν τινες ἀπὸ τῆς Ἑθνικῆς, ἣ μάλιστα πλεῖστοι κομίζονται, τὴν ἐπωνυμίαν θέμενοι. ISIDORVS Origin. XII. c. 7.: Aliae aues ad manum se subiiciunt, vt accipiter, aliae reformidant, vt garamantes. CONR. noster GESNERVS Garamantidas ex solo NICEPHORO, PHILOSTORGII compilatore, commemorauit. Apud ANTIGONVM Carystium c. 11.: ἔδὲ μελέαγρις ἔδαμῃ ἄλλη ὄρνεται legitur; sed locus mancus desiderium magnum integrae narrationis facit, unde poteramus cognoscere, in quibus Graeciae locis meleagrides primum cultae fuerunt.

IV. c. 43. Narratio de formicis ducta, pannis tamen alienis adsutis, est ex ARISTOTELE H. A. IX. 38.

IV. c. 46. ad notam de cantharo tinctorio. De coccinella tinctoria cogitauerat iam olim EDW. TYSON in Dissert. philologica de Pygmaeis post Anatomiam Pygmaei p. 42., vbi ait: These κάνθαροι are that sort of Scarabaeus, whe call a Lady cow, and i have formerly given a figure of in Philosoph. Transact. n. 176. p. 1202., from the worm or chrysalis of which come the cochinel for dying scarlet, of which there is a good account here in Aelian out of Ctesias. Nec Coccus Laccae a Britanno KERR descriptus intelligitur; is enim ex arboribus succum rubrum trahit atque inde cellas format, quae laccam praebent tinctoribus aliisque artificibus.

IV. c. 50. HIEROCLES in Hippiatricis p. 173.: τὰ τοιαῦτα ἠγνοήθη ὡς περ Μήκωνι τῷ παλαιῷ, ὃς ὤετο ἵππον καὶ τὸ κάτω βλέφαρον ἔχειν τρίχας, αἷς καλῶσιν Ἕλληνες βλεφαρίδας. καθάπτεται γὰρ αὐτῷ Σίμων τὴν ἀγνοίαν ταύτην αἰτιώμενος. Recte igitur MEVRSIVS in AELIANO corrigebat Μίκωνα pro Νίκωνα. Error pictori primum a Simone Atheniensi hippocomo obiectus esse videtur. Simias, elephantum atque inter aues vulturem gryphum et struthiocamelum in vtraque palpebra cilia habere, monuit FERRALTUS in anatomia elephanti T. II. p. 290. vers. germanicae.



IV. c. 55. Scriptor anonymus apud SVIDAM sub voce *καπρέαι*, capreae, inquit, sunt carnes eminentes infra pterygomata pudendi, quas excindunt, cum ad bellum parantur cameli, ne amplius coire possint. Vocem *καπρέαι* in sue castranda adhibet etiam ARISTOTELES. *πτερυγώματα* in pudendo muliebri explicat GABR. FALLOPIVS Obseruat. anatomic. p. 193.

V. c. 1. Initio versio GYLLII habet: *Terram Mariandyneam*. Sed GESNERVS de Avibus p. 575. ex suo Codice laudat *γῆν τὴν Παρίαν*. Memnones aues forte intelligebat PLINIVS libro 19., cum aues ultra Phasidem peti, alias in Numidiam atque in Aethiopiae sepulcra sequi luxuriam querebatur.

V. c. 27. Verba *ἐπὶ τῶν ὤμων ἔχειν τὰ κέρατα* manca esse suspicor et legendum: *ἐπὶ τῶν ὤμων ἔχειν ὕβον καὶ κινεῖν τὰ κέρατα*. Idem de Caricis bobus tradit PLINIVS VIII. sect. 70. Cf. AELIANVS XVI. 33. et II. 20., vbi boues mobilibus cornibus armati memorantur.

V. c. 39. EVSTATHIUS ad Iliadem p. 806. de leone ignem timente: *τῷ δὲ τοιούτῳ φόβῳ φατὶν αἴτιον τὸ ἐνθερμον αὐτῷ καὶ οἷον πυρῶδες. διὸ καὶ δέδιε τὸ πῦρ. διὰ τούτου δὲ, φατὶν, ἔδὲ μύει κοιμώμενος. ὡς δὲ Δημόκριτός φησιν, ἔδὲ τιπτόμενος. μόνος γὰρ, φησὶ, γεννᾶται ὄρεων*. Causa timoris eadem infra traditur XII. 7. De catulis contrarium supra IV. 34. EVSTATHIUS l. c. p. 800. in etymologia vocis *λῆς*. ὡς ὀξυδερκῆς, καὶ ὅτι, ὡς φησι Μανέθων ἐν τοῖς πρὸς Ἡρόδοτον, ἔ καθεύδει ὁ λέων, ὅπερ ἀπίθανον. ἔ γὰρ ἂν αἰεὶ ἐγρηγορεῖ, ἀλλὰ κατὰ δορκάδα τὴν ἐκ τῷ δέρκειν παρηγμένην καὶ κατὰ τὸν λαγὼν τὸν ἐκ τῷ λαῷ, ἀνεωγότας καθεύδων ἔχει τὰς ὀφθαλμούς, ὡς οἱ παλαιοὶ φασιν. De leone Berenicae TERTULLIANVS de anima cap. 24.: plane obliuiscetur feritatis leo, — delictum fiet Berenices alicuius reginae, lingua genas eius emaculans.

V. c. 42. Mel idem furiosum commemorat PEYSSONEL *Traité sur le Commerce de la mer noire* T. I. p. 285.: *On debite à Taman du miel d' Abaza — il est d'une très mauvaise qualité, il cause une ivresse affreuse à ceux qui en mangent, et c'est pour cela qu' on l' appelle deli-bal, du miel fol. On en compose une boisson avec le nardenk; on le mele aussi avec la boisson de millet fermentée appelée b o z a, pour lui donner plus de force.*

VI. c. 64. Vrina caudae floccosae aspersa vulpes etiam vulgo canes infrequentes abstertere dicitur, quo respexisse puto MARTIALEM IV. epigr 49.: quod vulpis fuga, viperæ cubile olet.



VII. c. 4. Κατώβλεψ nominatur iam ab ARCHELAO Cherronesite apud ATHENAEVM IX. p. 409. Ad vri genus seu bisontis referebat illustris BUF-FONVS.

VII. c. 11. Versum non HESIODI, sed exinde expressum esse, ait WYT-TENBACH ad PLVTARCH. l. c. p. 49.

VII. c. 47. LOCUS HIPPONACTIS laudatur etiam ab EVSTATHIO ad Odyss. p. 627.: τῶν ἀγρίων ὕων τὰ νέα οἱ μὲν κολόβρια, οἱ δὲ μολόβρια λέγουσιν· ἐπά-γει ὡς καὶ Ἰππώναξ τὸν ἴδιον υἱὸν μολοβρίτην περὶ λέγει ἐν τῷ κρέας ἐκ μολοβρίτη-συός. De ἀρκήλοις locus ARISTOPHANIS integrior exstat apud EVSTATHIUM p. 350. et p. 633. ad Odyssaeam. Ἀρκηλοι cum lyncibus et camelopardalibus no- minantur a CALLIXENO Rhodio apud ATHENAEVM V. p. 201.

IX. c. 6. De echinis et ostracodermis idem pronunciat ARISTOTELES de Partib. IV. c. 5., de testaceis omnibus ex relatione piscatorum SWINBURNE Itinc- rarii Siculi I. p. 299. vers. germ.

IX. c. 30. ad notam. Omne felium genus Linnaeanum eodem modo recon- ditos gerit ungues, quem accurate pinxit et descripsit PERRALTVS Oeuvres de Phy- fique Vol. II. p. 372. PLVTARCHVS de Curiositate p. 520.: ὥς περ οἱ ἀετοὶ καὶ οἱ λέοντες ἐν τῷ περιπατεῖν συστρέφουσι τὰς ὀνυχας, ἢ αὐτῶν καὶ τὴν ὀξύτητα κατατρίβουσιν. In aquila tamen alia est ratio.

IX. c. 35. CLEOMEDES de Mundo p. 56. asseuerat, montium altitudinem ad perpendicularum nullam superare quindecim stadiorum mensuram, vti nec ma- ris profunditatem. Apud PLVTARCHVM in Aemilio Paulo est, Geometras con- tendere, nec montium nec maris altitudinem ultra 10. stadia ascendere.

IX. c. 36. Exocoetum lubenter etiamnum ad blennios referrem; hoc enim genus in siccum amphibiorum instar interdum exire, pinnis pectoralibus la- certarum instar saltare, ex Cl. FORSTERI Itinerario docui. Eandem rem iam olim obseruauit THEOPHRASTVS in quibusdam Indiae fluuiorum pisciculis, vt refert ATHENAEVS VIII. cap. 2. p. 332.: quidam, inquit, Indici pisces e fluuiis in siccum egrediuntur saltu, veluti ranae, specie similes piscibus maxinis (μα- ξεινοῖς) dictis. Sed in editis libris THEOPHRASTI legitur μαζίναις. Vtrumque vocabulum de myxino ARISTOTELIS intelligendum et piscis Indicus ad blennios referendus esse videtur. Eandem ex THEOPHRASTO rem breuius narrat PLINIVS IX. cap. 19. Ex recentioribus neminem reperi de pisciculo Indico tradentem, nisi medicinae doctorem HVHN, qui ex India orientali redux in Gange fluuio repe- riri



riri narrat pisciculum, spithamam longum, colore bruneo-nigrum, squamis paruis, sed fortibus, qui duabus iuxta caput vtrunque pinnis caudaeque motu adiutus super coenum ipsamque terram exsiliat, vitamque extra aquam per duos dies sustineat. Hunc velut in esu saluberrimum omnium et gratissimum commendat, et ab incolis *Porko* vocari ait in libro germanico: *Neueste Mannigfaltigkeiten, zweyter Jahrgang, Berlin, 1779. pag. 778.*

IX. c. 44. Viperarum foetor ex glandulis duabus iuxta anum in cauda positus prodit, quae liquorem foetidissimum effundunt, auctore EDW. TYSONO. Idem ad hunc ipsum AELIANI locum monuit FR. REDI Obseru. de viperis p. 81. vers. latin. Hinc MARTIALIS: quod vulpis fuga (cauda fugientis vrina adspersa), viperæ cubile olet.

IX. c. 64. Experimento ex ARISTOTELE commemorato ad aquae marinae dulcedinem mixtam demonstrandam simile, sed mirabilius, est cum ampulla vitrea factum, quod commemorant Acta Societ. Parisin. 1725. in Historia p. 6.

X. c. 12. PLINIVS VIII. c. 10. de elephanto: inuenit et luxuria commendationem et aliam: expetit in callo manus vim saporis.

X. c. 16. Fabulae de pullorum vpupae pietate in parentes originem indagari in notis ad FRIDERICI II. librum.

X. c. 42. Telephus grammaticus idem videtur, quem GALENVS ὀφεινῶν V. c. 4. §. 6. aetatem ad annos fere centum produxisse narrat. Telephus Pergamenus inter grammaticos laudatur ab EVSTATHIO ad Odyssæam p. 641.

XI. c. 10. De Apidis oraculo Memphitico conferatur DIO Chrysof. T. I. p. 660. ed. Reisk. HEMSTERHVS. in Obseru. Miscell. Amstelod. T. VI. p. 341. VALESIVS ad AMMIANVM p. 333.

XI. c. 37. ad notam de talpa. Omnino ARISTOTELES H. A. IV. 8. talpae τῆς ἀνω χαυλιόδοντας memorat, quibus cum apro conuenit ei. Recte igitur AELIANVS.

XI. c. 38. Suspicionem a viris doctis receptam, anatem tadornam esse, quam veteres dixerunt vulpanferem, egregie confirmant mores iidem plane in sobole tuenda obseruati a curiosis, vti refert illustris BUFFONVS T. XVII. p. 303. Hoc genus cortale olim apud Graecos fuisse, recte idem arguit ex loco ARISTOTELIS H. A. VI. 2., vbi nominatur cum reliquis cortalibus, quae oua subuenta-nea edere solent.



XII. c. 16. Cum DEMOCRITO facit Problema inter Aristotelica X. 16.:  
 διὰ τί τὰ μὲν πολύτεκνα τῶν ζώων, οἷον ὄες, κύων καὶ λαγὼς — ἢ ὅτι τὰ μὲν  
 πολλὰς μήτρας καὶ τόπους ἔχει ἴσως καὶ πίμπλασθαι ἐπιθυμῇ καὶ εἰς ἃ σχίζεται  
 ἡ γονή. Cornua uterina horum animalium omnino maiora, longiora et capaci-  
 ora sunt, quam ruminantium et aliorum pauciparorum.

XII. c. 20. τὸ τενοθρηνώδες ἐπὶ τῷ βρέγματι est pars cranii spongiosa pro-  
 pter sinuum frontalem cellas ab ossibus frontis ad cornuum mediam partem at-  
 que hinc ad condylos occipitis excurrentes, quas in cranio vri multo maiores  
 quam in vulgari tauro vidi. Has cavitates in mutilo armento deesse voluit DEMO-  
 CRITVS. De re ipsa alibi accuratius tradam, vbi cornuum varietatem deciduo-  
 rum et perennium indagabo.

XII. c. 33. Festum, sed canibus perniciosum, diem ad Augustum men-  
 sem refert Scriptor anonymus apud SVIDAM sub voce Μαῖέμας.

XII. c. 40. Apud ANTONINVM Liberalem c. 4. Phalaecus Ambraciotarum  
 hic tyrannus appellatur, et historia integrior exstat.

XIII. c. 25. κεγχρίδας. Alias κεγχρῖς, κεγχρηῖς, est tinnunculus. κεγχρίται  
 OPPIANO seu DIONYSIO in Ixeuticis genus anserum. Sed h. l. parua avis intelli-  
 gitur, forte *miliaria* avis Romanis dicta. GESNERVS, quem hic locus fugit, laudat  
 tamen p. 55. et 585. EUBVLI locum apud ATHENAEVM II. p. 65., vbi inter par-  
 uas esculentas auiculas ἀκανθυλλίδας, βιττάκας, σπίνια, κερχνήδας nominat,  
 vbi legendum censeo κεγχρηίδας.

XIV. c. 7. Quae de sensu vocis ἐχῖνος disputavi ad h. l., firma et vera pu-  
 to. Atque iste echinus vt auibus granioris, gallinis anatibusque peculiaris est,  
 ita raro exemplo reperitur etiam in quadrupede animali, quod LINNAEVS Casto-  
 rem zibethicum, primus vero notitiae omnium accuratissimae auctor, *Rattum*  
*moschatum* appellauit. Haec vero prorsus singularis muris species non solum  
 echini seu interioris stomachi cuticulae separabilis, sed glandularum etiam ante  
 auium ventriculum per densas series collocatarum similitudinem reddit, vt do-  
 cuit egregius auctor notitiae SARRAZIN in Mémoires de l' Acad. des Sciences  
 de Paris, 1725. pag. 332. Idem denique animal dum intento animo contem-  
 plor, partiumque eius genitalium structuram situmque pro anni tempore varium  
 considero; descendunt enim illa membra instante coitu ex abdomine, postea  
 vero retracta gracilescunt, vt in auium testiculis et pene fieri nouimus; dum  
 igitur haec cogito, tandem mihi reperisse videor usum canalium istorum  
 in echino seu herinaceo nostro, qui ad testiculos pertusi ducunt, a solo,  
 quod



quod sciam, BORRICHIO annotati in Actorum Hafniens. Vol. II. p. 175., quorumque usum cum illo aequè ignorabam, cum in Promptuario Lipsiensi anni 1787. interiores herinacei partes describerem. Igitur hos canales inuersos tempore coitus puto testiculos detractos ex abdomine propius ad vesiculas seminales adducere, post coitum vero reuertentes et cauos factos cum ipsis testiculis reduci in abdomen, ut in mure seu castore zibethico fieri docuit SARRAZIN. Quodsi herinaceus in ipso venerei aestus tempore anatomico examini subiicitur, opinionis meae vanitatem aut veritatem approbari viris doctis aut reprobari posse spero.

XIV. c. 13. HIERONYMVS contra Iouianum libro II.: in Ponto et Phrygia vermes albos et obesos, qui nigello capite sunt et nascuntur in lignorum carie, pro magnis redditibus paterfamilias exigit.

XIV. c. 20. Canis iecur in medicamento contra hydrophobiam est. Similiter VEGETIVS Mulomed. III. 84.: quodsi canem ipsum occidere potueris, iecur eius decoctum dabis ad manducandum vel tritum faucibus degeres.

XVI. c. 2. PENNANTVS loco in nota laudato contra GESNERVM asserit, h. l. intelligi Pauonem bicalcaratum. *It has, inquit, a crest, but not so conspicuous, as that described by Aelian; but it has those striking colours in form of eyes, neither does it erect its tail like the peacock, but trails it like the pheasant.* Eundem deinde putat esse Catreia STRABONI et AELIANO XVII. 23. dictum; de cantu vero fabulam aut hyperbolam esse putat.

XVI. c. 13. Haec eadem fere ex eodem, ut puto, auctore exscripsit STRABO p. 1033.: τῶν δὲ καρίδων τὰς μὲν μικρὰς μέχρι ὄψεως ἀναθεῖν, τὰς δὲ μεγάλας μέχρι τῶν συμβολῶν τε τῆ Ἰνδοῦ καὶ τῆ Ἀκείνης: ubi Cl. TYRHWITT p. 39. in voce ὄψεως mendum latere suspicabatur; sed locus pluribus vitiis laborat.

XVI. c. 33. Boum retro pascentium exemplum forte aliquo modo firmari possit auctoritate Cl. PALLAS, qui in Spicileg. XII. p. 81. capram Saiga, STRABONI Colon dictam, interdum retro pasci tradit. Liber de natura rerum apud VINCENTIVM XIX. cap. 113.: Tragodita sola inter bestias deiectis cornibus obliqua ceruice pascitur, ut magis videatur herbam sic ore attractam secare, quam aliorum animalium more carpere. Habet enim cornua per declium capitis et maxillarum ad terram usque dependentia, quae prohibent eam in terra iuxta morem pascere. Nomen forte corruptum ex PLINIO XI. sect. 45.: Troglodytarum (armentis) in terram directa cornua: qua de causa obliqua ceruice pascuntur. Quod deinde sub auctoritate ARISTOTELIS tradit AELIANVS, capras Libycas quasdam mammas in pectore dependentes gerere, in eo fere est, ut suspicer,



suspicer, AELIANVM ambiguo vocabulo aliquo falsum fuisse, quod contra morem ruminantium situs hic mammarum est, etsi capram bene barbatam et cornutam vberibus inter pedes priores dependentibus descriptam et pictam adeo a PAVLINO in Ephemerid. Natur. Curios. Dec. II. Ann. V. p. 55. in Appendice non ignoro. Forte enim in graeco fuit vocabulum, quod mammulas, seu verruculas, etiam noneolas dictas, significabat; quae vulgo caprarum, interdum etiam suum, in faucibus sub mento dependent, et vernaculum nomen apud nos etiam cum mammis habent commune.

XVI. c. 41. De serpentibus alatis eadem ex eodem MEGASTHENE paulo accuratius STRABO excerpfit XV. p. 1029., vbi ὄφεις διπῆχεις ὑμένόπτεροι ὡς-περ αἱ νυκτερίδες memorantur.

XVI. c. 42. APOLLONIUS Mirabil. c. 39. ex ARISTOTELIS Anatomicis Eclogis refert: ὄφεις ὡφθη ἐν Πάφῳ πόδας ἔχων δύο ὁμοίως χερσαίῳ κροκοδείλῳ.

XVII. c. 19. Locis iam laudatis adde egregium ZOSIMI Histor. I. 57. §. 6. Nigram auem columba paulo minorem, in mari et in terra viuentem, praesertim ad Tigrin frequentem praedicat Seleucidem nescio vnde NORBERG in Epistolis adiectis Itinerariis Epistolis BIÖRNSTAHLII T. VI. p. 366.

XVII. c. 20. De hirundine Samia etiam ANTIGONVS Caryst. c. 132.: ἐδὲ τὰς Σαμιακὰς ὄρως συγγεγραφὼς ἐπὶ τῶν πρώτων κληθέντων μαθητῶν τῶν περὶ Ἡρόστρατόν φησι χελιδόνα λευκὴν φανῆναι. Miraculum vetusto auctori fecerat et color et magnitudo extraordinaria.

XVII. c. 25. WESSELINGII emendationem ἄμματα confirmat etiam, quod simili modo in PSEUDOPHOCYLIDE versu 199. scriptum habent Codices duo regii a Cl. BRVNKIO collati ἔρματα pro ἄμματα.

XVII. c. 34. In insulis beatis prope Arabiam omnia pecora alba et feminas sine cornibus esse, tradit Scriptor anonymus apud DIODORVM Sicul. Tom. I. p. 215. Quae vero in nota de pilis camelinis ad texturam ineptis dixi, plane aliena et falsa deinde comperi.


XVII. c. 45. Quae de cornibus taurorum Aethiopicorum hic narrat AGATHARCHIDES, tam similia sunt iis, quae de bicorni Aethiopum rhinocerote narrat COSMAS Indopleusta, vt suspicio non levis animum subire possit, eundem etiam hic intelligi; taurum enim PAVSANIAS etiam appellauit rhinocerotem.



Quae in Addendis p. 580. de antris inguinalibus disputavi, etsi recte habent se, postea tamen cognoui, leporis genus haec antra inguinalia, etiam sinus et cauitates inguinales dicta, glandulis obsita, depila, et oleosa graueolenti materie oblita communia habere cum animalibus plerisque ruminantibus, si Ibicem et congeneres capras exceperis, ut post PERRALTVM et DAVBENTONVM docuit Cl. PALLAS in Spicileg. Zoolog. I. p. 26. XI. p. 22. 38. XII. p. 53. Cum marsupio Didelphidum vterino male comparauit ea DAVBENTONVS in anatomia Antilopes Dorcadis T. VI. Parte II. p. 146. vers. germ. An cum aetate demum incrementum appareant, nondum obseruatum legi.

Ad notam spectantem IV. c. 31. p. 581. Quaecunque hodie vulgo de elephanto traduntur, falsa pleraque arguere videntur Excerpta ex libro AYIN AKBARY in India orientali typis expresso, quae sermone vernaculo nobis promulgauit Cl. SPRENGEL in Appendice Manualis historici anni 1786. p. XXX. separatim excusa, quae eadem inserta legitur Manuali anni 1787., quam lectores curiosi consulant.

Haec fere sunt, quae et mea et lectorum AELIANI mei interesse putavi, ut supplementi instar adderem iis, quae ante hos quinque annos in scriptorem ex alieno merito laudabilem commentatus sum. Morbus tum grauissimus limam mihi in ipsa opera cohibuit; a quo postquam conualui, omnem dedi operam, ut, quicquid omissum aut male traditum reperissem, corrigerem et supplerem. Reliqua leuioris fere momenti supplementa commodiori loco seruata repono.





---

# TABVLARVM IN AERE

## EXPRESSARVM INTERPRETATIO.

**F**ig. 1. monstrat fauces vrogalli apertas, in quibus profunde abdita latet lingua. Palatum vero totum, vti etiam cutis inter maxillae inferioris iuga duo extensa, exasperatur aculeis cartilagineis plerumque triangularibus, quales in faucibus atque ore ruminantium animalium, praeterea in faucibus testudinum marinarum et sturionis videre solemus. In superna oculorum regione vestigia callosae, rubrae et punctatae cuticulae apparent.

Fig. 2. cranium vrogalli a latere exhibet conspiciendum. In quo apparet primum quidem forma rostri incuruati aquilino similis; in qua quidem similitudine viri quidam docti gallinacei generis affinitatem et aquilini reperisse sibi visi sunt. Rostrum superioris mobilitas in hac aue plane nulla est, si eam ex iunctura frontaliū nasaliumque ossium cum rostro seu maxilla superiore iudices. Ossa nasalīa angusta cordiforme initium habent. Omnium maxime memorabiles in hoc cranio sinus bullares in anteriore parte ossis sphenoidalis, quod orbitam oculi fingit, protuberantes. Quorum usum vt indagarem, cum meminissem in auium craniis os cuneiforme in posteriore parte totum esse spongiosum et cauum, ita vt auris alterius cum altera communio per has cavitates sit aperta, quibus etiam tubae Eustachianae inferuntur, vt docuit MOVLEN in Transact. philosophic. No. 199., totum cranium diligentissime comparatum cum aquilae albicillae senis cranio ad perpendiculum dissecai ferra acutissima. Primum igitur cranium ipsum paululum aquilino breuius, aquilinum vero multum altius apparuit. Cranium vrogalli occiput fere quadratum, sinciput vero cum orbitis admodum protuberans habet. In aquila vero occiput ab orbitalum fine fit admodum latum, rotundum adeoque conuexum. Dissecto ad perpendiculum cranio medio cum osse sphenoidaleo diploë crassissima apparuit, quae efficit, vt receptaculum cerebri ipsum multo angustius sit, quam pro mole cranii credere licet; ipsae etiam orbitae hac diploë crassitie mirum in modum angustantur. Textura spongiosa superne ad initium nasalium ossium excurrit, nec vlla cum narium cavitae communio conspici potest. In basi cranii textura ea spongiosa per ipsum occipitis condylum omnem ossis sphenoidalis partem, quae orbitas separat et anterieus gemino mucrone, superiore



riore paulum ultra nasalium ossium initium, procurrit, peruagatur ita, ut sinus diploë frontalis in vnum cum sphenoidali coëat. Nulla nec in osse sphenoidali communionis vestigia cum naribus apparent, sed nervus nasalis in fossa sua supra bullam sphenoidalem separatus ad nares excurrit. Manifestum igitur est, totum hunc cavitatum spongiosarum apparatus nihil odoratum, contra vero vel auditum vel corporis leuitatem et volatum adiuuare. In cranio Tetricis ultra dimidium minore diploë multo densior, sed iisdem in partibus, conspicitur, nisi quod sphenoidale os inter orbitas non intumescit in bullam, sed inferiorem tantum marginem crassum et rotundum, cui ossa palatina applicantur, textura spongiosa repletum habet. Aquilae albicillae cranium os sphenoidale interorbitale totum spongiosum habet, sed marginem inferiorem palatinum multo crassiorem cum cavitatibus multo pluribus, quae posterius vsque ad condyli initium, anterieus vero ipsa pterygomata ante nares transuerse posita peruagantur. Sinus frontales satis magni a sphenoidalibus pariete tenui osseo horizontali, ipsi vero inuicem perpendiculari separati, triplici ductu, medio vno, duobusque lateralibus supra orbitalium margines cum occipitalibus in vnum coëunt. Rostris superioris cavitatis magna et longa tota reticularibus maculis osseis laxis repleta. In cycno sinus frontales tubere magno eminentes, ante quos globus niger glandularis collocatus est, pariete perpendiculari minute perforato separantur et triplice ductu, ut in aquila, ad occiput auresque peruagantur. Os sphenoidale totum spongiosum, inter orbitas tenue, margine inferiore tantum spongioso, anterieus cavitatem magnam triangularem sinibus frontalibus subiungit, pariete horizontali ab iis separatam. Cavitatis anterior sphenoidalis in nares ipsas etiam patet, adeoque odoratum etiam adiuuat. Contra sinus frontales in latere vsque in extremum os lacrymale seu appendicem orbitae anteriorem, longissimam et latissimam continuantur. In anseris vulgari sinus frontales parui (quoniam frons aequalis descendit) liberam cum sphenoidalibus et per ductum triplicem cum occipite, nullam vero cum naribus communionem habent; contra vero bulla pellucida ingressum Eustachianae tubae desuper tegit, eius fere magnitudinis, ut pisum recipere possit. Obiter in ardea minuta, cinerea, stellari, ciconia alba et nigra dum tubam Eustachianam rimor, apertum eius et liberum ingressum in auris cavitatem sub tympano video sub margine eminentiae triangularis ossis sphenoidalis, cum in plurimis auibus os ipsum intret adeoque visum effugiat. In coruo cornice LINN. cranium omne spongiosum, ut in strige alucone, nisi quod diploë in strige crassior, liberam cum triangulari anteriore cavitatis ossis sphenoidalis, quae per marginem inferiorem interorbitalem seu palatinum ad condylum continuatur, et cum osse lacrymali et pterygomatibus ossis sphenoidalis, quae in strige etiam et aliis quibusdam auibus cum lacrymali osse fere tota coaluerunt in vnum corpus, habet communionem. In gallopauonis cranio si-

nus



nus frontales minores triplice ductu cum occipite, inferius vero, ut in cornice, cum sphenoidalibus coniuncti sunt; sed rete spongiosum ubique multo densius apparet. Condylus occipitis totus spongiosus. In pico vario maiore cranium tenue pellucidum sinus frontales per unum ductum cum occipite et cum sphenoidalibus cavitatibus habet communes. Alas orbitales ossis sphenoidalis ab osse lacrymali distinguere non licet, sed utrumque coniunctum orbitale cauum anterius claudit. In scolopace gallinagine sinus frontales triplice ductu in occiput, inferius vero in sphenoidales excurrunt, in antica vero sphenoidalium frontaliumque coniunctione cavitas ovalis nasalis cum minutulis ossibus spongiosis inclusa latet. Haec omnia reuocant mihi in animum cavitates immensas sinuum frontaliū elephantī cranium superne et ipsos condylos peruagantes, quibus similes in cranio vri nuper vidi, quae tamen ipsos condylos non ingressae ad cornuum duas tertias partes, ut in plurimis cornutis animalibus, excurrerant. Videant nunc alii, num sinus hi frontales tam immani praeter odoratum alias etiam capitis functiones adiuuent. Reliquam varietatem texturae spongiosae in craniis auium cum membrana duplici tympani annotavit MOVLEN l.c., quem in paucis quibusdam a vero aberrantem reperi. Recentiores GALVANI et VICQ D'AZYR de auditu auium instrumentis annotationes nondum legere mihi licuit; nec auditum hoc tempore mihi in auibus diligentius scrutari animus erat. Talpae aures auium structurae simillimas esse, asseruit CLAYTON in Philosoph. Transact. No. 206.; quam quidem similitudinem non ad ossicula auditus, sed potius ad os sphenoidale spongiosum ab aure una ad alteram usque et situm formamque ductuum semicircularium, quae eadem in pico, scolopace etc. est, pertinere video in talpae cranio dissecto. — Praeterea ossis communis maxillaris capiti superiori interiori adhaeret stylus osseus longus, qualem etiam in cranio phasianī reperi. Differentiam, quae cranium vrogalli et tetricis intercedit, ne lectorem diutius morer, alibi enarrabo satis insignem.

Fig. 3. Idem cranium a postica parte conspiciendum cum longis maxillae inferioris processibus ad occiput applicatis. In occipitis ea parte, quae cavitatem auris pro ratione capitis et reliquo auium more maximam fingit et tegit, vides sinum magnum curuum et fere cochleatum, in cuius interiore parte quatuor minora foramina in cerebrum pertusa patent, dextrum vero et maius, quod solum in pictura apparet, in magnam auris cavitatem ducit, atque hinc suspicor, canalem membranaceum aërem ex capite spongioso deriuare in maxillam inferiorem, cuius posticus processus, qui occipiti utrinque applicatur in posteriore parte in ipso initio, quod cum processu maxillae transuerso introrsum verso habet commune, minutum gerit foramen insculptum.



Fig. 4. Maxilla inferior vrogalli, quae post foramina lateralia in angulo altioris partis additum habet os paruum rotundum, oblongum, quo maxilla ipsa cum processu longo orbitali postico ligata cohaeret.

F. 5. asperam arteriam vrogalli cum lingua et parte antica thoracis sistit. Pinxit quidem arteriam hanc asperam cum lingua Ch. BLOCHIVS in *Beschäftigungen der Berlinischen Naturf. Freunde*, T. IV. tab. XVIII. fig. 2., verum pictor eius in quibusdam partibus aberravit, atque ipse descriptionis auctor plura aliter vidisse videtur, quam equidem comparata eius descriptione in aue mea reperire potui. Quas quidem differentias singulas enarraui in Promptuario Lipsiensi anni 1787. Vides igitur hic in antica thoracis parte finem musculorum coeuntium in carina sterni firmatum; ipsi vero muscoli iuxta latera tracheae tela cellulosa laxa circumdati ad laryngem decurrunt, vbi bifurcati portionem inferiori thyroideae cartilaginis faciei, alteram vero arytaenoideae inferunt. Rima laryngis in anteriore parte valde dilatari potest, nec tam angusto patet foramine, quam in reliquis plerisque auibus. Musculi hi duo tracheam contractam inuoluunt, ita vt pars circumuoluta pectoris cavitati et sterni anticae parti incumbat. Lingua in faucibus profundissime recondita, quas cum cultro aperirem, reperi cornua ossis hyoidei antrorsum versa, quo in situ ea hic picta conspicias; lineae vero punctatae situm naturalem eorum in plerisque auibus retrorsum versorum significant. Deinde cum os hyoideum ipsum depurgarem, facile animaduerti, cornua in vtramque partem, hoc est, antrorsum et retrorsum, commode verti posse. Videtur igitur haec fabrica facta esse eo consilio, vt, cum tracheam et linguam cum eo connexam muscoli longi laterales in sterno firmati retrahunt, cornua antrorsum versa hunc linguae descensum adiuuent.

Fig. 6. os hyoideum sistit, cuius media pars et tertia, vbi iunguntur, addita vtrique habent cornua. Sed in plerisque auibus media et tertia pars vnum efficiunt continuum os, quod ante cornuum additorum initium triangulum facit; praeterea pars haec media multo breuior esse solet in reliquis auibus. Pars postrema intorta tota est cartilaginea.

Fig. \* in latere tracheae addita sistit priores duas caudae vertebrae, quarum fabricam tradunt annotationes ad Fridericum.

Fig. 7. particulam cutis thoracicae pingit, in qua non solum pori, quibus plumae in quincuncem collocatae inhaerent, sed et muscoli parui inuicem transeuntes, qui plumas poris infixas tenent et regunt, per epidermidem translucens conspiciuntur. Praeterea in inferiore parte translucent particulae musculorum pecto-



pectoralium tenues, qui ad minutos illos inuicem se decussantes musculos cutis non abeunt, sed cuticulae interiori tantum adhaerent. Macerata cutis aqua monstrabat duas cellulosa tela distinctas tenuissimas membranas, quam telam transibant seque inuicem decussabant muscoli parui et angusti, quorum in angulis infixae haerent plumae. Tela ipsa cum musculis et epidermide cellas seu poros plurimarum in angulis format.

Fig. 8. peruncti glandulas duas iuxta sibi appositas, cute tectas, sed sub cute separatas, sistit magnitudine naturali paululum maiores, quarum in media et summa facie apparent vesiculae a. a. duae, oleo limpidissimo fluvido repletae, quarum cauum auellanam recipit. Oleum per penicillum plumaceum maiorem infra appositum exprimitur. Glandulae ipsae dissectae flauam cellulosam et oleo repletam substantiam ostendunt pluresque transversas foveas, quae oleum ad appositos in margine glandulae exteriore penicillos per poros apertos secernunt.

Fig. 9. glandulam dextram peruncti cum penicillis plumaceis lateralibus;

Fig. 10. eandem dissectam, ibique foveas seu canales secretorios transversos cum ductuum orificiis apertis monstrat.

Tabulae IV. Fig. 11. sistit truncum corporis osseum accuratius per partes singulas expressum, quam apud MEYERVM I. tab. XVI. Dorsi vertebrae processibus inuicem connatis spinosis columnam vnā continuam et lateralibus similiter connatis tectum aliquod efficiunt, quatuor foraminibus ouatis pertusum, cui infra appositae haerent quatuor primae costae verae. Vna adest spuria antica, altera postica. Verae sunt omnes 5 manifestis epiphysibus obliquis inuicem colligatae. In aquila tamen albicilla manifestos reperio processus costarum obliquos. Caudae vertebrarum formam totam expressam habes iuxta Fig. 6. Omoplatea dextram retractam hic vides ad columnam spinosam magis, quae depressa et costis potius imposita, longior etiam ad peluis initium vsque pertingit. Forma furculae, sterni laterum varios in ramos diuisorum, processusque interclauicularis eadem est in Tetrice et in Meleagride, sed a plurimarum auium structura aliena. Ramos sterni laterales vt singulares in vrogalli sceletono annotauit etiam MEYER.

Fig. 12. humeri cubiti cum radio carporum duorum, metacarpi in medio diuisi, pollicis ossa, cum duobus digiti indicis articulis et minimi digiti infra primum indicis articulum appositi rudimentum sistit conspicienda.



Fig. 13. humeri ossis caput in facie interiore visum cum foramine magno aliquo et paruo. Ad latus magni foraminis fouea os magna excauatur, quam in tabula foramini similiorem factam esse video.

Fig. 14. cubiti cum carpo exteriori, metacarpo et pollice coniunctionem docet.

Fig. 15. clauiculae dextrae faciem interiore cum foramine magno monstrat ex parte inferiore.

Tabulae V. Fig 16. dorsi partem seu tectum planum, quod processus laterales vertebrarum dorsi efficiunt, cum costis quatuor illi appositis, peluem, foueas renales, spinae partem cum medulla ipsa dilatata in media fere peluis longitudine, cum cauda et ossibus pubis in orbem fere dimidium coeuntibus, a facie interna conspicienda sistit.

Fig. 17. os femoris dextri a latere externo, magnitudine naturali, F. 18. a latere interno visum cum aperturis variis minutis in capite contra trochanterem positis;

F. 19. colli vertebrae primas 3 cum atlante desuper conspiciendas;

F. 20. easdem in inferiore facie sistit magnitudine naturali. Secunda cum tertia vertebra foramen vtrinque laterale habent, omnes 4 primae pro spina supra infraque carinam habent mediam manifestam.

Tabulae VI. Fig. 1. sistit scolopacis gallinaginis cranium. a. notat situm auris fere sub orbita media. b. os commune maxillare, quod contra morem reliquarum auium non in postica parte cranio super auris cauitate iungitur, sed ad anticam partem retractum maxillae inferiori breuissimae iungitur. Hanc maxillam sistit Figura 2. Foramen magnum non in occipite, sed in basi cranii sub media fere orbita collocatum admirationem etiam facit in hoc auium genere, quod structuram hanc cranii cum rusticola et tertia specie communem habet; in reliquis enim scolopacum tringarumque speciebus, quas vidi, nihil tale reperitur. Foramen magnum occipitis in cranii baseos postrema atque inferiore parte situm, ut in cranio hominis, annotatione dignum censuit in vlulae anatomia PETITVS (Mémoires de l'Acad. de Paris, 1736. p. 127.). Eundem huius foraminis situm in cranio pici martii cum vlula comparato reperio; verum in nullo plane cranio earum auium, quae satis multa ex regionibus nostris collecta coram habeo,



beo, tam longe distitum ab occipite antrorsumque retractum inuenio. Quare singularem eius usum ex reliquarum partium structura mirabili pendentem suspicari licet. Plura de hac re disputaui in Promptuario Lipsiensi histor. naturalis et oeconomiae anni 1787.

Fig. 3. tracheam Tetraonis tetricis LINNAEI sistit in facie inferiore a latere conspiciendam. a. a. initium bronchiorum cum ponte intermedio osseo. b. b. musculi lateralis alterius pars abscissa. Musculus hic inferius in crassam satis vaginam expanditur, qua trachea ad bronchia usque includitur.

Fig. 4. Facies tracheae superior, monstrat ante bronchiorum initium carinam sulco seu linea excavatam media. Ampliorem descriptionem qui desiderat, petat ex Promptuario Lipsiensi anni 1787.

F. 5. cranium sistit Colubri natricis desuper visum. a. a. maxilla superior extima et breuior per os commune b. b. cum interiori c. c. maxilla superiori coniuncta. Haec interior acclinatur inferiori in loco seu centro articulationis. Inferior d. d. coniuncta per os e. e., quod cohaeret cum altero f., articulatur cum occipite iuxta triangulum cranii paululum exstantem. Maxilla superior et extima in loco g. g. cum processu orbitali articulatur. Tres omnes maxillae dentibus in fauces versis armantur.

Fig. 6. sistit idem cranium in inferiore facie conspiciendum cum duplici maxilla superiore atque inferiore vnica.

F. 7. exhibet duplicem maxillam superiorem ab inferiore facie visam, ut clarius eius ortus et iunctura appareat.

F. 8. maxillam inferiorem separatam. Fig. 9. eandem in latere visam, ut officulorum iunctura duorum, quibus componitur, appareat.

Vides igitur, colubrum adiuuante hac ossium structura non solum maxillam superiorem duplicem mouere, sed miro etiam modo cum inferiore dilatare faucesque adeo ampliare ad praedam multo maiorem deglutiendam posse. Inferior enim maxilla in utroque latere duobus ossibus componitur, quae in antica parte membrana iunguntur media. Eandem maxillae inferioris structuram in auibis quibusdam aquaticis gulosis descripsit et pinxit HERISSANT in Mémoires de l' Acad. de Paris, 1748. Praeterea mobilitate maxillae superioris et structura ossis communis maxillaris, quod maxillarum dilatatorem in viperae caudis.



nae anatomia appellauit EDW. TYSON, mire serpentes cum auibus conueniunt; cuius similitudinis demonstrandae causa has icones addidi. Ceterum plures exstant colubrorum species maxillis duplicibus cranio iunctis praeter inferiorem instructae. Talem enim memorat HASSELQVIST Itinerar. Palaestin. p. 365., colubrum indicum Vlar Sawa L. Baro DE WVRMB in Scriptis Societ. Batau. orientalis. In colubro Diane Cl. PALLAS Itiner. Russici T. II. p. 717. memorat pectinem quadruplicem palati; in scutato colubro idem T. I. p. 459. palatum pectine gemino dentium vtrinque reclinatorum instructum refert. Plura dixi in Promptuario Lipsiensi 1787.

---



D E

# AVIVM RAPACIVM GENERE ET DIFFERENTIIS.

**A**quilas ab accipitribus milvisque iam olim veteres et corporis specie et moribus separarunt; deinde artis falconariae scriptores genus uniuersum rapacium auium in quatuor familias digestum descripserunt, aquilasque a falconibus, asturibus et accipitribus, vti etiam a vulturibus, pluribus notis separarunt. Nostra demum aetate familiae hae in vnum aliquod genus confusae et permixtae a LINNAEO variis virorum doctorum erroribus et reprehensionibus occasionem praebuere. Numero specierum incrementum maior etiam difficultas apparuit, singulas recte et bene notandi atque inuicem distinguendi, seruatō generis charactere, temere assumto. Itaque exemplo BRISSONI disiungere iterum male iunctas a LINNAEO generis falconum species coeperunt, et differentiae notas plures annotare, quibus aquilae a falconibus diuersae abeunt. BRISSONYS igitur aquilas rostro ab initio recto et deinde subito deorsum inflexo, contra falcones rostro a cera statim paulatim inflexo atque vncinato distinguit. Post eum Cl. BLASIVS MERREM rostri etiam ab initio recti, deinde subito incurui, longioris generatim et fortioris forma, collo longiori, pedibus brevioribus et fortioribus aquilas a falconibus separauit in Dissert. miscell. zoologicis Gottingae 1781. editis, p. 77. Deinde in charactere generis aquilarum posuit caput crassum, pilosum, falconum contra magnum et plumosum; linguam aquilarum integram, canaliculatam, falconum diuisam antice et leuiter tantum canaliculatam; plumas aquilarum copiosiores, sub iisque lanulis densissimis opertum corpus, quae falconibus plane desint. Denique in singulis vtriusque generis speciebus separandis et denotandis denticuli in latere rostri vtrinque ab antica parte appositi, longitudinis alarum, caudae pedumque rationem habuit, omninoque bene de vtriusque generis charactere rectius constituendo meritis est. Postea Cl. IO. HERMANN in Commentario Tabulae Affinitatum p. 171. de genere falconum Linnaeano multa praeclare tradidit, illudque statim ab initio posuit, nihil in distinguendis speciebus tribui posse plumarum, pennarum, pedum et cerae colori, vtpote cum varia aetate mutabili. Hinc igitur alias notas excogitandas et seligendas esse recte monet, in quarum numero denticulum rostri lateralem; oculorum ambitum vndique aut plumulis rotundiusculis



culis imbricatum positis aut setaceis cinctum; vibrissas in fronte aliis surrectas, aliis patentes, aut absentes; denique alarum longitudinis cum cauda comparatae, pedum, plumarum tibialium et imprimis squamarum, quibus anterior tibiarum pars tegitur, formae rationem habendam esse censet. Plumas capitis longiores, angustiores et acuminatas, quas aquilarum generi tribuit, ligulatas vocans, Cl. PALLAS Spicileg. Zoolog. VI. p. 18. adesse etiam in miluis monet.

In ipsa etiam LINNAEI patria tandem senserunt methodi Linnaeanae affectae, aquilarum familiam a falconibus esse separandam, eiusque rei necessitatem exemplo illustri confirmavit diligentissimus Ornithologus SAMUEL OEDMANN in nouis Actis Stockholm. anni 1784. p. 303. seqq. Is igitur BRISSONVM secutus rostri forma aquilas a falconibus segregat atque in exemplo ponit falconem haliaietum, quem cum aquila haliaieto magnitudine et colore plane conuenire, rostro vero valde differre asserit, obiterque etiam vulturem albicillam aquilarum familiae vindicat. Falconem haliaietum diuersum statuit ab aquila leucocorypha Cl. PALLAS Itiner. Russici II. Append. no. 5. et Cl. GMELINI, iunioris, Itinerar. II. p. 163, quam eandem BRISSONI aquilam haliaietum esse putat. Falconem haliaietum inter arundines iuxta aquas nidificare, tradunt SALERNE, BUFFON, PENNANT, alii, idemque de sua leucocorypha aquila tradit GMELINVS. Contra, cuius doctissimus OEDMANN diutius obseruauit vitam moresque, falco haliaietus, ad mare et lacus piscosos habitat, et in vicinia lacuum in arbore aliqua alta, vnde prospicere quaquauerius possit, nidum firmissimum artificiose construit ramis pinorum siccis, femina adiuuante; oua tria femina parit, gallinaceis paululum maiora, rubiginosa. Venatur meridiano tantum tempore, ex alto pisces speculatus, quos magna cum celeritate praecipitatus desuper ex alto rapit. Terrae aut faxis nunquam insidet, sed arboribus; nec aues alias terrestres aut marinas praedatur; pullis in cibo etiam serpentes affert. Falconem haliaieton et albicillam LINNAEI in arboribus altissimis iuxta ripas nidificare et digitum anticum extimum retrorsum bubonum instar flectere, annotauit Cl. TENGMALM Actor. Nou. Stockholm. 1782. p. 44. Pisces in victu praeferebat, alias muribus contentus auiculisque, quas deplumabat albicilla, foetentia omnia corpora exosa. Vulturem albicillam eundem cum LINNAEI falcone leucocephalo esse, asserit etiam OTHO FABRICIVS Faunae Groenl. p. 53, qui albicillae vulturis seu potius aquilae vitam, victum, nidum et coloris mutationem cum aetate egregie persecutus est. Quam aquilam piscatricem, aquilis minorem, et meliore membrorum forma aptioreque plumagio ad victum aquaticum intelligi voluerit Imperator p. 6. et 74, illis definiendum relinquo, qui species complures inuicem comparare potuerunt.



Aquilam seu falconem melanaëtum LINN. eundem plane specie, sed colore diuersum esse a fuluo, post illustrem BUFFONVM suae observationi confusus affirmat ill. B. DE LA PEIROVSE Act. Nou. Stockholm. 1782. p. 101. coloremque nigrum mira variatione demum in igneum perducere monet.

Falconem montanum a LINNAEO omissum, seu aquilam paruam BUFFONI a FRISCHIO nostro pictam in tab. 71., magnitudine vrogalli, corpore nigricante, maculis fulvis, praesertim in collo, notato, pectore macula alba notato, cera, digitis et palpebris citrinis, pedibus lanatis distinguit, in Alpium regione humiliori degere, et cum clamore gallinas, vulpes et catos praedari annotat. Sed montanarium ALBERTI in eo agnoscere non licet, quanquam ad aquilarum proprie dictarum familiam pertinere videtur.

Vulturum etiam generosus Gallus plures species l. c. suis notis distinxit, in quibus tamen difficile est galeros omnes ab Imperatore dictos agnoscere. Primus vultur barbatus corporis forma et audacia inter aquilas et vultures medius barba nigra facile distinguitur, capitis aut colli parte nulla calua. Alter percnopterus iunior in utroque sexu albidus, adultus in dorso colore flauo et fusco variatus, ventre lutescente, abdomine et femore intus niueis discrepat, remige altera multo breuiore, rectricibus praerosis. Hic collum cum capite ad humeros usque tomento albo tectum habet. Clauiculae quo sensu prominentes memorentur, nescio, nec satis intelligo, qua ratione caput caeruleum dici possit simul et tomento albo tectum. Sed video nunc, easdem viri docti observationes gallico sermone esse relatas in Encyclopaediam Methodicam a Cl. MAURVYT, ibique sub nomine Percnopteri magis distincte legitur: *le jabot forme une grande proéminence couverte d'un duvet brun encadré de blanc*. Tertius, Pyrenaeorum montium incola, *Arrian* vocatus, percnoptero paulo maior, fuscus, seu, ut deinceps dicitur, niger totus, capite breuissimis plumis tecto, dimidio collo caluo et caeruleo cum pedibus nudis et cera, iride oculorum aurea est. Pectus praeterea gibbosum habere dicitur; quam equidem notam non satis intelligo. Sed in gallica descriptione inserta Encyclopaediae p. 499. legitur: *l'oesophage est proéminent*: quod etsi verius dici non videtur, indicat tamen clarius, cavitatem gularem inter clauiculas intelligi. Quartus monachus a Gallo vocatus, montium eorundem incola, corpore nigro, vertice gibbo, pedibus et cera rubicundis, collo omni plumis vestito distinguitur. Itaque gibbum cranii non solum in meleagride et numenio caluo illustris BUFFONI XV. p. 49., sed adeo in vulturum genere reperimus. Denique quintum stercorearium appellat, montium Pyrenaeorum incolae *Alimoch*, mole corporis fere gallopauoni aequalem, in grege cum congeneribus degentem, cadaueribus, sed imprimis stercore humano, victitantem. Hic caput nudum, croceum, villis raris albis adpersum, ceram et guttur item cro-



ceum, corpus albo-fuscum, iridem caeruleam, pedes cinerascens habet. Quod vero vir doctus in charactere posuit ceram et gibbum nudum et croceum, videtur potius verticem aut totum caput intelligi voluisse. De gibbo enim proprie dicto descriptio tacet. Ventriculus nudus, croceus prominere dicitur; quod nullo modo verum esse potest. Potius spatium inter furcam depressum, in quod gula seu gularis saccus plenus cibo regurgitare solet, intelligo; doleo tamen, verborum proprietatem non ubique adhibitam erroribus facile ansam praebere posse. Postremum hunc vulturem BRISSONVS leucocephalum, BUFFONVS paruum appellat. — Dubitanti nunc iterum succurrit gallica descriptio a Cl. MAUDVYT inserta Encyclop., ubi de vulture *Alimoche* est: *lorsque l'estomac est plein, il forme une protuberance nue de couleur de safran.* Idem in descriptione vulturis barbati posuit: *il y a un enfoncement profond au dessous des clavicles, il est tapissé d'un duvet long, épais et soieux, dirigé en avant.* Denique idem PEYROUSE generatim de toto vulturum genere posuit: *ils ont tous au bas de l'oesophage ou un enfoncement considerable ou une grosse proéminence.* Quae si loca omnia collecta confidero, aperte mihi animadvertere videor notam toti vulturum generi communem, quam in vulture grypho iam olim annotavit PERRALTVS, cavitationem scilicet inter claviculas gularem, ut in ardeis, depressam, lanulis tectam, aut nudam, in qua gula cibus plena recepta quiescere videtur. Cavitas haec ipsa sua depressione facit, ut claviculae, pectus et oesophagus eminere videantur. Fortasse notam hanc magis constantem et propriam toti generi reperient viri docti, quam caput collumque calua aut tomentosa. Qui nuperrime Linnaeanum Systema recoxit, IO. FRID. GMELIN, in vulture bengalensi ingluviem supra pectus pendentem; in fuluo foueam in medio pectoris lanugine alba vestitam et pennas longis angustis rufescentibus cinctam; denique in totius generis charactere collum retractile posuit; quae quidem argumenta (si vera sunt; verborum enim improprietatem nunc non specto) maiorem etiam cum ardeis affinitatem demonstrare videntur.

Peregrinos falcones Imperator cap. 26. mutatos corpore grandiores effici et pennas alarum caudaeque breuiores recipere, denique pellem circa oculos et pedes illorum effici croceos annotat. Vbi pellem circa oculos interpretor palpebras; nec enim ceram aut cutem inter rostrum et oculos in latere cavitati lacrimali superstratam intelligere licet, ut puto; has enim auctor augustus partes aliter nominare solet. Ex hoc palpebrarum indicio suspicor intelligi falconem rusticulum LINNAEI, galli maioris magnitudine, cera, palpebris pedibusque luteis, quem accuratius descripsit OTHO FABRICIVS Faunae Groenl. p. 55., licet multae ibi corporis notae ad speciem rite definiendam necessariae sint omissae. Eundem esse putat, aetate tamen iuniorem et colore paulum diuersum, quem deinceps sub nomine falconis fusci descripsit, corpore minorem paulo, quoniam dorsi sub.



subnascentes veteribus plumas colore cum plumis rusticuli conuenire vidit. Atque in vniuersum annotat, in accipitribus pullis colorem obscuriorem sensim cum aetate mutari in lucidiorem. Magnitudinis differentia ne moretur nos, facit observatio FRIDERICI; colorum varietas in vtroque annotata satis conuenit cum varietate ab Imperatore in diuersa aetate tradita; sed partes corporis singulae non satis accurate traditae et cum reliquorum falconum forma comparatae sunt. Denique quem FABRICIUS falconem fuscum descripsit et a rusticulo tantum aetate et colore differre censet, eundem plane asserit esse, quem sub nomine peregrini pinxit ill. BUFFON T. II. p. 96. tab. 40. et alibi sub nomine falconis nigri, p. 126. versionis germanicae. Palpebras tamen luteas in montanario etiam CARCANVS et in vespertino falcone commemorat LINNAEVS. Peregrinus ALBERTO dictus cap. 8. an idem sit, definiri non potest. Notas saltem easdem cum Imperatore non posuit. Idem deinde ALBERTVS cap. 10. falconem nigrum paulo breuiorem quidem peregrino, et colore dissimilem obscuriore, sed figura plane similem esse ait, vnde recte simul arguit, non specie, sed varietate coloris diuersum esse. Laudat denique FRIDERICI Imperatoris locum hodie non exstantem, vbi is falconem nigrum ex Indiae montibus per Graeciae, Siciliae Italiaeque montana sensim etiam in Germaniam generatione continuata deriuatum esse dixerat ex opinione Guilelmi falconarii. Cognitus igitur et dictus etiam FRIDERICO fuit falco niger; sed ignoramus, num is eandem cum ALBERTO sententiam de eo dixerit, eundemque cum peregrino habuerit.

BELISARIUS duo peregrinorum genera facit, alterum colore aereo, singulis pennarum capitibus ad coronae modum albedine distinctis; alterum colore nigrius, ita vt fere gentilis priuatim dictus appareat. Inter omnia falconum genera hoc dociliorem aut magistro obsequentio-rem vllum reperiri negat.

CARCANVS, Vicentinus, quadruplex genus facit, flauos, rubeos, turtureo colore et fuscus (*bruno*); his quintum genus, totum album, addit. Quo melius lector de disciplina eius iudicet, ponam verba eius Italica, sed ex libro EVGENII RAIMVNDI repetita, quia altera CARCANI editione careo. Ex CARCANO sua mutuatum esse RAIMVNDVM, puto non solum iis rationibus adductus, quas in Notitia litteraria Scriptorum artis falconariae posui, sed video etiam, plane eadem ex CARCANI libro laudari ab ALDROVANDO, latine tamen conuersa. Generatim peregrinum a montanario etiam ex longinquo internosci ait, quoniam celeriter adscendens alas raro quatit, quas habet maiores, ideoque etiam maiorem in aëre apparere, quamquam corpore sit minor. Contra montanarium crebrius quaterere alas minores, veluti hirundinem. Deinde sic pergit:



„I mutati peregrini si conoscon' assai meglio: percioc' hanno la testa per lo „più non molto nera, in cima piana, segnata di nere linee: la coperta di color „turchino (alibi le spalle, i. e. humeri, explicantur per verbum la coperta): la „gorga bianca senz' alcun segno o pochi; altri l'hanno di color di bragia, che ten- „di alquanto al rosetto; la maglia hanno dalla gorgia in giù rara et grossa con „alcune traversate sù le coscie; altri hanno le gambe et i piedi di pallida giallezza „et altri di color bianco pallido. Quando si ved' alcun falcone mutato con li „suddetti segni, si può dire et è chiaro'nditio, che quando era foro, havea'l piu- „maggio ò biondo ò rosso; et quante più volte se mutano i falconi, tanto mag- „giormente fanno la gorgia bianca, et la coperta turchina.“

„I falconi bruni peregrini (fuscus interpretatur ALDROVANDVS) che prima „erano fori, mutati poi fanno la testa più bruna delli suddetti biondi ò rossi. Han- „no la coperta turchina, mà non tanto come le predetti; la gorga bianca di al- „cune linee nere et lunghe macchiata. I piedi di pallida bianchezza et altri di „colore verso l'azzurro. Hor vedendo questi segni, se può prender chiaro'ndi- „tio che'l falcone dianzi sia stato prima di piuma bruno.“

Ex hoc loco simul apparet, peregrinum magnam habere cum montanario similitudinem, sed volatu facile internosci. Vnde nata est mihi suspicio, gentilem Imperatoris esse eum, quem CARCANVS montanarium appellat. ALDROVANDVS libro VII. cap. 1. falconem nigrum in montibus agri Bononiensis captum descripsit et pinxit pag. 464., quem eundem cum genere peregrini nigro BELISARII et brunno seu fusco CARCANI, sed mutatum, esse censet. Hunc igitur ita denotavit. A capite summo ad extremam caudam longus erat dodrantem et duos palmos; vertex capitis planus ac compressus; rostrum pollicem crassum, pulcre caeruleum, breue, robustum, cera crocea, oculus caeruleus, palpebris luteis cinctus. Caput, ceruix, dorsum, alae fuscae et pene nigrae, per singulas plumas et pennas alarum maiores maculis atris transuersim sparsis. Gula ex albo flauescens, infima sui parte maculis veluti guttis in longum ductis distincta. A freno seu rictu linea nigra ad latera deorsum ad gutturis fere medium porrigebatur. Pectus, venter, femora alba, lineis latiusculis nigris transuersis distincta. Ala extrema ad eandem extremam pertingebat; cauda minus fusca, lineis etiam nigris transuersis insignis. Crura et pedes lutei. Coxae longae, tibiae breues, digiti tenues, longi, squamis, vti crura, tecti, ungues acutissimi, nigri.

ALDROVANDVS ipse deinde non dubitat ALBERTI falconem nigrum et Germanorum carbonarium de fusco BELISARII peregrino interpretari; in quo ne quidem habet consentientem. Quod si quis hanc ALDROVANDI descriptionem cum falcone fusco et rusticulo OTH. FABRICII comparauerit, vix, vt equidem, diu



diu! dubius haerebit, sed potius vtrumque cum peregrino nigro ALDROVANDI specie congregabit. Quanquam enim ALBERTI niger falco breuior paulo sit peregrino, eam tamen difficultatem aetatis mutatione facile tolli memorata ex Imperatoris loco supra iam monui. Figura ab ALDROVANDO apposita mihi quidem, vt in opere ligno inciso, egregia videtur; rostrum enim breue, non dentatum, barbam vtrinque nigram, gulam albam guttis in longum ductis notatam, pectus cum abdomine cruribusque lineis transuersis pictum, et caudam alis aequalem bene lectoris oculis exponit. Mirum mihi accidit, FRIDERICI nullam ab ALDROVANDO hic fieri mentionem, quem tamen alibi, forte ex aliena commemoratione, laudauit. Is vero hoc ipsum genus intelligere videtur nomine peregrini bruni seu fusci, quem ab aliis diuersum a peregrini genere reputatum fuisse annotat p. 86.

Sacrum falconem Imperator girofalconi proximum magnitudine ait, capite magno, rotundo, rostro breuiori, corpore subtiliore et longiore proportionem, alis et cauda longioribus, pectore minus carnosum et denso, digitis breuioribus. Sauros a mutatis parum colore differre, asserit. ALBERTVS cap. 5. magnitudine fere aquilae esse ait; quem locum vbi laudat CONR. GESNERVS p. 64., parentesi inclusa addit verba nescio vnde traducta: *vel paulo maior*. Magnitudinis haec nota sola potest lectorem morari, quin eundem ALBERTI et FRIDERICI sacrum existimet; reliquae vero notae aut plane aliae sunt, aut eadem; et quae ALDROVANDVS putabat a sacro FRIDERICI esse aliena verba, pertinent ea ad comparisonem cum girofalcone institutam. ALBERTVS vocem ei *certificam* tribuit; sed rectius ALDROVANDVS p. 469. *terrificam* posuit, nescio, an ex sua emendatione. Ex omnibus vetustiorum falconariorum notitiis iam olim colligebat CONR. GESNERVS, et post eum ALDROVANDVS, sacrum non esse falconem, sed potius ad aquilarum genus referendum; veram ARISTOTELIS aquilam nominat GESNERVS.

Nunc audi CARCANI de sacro locum italico sermone expressum ex RAIMUNDO, quem latine vertit ALDROVANDVS: „I sacri sono maggiori di un peregrino, „che sia grosso. Questi hanno la testa grigia molto, in cima piana, si affomiglia alla testa del nibbio over milione dalla coda forcellata — hanno l'occhio „nero et grosso, la becchiera turchina (rostrum caeruleum ALDR.), le narici „per la maggior parte picciole; sono di persona lungi 'l più; hanno le maglie „del petto brune, la coperta (dorsum et alae superiores ALDROV.) bruna per lo più „et altri tortorata, le coscie bianche nella parte di dentro, la coda 'n alcuni come s'usa qui à dire fasolata e lunga (ALDROV. vertit: maculis semicircularibus „phaseolorum figuram aut renum fere exprimentibus varia cauda), l'ala grande e „lunga, la gamba e mano quasi tutti di color azzuro, che azulina fra' Struccieri si



„dice in questo paese, ma non tanto grande à rispetto del resto della persona. „Vi e poca differenza dal foro al mutato; perciocche 'l mutato ha solamente la „maglia un poco più bruna, e tonda del foro, ed i piedi s'imbianchiscon' alquan- „to, e si macchiano 'n alcuni di giallo, e sono quasi tutti di coperta tortorata „rossa; ed altri hanno la coperta nera, così i mutati come 'fori, di modo che „solo 'l pratico nell' arte conoscerà 'l mutato dal foro. I terzuoli loro son' ap- „prezzati al pari de' falconi ò poco meno: di questi tali falconi ne vengono „portati assaissimi di Candia 'n Venetia, ove sono Mercanti provisionati dalla „Maestà del Ré Christianissimo, che gliene mandano infiniti ogn' Anno.“

Quae quidem omnia cum loco FRIDERICI bene convenire videntur. Speciem tamen ipsam allatis recentiorum scriptorum testimoniis definire nondum audeo. Illustris BUFFON Sacrum, etiam britannicum dictum, e falconum familia etiam vult eximi et lanariis iungi, leuissima tamen ratione, colore nempe pedum et rostri caeruleo motus. BRISSONVS varietatem putat esse falconis. Certius multo est, Sacrum Aegyptiacum a BELLONIO dictum esse eundem cum vulture paruo seu Noruegico, quem Tabula illuminata Buffoniana 449. sistit; quod manifesto vidit in Sacro sibi ex Aegypto allato Cl. MAVDVYT in Encyclopaedia sub hac voce.

Girofalco FRIDERICI et ALBERTI quin idem sit, nihil impedit; verum quem auctor de natura rerum dicit Girfalconem siue Herodium, colore caeruleo in pectore et alis, plane alienum et diuersum esse, statuit ALDROVANDVS. Cum ALBERTO consentit BELISARIVS, non solum rariores sed pulchriores etiam ceteris accipitribus scribens. Nam etiam, inquit, praeter corporis formam eo standi modo erecti permanent, eaque membrorum compositione hominum oculos ita delectant, vt quandam aucupandi maiestatem prae se ferant. — Sint praeterea vnguibus validis, posterioribus maxime, planis cruribus, nodosis nec longis, cauda ad sui corporis formam decenti. Alarum vero summitates ita sint fortes, vt facile iudicari, vt animaduerti inde possit, in volatu eas quam diutissime perseuerare posse. In quibus verbis *cruribus non nodosis* legendum censebat ALDROVANDVS, vt consensus ALBERTI BELISARIIQUE seruaretur saluus. BELLONIUS Girofalconem vulgaribus falconibus fescuplo maiorem esse ait. SIGISM. BARO DE HERBERSTEIN girofalconem in reliquas aues ferocem, in suos mitem esse asserit, et praeter reliquarum auium rapacium morem non aqua sed arena corpus abluere et pediculos purgare. Ex quo SCALIGER diuersam a vulgari speciem intelligi arguebat. Frigore tantoperè gaudere, vt perpetuo aut super glacie aut lapide aut marmore algido stare gestiant. CARCANVS quatuor colorum varietate distinctas species commemorat, flauos, rubeos, brunneos (fuscus vertit ALDROVANDVS) et albos. Sed nec ille, nec ALBERTVS, BELISARIVS BELLONIVSUE totum



totum Girofalconem depingunt; hinc primus ALDROVANDVS pleniorē descriptionem auis in aula Ducis Ferrariae visae et e Noruegia allatae cum pictura p. 473. apposita dedit. Vertex illi erat complanatus ac sessilis colore cinereo; rostrum crassum, validum, breue, caeruleum, unco modico, sed acutissimo ac robusto, subcaeruleo, deorsum incuruatum. In oculis nigerrima pupilla, iris caerulea, caeruleo quoque circulo ambiente, conspiciebatur. Dorsum, alae, venter, cauda alba erant, verum tergi alarumque plumae pene singulae nigra macula notatae, quae cordis quodammodo figuram aemulabatur, instar oculorum in cauda pauonis. Alarum remiges prope extremum apicem nota maiori ac longiori nigra ornantur, quae tamen margine seu limbo albo clauditur. Alae admodum longae paene ad extremam caudam pertingunt. Gula, pectus et venter pura tingebantur albedine; cauda non admodum longa, imo respectu corporis et reliquorum falconum breuiuscula potius, notis nigris transuersim variegata; tibiae et pedes colore caeruleo diluto, tibiae crassae, robustae; pedum digiti oblongi, validi, late expansi, tabellarum continua serie per totum tecti. ALDROVANDI hanc descriptionem ad LINNAEI Gyrfalconem et BUFFONO in Hist. Nat. tab. 13. et in Tabulis illuminatis No. 210. et 462. pictas aues refert Cl. MERREM; verum notae a LINNAEO appositae auem vix distinguunt. Denticulum rostri lateralem deesse volunt. CARCANVS I. c. 11. ex insula Cypro, Creta et Aegypto afferri et Gallorum regi vendi tradit, quod merito mirum videbatur ALDROVANDO. Tres Girofalconis varietates, an species, dubius recenset Cl. MAVDVYT in Encyclop. method. p. 60.: primam Islandicam, quam tabula illuminata Buffoniana 210, alteram albam, quam tabula 446, tertiam denique Noruegicam, quam tab. 462. sistit. Sed hac distinctione nihil proficitur admodum.

Montanum seu montanarium non memorauit FRIDERICVS, sed ex AQVILA et THEODOTIONE ALBERTVS cap. 7, cui in eo TARDIVVS non consentit, quod rarius manu tenendum tradit; contra enim frequentius et diutius, quam caeteros falcones, gestandum esse scribit. Formam et colorem ita depingit CARCANVS I. cap. 7.:

„I falconi montanari fori sono di molti et varii piumaggi, altri rossi bion-  
 „di, altri tutti bruni come 'l corvo, altri cineritii, altri occadi, cosi chiamati da'  
 „Struccieri di questo paese, perche le penne loro della coperta s'affomigliano af-  
 „fai à quelle dell' Oca Baleta. Sono per la maggior parte di persona mezzani et  
 „pochi grandi, e molti di loro piccioli, alcuni tondi, altri lunghi. Tutti que-  
 „sti falconi montanari hanno la testa tonda, colma 'n cima e nera, con un poco  
 „di corona grigia attorno 'l capo e su 'l fronte appresso la becchiera hanno alcune  
 „poche piumette bianche sottili, le quali sono pochissime ne' bruni, ed alcuni  
 „ne sono 'n tutto privi: la becchiera hanno corta e grossa co'l corno nero, le



„narici per lo più picciole et parimente gli occhi, e le palpebre picciole per la  
 „maggior parte; la gorga alquanto bianca fin all'osso, che la divide dal petto, e  
 „macchiata di grosse macchie, e dal petto 'n giù son' ornati di alcune piume,  
 „le quali tirano alla ruggine, altri al rosso, ed altri al nero con certe macchie non  
 „molto grosse. Altri hanno la gorga ed il petto tutto di nero coperti: le coscie  
 „di dentro nere; la coperta per lo più bruna, e di minute piume. Hanno alcuni  
 „dal mezzo 'n giù della sudetta coperta alcune tratte bianche, altri rosse sottila-  
 „mente tottorate. Altri l'hanno cineritia semplicemente. Alcuni l'hanno (co-  
 „me sogliono dir 'i Struccieri) bicoccata sopra li mantelli e vanni ed altri no. (haec  
 „omisit ALDROV.) Alcuni hanno la coperta occata come le penne c'hà sopra la  
 „schiena l'oca baleta, come di sopra. Hanno le ale non come 'l peregrino lun-  
 „ghe, ed anco la coda più corta de' sudetti: e la maggior parte smerlata, à gui-  
 „sa di quella del Smerlo ò del Smeriglio, come più ve piace di dire. Se ne  
 „trovan'alcuni che l'hanno sacrata, ma pochi: la mano e la gamba hanno per  
 „lo più di color giallo, alcuni mescolata di giallo fistichino, così chiamato da'  
 „Struccieri. (flavo paleari ALDROV.) La qual mano non è grande come quella  
 „del peregrino: le dita grosse et grasse: l'unghie loro sono negrissime.“

„I mutati montanari si conoscon' assai meglio, percioc' hanno la testa nera  
 „come cornacchia, il collo e spalle brune, la coperta dal mezzo 'n giù turchina, la  
 „coda alquanto corta e nera, le narici gialle, e giallo anche d'intorno à gli oc-  
 „chi; la gorga hanno bianca, la qual però non passa l'osso, che dal petto lo di-  
 „vide. In alcuni si vede questa gorga di color rosso affocato, ed altri di nero;  
 „mà l'una e l'altra d'alcune macchie tonde ornata. Hanno piumaggi sopra le  
 „coscie assai bruni, li piedi gialli per lo più con le unghie nerissime. Et è d'av-  
 „vertire, che quante più volte si sono mutati, tanto maggiormente fanno la  
 „gorga bianca et più picciole le macchie, e la coperta divien' assai più turchina.  
 „Queste sono le conditioni, che dev' havere 'l falcone montanaro, il quale non si  
 „debbe sprezzare, quand' ha bella e gran persona: e tanto più, quando 'n lui si  
 „trova nobiltà o somiglianza 'n qualche parte del peregrino cioè ò in testa, ò in  
 „mano, ò in piuma. Et in particolare 'l loro di piuma bruna; percioc' è  
 „d'animo mirabile, mordente, ardito et honorato alla riviera: et di questi tali  
 „se ne sono visto molti, non sono solamente buoni alla riviera, mà ancora, se  
 „ben rari, ad oche et aeroni eccelentissimi. —“

Hunc CARCANI locum cum falcone montano WILLUGHBEII, RAII, KLEI-  
 NII et BRISSONI l. p. 352. tanquam varietatem speciei suae No. 27. sub nomine  
 Lithofalci propositae retulit Cl. MERREM p. 105. Sed nimium is varietatum nu-  
 merum accumulare in ea specie mihi videtur. Denique ALDROVANDVS subiun-  
 xit descriptionem falconis cinerei seu leucophaei p. 479, quem eundem cum

CARCANI



CARCANI montanario cinereo, sed saepius mutatum, esse censebat. Etiam is pedes, ceram et palpebras luteas habet, pedes et crura pro ratione corporis non magna neque crassa, alae principium superne latum et minus, quam caeteri, acutum, alas ad mediam caudam pertingentes, caput crassum, vertice tereti, nonnihil cliuo ac eleuato leniter assurgens, rostrum crassum, breue, nigrum, pollicari crassitudine, vnco haud ita acuto, sed validissimo: Figuram p. 480. appositam Cl. MERREM ad falconem torquatum suum No. 28. cum falcone cinereo BRISSENI I. p. 355. tanquam sexus varietatem retulit p. 108. Sed figura ALDROVANDI dentem rostri lateralem prae se fert.

Gentiles falcones mutatos colore plumarum et pennarum plane similes peregrinis fieri, sed in dorso et cauda plus guttatos, asserit Imperator cap. 27. Itaque difficulter nec nisi longo usu vtrumque genus internosci; actu tamen atque operationibus facillime distingui. Verum ea pars libri, vbi Imperator hanc differentiam explicuerat, hodie non exstat. Sed defectum supplebit BELISARIUS, qui, gentiles, inquit, paulo minores forma peregrinis, et dubitant quandoque venatores, iudicentne, peregrinos esse, cum eiusdem fere formae sint, et eodem pennarum colore distincti. Sed volatu discernuntur; nam motus alarum inter volandum spissior crebriorque gentiles esse demonstrat, cum peregrinorum alae quasi triremium remorum motus esse videatur. Animosiores tamen adeo sunt, vt ad omnia auium magnarum genera audacissimi iudicentur. Sed differunt a peregrinis plurimum, quod nec adeo veloces sint, nec animi generositate aliqua, sed fame potius, praedam insectari consuescunt. Denique e nido exemptum et gruum aliarumque auium maiorum praedae assuefactum audacia praestare. Quod postremum de nobili suo falcone tradit etiam TARDIVVS. Verum ecce Imperator II. cap. 4. p. 76. aperte asserit, nullam aliam nisi patriae differentiam esse inter peregrinum et gentilem falconem; etsi sint peregrini maiores et pulchriores et tardius mutantur. Tardius enim mutari ait, quia tardius nascuntur; et reliquam magnitudinis et pulcritudinis diuersitatem a patriae frigore intensiore pendere. Denique sapienter addit, diuersitatem regionum, colorum et morum non facere homines aut animalia diuersae speciei esse. Ita numerus falconum ab Imperatore descriptorum vno minor fit, et girofalconem, sacrum, peregrinum, eundemque gentilem, et laynerium quaternarius complectitur. ALBERTVS gentilem non nominauit; credo igitur, eum sub alio nomine latere, vti etiam ALDROVANDVS censuit, Germanicum CARCANI eundem esse ac gentilem. De hoc ita CARCANVS:

„Sono quasi tutti di gran persona; e la maggior parte di figura lunghi, ed alcuni pochi rotondi, assomiglianti molto al peregrino nella persona, nella testa, nella becchiera e nella mano. Hanno le coscie bianche di dentro; l'ala



„grande, la coda lunga, e sono tutti di piuma bruna, ed hanno somiglianza af-  
 „fai con li bruni falconi peregrini, fuor che nella testa e nelle spalle, perc' han-  
 „no quella e quest' alquanto più brune. Hanno una corona bianca, la quale  
 „circonda 'l capo appresso 'l collo. Le maglie del petto sono 'n loro per lo  
 „più brune e grosse, in alcuni ruffinose e lunghe. Sono questi falconi morden-  
 „ti molto e riescono per la maggior parte buoni ed all' aerone divengon' ottimi,  
 „e sono 'n pregio poco meno de' peregrini, ne potrà 'l falconiero (s'egli non è  
 „pratico molto nell'arte ed avveduto) discernere 'l falcone Tedesco dal peregri-  
 „no. I mutati hanno la testa, il collo e le spalle brune, la coperta turchina  
 „mescolata con alcune traverse più brune, la gorga bianca macchiata di linee  
 „grossette, il petto medesimamente più de' bruni peregrini, mà la mano di lo-  
 „ro è come quella de' peregrini. I terzuoli loro non si discernono da quelli de'  
 „peregrini per esser' eglino 'n tutto simili.“

Hanc CARCANI notitiam ad falconis gentilis LINNAEI varietatem primam germanicam refert Cl. MERREM p. 95. cum iconè pag. 433. posita; sed haec ex CONR. GESNERO p. 58. translata nomen adpositum peculiare non habet; et alae in ea ad caudam extremam pertingunt, quas tamen mediocres esse vult V. C.

Huc referri meretur descriptio accurata falconis gallici, quem circa Parisios captum per trium annorum variationem in colore plumagii persecutus est Cl. MAUDVYT in Encyclopaedia Methodica sub vocabulo *Faucon*. Vtar, ipsis eius verbis, vt in CARCANI locis coepi facere, ne in artis propriis quibusdam vocabulis aberrem interpretando, aliosque ipse in errorem inducam.

Saurum falconem tabula Buffoniana illuminata coloribus 470, biennem vero tabula 421. recte pingere dicitur; ipse vero vir doctus verbis eum his pingit:

„Tout le dessus du corps est brun, les pennes des ailes sont de la même  
 „couleur, mais elles sont bordées de rouffêâtre, ainsi que les plumes, dont le  
 „dessus du corps est couvert; la gorge, le devant du col, et tout le dessous du  
 „corps est d'un blanc sale, varié de taches brunes oblongues sur la gorge, le  
 „col et la poitrine, et de barres transversales sur le reste du corps. Ce plumage  
 „est celui de la première année. A la seconde le brun du dessus du corps devi-  
 „ent plus foncé, il prend une teinte de gris et le roux, qui bordoit les plumes,  
 „est remplacé par un brun noir; en dessous du corps les taches brunes diminuent  
 „de nombre, le blanc devient plus net, mais il reste encore quelques taches  
 „rouffêâtres par places.“



Triennem tabula illum. 430. bene exhibere pictum dicitur; verbis eum ita pingit vir doctissimus:

„La base du bec est entourée à sa partie supérieure de petites plumes étroites blanchâtres, inclinées en arrière, la tête, le dessus du col et de tout le corps sont d'un brun noirâtre, les couvertures des ailes, et les plumes scapulaires sont d'un gris brun, chaque plume étant rayée transversalement à son extrémité de brun noirâtre. Il y a de chaque côté de la portion inférieure du bec une raie brune, qui descend le long de la gorge, et qui forme une sorte de moustache; la gorge est blanche, le devant du col, la poitrine, le haut du ventre le sont aussi, avec quelques traits dans la direction des plumes d'un brun noir, clairsemés et fort étroits; le bas ventre et les jambes sont rayées en travers de brun sur fond blanc. La couleur blanche de la gorge remonte de chaque côté vers la joue, derrière la moustache brune, et forme une tache blanche au bas de la joue, dont le haut est d'un brun noir, les pennes des ailes et celles de la queue sont d'un brun noirâtre; celles de la queue sont de plus rayées transversalement d'un brun noir sur un brun plus clair, quoique foncé.“

Haec cum notis mutationum a FRIDERICO in peregrinis falconibus libro 2. cap. 26. annotatarum apprime conveniunt; verum ulterius progredi in iudicando vix audeo, et lubens iudicium omne viris intelligentibus permitto.

Tunetanum falconem TARDIVVS naturam lanarii referre ait, paulo minorem, similibus pennis sed magis decussatis et longioribus, capite rotundo et crasso, satis in sublime volentem, ad aues tum aquaticas tum caeteras utilem. Idem tradit BELLONIVS, nescio, sua an TARDIVI auctoritate. Quare ALDROVANDVS dubitabat, num eundem voluerit intelligi CARCANVS, cum diuersum plane colore pinxerit. Ita vero is tradit: „Sono tutti di persona piccioli, mà di spiumaggio gentili e nobili quasi come 'l peregrino; hanno per lo più la testa bionda et alcuni un poco nera à guisa de' falconi bruni e parimente nel resto, così fori come mutati. Somigliano tanto al peregrino, massime nella mano, che molti ves' ingannano tenendoli per falconi peregrini. Mà per esser' essi tutti piccioli et quasi come terzuoli de' peregrini, può 'l saggio falconiero agevolmente discernere l'uno dall' altro, ancorche di questi hò veduto alcuni à riviera buoni et honorati. Li terzuoli delli predetti sono di poco prezzo, ne riescono.“

BELISARII de Tunetano locum ALDROVANDVS memorat, sed non attulit, nec GESNERVS BELISARIVM in Tunetano laudavit. Quare de eius auctoritate dubito.

Gibbo-



Gibbosum falconem solus et primus ALBERTVS nominavit cap. 9. eumque tanquam varietatem germanicam ad gentilem LINN. retulit Cl. MERREM p. 95.

Album falconem ALBERTI cap. 11. eundem putat esse ALDROVANDVS, quem sibi transmissum verbis alienis describit, et satis male pingit p. 487. Corpore toto erat lactei coloris, maculis tamen flavis aspersis, quae albae apparebant et ipsae. Alae sine maculis, quibus cauda conspersa erat; media tamen utraque caudae penna tota candida erat. Rostrum album magis, quam caeruleum, pedes cum unguibus lutei, oculi flavi et nigri. Statura erat alta, magnus et superbus, nec nisi clausis oculis comedebat. Atque hunc falconem ALBERTI et ALDROVANDI tanquam torquati sui falconis no. 28. varietatem posuit Cl. MERREM p. 107.

Lanarios, seu, ut FRIDERICVS cap. 28. appellat, lanerios gemini esse generis longe diuersi, primus recte obseruavit ALDROVANDVS. Is enim cum Gallicorum scriptorum, TARDIVI et BELLONII, descriptiones cum ALBERTI atque Italorum lanariis comparasset, immensi quadam diuersitate distare utrumque genus, alterumque ab ALBERTO Italisque dictum ad accipitrum ordinem relegandum, alterum falconibus generosis inferendum vidit, hocque posterius genus gallicum lanarium dixit. TARDIVVS igitur Gallus de suo lanario ita tradit: Lanarius satis communis est per omnes regiones, minor falcone nobili, pulcris pennis praeditus, pedibus breuioribus, quam caeteri falcones. Praefertur, cui caput grandius et pedes magis ad caeruleum colorem inclinantes, siue is nido eximtus, siue iam adultior captus sit. Non opus habet delicato victu. Vtilis est ad aucupium tam in terra quam super aquas. Idem alibi lanarium gruum ad venationem quomodo sit instruendus docet. Vtilem inprimis esse ait a medio mense Julio vsque ad Octobrem medium; postquam pennas mutarit, praestantiorum esse; tempore frigido aut hieme inutilem esse. BELLONIVS Galliae montes et silvas per totum annum habitare ait lanarium, reliquis falconibus mitiorem et dociliorem frequentissime omnium in usum venationis adhiberi, gentili minorem, pulcrioribus pennis ornatum, quam sacrum, praecipue postquam mutauerit plumas. Praeferri eos, qui caput crassum pedesque caeruleos aut flavos habeant. Venari aequae in aquis et in terra. Omnium optime cibo etiam minus delicato nutriri. Agnosci deinde ait facile rostro pedibusque caeruleis. Plumae anteriores nigro ac albo variae, maculis quidem non, ut in reliquis falconibus, transversis, sed longis. Plumae dorsi non admodum variegatae sunt, uti neque alarum et caudae, parte superna et externa; et si forte in his maculae quaedam conspiciantur, eae exiguae sunt, teretes et albae. Verum alarum extensarum partem inferiorem seu pronam contemplanti notae apparebunt, figura ab reliquarum volucrum rapacium notis differenti. Sunt enim rotundae atque instar numulo-



mulorum exiguorum per superficiem disseminatae, licet pennae pectoris et partis corporis anticae varietates in longitudinem protensas ac super marginibus dispositas ostendent. Collo est breui et crassiusculo, ac rostro simili. Lanarius mas corpore quidem est minore, caeterum eodem fere pennarum plumarumque colore. Patientissimum perticae esse addit, facile ad gruum venationem instrui, post mutationem optimum, a medio Iulio vsque ad extremum Octobrem in venatione adhiberi, hieme inutilem.

Lanarios CARCANVS ita describit: „I Lainieri nascono nell' Alpe Vicentine — alcuni di loro sono di gran persona, altri di mezzana, altri di minore; la testa hanno tutta bionda ed in cima piana: gli occhi neri e grossi, e per la maggior parte hanno le narici picciole, la becchiera corta e grossa e più picciola del falcon peregrino e del montanaro, di color turchino; il petto biondo, di rare e rugginose maglie macchiato, la coperta come 'l falcone peregrino e su l'ultimo delli bannazzi e mantelli paiono di pinti di bianchi e tondi occhi, l'ala e la coda longa, le gambe corte, la mano picciola, assai più del peregrino e del montanaro, di color turchino. Li mutati poi hanno la testa fin' alle spalle bionda, rosseggiante, con alcune linee sottili; la loro coperta è turchina con alcune traverse nere, in altri dorate tutta ombreggiata, il petto hanno biondissimo senz' alcun segno, mà i piumaggi delle coscie sono traversati di poche e rare macchie; mutano la mano di turchina, che prima era 'n color giallo e si conoscono malagevolmente i fori da' mutati. Questi hanno su l'ale assai; (alarum aequilibrio in aëre sese suspendunt diu admodum et frequenter ALDROV.) e veggendo essi 'n campagna alcuno, che vadi à sparaviero, lo seguitano di continuo volando sopra 'cani, di modo, che gettato lo sparaviero dietr' all' uccello, il lainiero discende con prestezza grande, e s'avviene che lo sparaviero non pigli subito la quaglia, egli la segue fin tanto, che ne fa preda ò la fa dare, e se dà in terra ò macchia ò altra simil cosa. Questi falconi di sua natura non ricozzano, ma fanno la colonnata 'n aere, ed attendon' à volar' al suo solito. (ALDROV. minime impetunt, iciuntque denuo, verum in aëre sustinentes se veluti stant ac tanquam immoti pendent et suo more volare pergunt.) Hor volendoli liberar lo Strucciero da quest' impaccio e fare sì che 'l detto lainiero non gli dia noia, è mestiere che se sforzi di fargli pigliar' una quaglia; che così 'l falcone andera à pascersi e non impedirà più l' uccellatore. Se per avventura i cani boreno qualche compagnia di pernici, scende come folgore 'l lainiero e ne prende una, ovvero la fa metter 'n una macchia ò altra fortezza, di maniera, che alle volte 'nterviene, che l' uccellatore la piglia poi con lo sparaviero. Questi lainieri si fanno volare sopra 'cani da rete, à fine di far star ferme le pernici, i coturni ò fagiani ò altro uccello c' habbia fermato 'l cane, e se qualch' uccello soampa dalla rete, scende 'l lainiero e ne fa preda. S'uccellano anche questi



„falconi di getto à pernici, a' coturni, ed à fagiani, e non potendo pigliar di „primo volo, segnando l'uccello, come fanno gli astori, mà rarissimi l'affonda- „no, ma fatto dar l'uccello, farrà una colonnata e se mettr' à volar sopra. Que- „sti falconi lainieri amano molto la compagnia e vi sono li terzuoli di questi, co- „me di tutte le altre forti di falconi.“

Hucusque CARCANVS apud RAIMVNDVM; reliqua latino sermone ex AL-  
DROVANDO tradam. Equidem, inquit, nunquam eos ita instituire potui, vt fru-  
gem aliquam facerent, aut ad volaticum venatum idonei euaderent. In Gallia  
vero magni aestimantur, relatumque mihi est, in ea regione eos instrui ad lacu-  
strem venatum, ac ternos vel quaternos pluresue falcones emitti, qui super aquis  
seu eo loco, vbi anates sunt, volitent, eaque ratione anates capi, verum in no-  
stra Italia nullius sunt vsus aut pretii.

Haec quidem omnia accipitris speciem a lanario gallico diuersam arguere,  
recte annotauit ALDROVANDVS; atque hinc explicat locum BELISARII de villa-  
nis seu ignobilibus falconibus, quos cum GESNERO lanarios interpretatur. Ita  
vero BELISARIVS: Villanos audiui in Gallia optimos reperiri: quod an ve-  
natorum arte industriae aut ipfarum auium natura eueniat, non comperimus —  
cum in regione nostra nec animo viribusque nec volatu valeant.

FRIDERICI lanarios eosdem cum Italicis CARCANI facere velle videtur AL-  
DROVANDVS; postquam enim CARCANI locum posuerat, subdit, easdem fere  
notas lanariis suis assignare FRIDERICVM. Verum de FRIDERICI lanariis affir-  
mare aliquid vetat mentio volatus omissa; deinde in aucupem tam solertem, exer-  
citatum et doctum vix cadit error tam grauis, vt accipitris genus pro falcone ven-  
ditaret. Gallicum lanarium, quoniam hodie in Gallia paucis visus esse dicitur,  
ex BELLONIO descripsit illustris BVFFONVS, et ex ALBINI exemplo pinxit. LIN-  
NAEVS eundem in syluis Sueciae migrantem reperiri, et diuersum ab Italico la-  
nario annotauit. BRISSONVS l. p. 363. BELLONII verba repetiit.

Lanarii ALBERTI c. 15. manifesto ad accipitres pertinent. Sed ALBERTVS  
facit nomen genericum. Falconum, inquit, ignobilium genera sunt tria, quae,  
antiqui aucupes vt Ptolemaeo tradunt, Aquila, Symmachus et Theodotion, la-  
narii potius quam falcones vocantur, (vbi editio Veneta Ptolomaei habet), et sunt  
butherii quidem mures in campis insequentes per colores differentes, quia sunt al-  
bus et niger, in quantitate falconum, et rubeus, qui minor est, qui mirle imi-  
tatur. — Cum mutauerint se bis vel ter, et pusillanimitas naturalis per artem me-  
dicamen acceperit, efficiuntur columbas et anates accipientes. Duo igitur priora  
genera, maiora, coloribus, tertium magnitudine merularii accipitris seu Smerilio-  
nis



nis distinguit; hos omnes tres lanarios ad naturam buteonis accedere ait. Butrones enim butherios appellat. Praeterea legendum puto: *butherii quidam*. Idem cap. 11. falconem album comparat cum lanario albo, qui volat in campo insidiando muribus. Lanarium nigrum vulgarem buteonem, Italis *Poiana* dictum, sine dubio esse asserit ALDROVANDVS; rubeum interpretatur tinnunculum, omnes tres ex communi victu murium nomen sortitos esse suspicatus. Si nominis originem quaeris, equidem lanarium album proprie isto nomine et primum appellatum fuisse suspicor ab albo lanae colore; deinde eodem nomine fuisse comprehensos alios accipitres, qui similem volatum habent. Ita enim ALBERTVS cap. 3.: stans autem falco in alto suspensus alis, degenerat in naturam auium, quae lanarii a philosophis, a vulgo autem germanice Swemere dicuntur. Reperio tamen apud CANGIVM, veteres Gallos degeneres et ignauos viros *laniers* nominasse; quae quidem notitia Gallicum etiam lanarium degenerem et ignauum arguit.

Quem ALDROVANDVS sub lanarii albi nomine pinxit, accipitri palumbario fere par, a summo capite ad extremam caudam dodrantis et sesquipalmae longitudinem explet. Vertice est lato, capite et collo crasso, omnibus e cinereo albicantibus, vti et ventre et tota parte prona, nec non femoribus, vropygio et cauda inferna. Oculi pupillam nigram iris flaua includit. Inter huius canthum maiorem et rostrum macula est nigra. Rostrum nigrum, acuto et prolixo unco, cera lutea. Alae sunt admodum acutae, oblongae, intra pollicem a cauda extrema subsistunt compositae. Femora non tota plumis tecta, tibiae luteae, valde graciles, a poplite ad ungues usque paulo plus palmo longae sunt, et culmo triticeo vix crassiores. Digi- ti similiter lutei, imbecilles, unguiculi nigri, tenues et debiles, licet adunci. Hunc ALDROVANDI lanarium cum aue S. Martini et subbutrone BVFFONI et cum vulture cinereo-albicante FRISCHII tab. 79. ad primam suam falconis torquati No. 28. varietatem refert Cl. MERREM p. 106. BELLONII lanarium falconis alicuius varietatem potius esse suspicatur Cl. MAVDVYT Encyclop. p. 155.

Falconem rubeum ab antiquis appellari aliquem ait ALBERTVS cap. 12, quia guttae, quae in aliis albae sunt, in hoc genere sunt rubeae et nigrae guttae sicut in aliis (*non* inserit GESNERVS) sunt interpositae; nec in dorso vel exteriori alarum hic falco rubeus apparet, nisi quando alas exserit, tunc fusca in eis apparet rubedo. — Est autem non magnus, paululum minor peregrino, sed unguibus et pedibus et rostro fortis, et valde in volatu agilis, sed non satis diu perseverans, et domesticatur multum, et efficitur melior per mutas duas vel tres. Ita ALBERTVS. PETRO Crescent. X. 9. falco rubeus ex numero maiorum falconum est, et fere cum macilentus est, melius aucupari dicitur. TARDIVVS ru-



beum falconem in locis planis et palustribus inueniri ait; esse audacem, sed difficulter regi. Dubium est, eundemne an diuersum hi falconem rubei nomine intelligi voluerint; ex loco natali a TARDIVO addito liceret suspicari, aeruginosum LINN. intelligi. Sed Cl. MERREM omnia haec de rubeo falcone loca ad gentilem pro varietate traduxit p. 96.

Cyanopodem falconem priuatim solus ALBERTVS nominauit et descripsit cap. 184. Varietatem aliquam noti generis alicuius esse, satis est probabile; ex indicio tamen ab ALBERTO posito, vbi natura sua suspensum alis in aëre stare nec ictum dare prae timore tradit, degenerem et accipitrum naturae propiorem suspicari licet. Sed Cl. MERREM ad peregrinum veluti varietatem retulit p. 97.

De reliquo asturum, accipitrum et sperueriorum genere quia parum aut nihil separatim tradunt FRIDERICVS et ALBERTVS, nihil addo, nisi locum ALBERTI p. 228. a. Buteus, inquit, vocatur avis rapax subnigra, quam germanice *Brobuxen* vocamus, et est pigri volatus et vncorum vnguium et curui rostri, fere quantitatis milui. Venatur autem ranas et mures et auiculas pigras aut infirmas, volare non valentes, et rapit pullos auium aliquando et est ad comedendum dulcissima et saporosa, si decoctione opthesis. CONR. GESNERVS p. 46. legendum censebat *Braekbusen*, i. e. miluum paludum aut noualium. *Busen* enim et *Busant* in vetere dialecto occurrit etiam coniunctum in nomine *Busaar* aut *Bushart* pro Buteone. Ex gallico *Busse* reperies factum *Busio* apud CANGIVM. Sed ALBERTVS sua debet auctori de rerum natura apud VINCENTIVM XVI. cap. 43, qui simpliciter: haec, inquit, avis sapore dulcissima est. PLINIVS X. c. 49. buteonem accipitrum generis in Balearibus insulis esse in honore mensarum refert. Falconem apiuorum in cibo expeti a Gallis, annotat illustris BVFFON.

Explicatis falconum speciebus, quantum ab homine disciplinae falconariae ignaro, et qui plurimas ex hoc genere aues nisi ex aliena relatione cognitae non habet, fieri potest, videamus nunc proprias totius generis notas, quales a scriptoribus vetustis artis falconariae traditae sunt. Recentiorum enim observationes in Notitia literaria excerptas posui, quas huc iterum referre, non opus est. Ex recentissimis vero historiae naturalis scriptoribus nullum noui, qui scriptorum rei falconariae observationibus vsus genus auium rapacium bene digestum explicauerit. Facile etiam lectores intelligentes mecum sentient, ordinem hunc vniuersum auium rapacium ab illustri BVFFONO facta specierum plurium permixtione et confusione magis esse perturbatum atque obscuratum, quam ab vllō alio scriptore, ita vt initium emendandae eius disciplinae vnde sumi possit, vix reperire liceat. Quare omnis spes pristini ordinis restituendi et recte explicandi reponenda mihi videtur in viro doctissimo, HYBERO, cuius specimen de volatu  
auium



auium rapacium saepius iam a me laudatum fuit. Interim, quod in me est, efficiam, vt naturali methodo redintegrandae materiem vndequaque diligenter colligam et peritioribus vsu elaborandam commendem.

Primum igitur praecepta ponam ALBERTI Magni ex tribus prioribus capitibus collecta, simulque quaedam eius loca accuratius explicabo, quam a me fieri potuit tum, cum verbis ipsis magis animum attenderem, quam auium naturae, antequam collectas plurimum virorum doctorum obseruationes de toto hoc auium ordine animo complexus singulas notas distinguere didiceram. ALBERTVS igitur quatuor notis genericis falcones a reliquis auibus rapacibus separat, figura corporis, colore, actu et moribus, ac denique voce.

Ad figuram et formam corporis quod attinet, caput est rotundum et grandius seu crassius, collum breuius et rostrum, pectus maius cum sterno acuto, alae longiores, cauda contractior, crura breuiora et fortiora. Caput quidem grande et rotundum ita est intelligendum, vt non sit enorme aut nimis rotundum, vt in noctuis et bubonibus. In asture, vt in aquila, pars antica capitis longior est et paulatim in rostrum stringitur; hinc accipitres *ὄφιοκέφαλοι*, i. e. serpentino capite, dicti DEMETRIO; quod non item in capite falconum accidit, sed frons eius ex rotunditate dilatatur, et superior cranii pars plana a figura rotunda deficit.

Collum breuius est, quam aquilae, asturis et nifi, sed non immodice, vt in noctuis. Crura quidem breuia sunt, sed coxae longae et bene plumatae, pes patulus, digitus fortis, praecipue in nodis articulorum, quos matriculas alibi appellare videtur ALBERTVS; ungues fortes et magis ad interiorum pedis partem paulum curuati. Cauda breuior est, quam in asturibus et nifis, ita tamen, vt alarum compositarum pennae anteriores et longiores se super extremam fere caudam aut plane aut prope attingant; eadem non dependet, vt in asturibus et nifis. Nimirum caudae longitudinem timiditatis signum esse ait, ratione hac edita: quia longitudo caudae super humorem nuchae descendens attestatur, et timiditatem arguit. Ita editur vulgo; sed CONR. GESNER de Auibus p. 59. laudat h. l. *nam cauda longa spinæ dor si medullam nimis humidam indicat et timiditatem arguit*. Videtur igitur *superantem* legi voluisse in ALBERTO, quod probo. — Denique MICHAEL SCOTVS de Phisionomia cap. 21. omne, inquit, animal volatile habens ungues curuos et rostrum viuit de rapina, coxas habet pulposas et pectus grossum ac forte.

Color corporis proprius est hic, vt adsint maculae nigrae in facie in maxillis, albae circa orbitas oculorum vtrinque ex vtraque parte rostri; cilia, id est su-



percilia, sunt nigra; color cranii, dorsi et superioris partis colli, et exterioris alarum et exterioris caudae cinereus siue subniger; in alis plenus est falco varietate virgulatim quasi descendente, interruptis quinque virgulis. Haec varietas pro colore vno habet semper nigredinem, sed in primo anno secundus color est rufus remissae rubedinis, et quo saepius mutatur avis, eo magis magisque albescit. In hoc loco praetuli lectionem VINCENTII, vbi vulgatae ALBERTI editiones habent: *et in aliis esse plenum varietate quasi virgulatim descendente*; neque enim puto omissam fuisse ab ALBERTO notam, quam posuit etiam Cl. HUBER, virgarum in singulis alarum pennis, inprimis forinsecis, coloris quasi incisura aliqua distinctarum. Numerus an ubique adsit quinaris, nunc non succurrit, nec annotatum est aliquid de numero a Cl. HUBERO. Vulgarem tamen lectionem ALBERTI vel sic praefero alteri, quam nescio vnde duxit GESNER de Avibus p. 57., vbi ex h. l. laudat: *interruptis quandoque*. Forte compendium scripturae *quique* ita festinans interpretabatur vir praeclarus.

Color oculorum est croceus, rufo vicinus, pupilla nigra. Pedum color optimus croceus, ad albedinem vergens; nam quo minus albescunt pedes, eo falco est ignobilior; et si vergunt ad caeruleum aut hyacinthinum colorem, ignobilitatem et timiditatem significant.

Mores falconum proprii sunt, cum impetu in praedam statim irruere manu emissum. Celeri igitur volatu adscendit et compositis ad pectus unguibus cum impetu et magno alarum motarum sonitu in auem descendit itinere obliquo, quo longius efficiat vulnus ungue postico impresso, quem talum artifices appellant. Contra accipitres diu in aëre suspensi alis haerent, antequam praedam aggrediantur. Venatur falco solus et cum socio, cum quo praedam non inuitus communicat, quod non facit astur aut nifus.

Denique propria falconum vox grossior et prolixior ab acuto in grauiorem sonum procedit, quam asturum et niforum; et cum reclamantur a faleonario, non sibilo, sed voce magna ad modum reclamationis canum reclamantur; nec reuocantur ad modum canum, sed potius circumducitur in chorda quiddam ex quatuor alis vel pluribus ad modum avis colligatum, cui caro recens superligatur. In hoc loco vitium inesse aliquod suspicor. Videtur enim ALBERTVS voluisse distinguere modum, quo falcones et astures reuocantur a pugna; falcones quidem voce inclamati redeunt ad pugnum; contra astures ad tiratorium carnosum ostensum retro properant. Hinc distinctio orta est auium, quae ad pugnum et ad tiratorium redeunt; Italis dicuntur *uccelli da pugno* et *da logoro*.

Sequan-



Sequantur nunc falconum argumenta ex FRIDERICO collecta. Is igitur I. cap. 24. p. 30. falcones oculos penitus nigros habere ait; nigredine tamen pupillae intensiore, quam albuginei humoris seu iridis potius. Contra genera accipitrum et niforum habere glaucam iridem et pupillam nigram. Cilia auium rapacium multum prominent super oculos defendendos, uti putat Imperator, seu potius ad visum oculorum cautorum adiuuandum; sunt praeterea detecta, plumis carentia, dura et tenuia, ita ut fere incidant. Cilia hic Imperator dicere videtur os superciliare auibus rapacibus, non tamen omnibus, proprium; contra ALBERTVS cilia pro superciliis posuit eo sensu, ut intelligeret locum, quem supercilia in homine obtinent. In colore oculorum falconis designando diuersus abit ALBERTVS; quem dissenfum in re tam manifesta, ubi Imperatori assentitur etiam Cl. HUBER, ut tollerem, eam tandem ineundam viam putaui, ut colorem oculorum croceum in ALBERTO ad palpebras croceas traherem, quales in aliquot speciebus conspici supra iam ex idoneis auctoribus retuli; sed incompertum mihi est, propriumne omnes eum colorem habeant species.

Caruncula porro narium foras prominet in falconibus; contra intus deprimi-  
tur in accipitribus. Cap. 26. p. 31. Sternum falconum magis rotundum et crassius  
est, quam in accipitribus et nifis. Cap. 32. p. 39. Pennarum numerum, formam,  
positionem et mutationem in alis, empinionibus et cauda alibi iam copiose ex-  
plicui. Igitur ad volatum transeo. Falconum igitur plures species mediocriter  
mouent alas volando. Aues rapaces, quae habent interualla pennarum, hoc  
est, pennas decisas alarum, sicut accipitres et nifi, postquam frequentius moue-  
runt alas ad praedandum, si contingit, ut praeda non potiantur, statim extentis  
alis, et non motis neque frequenter nec cito per spatium coguntur euolare, dum  
ab illa defatigatione, quam sustinuerant in frequenti alarum motu in praedando,  
requieuerint sic extentis alis suspensi. Quando etiam adscendere quaerunt, cir-  
cumuolando ad altum mutant modum mouendi alas, sicut accipitres et nifi; post-  
quam per aliquod spatium frequenter mouerunt alas, postea ipsis extensis et non  
motis, ut requiescant, in circuitum circumferuntur, statimque cum volunt plus  
adscendere, iterum frequenter coguntur mouere alas, deinde circumferuntur exten-  
dentes alas, et non mouentes eas per spatium, sic vicissim permutantes motum  
alarum, ut quiescant a labore, quem habent ex frequentiori motu alarum. Cap. 54.  
p. 59. Falconum species quinque talo feriunt praedam; accipitres, quo nomine  
non solum asturem, uti alii, sed speruerium etiam comprehendit Imperator, ca-  
piunt, seu vnguibus colligatam corripiunt. Libro II. cap. 2. p. 75. Pupillam falco-  
rum maiorem videtur facere, quam asturis et speruerii. Cap. 29. p. 90. Pluma-  
tam denique falco, quam deglutiit, sine excussione capitis euomit, et ante se ca-  
dere dimittit, non cum excussione capitis, ut astur et nifus; egerit prope, non  
longe plumatam. Hae sunt praecipuae a FRIDERICO positae falconum notae;  
sed



sed cum maior pars libri secundi de falconibus interciderit cum tertio de accipitribus, manifestum est, magnam etiam notarum copiam, quibus vterque ordo invicem differt, vna intercidisse.

Generatim Imperator II. cap. 5. de omni falconum genere annotavit, qui nascantur in septimo climate et ultra versus polum arcticum, esse maiores, fortiores, audaciores, pulchriores, meliores et velociore in sua quemlibet specie, propter frigoris vim maiorem. Praeterea in aibus frigidioris caeli indigenis colorem plumagii rubeum dominari. Hanc veram esse, patriae scilicet, non speciei, differentiam inter falconem peregrinum et gentilem, admonet idem Imperator cap. 4. De colore rubeo credere fas est diligenti Imperatoris observationi; cui etsi obflare videntur annotationes aliquot recentiorum de colore plumagii albo falconibus frigidissimarum regionum proprio, cogitare tamen debemus, non eandem frigoris vim esse posse in aues propter naturae suae caliditatem frigidum aërem caelumque amantes, quam in aues frigidiores calorem aëris caelique amantes annuaque peregrinatione sectantes. Etsi vera sunt, quae de plumagio albo falconum Islandiae aliarumque frigidissimarum regionum narrantur passim, interpretari tamen illa ita licet, ut de plumagio hiberno ita recte pronuntiari posse dicamus. Eadem igitur ratione explicabo egregiam observationem KRAMERI in Elencho Animal. Austriacorum, p. 326., de falcone haliaieto LINNAEI. Capitis, inquit, remigum primarum et subinde rectricum totiusque corporis colorem album a climate frigidioris et solis defectu dependere, non tantum ex aibus septentrionem habitantibus et autumnis vel hieme Austriam petentibus constat, verum etiam sequenti experimento confirmatur. Dum aucupes nostri aues per aestatem in cellis subterraneis aliisque locis frigidioribus et obscuris custodiunt, atque illis, ne canant, remigum et rectricum aliquas extrahunt, quae in his locis sole carentibus iterum crescentes albent, praesertim in emberiza flava, utpote quae hac ratione, dum autumnis eximitur et radiis solaribus, ut canat atque ad alias alliciendas aptior fiat, exponitur, saepe semialbescit.

Quod denique Imperator falcones frigidarum regionum saepe corda maiora, inferiusque corios duos appositos habere ait, puto corios intelligi minora corcula infra appensa. Quod vero in falconibus interdum accidere testatur Imperator, idem fere aut simile aliquid observavit in genere perdicum Americano D'ABOVILLE in Vol. II. *Transactions of the American Philos. Society held at Philadelphia*, p. 330. seqq. Is enim in perdicibus quadraginta octo, quas simul inspexit, corda gemina reperisse vult; sed dolendum, ipsam structuram mirabilem pictura non fuisse adumbratam, verbis, quanquam obscure, descriptam.



Postremus et recentissimus scriptor historiam naturalem falconum artemque ipsam falconariam pertractandam adgressus est Cl. MAVDVYT in Encyclopaedia methodica, adiutus opera viri artis falconariae inprimis periti, Cl. LE ROY, cui caput de arte falconaria insertum antiquiori Encyclopaediae debetur, quo deinde usus etiam est illustris BVFFONVS. Praeterea communicatum habuit Cl. MAVDVYT a Cl. HVBERO opus egregium, cuius prodromum deinde publicavit eius Geneuensis, atque inde excerptit multas easque egregias observationes, quibus disciplina artis falconariae et historia naturalis falconum illustratur. Quidquid igitur in capite de falconibus et arte falconaria noui traditum reperi in Encyclopaedia methodica, huc relatum facile consensum lectorum meorum merebitur. Plurima quidem de alarum, pedum digitorumque forma praecepta ex prodromo typis publicato iam nota esse possunt lectoribus; verum eadem hic oratione et rotundiore et elegantiore traduntur; quaedam etiam annotationes intertexuntur, quas in prodromo, quem nunc ante oculos habere mihi non licet, antea legisse non memini.

Remiges igitur aues altius volare dicuntur, quam aues velificantes appellatae a Cl. HVBERO. Habent alas tenues, graciles (*mince, déliée*), parum conuexas et fortiter tensas, dum explicantur; contra in velificantibus alae sunt crassiores, carnosiores (*plus épaisse, massive*), arcuatae et minus inter volandum tensae. Remigum penna secunda, velificantium quarta penna alarum longissima est omnium. Vt remiges omnes altum, ita velificantes aues humilem volatum exercent; haeque ad pugnum, illae ad escam redire dicuntur. (*Oiseaux de haut vol ou de leurre, oiseaux de bas vol ou de poing.*) Ex digitorum forma habentur vel nobiles vel ignobiles. Nobiles digitos omnes longos et graciles (*déliés*), ignobiles contra breues et crassos habent. Aues velificantes maturius adolescunt et perficiuntur, tribus fere hebdomadibus postquam area pulli sunt egressi, quam remiges. Tres falconum capiendorum modi docentur (p. 19.); in quorum prioribus duobus adhibetur lanus, cuius timor clamorque excubantis falconem vel altissime volantem prodit aucupi. Tertius vitur bubone ad hanc venationem educato, atque humili volatu a stipite in terra defixo ad stipitem properante et falconem in rete alliciente.

Manfuefactio omnis falconum atque educatio exemplo Gyrofalconis, Sacri, Gentilis, Smerilionis, Asturis et Speruerii plane et copiose traditur a pag. 22. ad pag. 26. Ex qua tractatione illud modo ponam praeceptum, quod mense Martio, quo venerea copula inuicem coniungi solent, utrique falconum sexui filices magnitudine auellanarum induntur, quibus desiderium coitus suffocari creditur, etsi remedio hoc, utpote periculoso, non utendum esse, saepius recte censet vir doctissimus.



Sequitur catalogus scriptorum artis falconariae, in quibus Imperatorem FRIDERICVM II. et Gallum D'ESPARRON desidero. Ex IOANNE DES FRANCHIERES et GVIL. TARDIVO annotatur, vtrumque auctorem in eo consentire, vt carnes animalium venereo stimulo prurientium in cibo falconum defendant; TARDIVVM praeterea quatuor vermium intestinalium species (*filander*) distinguere. Tertius, qui nominatur, ARTELOVCHÉ DE ALAGONA ciborum salubritatem et bonitatem accuratius distinguit, carnesque corui, cornicis, noctuae (*chouette*), corui marini et querquedulae (*sarcelle*) plane defendit.

Falconem Indicum a doctissimo SONNERAT descriptum (*faucon à collier*), superius nigrum, inferius album, sexum femininum masculo minorem habere non agnoscit Cl. MAVDVYT, et contra ex eo, quod colores feminae splendidiores et natura cum statura (*taille*) minus robusta esse dicuntur, arguit, errore marem fuisse pro femina habitum.

Qui denique nuperrime Linnaeanum Systema auxit et emendavit, IOH. FRID. GMELIN, contrariam in partem atque alio modo, quam illustris BVFFONVS, peccasse mihi videtur. Immensum enim in numerum auxit familiam aquilarum et falconum, nullis finibus separatam; nec vllam mutationum aetatis sexusue rationem habuit in digerendis speciebus, etsi in adiecta notula de eo discrimine recte admonuit. Verum etiam hoc exemplo constabit, vanos esse virorum doctorum conatus, qui rapaces aues aut ex libris peregrinatorum aut subito visu auis viuae aut mortuae in ordinem redigere satagunt.

---



---

# ADDITAMENTA.

DE

## MUTATIONE PENNARVM PLVMARVMQVE.

**E**gregie etiam hanc physiologiae partem tractauit Cl. MAVDVYT in Encyclopaedia methodica, p. 235. seqq. Satis magnum auium numerum bis in anno mutare plumagium, is mecum asserit, eodem plane modo eam mutationem fieri narrat in auibus aquaticis et auibus peregrinis, viduas (*veuves*) quas Galli appellant, quo suspicatus antea fueram. Quaedam adeo aues ter anno plumagium mutare dicuntur; verum eius rei exemplum desiderasse videtur doctissimus Gallus. Mutationem ipsam a viribus partu et cubatione exhaustis cum illustri BUFFONO repetit; vbi succus nutritius aliam in viam deriuatur, interimque canales veterum plumarum pennarumque exsiccantur. Pulli auium in prima mutatione plumas solas nec ipsas pennas amittere dicuntur; in hac vero aetate succi nutritii abundantia mutationis causa est. Contra in iis, quae bis anno plumagium mutant, primae quidem mutationis causam repetit ab humorum succique nutritii abundantia, alterius vero, quae fit autumnis, et qua pennae plumaeque renascuntur minus pulchrae et pallidiores colore, a virium succique alio deriuati defectu. Recte. Poterat praeterea vir doctissimus vti comparatione reliquarum classium animalium, vbi venereae voluptatis sensus et stimulus colores viuiores et pulchriores efficit, nouasque adeo partes velut in nuptiale decus protrudit postea delendas, vt in tringa pugnaci papillas carneas frontis et iubam collarem, in phasianis cornicula pennacea; in piscium genere eadem colorum mutatio locum obtinet, et in cyprinis squamae sub nuptias clauatae apparent. Anatem cristatam (*Canard hupé, branchu*) singulis annis mense Iunio plumagium decorum amittere, feminae similiorem tunc fieri, mense vero Nouembri pristinum decorem iterum assumere, vidit Cl. MAVDVYT p. 565. Eandem mutationem geminam in aue Africana *Capmore* obseruauit p. 569. Multae aues fere simul omne plumagium, inprimis tamen pennas, amittunt, vt anatum species plures atque aues rapaces. Praeter picam variam aliae etiam multae aues plumas capitis simul amittunt et subito caluae apparent. (Sub voce *Pie*.) Post lanulas in pullis paulatim cadentes plumagium hoc ordine nascitur. Primum igitur germinant plumae capitis, pen-



nae deinde caudae, alarum, postea tectrices magnae et parvae alarum (*couvertures*) et caudae superiores et inferiores (bracalae Imperatori), postremae plumae gulae et reliquarum corporis partium. (p. 364.) Aves *Bengali* dictae pluries in anno colorem, non plumagium ipsum, mutare dicuntur; quod quidem fieri posse negat Cl. MAVDVYT (p. 525.) et narrationem de colore viuidiore facto interpretatur, quem etiam quavis aestate in aue *Troupiale* dicta et in cauea alta ex pallidiore accendi viuidumque magis fieri vidit. Loxiam Africanam nigram (*Bouveron noir*) per 18. menses domi altam plumas supinarum partium crispas prima mutatione exuere atque altera mutatione non resumere vidit. (p. 535.) Eandem auem in Guiana Americana plumis rectis, non crispis, reperiri testatur. Psittaci speciem aliquam (*Perroquet tapiré*) nondum adultam plumis dorsi et scapularibus spoliata inungunt sanguine ranae minutae caeruleae, per longitudinem corporis virgatae; quo factae plumae viridium loco flavae, rubrae aut mixto colore nascuntur, et quavis mutatione redeunt. Causam repetit doctissimus Gallus a mutatione telae cellulosae cutis et germinibus plumarum tam alte impressa, ut inunctionem repetere non sit opus. Aves *viduas* dictas domi altas bis in anno plumagium mutare vidit Cl. Gallus; vernalis quidem mutatio maribus colorem plumarum pulcriorem et pennas caudae longas addit, quas autumnalis mutatio pallidas reddit et prorsus adimit. Feminae senescentes maribus magis magisque similes efficiuntur; quod item accidere feminis phasianorum, cum ouare aut desierunt, aut pauca modo oua edunt, annotavit Cl. MAVDVYT p. 3. sub voce *Faisan*. Plumarum colorem tunc induunt eundem cum maribus, sed pallidiorem, et a venatoribus *Faisans coquars* appellantur. Eandem rem observare licet in feminis senescentibus phasiani aurei. Prioris speciei feminae cultro anatomico subiectae oviductus manifestos, ovaria vero aut plane nulla aut fere oblitterata monstrabant. In gallinis vulgaribus et pavonibus eandem ARISTOTELIS observationem et AVSONII, pluribus veterum et recentiorum, inprimis IOH. HVNTERI, testimonio confirmatam illustrare atque explicare conatus sum in Promptuario Lipsiensi Anni 1786, quibus exemplis nunc phasianorum feminarum, anatum quarundam et viduarum exempla accedunt. Denique in pelecano Americano CATESBY I. tab. 81. senectute caput et colli duae tertiae partes calvae membrana crassa teguntur, in iuventute vero plumis vestiuntur. (Sub voce *Couricaca*.)



## D E

PASTV AVIVM AQVATICARVM ET EGRESSV  
I N T E R R A M.

**A**nseres feri vesperi ex pastu fatorum pratorumque redeunt congregati ad aquas fluuiorum lacuumque vicinorum, vnde sub diluculum exeunt. Contra anatum genera vesperi demum aquis egressa fata et prata vicina depascuntur, per diem in aquis altis delitescunt, vt auctor est *BUFFON* T. XVII. p. 85. Idem deinde in anate boscade p. 191. repetit; quas capite inter alas abscondito aquis lacuum altis innatantes interdum vidisse ex longinquo testatur *HEBERTVS*. Eadem quoque noctu tantum migrant. Anas clangula, ferina et glauca (*Morillon*) victum in terra non capiunt, et, si quando mari egrediuntur, quod fit interdum, balneo arenarum litoris recreant et refocillant corpus plumasque humidas, vt auctor est *BAILLON* ibidem p. 323. Difficulter etiam anas nigra (*Macreuse*) in terra ambulat, pedesque in arena cum dolore excoriat. Eadem male volat; cuius rei rationem inde repetit *BAILLON* p. 340., quod ossa alarum contra anatum morem magis retro flexa, et femorum acetabula iuncturasque nimis propinquas habeat. Ex quo argumento suspicari licet, peluim in hoc genere angustam et femora in acetabulis propinqua sibi inuicem posita esse, vt in colymborum fulicarumque genere. Anseres feros noctu cum pullis in fata aquis vicina egredi, auctore *TAENTZERO* tradit *ZORN* *Petinotheol.* II. p. 406.

## D E

ALARVM STRUCTVRA ET PENNIS, CVM CAVDÆ  
PENNIS ET PLVMIS.

**L**egi nuperrime, quae de natura et historia auium post illustrem *BUFFONVM* scripsit vir egregius, *Cl. MAVDVYT*, in libro gallico, *Encyclopédie Méthodique*; et cum plura in eo repererim annotatione digna et ab aliis omissa praecepta, operae mihi pretium facturus esse videor, si obseruationes viri doctissimi eas, quibus aut disciplina Imperatoris emendari atque illustrari, aut obseruationes a me collectae et positae augeri, corrigi et confirmari possint, fideliter excerptas cum lectoribus communicauero. In Introductione igitur p. 347. ed. Paris. (exstat enim idem liber Patauii repetitus typis) suspicatur, canalem pennarum cartilagineum expandi posse, aërem receptum per vasorum lymphaticorum oscula barbae



bae seu pilositati pennarum insita emittere, atque ita respirationem auium adiuuare simul. Rationem suspicionis repetit ab insertione canalis maiorum pennarum, quarum radicem in ipsum perioostium penetrare asserit. Sed in hac insertione nihil viro doctissimo praesidii paratum esse videtur ad opinionem hanc tuendam; contra vero omnis aëri ingredi debet eadem plane via, qua succus nutritius cum sanguine infertur. Radix pennarum maiorum in latere nodulis osseis cubiti tendinibus fortissimis adstringitur.

Ala pollicaris Gallice *aile batarde*, aucupibus vero et venatoribus *fouet de l'aile* audit. (p. 355.) Hanc alulam cum ipso osse pollicari, cui adhaeret, sine periculo vitae et absque magno auis dolore aucupes abscindunt, ut libertatis ei adimant usum; posthaec enim breues tantum grauesque saltus edere, nullo vero modo ascendere aut aufugere possunt. Hunc effectum non ab alae superficie imminuta deriuat Gallus, sed ita explicat, ut dicat, alam tunc, cum eleuatur, aërem non amplius findere, sed remouere, et paulo post, cum deprimitur aërique inniti vult, vacuum pulsare spacium, quod ala antea eleuata fecerat, igitur frustra auem volatum conari.

De ala notha subaxillari, quam WILLUGHBY etiam, sed breuiter, annotauit, egregie tradit p. 386. Lorsque les ailes sont pliées, ces plumes sont couchées le long du corps, mais pendant le vol elles sont attirées vers l'aile par l'expansion de la peau, et elles forment une voile, qui prend le vent arriere. Car quand les oiseaux volent contre le vent, ces plumes cedent et se couchent aisément sans faire obstacle; au lieu que quand le vent souffle arriere, elles sont tellement attachées qu'elles resistent. Eadem in Introductione p. 351. ponit, ibidemque recte addit, plumas has easdem in auibus paradisi dictis longissimas omnium et pulcherrimas apparere; in ardea Gallis *aigrette* dicta easdem cum scapularibus ad mundum muliebrem quaeri. Denique in ardeis ciconiisque haec subaxillaris ala vna cum scapularibus pennis longis et pedibus retro protensis usum caudae breuissimae et fere nullius redimunt. (p. 353.)

Tectrices caudae superiores in auibus viduis dictis a Gallis tam longae crescunt, ut ipsam caudam contegant; in gallis vulgaribus iubarum instar recuruae eriguntur; in pauonibus longissimae gemmas inscriptas gerunt et in rotae modum expanduntur. (p. 351.)



## DE PERVNCTO.

In anate moschata, si glandulae peruncti statim post mortem auis exscindantur, nullum inde malum odorem in reliquam carnem diffundi, ipsamque auem lautissimas etiam epulas instruere posse, testatur Cl. MAVDVYT Encyclop. method. Ita reperimus, veram esse opinionem, quam de causa odoris moschati in hac aue posuit iam olim BARRERE, simulque videmus, quam similes sint effectui saltim glandulae hae peruncti suis Americanae glandulis dorsalibus, cum quibus olim etiam comparauit EDW. TYSON. Morbum peruncti, quem nos *Darre* appellamus, Galli *ciron* vocant. Eius naturam accurate explicuit, atque ex ea nouam melioremque vulgari medicinam deriuatam docuit Cl. MAVDVYT p. 426.

## DE

## MVSCVLIS ALARVM ET CAUDAЕ.

Quoniam de musculis quibusdam alae, imprimis istis, qui pollicem seu alam spuriam, empiniones FRIDERICO dictam, membranam anteriorem alae et pennas corales regunt, et caudae, praecipue eo, qui a femore oritur, et de numero etiam caudalium dubitari adhuc posse videbatur; et cum ortus eorum et finis alius mihi in auibus quibusdam occurreret, quam duumuiris clarissimis, qui myologiam auium exsecuti sunt: nolui omittere occasionem, quae tamen praeter expectationem rara se mihi per hoc ver et initium aestatis obtulit, accuratius eosdem musculos in aliis auium generibus inuestigandi. Quaecunque igitur diligenti inuestigatione alarum caudaeque musculorum in tringa vanello et columba gyratrice reperi, breuiter annotata huc referam.

Musculum eum, qui cutem cum coralibus insertis retrahit, dum ala extenditur, ad pectus, reperi ortum in processibus transuersis costae quartae et quintae (sunt autem omnino octo in tringa) infra musculum eum, qui scapulam deprimat, in eodem loco ortus, sed latior et extremae scapulae insertus. Hunc scapulae depressorem nominat Cl. MERREM p. 154. No. 12, sed processibus quartae costae (voluit sine dubio quintam etiam addere) adfigit. Retractor coralium etsi basin fere communem cum eo habere videtur, longitudine tamen et angusta forma facile ab eo distinguitur, et cuti coralibus subiecta manifesto inseritur ibique per omnem superficiem expanditur.

Mem-



Membranae alarum expansor magnus portionibus duabus magnis carnosus constat in margine superiore furculae ortis; deinde in tres tendines distinguitur eodem in loco, quorum medius latior bifurcatur, atque altera extremitate inferiore vna cum tendine tertio interiore partem tendinosam radialis longi, attractoris manus (apud Cl. MERREM p. 157. No. 5.) et tertii iuxta eum interius siti musculi portionem tendinosam atque adeo ipsum cubitum amplectitur. Accedit in latere alae interno portio musculosa anconaei externi (quem bicipitem dicere videtur Cl. VICQ D'AZYR) et porrigit tendinem quartum, qui inter externum et medium latiore decurrit, et deinde cum altera medii et bifurci tendinis extremitate radialem longum paulo antea amplectitur. Primus et externus tendo paulo supra finem crassiore inferitur lateri interno pollicis, itaque empiniones explicat et sursum vel ad pectus retro trahit.

Musculum crurococcygeum reperi in facie posteriore femoris ortum et inferiori caudae extremitati insertum. Sub mucrone ossis, quo os sacrum tegitur, et quod iuxta caudam longo procurrit acumine, in sinu ossis iliaci velut in trochlea suspensus caudam deprimit.

In columba gyratrice mare plumas omnes simplices, nullis dumis subtus latentibus, reperi; in iis, quae caudales pennas supra infraque proximae accedunt, cannulam a radice statim crassiore supra infraque conuexam, nullo in inferiore facie sulci vestigio exstante, aut leuissimo. Tertia cannulae pars superior iusto gracilior fit. Pennas caudae duodecim, forinfecas alae decem integras, non excisas in alterutro margine, sed in fine ad angulum acutum decisas, vannos quindecim numeravi; corales debiles et nullo ordine positas numerare vix licet; alae spuriae pennae sunt ternae. Ala notha subaxillaris transuersa paucioribus constabat pennis, quam in reliquis, quas eo consilio inspexi, auibus, ternis fere aut quaternis longioribus. Tibiales dictae longae et densae in latere postico femoris appositae supra tibiam dependent. Perunctum nudum absque penicillo conulo bifido eminet.

Tracheae et laryngis inferioris formam cum musculis paulo supra descripsi de vocis instrumentis. A parte inferiore et infima oesophagi fibram muscularem utrinque ad latera ingluuiei excurrentem et cutem colli alligantem vidi. Musculus scapulae depressor tertiae, quartae et quintae costae processus amplectitur, paulo latior et multum crassior eo musculo, qui in eodem loco, sed inferius, insertus cutem cum coralibus retrahit ad corpus. Dum vero musculum attractorem posticum brachii (MERREM p. 153. No. 7.) in vertebrae dorsalis secundae spina ortum rimor, aperte video, fibrillas quasdam eiusdem transuersas in cutem porrigi paulo supra finem musculi eius, qui corales magis retro ad corpus trahit,  
cum



cum fibrillae hae eandem cutem cum coralibus sursum magis retrahant. Praeterea video infra musculum hunc coraliū pennarum in eodem loco costis inferi fibras carneas multas a pectorali magno, vbi scilicet super sterni marginem eminet et ipsarum costarum fines tegit, quas a margine sterni ortas nullo modo dicere possis, vt qui infra oritur abdominis musculus oblique descendens. (MERREM p. 151. No. 2.) Eandem sine dubio musculi pectoralis magni structuram in aue eadem aut simili viderat V. C. VICQ D'AZYR; ille enim musculum hunc fibris suis costas etiam amplecti posuit; quod negabat in aquila sua fieri MERREM p. 152.

Humeri retractorem, quem in extrema dorsi vertebra oriri ait Cl. MERREM p. 153. No. 8., reperire non potui; videtur adeo cum musculo magno scapulae (MERREM p. 154. No. 13.) in vnum coaluisse et latissimi dorsi vicem gerere. Contra musculum rotundiusculum primae costae (spuriae) et secundae processui transuerso adhaerentem reperi, qui scapulae inferiores musculos transversos perforans adfigitur margini inferiori scapulae non longe ab eius articulatione cum humero et clauicula.

Quae varietas cum animum meum pungeret, meque dubium faceret, num oculis recte vsus essem, an aberrassem parte aliqua; coepi musculum eum, qui humerum attollit, quaerere. Hunc a iunctura clauiculae et scapulae ortum lateri anteriori humeri in medio inferi, humerum cum ala attollere et deltoidis vicem gerere, docet Cl. MERREM p. 154. No. 14. Verum in columba locum eius occupat tendo fortissimus capiti clauiculae et capiti minori recuruo humeri versus interiora insertus. Praeterea musculus pectorali magno subiectus in sterno tendinem fortissimum per cavitatem seu foramen in iunctura clauiculae et scapulae relictum inserit, extrorsum ad caput humeri reflectit et in latere superiori inserit. Tendo hic supergressus tendinem eum, quem paulo antea commemorauī, humerum cum ala fortissime attollit atque altissime. Post hunc et infra scapulae caput inseritur anconaeus magnus, qui in itinere humerum etiam amplexus et deum cubito adhaerescens simul etiam humerum cum cubito attollit.

Hanc columbae aut similis auis structuram contemplatus esse videtur FABRICIUS ab Aquap., cum de volatu p. 376. ista scriberet: „Musculus ille latissimus et maximus, qui in hominibus et caeteris ad humeri extensionem exterius in dorso positus est, interius in volatili fuit collocatus, et est illi subiectus, qui ad pectus brachium adducit, (*pectoralem magnum* intelligit), qui a me glossocommii musculus appellatur, quod, cum intus sit, vt alii flectentes, extendit tamen et humerum strenue, quia magnus est, attollit. Reflectitur enim ad humeri articulum eius tendo ab exterioribus ad anteriores partes, et ita praeter morem



„et consuetudinem caeterorum intus existens, extendit, sicut perpulchre anatome  
„commonstrat.“

Vides igitur, quam mira musculorum varietas in variis auium generibus plurimas atque accuratas anatomici observationes postulet, quo melius musculorum auium analogiam cum humanis indagare et volatus etiam diuersitatem explicare inde possimus. Nec statim, vbi quid in quibusdam auibus a vulgari more et scriptorum annotatione alienum reperimus, errorem arguere licet scriptoris; sed potius, vt eiusmodi dubitatio locum habere non possit, auium genus diligentius in posterum annotandum erit. Quis enim latissimum dorsi in pectore quaesiuerat? Atque ipse de fide FABRICII dubitaueram, donec in columba asseram eam vidi et miratus sum.

Qui membranam alae extendit in columba, partim a magno pectorali, partim sui generis portionem iuxta pectoralem magnum insertam habet, capiti humeri et clauiculae. Tendines hinc duo membranam percurrunt; alter in extremo margine decurrens iungitur demum cum tendine tertio a portione magna anconaei externi adscendente et distincta orto, et protuberantiae pollicari in facie interna adhaeret, partim vero musculus minutum carnosum amplectitur, qui a tendine radiali longi ortus pollicem regit.

Caudae musculos eodem numero, vt in reliquis, vidi, et crurococcygeum apertissime. Praeterea sub peruncto ad latus ossis terminalis vtrunque suis, vt videtur, musculis tectum, et inter superiores interiores caudae musculos latentia duo corpora fere cartilagineae aut tendinosae naturae reperi, oblonga, crassissima, quae dissecta flaua pinguedine plena apparebant, et vaginas pennarum caudae duodecim manifesto monstrabant. Sed harum partium accuratior inuestigatio alio pertinet.

Corneae marginem lamellis osseis compositum alii iam annotarunt. Membranam nictitantem, cum pro palpebra superiore datam auibus existimaret, columbis deesse asseruit ALDROVANDVS Ornithol. II. p. 116. Columbas enim vtraque palpebra oculum claudere ait. Nihilo tamen minus in columba mea et omnibus aliis, vt puto, adest manifesta. Nares mirum in modum tumidae protuberant in basi rostri propriumque generis totius signum exhibent. Sed male LINNAEVS eumque secuti alii nares oblongas membrana molli tumida semitectas, alii rostri carunculam tumidam appellarunt, cum sit membrana pituitaria varie conuoluta et angusto rostro protuberans; in latere tantum inferiore angusta rima aditum aëri dat.



Cognitionem columbacei generis cum gallinaceo multis argumentis docere conatus est Cl. HERMANN Comment. Tabul. Affinit. p. 208. 209. In sceleto etiam signa eius quaedam occurrunt, veluti rami laterales sterni, quos habet cum gallinis, tetraonibus et meleagride communes; sed alia a structura gallinaceorum plane aliena sunt, nec huc pertinent.

## D E

LARYNGE ET VOCIS INSTRUMENTIS  
IN AVIBVS.

**T**andem nactus legi egregii zootomi VICQ D'AZYR dissertationem de vocis instrumentis in variis animalium classibus, insertam Actis Academiae Parisinae anni 1779. p. 191. seqq. Vnde capita praecipua excerpta huc transferam, ut lectoribus constet, num me atque alios ciues meos operae poenitere debeat, quam in indagandis avium instrumentis vocalibus hucusque posuimus. De diversitate sexus in vocis instrumentis avium imprimis aquaticarum eminente nihil hucdum suspicatus esse aut inaudiuisse videtur vir egregius; quod inuentum nunc vindicandum esse video ingenio et solertiae coniunctissimi collegae BERNHARDI CHRISTIANI OTTO, qui vna cum fratribus vita iam defunctis genus omne avium aquaticarum diligenter scrutatus ante plus quam viginti annos hanc sexus differentiam reperit, eaque adiutus plurimas species accuratius distinxit, atque inuentum etiam egregium ex parte scripto publicavit, ante quam reliqui viri docti suspicati aliquid de eo erant, aut publice de eo admonuerant. Doctissimus igitur Gallus vniuersum avium genus in tres classes describit ex structura et forma vocis instrumentorum. Prima nodum laryngis in bifurcatione nudum absque ullo musculo; altera nodum musculo forti et plano tectum, vtraque ceterum tracheam rectam habet; tertia tracheam varie flexam et singulari structura auctam et variatam exhibet. Vulgarem nunc distinctionem in laryngem superiorem atque inferiorem avium recte reprobare videtur; eo igitur auctore potius dicendum, glottidem suam obtinere locum in superiore laryngis parte, contra reliquas partes, veluti ventriculos et ligamenta inferiora, esse ad inferiorem partem translocatas.



In auibus altifonis et raucis larynx inferior musculis caret. In auibus cantatricibus inferior larynx obtegitur musculi alicuius fibris fortissimis et densissimis (très ferrées), cuius in medio sulcus per longitudinem decurrit, et qui retrorsum in papillas duas terminatur minutas, veluti in luscinia, linaria (*linot*), cardueli (*chardonneret*), alauda, chloride (*verdier*), acanthide (*serin*). Contra in columba musculi duo laterales inter postremos annulos tracheae inferunt se membranis mobilibus, quae annulorum istorum interstitium explent. Partes singulas laryngis cum musculis pinxit etiam vir doctissimus, atque in explicatio-  
ne Figuræ 22. monet, ligamentum bronchiarum transuersum in auibus quibusdam magnis, velut in stellari ardea (*butor*), plane deesse. Huic obseruationi subiunxit aliam de vocis instrumentis ranae vulgaris et bufonis magni Americani ex vicinia fluminis Mississippi translatis. Vtriusque laryngem cum chordis vocalibus pictum dedit Fig. 40—44., mirumque merito accidit lectori, tam artificiosa laryngis structura quem usum in bufone fere muto habere possit. Vides igitur, nondum exhaustam ingenio doctissimi Anatomi Parisiensis esse omnem laudis materiam, et multa superesse structurae miracula indaganda in larynge auium. Praeter enim aues illas, quas recensuit Cl. Gallus, multae aliae tribus quatuorque musculis inferiorem laryngem firmatum et mobilem habent, quarum nomina et exempla antea posui. Vellem etiam communionem tracheae cum gula columbarum et ardeae virginis accurata viri anatomiae periti obseruatione confirmatam videre, quam in columba obiter memorat illustris BUFFONVS, clarius vero nuper Cl. MAVDVYT in Encyclop. Methodica, p. 329. Introductionis in Historiam Auium. Canalem ipsum, quo ingreditur aër, nondum quidem esse repertum ait; ipse tamen in pluribus etiam auium generibus eandem tracheae cum gula communionem locum habere suspicatur, cuius ope aër alimentis exsolutus digestionem exeat, idemque deinde tracheam ingressus corporis superficiem leuitatemque augeat in volando. Analogia vesicae pneumaticae piscium confidere videtur vir doctissimus; verum equidem nihil vspiam de hac communione traditum reperi, nec a PERRALTO annotatur tale quid in anatomia ardeae virginis; itaque intra suspicionem consistendum erit, dum anatomia certiora docuerit.

ARISTOTELES etsi in libris vulgatis de animalibus nihil de vocis instrumentis animalium auiumque priuatim tradidit, non ignorauit tamen miram tracheae laryngisque varietatem in auibus, vt apparet ex libro de Audibilibus, vbi accurate conatum gestumque auium vocem per longum et angustum canalem tracheae (bombycem ipse vocat) exprimentium obseruauit; atque idem auium quarundam tortuosas et varie inflexas sinubusque auctas tracheas vidisse videtur, quoniam arteriam asperam in quibusdam auibus diuersae latitudinis et sinubus auctam esse refert.



In columbo gyratore mare reperio basin laryngis inferioris, quae bifurcationi originem praebet, duobus annulis maioribus constantem, qui magno inter se relicto spatio vtrique membrana crassissima teguntur, cui inferitur vtrique musculus ultra duos suspensorios, quibus trachea sterno alligatur, paulum excurrentes in latere tracheae. Cum pons in basi bifurcationis desit, solennis alias in plurimis auibus, videtur membrana ista crassa interstitium internum tracheae ad bifurcationem claudere sibi vtrique applicata, atque aperire musculo sursum tracta. Denique musculus, qui ut plurimum latera vtrique tracheae legit et ad laryngem ab imo usque pertingit, in columba plane deest, eiusque locum brevis iste inferior membranae insertus tenere videtur.

## OBSERVATIONES OSTEOLÓGICAE.

In sceleto strigis bubonis, quod Berolini nuper inspexi, duo mihi memorabilia occurrerunt. Radius ubi iungitur carpo et metacarpo, in latere interiore appositum habet ossiculum satis forte, introrsum et retrorsum reflexum, veluti vncum. Praeterea radius in inferiore sui tertia parte finditur in fenestram angustam, uti solet metacarpus avium, in latere interiore virgula tenui ossea circumscriptam. Domum reuersus eandem radii fenestram in strigis aluconis sceleto agnoui, non item vncum osseum radio prope iuncturam in anteriore parte appositum.

In cranio falconis caerulei seu eius, quem St. Martini nomine vocauit illustris BUFFONVS, video, ossis lacrymalis parti superiori in orbita anterieus eminenti iunctum haerere os fere ouatum, tenue, a margine superiore orbitae remotum, nec cum ea, nisi media membrana aliqua, quae orbitam cingit, cohaerens, quale etiam nuper Berolini in sceleto aquilae alicuius vidi, ossi lacrymali arcte iunctum, orbitae vero margini ope membranae adhaerens, quanquam satis longe remotum. Hoc ossiculum superciliare esse puto, quod in aquila mea albicilla propius marginem superiorem orbitae positum nec cum osse lacrymali iunctum reperi.

In sceleto lari nostratis magni albi supra caput inferius humeri in latere eo, quod radium respicit, eminet dens magnus osseus super radium infra decurrentem deflexus, quem in situ suo tutari et reprimere videtur. Radius ipse sub dense paulum introrsum flexus conspicitur. In scolopace arquata maximum omni-



um dentem istum vidi. In reliquis auibus aut leue aut plane nullum eius vestigium exstat. In tringa vanello satis eminent, illique soli inferitur musculus tensor manus, externus simul et posticus Cl. MERREM p. 156. No. 2. dictus, qui ad metacarpi protuberantiam pollicarem pertingit. In aliis etiam auibus idem musculus eidem denti inferi videtur.

---

Pag. 124. post sermonem de CARCANI libro haec attexenda sunt. Posterior etiam huius libri editio exstare debet falconum designatione accurata aucta, quam in suum librum traduxit RAIMVNDVS, latinam vero fecit ALDROVANDVS. Comparationem horum locorum reperiēs, ubi de auium rapacium genere et differentiis dictum est.

---



## CORRIGENDA.

**H**orum indicium debeo humanissimo SCHAEFERO, qui paginarum a prelo madi-  
 darum emendandarum curam et taedium tam patienter tulit, precibus libra-  
 rii et amore litterarum motus. Meus quidem animus post exantlatam hanc  
 operam commentariorum et indicis ita abhorrebat a repetita paginarum singula-  
 rum et curiosa lectione, ut maximas nunc iuveni doctissimo pro cura tam sedulo  
 et solerter in alieno libro collocata gratias agam, propitiamque ingenio eius for-  
 tem Aesculapiique gratiam apprecer. Si quid praeterea peccatum fuerit, lectoris  
 intelligentis attentionem non morabitur illud, uti spero. Praeposterum differ-  
 tationum quarundam ordinem excusabit absentia auctoris; cui si currente calamo  
 saepe animus a recto verborum ordine aberrauerat, aut memoria vocabulum ali-  
 quod exciderat, id omne quicquid fuit vitii humanitas SCHAEFERI vel emenda-  
 uit, vel suppleuit. Illorum, de quibus dubitauerat, omnem mihi correctionem  
 permisit; quam ita habe L. B.

In Praefatione Tomi I. p. XII. linea 5. pro vocabulo cultum scribe notitiam.

In Commentariis T. II. p. 15. lin. 7. quouis fere, lege vere.

Pag. 23. lin. 24. excuato, l. excuata.

P. 33. lin. 4. ab infima pagina, verba *ut in psittacis* dele.

P. 36. lin. 15. pars, scribe paris.

P. 45. lin. 5. scribe: super ipsa metacarpi iunctura.

P. 46. lin. 15. ab infima pag. scribe: cellulofam telam.

P. 52. lin. 9. scribe: vereor ne.

P. 56. lin. 5. ab infim. pag. scribe: iisque caudam.

P. 64. lin. 20. pro cui scribe cur.

P. 67. lin. 1. scribe: scriptorum istorum.

P. 77. lin. 5. scribe: adhibeant.

P. 81. lin. 16. post interpretatus est adde THOMAS Cantimpratensis.

P. 83. lin. antepenult. scribe: testatur vidisse.

P. 84. lin. 7. pro velli scribe: velle.



P. 99. lin. 3. scribe: vt quadrupedum carnes.

P. 109. lin. 15. scribe plurima pro plurimum.

P. 112. lin. 10. post prolobum videor omisisse *oesophagum*.

P. 119. lin. 1. pro quinque scribe octo.

P. 177. lin. 10. legendum Fig. 9.

P. 183 lin. 10. verba: Palpebras vsque ad nomen LINNAEVS, retrahenda ad p. 182. et lin. 37. post vocem omiffae inferenda sunt.

P. 204. lin. 13. pro factae scribe facto.

P. 208. lin. 6. portionem tendinosam dele, vt superfluum.



Fig. 1.




Fig. 2.






Fig. 3.


















Fig. 7.




Fig. 8.




Fig. 10.








Fig. 9.




















Fig. 16.




Fig. 19.




Fig. 20.




Fig. 17.







Fig. 18.















I N D E X  
R E R V M E T V E R B O R V M  
Q V A E  
I N C O M M E N T A R I I S H I S  
E X P L I C A N T V R  
C V M N O T V L I S I N T E R S E R T I S.



I N D E X

RECAPITULATION OF THE

CONTENTS

IN CONNECTION WITH

THE

RECAPITULATION OF THE



# I N D E X

## R E R V M E T V E R B O R V M.

**A**bacistarum ars. 76. In notis non recte dixeram, eam numerandi artem per digitorum inflexionem inprimis intra monachorum claustra excultam fuisse. Vetus enim est ars, Graecis etiam et Romanis vetustis nota et in foro etiam ab oratoribus adhibita. Numeri ad centesimum sinistrae manus conformatione et inflexione digitorum indicantur, reliqui dextra. Artem ipsam solus tradidit BEDA de Indigitatione, seu loquela per gestum digitorum, T. II. p. 164. seqq. editionis Basil. 1562., vbi virorum doctorem annotationes antiquitatem artis ex scriptoribus graecis et latinis tradiderunt. Ex BEDA addam, quae ad locum Imperatoris p. 102. intelligendum faciunt. Modum, secundum quem abacistae tenent 70. cum manu, alium, quo ternarium numerum tenent, denique quo 73. tenent, commemorat augustus auctor; ii vero ex doctrina BEDAE tales fuerunt. Quum dicis tria, inquit BEDA, tertium digitum, id est impudicum seu medium, inflectens in medium palmae artum affleces. Quum dicis 70., indicem circumflexum pollicem immisso superimplebis, vngue duntaxat illius erecto trans medium indicis artum. Atque his duobus modis coniunctis efficitur numerus 73. Haec verbo indicasse sufficit; plura qui de arte hodie incognita desiderat, adeat librum BEDAE.

Aëris raritas in monte Olympo. 82.

Aëriphilus falco. 89. 90. IOANNES Sarisberienfis l. p. 41. alarionem aquilarum speciem potentissimam appellat.

Aëtites lapis in aquilis ortus. 115.

Airones, Ayrones, id est Ardeae. 4. mares cristam habent 16. rostrum 22. digitus posticus 27. marium in ardea bifa color tempore coitus 40. quomodo se defendunt? 61. 118. species 61. coitus ibid.

Αἰσάλων. 66.

Αἰτῶλιος, αἰγῶλιος. 68.

Alarum ossa 24. structura omnis enarrata cum pennis plumisque. 42—52. 113. ala spuria quot pennis composita, vsus 54. 55. 206. ala subaxillaris seu notha 48. 49. 51. 206. differentia in falconibus et asturibus 113. 132. seqq.

Alauda. Ab Italico *Lodola* dicitur *laudola* apud MICHAELEM SCOTVM de Phision. cap. 20. et cristam habet.

Albanus quae auis? 58.

Albus falco 192.

Aletes, Alethes, falcones americani 110. mores 118. ex Africa septentrionali oriundus. 142.

Alphanet, seu barbaricus falco 109.

Anabula, animal. 80.

Anates campestres, *canards des près*. Otis tetrax 8. Anates de Pharaone. 15. Anas nigra quomodo pedes positos habet? 205.

Anchae, *anches*. 25.

Anonymi liber de naturis rerum, quem VINCENTIVS excerpfit, existat manuscriptus in bibliotheca Parisiensi. 103.

Anserum genera, victus, mores, migratio 5. 13. species 12. rostrum 22. anserum species cadaueribus victitans. 64. MICHAEL SCOTVS de Phisionomia cap. 20.: quaedam habent dentes in ore — quaedam scripaturam et non dentes, ut anser.



- Antenere, Antannaire, Antenido, Antevere, falco quando audit? 109.  
 Apodes hirundines. 6.  
 Aprones aues quae? 12.  
 Aquilae piscatrices, earum pedes 29. 65. albicillae descriptio et dissectio 48. aquila germana ARISTOTELIS definitur 69. melius volant aëre ventoso 116. serpentes impetit 118. a falconibus quomodo differant. 179.  
 Aquilae epistola ad PTOL. 103.  
 Ardea. Vide Airones.  
 Aristotelis versiones veteres. 81.  
 Armus, os humeri. 23.  
 Arteria aspera auium. 36.  
 Artus inferiores aquaticarum auium citius perficiuntur. 28.  
 Ἀσπίλας aquila. 92.  
 Astur, Austur, an ex graeco ἀσπίλας? 66. fauri et mutati colores 72. mores. 116.  
 Atricapilla muscicapa eadem cum motacilla ficedula. 40.  
 Auditus instrumenta in auibus. 172. 173.  
 Aues aquaticae palmipedes breues pedes et collum longum habent; palustres longis sunt pedibus 3. migrant 13. oua albuminis an vitelli plus habeant? 71. egressus ex aquis ad cibum 122. 205. quibus notis a quadrupedibus atque a se inuicem generatim differant? 144. seqq.  
 Aues de paradiso geminae. 60.  
 Auium rapacium feminae cur maiores? 64. quo diei tempore venari soleant? 68. 111. potus 77. adulteria 96. 110. septentrionales piscibus et aquatilibus viuere magis putantur 96. 99. victus, vomitus, ventriculus, succi gastrici natura. 97. 98. cor auium an edant? 99. coitus, pullificatio, educatio. 114. differentia ex forma alarum et volatu. 132. seqq. totius familiae differentiae et characteres 179. seqq. 201. mansuefactio et educatio ibidem.  
 Auriphrygius auis quae? 29.
- B.
- Baburni, Babuyni, Baboyni, Babewyni, simiae genus. 87.  
 Balarin, falco. 117. 118.  
 Barbates, Barthlathes, Baumgans, Bomgans. 4.  
 Bernecelae, Bernechae, Bernichae, Bernacae, Barnaces, Berniclae, Berneftae, anseres. 4. Barnetae, fabulae de iis origo 86.  
 Bernardi Syluestris Microcosmus. 83.  
 Beuer, castor. 83.  
 Bibio, genus insecti alatum. 82. MICHAELI SCOTO de Phisionomia cap. 21. musca, bubio.  
 Bifi airones, bifus color. 40. 124.  
 Bistarda, Otis. 8.  
 Bittorfus. 131. De colore pedum simili pedibus ardeae stellaris (*biter* Gallis) suspicatus sum; quam coniecturam video confirmari loco ALDROVANDI VII. libro p. 462., vbi ex falconariis refert, peregrini falconis pedes habere colorem eundem, quem pedes ardeae stellaris seu botauri, nempe inter flauum et plumbeum ambigentem, seu pallide virescentem, et ad caeruleum non nihil vergentem.  
 Blaufus. 95.  
 Bleneftae, anseres. 4.  
 Bracalae, i. e. vropygii plumae inferiores. 55.  
 Broboxen, auis. 196.  
 Bruchus. 10 H. Sarisber. VI. p. 332.: quod ex locusta nascitur bruchus, qui ita vocatur, quousque alas habeat. Exinde succrescentibus alis cum coeperit volitare, vocatur athelebus (attelabus), cum enim plenissime volare poterit, efficitur locusta.  
 Brumestae, vuae. 86.  
 Bubonum pedes 42. quomodo a falcone capiuntur. 116.  
 Bucerotis duae species 17. cornu eiusque vsus. 36.  
 Buse, Busio, Busaar de buteone. 196.  
 Butorius ALBERTO pro buteone; et *butharius*. 94. 95. Alibi pro ardea stellari dicitur 99. et supra in Bittorfus. Forte de hac aue est locus IOANNIS Sarisberienfis I. p. 43.: regulus quoque ipse, qui et bitriscus dicitur, vera quandoque portendere non dedignatur. Nam de trochilo



chilo regulo sermo ibi non est. Forte est bitriscus vetus britannicum vocabulum.

## C.

**C**alandra. 32.

Cameli solipedes. 162.

Camusius, Camoccia, Camuzzum, Chamois. 84.

Canna, Cannula, Canalis, cartilagineus pennarum plumarumque. 52.

Cantalenae, pro cantharidibus. 87.

Canthari tinctorii Indici AELIANI qui? 163.

Cantharidum usus in canis rabidi morfu antiquus. 87.

Canthus oculorum. 18.

Caprae solipedes. 162. Caprarum mammae in pectore. 169.

Capus, pro falcone. 122.

Carbonerae anseres. 12.

Cardilli, Carduelli i. e. Cardueles. 12.

Carpi ossa in ala anium. 44.

Catalanica versio epistolae AQVILAE, SYMMACHI et THEODOTIONIS ad PTOLEMAEVM qua aetate facta? 103.

Catreus, auis quae? 168.

Caudae pennae quot, quo ordine posita? 55. musculi enarrati 55. 56. 57. tredecim et quatuordecim quibus? 116. 119. cauda an gubernet volatum? 134. caudae testrices. 206.

Cauilia. 77. MICHAEL SCOTVS de Phisicis, c. 92. cauculae pedum.

Cauitas gularis ardearum et vulturum dumis testata. 41.

Celsa, seu ficus fatua. 102.

Cera in rostro anium. 71.

Cercean, penna. 53.

Charadrius oedienemus quomodo currit? 3.

Cibi falconum salubres et noxii. 98. 99. 109. 120. 202.

Ciconia alba et nigra 3. nigrae cibandi modus 4. media ciconia 11. pudicitia 36.

Ciconia aquis extracta. 83. Alia exempla posuit BVFFON XIII. p. 385.

Cilia in palpebris anium 19. 163. saepe pro superciliis.

Cinni i. e. cycni 2. cibus et rostrum 4. duplex species. 15. 16. Nuperrime demum comparato utroque cycno intellexi, rostro etiam non solum minore sed etiam aliter figurato differre. De qua re alibi tradam.

Circellae, *Cercelles*, anates. 4.

Cisimus, Sismus, Citillus. 83.

Ciueta, Ciuetator. 89.

Clauculae anium. 23.

Coccygis ossa in auiibus. 57.

Cochalis, Conchilis. Vide infra in *grotto*.

Cofani Apulis Onocretali. 2.

Coloris mutatio in auiibus 40. tempore coitus in sparuerio 120. 123. in aliis. 154. Color iridis, remigum et rectricum etiam variat cum aetate 155. rubeus et albus falconum vnde? 200.

Colubri natricis cranium et maxillae duplices superiores picta. 177. 178. Qui nuper serpentum notas definire voluit WERGEL in scriptis societ. Hallensis T. I. p. 29., annotauit, natricis huius cranium a MEYERO tab. 90. pictum ostendere acutas palati carinas geminas, serpentibus omnibus communes. Sed maxillas duplices denticulatas, si vnquam is vidit in sceletto, carinas inepte admodum dixit.

Columborum genus, rostro croceo 12. de Syria cum aliis 59. columba ciliata 116. volatus 138. anatomia. 208. seqq.

Cooperculae, coopertoriae, caudae pennae quae? 55.

Cor duplex falconum et perdicum. 200.

Corales pennae quae, quot? 42. 53.

*Coriens*, rana. 84.

Corlini, *Corlicux*. 11. 23. Scolopax arquata, phaeopus. 84.

Cornelli, i. e. Cornices. 23.

Cornicis variae migratio. 13.

Cerui marini, *cormorans* 2. mansuesacti ad piscandum 118.

Costa pennarum, alias rhachis. 38.

Coturnicum inter volandum vox vnde? 12. alia fabula de volatu 84. mores et venatio. 121.

Coyardi. 32.

Cozardi, cuzardi. 32.

Ee 3

Cranii



Cranii auium forma, futurae, ossa. 15. In explicatione tabularum. p. 171. 172. Cranium cornigerorum cavitatibus spongiosis plenum. 167. Tetricis, aquilae albicillae aliorumque crania. 172. 173.

Crassantius, rubeta. 84.

Cruppon, *croupion*. 32.

Cruris positio. 28.

Cuconiones, cucuriones, ranae. 84.

Cultelli, *couteaux*, curtelli, pennae quae, quot? 42.

Curelius, curlegius, Corlinus. 84.

Cyanopus falco. 196.

Cygnus. Vide Cinni.

## D.

**D**endrofalconis mores. 118.

Dens rostri falconibus quibus? 134. vsus in praedando. 141.

Diaphragma auium. 37.

Digitus in ala auium tres. 24. indicis prima phalanx qua forma? 27. digitorum pedis forma, positio, vsus 29. versatiles quarundam auium ibid. phalanges earumque numerus 31. digitus minimus eiusque musculi 47. digitus indicis phalanges quot? 53. digitorum differentia in rapacibus 141. quini auium quarundam. 162.

Diomedae aues quae? 159. 160.

*Δρεπανίς* hirundo quae? 6. ALBERTO MAGNO p. 234. a. audit dryacha.

Dumae, *duvet* 38. falconibus desunt, aquilis densissimae. earum vsus 39. 111. 116. varietas 41. dumis ala interna tegitur in rapacibus, 42. 49.

## E.

**E***χίνος*, pellicula in ventriculo auium et ratti moschati. 167.

Educatio pullorum auium rapacium. 73.

*Ἐλάνη* in naribus falconum, hinc *ἐλαμοφόρος* falco. 71.

Elephanti sinus frontales immensi in cranio cum auium sinibus comparati. 173.

Empiniones, *empennes*, id est, ala spuria, quot pennis composita, vsus. 54. 55.

Engelbertus de naturis rerum. 81.

*Ἐπάργεμος* ossifraga. 93.

Epiglottis auibus nulla. 33.

Epistola SYMMACHI, AQUILAE et THEODOTIONIS ad PTOLEMAEVM, quo sermone et qua aetate scripta? 103. Exocoetus piscis quis? 165.

## F.

**F**acha, Facheta, Fakecha, Fatga, Fassa, columba. 8.

Fagiani, Italis Fagiano, Fasiani, aures seu cornicula. 16. Fasiani seminae senes maribus similes fiunt. 204.

Falco torquatus SONNERATI. 202.

Falconum in rostro dens 22. 141. quomodo ab aquilis differant. 179. 180. generis totius notae 197. seqq.

Falconariae artis scriptores recensentur 106. seqq. 201. seqq. antiquitas 122. artis vocabula germanica, gallica, italica. 126-131.

Falquet, eius mores. 118.

Famis signa in pennis, Hungermal. 72.

Feminae auium rapacium cur maiores et fortiores? 64. Ita IOHANNES Sarisburiensis de Nugis Curialium I. p. 13., deterior, inquit, sexus in auium venatione potior est. Feminae multarum auium senescentes maribus fiunt similes 204.

Femoris positio. 28.

Fibula auium. 27.

Ficedula eadem cum atricapilla. 40.

*Filandres*. Vide Vermes.

Foraminis magni occipitalis situs in auibus. 176.

Franquillini, *Francolini*. 7. 8.

Fridericus II. multa peregrina animalia publice monstravit 80.

Frogellus, fragellus, falco qui? 73.

Frontales sinus auium. 172.

Fulica, quomodo currunt in terra? 3.

Furcula, os auium 23. varietas 27. aquilarum 50. utilitas. 112.

Fureti, Gallice, *Furets*. I. Furones, Furunculi, pro felibus. ibid.

## G.

**G**aia, Gaius, pica et picus. 59.

Galeranus, vulturum nomen 14.

Gallandia an Groenlandia? 67. 88. Clarissimus vir, FORSTER, in secundis literis admo-



- admonuit me, in BARTHOLOMAEO Galaciam esse Holfatiam, contra Winlandiam factam esse ex nomine Wendenland, Wendland, eoque intelligi Pomeraniam et Ducatum Meckelnburgensem.
- Gallina de India. 17.
- Ganta, anser. 12.
- Garamantides aues, forte Meleagrides. 163.
- Gemse. 84.
- Genitales partes auium. 37.
- Gentilis falconis notae. 189. 190. 191. Vide etiam Peregrinus.
- Gervasii otia imperialia excerpta, cum iudicio. 82. seqq.
- Gibbosus falco. 94. 192.
- Gimus, gimetta, bubo. 89.
- Gosturdi. 32.
- Gragans, Graugans. 5.
- Grancus* cum cimice post piscem et cancrum nominatur apud MICHAELEM SCOTVM de Phision. cap. 21. Videtur cancri vel astaci species intelligi, et nomen Italicum esse.
- Grotto, Grotto molinaro, idem Volimarus, Volmarus. 21. Apud MICHAELEM SCOTVM de Phision. cap. 20.: quanto plus avis est volatrix et eadem maioris volatus in altum, tanto plus est aëreae naturae et propinquans aqui (aui?) ex aqua, ut patet de aquila, falcone, grotto et de conchili. Vbi quae *conchilis* dicitur, cap. 21. *cobalis* est. Omne, inquit, animal longorum crurum est longi colli, ut grues, ciconiae, *cobales*. GESNER p. 761. Italicum nomen *Coballi* aliunde allatum de larorum genere interpretatur.
- Gruum genera 3. duces. 12. In grue americana tres tracheae anfractus observavit DV VERNEY in DV HAMEL Historia Acad. Paris. p. 253. ed. secund.
- γυπαετός, quae vulturum species? 15.
- Gyrfalco, quis, unde dictus? 91. an ad falcones pertineat? 109. notae 110. descriptio. 186. 187.
- H.
- Hagard qui falco? 109.
- Haliaeetus aquila et falco quomodo differant? 180.
- Herinacei testiculi an coitus tempore ex abdomine descendant? 168.
- Herodius, aquila. 91. 92.
- Hirundo apus, riparia, rupestris. 6. 7.
- Huanus, avis quae? 19. 58.
- Hungermal, signa famis in pennis. 72. 101.
- Hut, Huter, serpens. 101.
- I.
- Iancae, Iantabes, anseres. 12.
- Iayus avis. 59.
- ἱερῶν genera Aristotelica illustrata. 66. 67.
- Inguinales sinus sebacei plerisque animalibus ruminantibus communes. 170.
- Intestinis caecis an mares auium rapacium careant? 64.
- K.
- Καταβάτης avis quae? 159.
- Κατώβλεψ animal quadrupes. 165.
- κεγχρίς, κεγχρηής 70. miliaria etiam est. 167.
- Κέπρος avis quae? 161.
- Kyche, Kyke, Kikes, Kytes pro κίσα. 59.
- L.
- Lacrimalia puncta et ductus 35. sinus quadrupedum. 36.
- Lacus Iohannis circa Neapolin. 83.
- Lagopus aurita pro noctua 28. lagopodis tetraonis pedes lanati 42.
- Lanarii, Laynerii, falcones 95. an ad falcones pertineant? 109. duplex genus. 192. seqq.
- Laniorum nomina et mores. 124.
- Lanulae, alias dumae, *duvet*. 38.
- Larynx auium superior et inferior; eius musculi. 33. 34. forma varia. 211. 212.
- Lauzani, quadrupes 2. idem animal ab Alemannis et Gallis *Leunzam*, ab Arabibus *Alphec* appellari, ait ALBERTVS p. 213. a.
- Leopardi. 1.
- Ligorius cum leone, vrsu, dracone et cane inter animalia fortia et audacia nominatur apud MICHAELEM SCOTVM cap. 20., vbi CANGIVS *Licorne* interpretatur, CHARPENTIER *Ligornis* legendum censet.
- Linci, Lincae, quadrupedes. 1.
- Lingua auium quarundam brevis. 34.
- Liuercini, aues. 2.
- Loni,



Loni, Lofs, Lozzi, fera Bohemica. 85.  
 Loxia africana plumas crispas rectis mutat  
 extra patriam. 204.  
 Lumbrici falconum, filandres. 110. 119.  
 Vide Vermes.

## M.

**M**adrinus, madré. 109.  
 Maimo, Mammo, finiae genus. 87.  
 Mammonetus. ibid.  
 Maleclum pro malleolum. 63.  
 Maluitii, *Mauvis*, i. e. turdi. 12.  
 Marcolf auis. 59.  
 Maris profunditas veteribus explorata. 165.  
 Maxilla superior auium mobilis 20. serpen-  
 tum duplex, auium inferior composita. 177.  
 Μαζνοί, μαζανοί pisces, iidem, qui μυζνοί.  
 165.  
 Medulla spinalis auium 33. in ossibus quibus-  
 dam deesse, monuit iam MICHAEL SCO-  
 TVS Phislon. c. 21.: omne animal vola-  
 tile et natans caret medulla multa in ossi-  
 bus et habet corium in ossibus, vt anser  
 respectu gallinae.  
 Meleagridis cornu et cranium. 15. 17. no-  
 mina et patria. 163.  
 Membrana niētītans auium. 19. Columbīs  
 an desit? 210.  
 Mergorum modi. 2. 16. 17.  
 Meruli, i. e. merulae. 12.  
 Metatarsus auium. 27. 28. 31.  
 Michael Scotus, eius versio librorum ARI-  
 STOTELIS 80. liber de animalibus. 81.  
 Miliones, Gallis Milans. 79.  
 Montanus, montanarius falco. 93. 183.  
 187. 188.  
 Morfex, i. e. pelecus carbo. 22.  
 Muscetus, Muschetus, Muscardus, Mouchet,  
 Nisus mas. 72. 73.  
 Muscicapa pro caprimulgo. 59.  
 Musculi laryngis 33. 34. alarum omnes  
 enarrati et descripti 44. seqq. 207. caudae  
 similiter. 55. 56. 207. Musculi epidermi-  
 dis plumarumque insertarum. 175. Vi-  
 de Plumae.  
 Mutatio pennarum quae, qualis, quo tem-  
 pore? 62. Muta etiam dicitur, *Mue* Gal-  
 lis, μστεύειν, μστάτος Graecobarbaris. Mu-  
 ta etiam domuncula mutatoria 63. muta-

tione maculae oblongae fiunt transuersae  
 in falconibus 72. mutati colores 109. mu-  
 tationum variarum nomina. ibid. mu-  
 tandi tempora varia vnde? 110. mutan-  
 tes interim venantur, et quidam fere nul-  
 las pennas mutant 117. mutationis ordo  
 explicatur in aquaticis et terrestribus 151.  
 seqq. duplex multarum auium, eiusque  
 causa. 203. seqq.

## N.

**N**ares vulturum 11. reliquarum auium 19.  
 20. columbarum quales. 210.  
 Nerui dorsales auium 33. optici caui. 112.  
 Nigri falcones. 94. 183.  
 Nisus mas et femina 72. 73. quomodo pul-  
 los educat? 73.  
 Noctuarum pedes 42. qua in re a buboni-  
 bus differant. ibid.  
 Νυκτερίς, hirundo quae? 6.

## O.

**O**culorum color in falconibus diuersus  
 18. 19. 134. 142. propria structura 19.  
 nubecula in aquilis duabus. 93. Bursam  
 FERRALTI accuratius deinde pinxit et  
 descripsit DE LA HIRE in DV HAMEL  
 Histor. Acad. Paris. p. 507.  
 Oesophagus auium 37. rapacium. 78.  
 Omoplatæ auium. 23.  
 Onager in Polonia. 85.  
 Orastus, Orastus, camelopardalis. 80.  
 Osina, i. e. Pelicanus. 21.  
 Ossa iliaca, pubis 25. superciliare aquilarum  
 27. os hyoides 35. 174. lacrimale 36. sesa-  
 moidea duo in auibus 45. ossium pubis  
 vsus. 113. Os maxillare commune, sin-  
 gularis situs eius in scolopace. 176. Oste-  
 ologicae obseruationes auium. 213.  
 Ossifraga aquila 3. ἐπάργεμος. 93.  
 Otidium genera 8. 9. mores et victus ibid.  
 et 16. quomodo a falcone occiditur? 111.  
 Otidis tetricis mores. 116.  
 Oua rapaces aues quot pariant? 68. 109.  
 aquaticarum an plus vitelli habeant? 71.  
 148. subuentanea nisi. 73. Quorum ra-  
 tione quomodo aues differant? 148.



## P:

**P**alatium eiusque foramina. 35.  
 Palleol, de auro. 85.  
 Palpebrarum motus in auibus. 17.  
 Papagabio, i. e. psittacus, unde? 34.  
 Papilio ex aqua natus. 82.  
 Paradiso, de, aues quae? 60.  
 Passer indicus seu solitarius. 101.  
 Pauonis vertebrae caudae. 57.  
 Pediculi falconibus infesti quot? 111.  
 Pedum differentia in aquaticis et palustribus auibus 3. color caeruleus unde in falconibus? 111.  
 Pelicani. 21. Carbonis cranium 22. digiti 29.  
 Peluis auium. 25.  
 Pennae alarum, quot, quales, quo ordine positaе. 42. seqq. nomina graeca 51. incrementum et nutrimentum 54. caudae pennae quot, quo ordine positaе? 55. alarum et caudae pennarum natura et usus. 205. seqq.  
 Perdix rubra, cinerea, rustica 7. 8. perdicum genera et mores. 115. 121.  
 Peregrinus falco quando audit? 109. 119. 120. quis sit? 183. seqq.  
 Peruncti forma, usus et morbi 25. 26. 113. 207. penicillus quibus additus est auibus? 58. 79. Vrogalli perunctum pictum 175.  
 Pes blaus, falco. 95.  
 ΠΕΤΡΟΧΕΛΙΔΟΝΕΣ, hirundines quae? 6.  
 Picae aquaticae. 4.  
 Picorum caudales vertebrae 57. pennae. 58.  
 Lingua. Cum auctores a me laudati in linguae structura describenda tam longe a se inuicem abeant, suspicor, in vnaquaque specie naturam paulum variasse musculorum reliquarumque partium structuram, atque hinc ortum virorum doctorum dissensum esse. Trochilorum linguam eodem modo ut in picis constructam esse et retractilem, uti suspicatus erat illustris BVFFON, ex skeleti inspectione confirmat Cl. MAVDVYT in Encyclop., sub vocabulo *Oiseau mouche*, p. 265.  
 Frider. Rel. Tom. II.

Pili iuniorum auium inter pilos lanulasque medi, *poil folet*. 38.  
 Pisciculus Indicus, *Porko*, in ficcum egrediens. 166.  
 Platalea cuius generis? 61.  
 Pluerii, *Pluvers*. 2.  
 Plumae inter squamas pedum falconum 28. earum differentia a pennis dumisque, et forma 38. duplices 39. 49. in quincuncem positaе 39. costa qualis? 49. Plumae quomodo in cute per quincuncem positaе haerent? 175. Eandem structuram auctore MERY ita descriptam reperio a DV HAMEL in Historia Academ. Paris. p. 302. ex Pelicano Onocrotalo: In Actis copiose exponuntur, quae anno 1692. sunt observata circa plumarum radices et fibras earum motrices in formam hexagonam sic dispositas, ut in centro tubus ipse aut calami basis collocetur ac fibrae ipsae in membranam sub pelle positam definant, atque omnes cellulae hexagonae per foraminula in membranis conspicua inter se communicent, adeo ut hi parui muscoli seu fibrae in varias partes pellem ipsam inflectant. Cum autem molles plumulae in ea membrana, quae inter pellem et eos musculos est interiecta, seu in ipsa pelle suas habeant fibrillas motrices, ab iis quoque pellem moveri satis est verisimile. Membranam hanc (seu telam cellulofam) subit aer ex thorace sub axilla in Pelicano Onocrotalo, ut ibidem MERY docet. — Quo ordine in pullis crescunt? 203. Plumae colore tinetae vario crescunt artificio 204. crispae loxiae africanae ibid.  
 Pluvialium mores et venatio. 121.  
 Pollex in ala auium. 24.  
 Porfirae avis nares. 19.  
 Prouinciae gallicae aues multae vernaculis nominibus designatae. 117.  
 Psittacus albus 16. maxillam superiorem mouent. 20. viridis, albus, galgulus. 34.  
 ΠΡΕΡΥΣ, avis rapax. 66.  
 Pulli auium caeci qui? 41. 150. lanulis seu floccis testi. 41.



Pulmones auium diuisi. 37.  
Pupillae contractio et dilatatio in auibus 17.  
differentia in auibus rapacibus. 73. 112

## Q.

**Q**uistula, Quisquilla, Quiscula, Quaqui-  
lia, Qualia, *caille*, coturnix. 84.

## R.

**R**alli terrestres et aquatici. 3. 8.  
Recocta 70. Ex lactis ouilli sero cocto  
faciunt Galli caseum vilem, *recuite* di-  
ctum. Mémoires d'Agriculture, année  
1787. Semestre de Printemps, p. 102.

Renes auium 37. aquilae albicillae. 50.

Respiratio auium ita fit, ut inspirato aëre  
sternum a vertebra recedat, pectus dila-  
tetur, et costae sursum eleuatae a se in-  
uicem recedant; expiratione autem ab-  
domen extrorsum intumescit, costae sibi  
propiores et sternum vicinius fit verte-  
bris, sternum deprimitur, et in Pelicano  
Onocrotalo tum aër sub axilla intrat te-  
lam cellulofam inter pellem et musculos  
fitam totumque corpus miro modo inflat.  
Haec in anseri et Peleceno docuit ME-  
RY. Cf. DV HAMEL Histor. Acad. Pa-  
ris. p. 271. et 303.

Roserae, anseres. 12.

Rubeus falco. 195.

Rupes mobilis. 83.

Rustica, Rusticula, perdix quae? 7. 8.

Ruxa. Apud MICHAELEM SCOTVM de  
Phision. cap. 21. serpens, ruxa, lumbricus  
et vermis terrestris gula et pedibus care-  
re dicuntur. Quod animal sit, nescio;  
nec illud nomen in Glossariis reperio an-  
notatum.

## S.

**S**acer falco, unde dictus? 90. an ad falco-  
nes pertineat? 109. eius notae 109. de-  
scriptio 185. seqq. Aegyptiacus est vultur.  
185.

Sahins, falcones qui? 70. 94. 118.

Sal et carnes falsae falconibus nocent. 98.  
110.

Saxellus, penna alae quae, unde? 53.

Scalvern, Scalucher, Schalucher, Scholu-  
cher, Scholver, Schulver, Schollebaar.  
22.

Skeleton auium rapacium explicatur. 112.

Scolopacis rusticolae mores. 121.

Scolopacis rotundum cranium, eiusque for-  
ma et structura singularis explicatur in  
Interpretatione tabulae VI. 176. Scolo-  
pax rubra CATESBY I. tab. 84. in vina-  
rio Ducis Auriaci panis particulas rostro  
acceptas sursum iactabat et faucibus inci-  
dentes excipiebat, teste Cl. MAVDV-  
YT in Encyclopaedia methodica, sub vo-  
ce *Courlis rouge*.

Scriptores artis falconariae recensentur.  
106. seqq.

Scurulus. Sciurus. 84.

Seculi XIII. eruditio. 81.

Seleucis auis. 169.

Seraph, Serater, camelopardalis. 80.

Serpens bipes; alius alatus. 169.

Sinus inguinales. Vide Inguin. Fronta-  
les, sphenoidales, spongiosi cranii. 172.

Slige, Schleye. 101.

Smeriliones, Emerillons, Mirle, Smirlin.  
65.

Spatulae auium. 23.

Speriolus, asperiolus, sciurus. 84.

Speruerius, Sparuarius. Epervier, unde  
dictus? 72.

Sphenoidales sinus auium. 172.

Sterna, perdix 7. 124.

Sterni structura et forma 26. varietas in fal-  
cone et accipitre 112. sterni crista  
Gallis *le bréchet* audit, auctore MAV-  
DVYT in Encyclop. p. 326.

Strigis aluconis descriptio et sectio. 50.

Strigum pennae plumaeque molliores. 52.

Struthiocameli structura passim annotatur.

In sclerotica duplicem membranam,  
opacam alteram, alteram pellucidam vi-  
dit MERY. Opacae parti musculus vnus  
membranae nictitantis et tertius palpe-  
brae



brae superioris adhaeret. DV HAMEL  
Histor. Academ. p. 259.

Sturnelli, *Etourneaux*. 7. sturnorum mores  
et volatus. 10. 11.

Subcoxalia. 41.

Superanicus falco. 73.

Supercilia falconum eminentia. 92. os su-  
perciliare. 93. 112.

Symmachi epistola ad PTOLEMAEVM.  
103.

Syrena, auis 7. 8. 117. In Prouincia Gal-  
lica Merops apiafter *Serene* dicitur. Hic  
cum insectis viclitet, intelligi vbique vi-  
detur ab Imperatore sub nomine Sy-  
renae.

## T.

Tagarot, falco. 110.

Talus falconum, digitus posticus 28.  
quomodo feriant talo? 141.

Tanir, Thamur, vermiculus Iudaeis dictus.  
86.

Targula, auis. 60.

Tauri aethiopici Agatharchidis qui? 169.

Telephus Grammaticus. 166.

Tertiolus, triciolus, auis. 65.

Testudo, limax. 100.

Tetraonis tetricis trachea. 177.

Theodotionis epistola ad PTOLEM. 103.

Thomas Cantimpratensis de naturis re-  
rum. 81.

Tibiales plumae. 41.

Tinea, tincha, piscis. 101.

Trachea auium arteria 36. vrogalli picta.  
174.

Tuba Eustachiana auium. 36. 172. 173.

Tunetanus falco. 191.

## V.

Vanelli, *Vanneaux*. 2.

Vanni, *Vanneaux*, remiges secunda-  
riae, numero plures, et variant. 51.  
Video, virum doctum, Cl. WALBAVM,  
in pluribus auium descriptionibus di-  
xisse *Schwingfedern* pro vannis, et  
*Schlagfedern* pro forinsecis et cultellis;  
recte quidem is; sed praeterea in laro,

exempli causa, cubiti vannos 6. distin-  
guit, quas remiges tertianas, et brachii  
superioris vannos sex, quas remiges  
quartanas appellat, et velo seu plicae po-  
steriori inter cubitum et scapulam vna  
cum scapularibus infixas esse ait. Verum  
equidem non approbo nomina pennarum  
a numero ducta, sed potius partium no-  
mina illis indenda esse puto. Alam sub-  
brachialem is *Unterflügel* dixit, eiusque  
in laro pennas 10, in anserie erythropode  
mare 8. numeravit. Alam pollicarem  
*Asterflügel* appellat, et in laro quatuor  
pennis, vt in rapacibus auibus, compo-  
sitam vidit. Vide scriptorum societate.  
Berolin. naturae curios. volumen octa-  
uum.

Vbleti, aues. 66.

Ventriculus auium 37. rapacium 112. 117.

Vermes falconum, *Filandres* dicti, varii ge-  
neris. 110. 119. 120. 123. 202. Vermes in  
auibus rapacibus varios reperit et descripsit  
GOETZE, velut in intestinis ascarides te-  
retes, cucullanos et gordios simul in eodem  
intestini tractu habitantes p. 85. echino-  
rynches p. 154. planarias p. 173. tae-  
nias. p. 401. Renales vero vermes nul-  
los ab eo commemoratos reperio.

Vermiculi cultura. 83.

Vermis fericifici cultura. 83.

Versionum Aristotelis librorum historia in  
praefatione et passim in annotationibus  
traditur. Seculo etiam XII. in Apulia  
fuisse interpretes graecorum librorum  
latinos, intelligitur ex loco IOHANNIS  
Sarisberiensis in Metalogi I. p. 765.;  
quod, inquit, a graeco interprete et qui  
latinam linguam commode nouerat, dum  
in Apulia morarer, accepi.

Vertebrae colli 23. caudae 33.

Vhan, auis quae? 19.

Viperarum foetor vnde? 166.

Vncia, quadrupes, Gallice *P Once*. 2.

Vnguium forma et varietas. 32.

Vocabula falconariae arti propria germa-  
nica, gallica, italica. 126. 131.

Vocis mutatio in auibus. 40. instrumenta.  
211. 212. Vide Larynx.

Ff 2

Vola-



**V**olatus varius variarum avium. 61. 62. Volandi celeritas 118. vocabula, quibus volandi modi varii signantur. 131. Volandi artificium, varietas in avibus rapacibus explicatur. 132. seqq.

**V**olmarus, Volinarus, avis quae? 21.

**V**pupa. MICHAELI SCOTO de Phisic. cap. 20. pupa dicitur. Pullorum in parentes pietas unde? 59.

**V**reteres ardearum 37.

**V**rogalli anatomia et descriptio. 171. seqq.

**V**ropygii plumae inferiores, *bracalae* 55. glandulae duae. 25. 26.

**V**ulpanfer, anas tadorna est. 166.

**V**ulpis astutia. 85. 164.

**V**ulsa animalia. 101.

**V**ulturum odoratus et character 11. species variae 14. Vultures pro aquilis scriptoribus barbaris 52. species novae generisque totius notae 181. seqq.

Z.

**Z**ueta, Ziguetta, bubo. 89.

LIPSIÆ,

EX OFFICINA KLAUBARTHIA.

















